



VLADA ZENIČKO-DOBOJSKOG KANTONA

KATALOG MEDIJSKIH OBJAVA 2019.

Poštovani, pred vama je katalog saopćenja za javnost Vlade Zeničko-dobojskog kantona u 2019. godini. Novi sastav Vlade, na čelu s premijerom Mirzom Ganićem, Skupština Zeničko-dobojskog kantona je potvrdila 27. marta. Katalog sadrži saopćenja za javnost o aktivnostima nove Vlade i njenih ministarstava poredana hronološkim redom i ilustrirana fotografijama.

Press služba

1. PREMIJER GANIĆ POVODOM OTVARANJA PROSTORIJA POREZNE ISPOSTAVE VISOKO: POREZNI SISTEM MORA IMATI DOBRU INFRASTRUKTURU

VISOKO, 02.04.2019. - Prigodnom svečanošću otvorene su nove prostorije Porezne ispostave Visoko, koja posluje u sklopu Kantonalnog poreznog ureda Zenica. Prostorije površine 416 kvadratnih metara, odlukom Vlade Federacije BiH preuzete su od bivšeg Zavoda za platni promet i date na korištenje Poreznoj upravi Federacije BiH, koja je u adaptaciju uložila 216.280,97 KM.

*"Porezna ispostava Visoko je prva porezna ispostava koja je smještena u potpuno renoviranim prostorijama. Porezna uprava FBiH djeluje na 89 lokacija, od kojih većina ne odgovara našim potrebama. Ograničeni smo budžetom, ali se nadam da ćemo tokom godine izvršiti adaptaciju još nekoliko lokacija", kazao je **Šerif***



***Isović**, direktor Porezne uprave FBiH.*

Premijer Zeničko-dobojskog kantona **Mirza Ganić** istakao je kako je ovo važan dan za Visoko, jer se kroz unapređenje porezne infrastrukture poreznim službenicima omogućuje da kvalitetnije rade svoj posao i povećaju ubiranje poreza, a poreznim obveznicima da dobiju

kvalitetniju uslugu.

"Porezni sistem je stub države, a da bi taj stub dobro funkcionirao moramo imati dobru, razvijenu i uređenu infrastrukturu na osnovu koje možemo da provodimo taj porezni sistem. Raduje me što se radi o prostorijama Porezne ispostave Visoko koja je veoma važna jer ovoj ispostavi gravitira veliki broj obveznika, koji će sada imati kvalitetniju uslugu", kazao je premijer Ganić.

Opremanje prostorija Porezne ispostave Visoko podržala je i Općina Visoko koja je donirala kancelarijski namještaj u vrijednosti od 7.020,00 KM. /kraj/

2. PREMIJER GANIĆ PRIMIO PREDSJEDNIKA SUDA U VISOKOM: NAŠ CILJ JE NEZAVISNO I SNAŽNO PRAVOSUĐE

ZENICA, 04.04.2019. - Premijer Zeničko-dobojskog kantona **Mirza Ganić** razgovarao je danas u svom Uredu sa predsjednikom Općinskog suda u Visokom **Enesom Behlulovićem** o stanju u pravosuđu, s fokusom na uslove rada, opremljenost i ljudske resurse ovog suda koji pokriva općine Visoko, Vareš, Olovo i Breza.



Behlulović je čestitao premijeru Ganiću preuzimanje premijerske dužnosti, istakavši raniji doprinos Vlade ZDK jačanju ovog suda.

"Naš cilj je nezavisno i profesionalno pravosuđe u skladu sa međunarodnim standardima. Želimo dati doprinos uspostavi pravosudnog sistema sa jednakim standardima nezavisnosti, efikasnosti, profesionalnosti i odgovornosti. Opredijeljeni smo da nastavimo aktivnosti na rješavanju nedostajućeg prostora za rad sudova i tužilaštava, jačanju te kadrovskom i materijalnom opremanju institucija

pravosuđa u ZDK", kazao je premijer Ganić. /kraj/

3. OBILJEŽEN DAN OTPORA FAŠIZMU OPĆINE TEŠANJ: TREBA DA BUDEMO PONOSNI NA ARMIJU R BiH

TEŠANJ, 04.04.2019. - Nizom prigodnih sadržaja obilježen je "4. april - Dan otpora fašizmu općine Tešanj". Na taj je dan, 1992. godine, Općinsko vijeće Tešanj proglasilo vanredno stanje te preuzelo nadzor i upravljanje nad sistemom Teritorijalne odbrane, što je bio početak organiziranog otpora na području te općine.



Manifestaciju je uvećao član Predsjedništva BiH **Šefik Džaferović**, koji se obratio učesnicima okruglog stola o temi "Značaj Oružanih snaga u odbrani RBiH kao članice Ujedinjenih naroda".

"Mi treba da budemo ponosni na Armiju Republike BiH. Da nije bilo Armije RBiH danas ne bi bilo ni BiH. To je potpuno jasna stvar. Naša odbrambeno-oslobodilačka borba je bila časna. BiH i borcima BiH potrebna je samo istina i pravda. Ovo što danas možemo da vidimo od bh. pravosuđa, možemo ocijeniti kao uticaj retrogradnih snaga na pravosuđe da se stvari relativiziraju, da se krivica izjednači. To nikada neće moći proći. Pozivam sve članove bh. društva, sve ljude koji vole ovu zemlju, da se suprotstave nasrtajima da se zamijene teze, da se izjednače agresor i žrtva. Nismo bili svi isti", poručio je Džaferović.

Dodao je kako su na prostorima dokle je iole dopirala legalna vlast RBiH poštovana i šticeana prava svih građana.

"Očuvani su kulturni, historijski i vjerski objekti svih. Tamo gdje su bile vlasti koje su napadale BiH, svega toga nema. Gradovi su porušeni, naselja popaljena, stanovnici protjerani i poubijani u skladu sa nastojanjima i željama onih koji su napadali BiH. Nismo bili isti", naglasio je Džaferović, dodavši kako zbog toga Armija RBiH i legalna vlast nose ogroman moralni kapital iz rata i neće dozvoliti nikome da taj kapital oduzme.

Potom su brojne delegacije položile cvijeće i odale počast na spomen obilježju šehidima i poginulim borcima u Tešnju. U ime Vlade Zeničko-dobojskog kantona cvijeće su položili premijer **Mirza Ganić** i ministar za boračka pitanja **Fahrudin Čolaković**.



Upriličen je i sastanak u kabinetu načelnika Općine Tešanj **Suada Huskića**, kao i otvaranje postavke "Domovina u srcu" Rendžerskog puka Oružanih snaga BiH. /kraj/

4. MINISTAR JELIĆ RAZGOVARAO S ČELNICIMA UDRUŽENJA POSLODAVACA I OBRTNIKA

ZENICA, 05.04.2019. - Ministar privrede **Zlatko Jelić** razgovarao je sa čelnicima Saveza udruženja/udruga poslodavaca ZDK, Obrtničke komore ZDK, Privredne komore ZDK te Udruženja poslodavaca Zenica o programima poticaja razvoja privrede koje ovo ministarstvo planira implementirati u 2019. godini. Za ove namjene predviđeno je da se izdvoji 3,6 mil. KM, od čega 2,4 miliona za subvencije preduzećima, a 1,2 miliona za razvoj i izgradnju poslovnih zona.



Predstavnici navedenih udruženja predložili su da se pojedini programi poticaja prilagode stanju u privredi i tržištu rada, u pravcu jačanja podrške startupima, uslužnim djelatnostima i intelektualnim uslugama, posebno poslovima u IT industriji koja je danas u vrhu potražnje na globalnom tržištu. To bi doprinijelo zadržavanju mladih, ali i suzbijanju sive zone koja je jedan od problema društva.

"Želimo uključiti udruženja poslodavaca i obrtnika u osmišljavanje programa poticaja čiji glavni kriterij mora biti radno mjesto, jer samo zajedno možemo postići željene efekte poticaja. Ova udruženja su bila uključena i u izradu Zakona o poticanju razvoja male privrede, koji je posljednje dvije godine osnov za finansiranje i provođenje mjera razvoja male privrede u ZDK. Ove godine planirali smo povećanje budžeta za subvencije preduzećima za dodatnih 350.000 KM, a za poslovne zone još 200.000 KM, tako da ćemo nastojati uvažiti i uvrstiti zahtjeve u programe koji su u pripremi", kazao je ministar Jelić.

Također, zaključeno je kako je neophodno osmisлити programe promocije poduzetništva i jačanja poduzetničkog duha, posebno među mlađom populacijom kod koje se mora mijenjati način razmišljanja o pokretanju vlastitog biznisa. /kraj/

5. PREMIJER GANIĆ OZVANIČIO ZAVRŠETAK VANJSKE REKONSTRUKCIJE PŠ ŽUPČA: TRAJNO OPREDJELJENI ZA RAZVOJ ŠKOLSKE INFRASTRUKTURE

BREZA, 05.04.2019. - Premijer Zeničko-dobojskog kantona **Mirza Ganić** presjecanjem svečane vrpce ozvaničio je završetak vanjske rekonstrukcije zgrade Područne škole "Župča" u općini Breza. Zamjenu vanjske stolarije i postavljanje toplinske fasade finansiralo je Ministarstvo za obrazovanje, nauku, kulturu i sport ZDK sredstvima u iznosu od 166.0000 KM.



"Vlada ZDK je trajno opredijeljena za razvoj infrastrukture, pogotovo za izgradnju, opremanje i utopljavanje školskih objekata, izgradnju fiskulturnih sala i poligona te svega onoga što treba da omogući da naši učenici imaju sve uslove da bi mogli sutra da budu uspješni ljudi. Mi ćemo u narednom periodu pružiti podršku svim školama, a ovom prilikom pozivam lokalne vlasti, načelnike i vijećnike, da imamo puno bolju saradnju kako bismo ubrzali administrativne procedure za ovakve projekte", kazao je premijer Ganić.



Mersiha Šehić, direktorica OŠ "Safvet-beg Bašagić", u čijem sastavu djeluje PŠ "Župča", zahvalila se Vladi i resornom ministarstvu što su prepoznali potrebe ove škole koja je u ratu bila teško devastirana, s obzirom da se nalazi u blizini nekadašnje ratne linije. Ako se izuzme sanacija zgrade koja je rađena prije 20 godina, ovo je prva zamjena stolarije i rekonstrukcija fasade nakon izgradnje škole šezdesetih godina prošlog stoljeća.

"Vlada ZDK ovim potezom pokazuje koliko cijeni školstvo, a u jednoj zajednici cijeliti školstvo pravi je put uspjeha. Već postićemo uštede na energentima, a učenicima i nastavnicima omogućen je ugodniji boravak u školi", kazala je Šehić.



Premijer Ganić najavio je kako će Vlada podržati i unutrašnju rekonstrukciju zgrade i fiskulturne sale PŠ "Župča", kao i drugih područnih škola OŠ "Safvet-beg Bašagić".

Vlada Zeničko-dobojskog kantona u protekle četiri godine uložila je 22 miliona KM u povećanje energetske efikasnosti školskih objekata, najvećim dijelom iz budžeta ali i udruživanjem sredstava sa stranim donatorima. Izgrađeno je osam novih školskih objekata, izvršena zamjena krovova na 35 škole, zamjena stolarije na 22 zgrade, rekonstruirano 25 kotlovnica te sanirano 18 i izgrađeno devet novih fiskulturnih sala. /kraj/

6. PROMOCIJA MATURANATA MEDRESE "OSMAN EF. REDŽOVIĆ": OSTAVLJATE OPORUKU USPJEHA I DOBRA

VISOKO, 06.04.2019. - Medresa "Osman ef. Redžović" iz Velikog Čajna kod Visokog, u prisustvu predstavnika Islamske zajednice u BiH, Vlade ZDK, muftiluka, vakifa i rodbine, svečano je ispratila 24. generaciju maturanata. Ukupno 55 maturanata - 27 djevojaka i 28 mladića, završilo je četvorogodišnje školovanje u jedinoj školi u Zeničko-dobojskom kantonu u kojoj se obrazuju učenici u duhu islamskih propisa i osposobljavaju za nastavak školovanja i obrazovanja na teološkim i drugim fakultetima.



Premijer **Mirza Ganić** uputio je čestitke kolektivu Medrese, učenicima i njihovim roditeljima, uz želju da nakon završetka ovog ciklusa obrazovanja ostanu primjer kako se obrazuje i odgaja omladina odnosno naša budućnost.

"Siguran sam da ste svjesni svoje obaveze da drugima i onima koji će dolaziti poslije vas trebate ostaviti oporuku uspjeha i oporuku dobra, što je vjerovatno i najznačajnija zadaća koju stariji trebaju ostavljati mlađim naraštajima", poručio je premijer Ganić.

Istakao je posvećenost Vlade razvoju i napretku sektora obrazovanja u ZDK.

"Provodimo i realizujemo projekte za poboljšanje uslova u našim školama i drugim ustanovama. Sve to činimo u saradnji sa upravama tih ustanova i lokalnom zajednicom", kazao je premijer ZDK.

Direktor Medrese **Dženan Handžić** zahvalio se na podršci Rijasetu IZ-a, Vladi ZDK, školskom odboru i vakifima uz čiju pomoć je Medresa "Osman ef. Redžović" za dvije i po decenije postojanja izrasla u jednu od najrespektabilnijih odgojno-obrazovnih ustanova u BiH.



"U prethodnoj godini uloženo je mnogo u vanjsko uređenje kompleksa, sve učionice opremljene su pametnim tablama čime je Medresa postala prva smart škola u ZDK, otvoren je prvi planetarij a nabavili smo i teleskop. Uz tekuća sredstva, pomoć IZ, vakifa i prijatelja Medrese u razvoj smo uložili skoro pola miliona KM", kazao je Handžić. /kraj/

7. PREMIJER GANIĆ I MINISTAR ČOLAKOVIĆ SA ZLATNIM LJILJANIMA: VLADA KONTINUIRANO VODI BRIGU O BORAČKIM POPULACIJAMA

VAREŠ, 06.04.2019. - Premijer Zeničko-dobojskog kantona **Mirza Ganić** i ministar za boračka pitanja **Fahrudin Čolaković** prisustvovali su danas 22. tradicionalnom okupljanju dobitnika najvećih ratnih priznanja Federacije BiH koje je upriličeno u Varešu.

Premijer Ganić se s dubokim poštovanjem prisjetio svih patriota koji su 1992. godine ustali u odbranu kontinuiteta i teritorijalnog integriteta BiH, odajući posebnu počast herojima koji su zarad dostojanstva i očuvanja civilizacijskih vrijednosti u toj borbi dali svoje živote.



"Danas svi zajedno ponovo vodimo borbu za očuvanje cjelovitosti države BiH. Bez obzira na sve što se dešava u državi i regionu, uvjeren sam da ćemo i ovu bitku izboriti u korist svih onih koji BiH doživljavaju kao svoju državu i koji namjeravaju ostati i živjeti u domovini", kazao je premijer ZDK.

Istakao je kako Vlada kontinuirano vodi brigu o svim boračkim populacijama, počevši od ratnih vojnih invalida, porodica šehida i poginulih boraca do demobilisanih boraca, a izdvajanja su svake godine sve veća.

"Godinama izdvajamo sredstva za trajno stambeno zbrinjavanje kao i liječenje i nabavku ortopedskih i drugih pomagala i lijekova, obezbjeđujemo banjsko liječenje, stipendiramo djecu i članove porodica boračke populacije. Kontinuirano vodimo brigu i o izgradnji i održavanju spomen-obilježja. Putem resornog ministarstva nastojimo stalno biti u kontaktu s pripadnicima boračke populacije kako bismo mogli izaći u susret njihovim potrebama. Dakle, briga o boračkoj populaciji je kontinuirana", kazao je premijer Ganić.
(kraj)

8. PRIORITET POVEĆANJE BROJA STUDENATA I IZGRADNJA INFRASTRUKTURE UNZE

ZENICA, 08.04.2019. - Premijer Zeničko-dobojskog kantona **Mirza Ganić** održao je u svom Uredu sastanak sa rektorom Univerziteta u Zenici **Damirom Kukićem**, predsjednikom Senata **Ilhanom Bušatlićem** i ministrom za obrazovanje, nauku, kulturu i sport **Spahijom Kozlićem**. U fokusu razgovora bilo je stanje i aktuelni problemi na ovoj visokoškolskoj ustanovi, čiji je osnivač Zeničko-dobojski kanton.

"U svom ekspozeu sam naglasio podršku razvoju visokog obrazovanja na području ZDK i podršku Univerzitetu u Zenici kroz njegovu reakreditaciju i akreditaciju studijskih programa, te stimulisanje zapošljavanja najuspješnijih studenata na našem univerzitetu. Očekujem da ćemo imati korektnu saradnju,



jer nas čeka puno posla", kazao je premijer Ganić.

Istaknuto je kako je među najvažnijim prioritetima stvaranje uslova za povećanje broja upisanih studenata i izgradnja infrastrukture, između ostalog i kroz javno-privatno partnerstvo, a jedna od prvih zadaća je usaglašavanje kolektivnog ugovora sa sindikatom.

Čestitajući premijeru Ganiću imenovanje na premijersku dužnost, rektor Kukić i predsjednik Senata Bušatlić izrazili su zadovoljstvo što je za ministra obrazovanja u novoj Vladi ZDK imenovan njihov kolega sa UNZE, redovni profesor Spahija Kozlić.

"Prvi akt kojeg sam potpisao bilo je rješenje o reakreditaciji, koja, između ostalog, omogućuje Univerzitetu da aplicira na međunarodne projekte. Univerzitet će biti prioritet u mom radu, jer bi on trebao biti duh ovog kantona. Može se puno učiniti uštedama, a kroz druge projekte raditi na rekonstrukciji dotrajalih zgrada i prostora", kazao je Kozlić. (kraj)

9. VRATITI VAKUFE I STAVITI U FUNKCIJU POMOĆI NARODU

ZENICA, 09.04.2019. - Program ovogodišnje manifestacije "Dani vakufa u BiH" nastavljen je danas u Zenici održavanjem naučno-stručnog skupa "Socijalni aspekt vakufa", u organizaciji Vakufske direkcije Islamske zajednice u BiH i Islamskog pedagoškog fakulteta u Zenici. Cilj ovog skupa bio je skrenuti pažnju na ulogu vakufa, kao jedne od najvažnijih institucija u islamskom organizovanju i izgradnji društva u BiH.

Direktor Vakufske direkcije **Senad Zaimović** istakao je kako su zahvaljujući vakufu u prošlosti nastala brojna javna dobra, pa čak i gradovi u BiH, tako da su vakufi uvijek bili u službi čovjeka, ali i države. Vakufska direkcija je u proteklih 10 godina realizirala 67 socijalnih projekata u BiH, od izgradnje objekata, do pomoći djeci, javnim kuhinjama, zdravstvenim ustanovama...



"Vakufi nisu samo džamije, tekije i mektebi, vakufi su i Roditeljska kuća u Sarajevu, koju je Vakufska direkcija pomogla sa više od polovine sredstava, a planiramo se uključiti i u izgradnju roditeljske kuće u Tuzli. Kada potražujemo povrat imovine koja je oduzeta u proteklim političkim sistemima, naš cilj je da vakufsku imovinu stavimo u funkciju pomoći narodu", kazao je direktor Vakufske direkcije Senad Zaimović.

Dekan Islamskog pedagoškog fakulteta u Zenici **Halil ef. Mehtić** podsjetio je da je u vrijeme vladavine Osmanlija u BiH izgrađena čitava lepeza zadužbina i javnih dobara, koja su imala značajnu ulogu u radu Islamske zajednice sve do Drugog svjetskog rata.

"Stiče se dojam da socijalističke vlasti nisu oduzimale vakufsku imovinu zato što im je bila potrebna, nego s namjerom da materijalno oslabe Islamsku zajednicu", kazao je Mehtić.

Skupu su u ime Vlade Zeničko-dobojskog kantona prisustvovali premijer **Mirza Ganić** i ministar za obrazovanje, nauku, kulturu i sport **Spahija Kozlić**. Premijer Ganić obećao je podršku radu vakufa ali i vraćanju oduzete vakufske imovine u Zeničko-dobojskom kantonu.

"Kao premijer, a i kao čovjek, dosad sam se uvijek zalagao za zaštitu vakufa i radio u pravcu vraćanja određenih vakufa tamo gdje oni pripadaju. I u narednom periodu ćemo se posvetiti da oplemenimo sve ono što je ostalo kao trajno dobro, a naravno da dolazimo i do onih novih dobara koja treba da služe svima nama, jer je to i osnovna poruka vakufa", kazao je premijer ZDK.

Safet Bektović, profesor na Univerzitetu u Oslu, smatra da bi BiH trebala uspostaviti zakonski okvir kao u skandinavskim zemljama koje imaju jaku tradiciju zadužbina sa naglašenim vjerskim i socijalnim karakterom, a koje su imale ključnu ulogu u pravljenju "društva blagostanja".

"Mislim da bi pravno regulisanje zadužbina i fondacija djelovalo kao poticaj, gdje država na kroz poreske



olakšice učinila taj čitav sistem funkcionalnijim, a s druge strane zadužbine bi kroz međusobnu saradnju postigle balans između efikasnosti u smislu doprinosa društvu i socijalne pravde", kazao je Bektović.

Naučno-stručni skup treba ponuditi konkretna rješenja i unapređenja na planu rada Vakufske direkcije BiH, a predavanja i zaključci bit će sabrani u zbornik radova. /kraj/

10. USVOJEN PROGRAM UTROŠKA SREDSTVA MINISTARSTVA ZA BORAČKA PITANJA: STIPENDIJE ĆE DOBITI SVI STUDENTI KOJI SU APLICIRALI ZA BORAČKE STIPENDIJE

ZENICA, 10.04.2019. - Vlada Zeničko-dobojskog kantona, na svojoj prvoj sjednici, usvojila je Program utroška sredstava Ministarstva za boračka pitanja za 2019. godinu, u iznosu od 10.105.000,00 KM, čime je postignut kontinuitet u osiguravanju sredstava za liječenje, pomoć, zdravstvenu zaštitu, stambeno zbrinjavanje, zapošljavanje, kao i za ostale vrste pomoći branilačkoj populaciji.

"Ovo je najveći planirani iznos sredstava za branilačku populaciju od osnivanja ovog ministarstva. U odnosu na 2018. godinu sredstva su povećana za više od 600.000 KM, što je potvrda opredjeljenja ovog sastava



Vlade ZDK za realizaciju projekata koji imaju za cilj pomoć boračkoj populaciji, kao najzaslužnijoj kategoriji društva. Navedeno povećanje najviše će se odraziti na transferu za stipendiranje studenata, te na transferu za podsticaj zapošljavanja branilaca i članova njihovih porodica", kazao je ministar za boračka pitanja
Fahrudin Čolaković.

Usvajanjem Programa utroška sredstava, stekli su se potrebni preduslovi za realizaciju zacrtanih ciljeva Ministarstva za boračka pitanja, gdje se u narednom periodu očekuje raspisivanje javnog poziva za stambeno zbrinjavanje, javnog poziva za projekte zapošljavanja i samozapošljavanja, kao i drugih projekata koji imaju za cilj poboljšanje statusa ove populacije.

Kada je u pitanju stipendiranje studenata, ove godine će, po prvi put, biti prihvaćene sve aplikacije, koje su formalno ispravne, a koje su studenti iz reda boračke populacije dostavili na ranije raspisani konkurs Ministarstva za boračka pitanja.

*"Stipendije će dobiti svih 2.230 studenata koji su se prijavili na konkurs. To je potvrda opredjeljenja Vlade ZDK da pomogne mladim ljudima. Boračka zaštita ostaje naša trajna obaveza i to ne samo u smislu implementacije ostvarenih prava, nego i unapređenja sveukupnog statusa boračke populacije", kazao je premijer ZDK **Mirza Ganić**.*

Za stipendije je planirano 2,44 miliona KM, što je za 400.000 KM više nego prošle godine, a u odnosu na 2014. godinu, kada je dodijeljeno 1.332 stipendija, taj iznos je skoro udvostručen. Za zapošljavanje boračke populacije u 2019. predviđeno je 1,7 miliona, stambeno zbrinjavanje 1,3 miliona, nabavku udžbenika 350.000 KM, liječenje boračke populacije jedan milion, za slučaj vanredne okolnosti 800.000, banjsko liječenje 300.000, a za slučaj smrti 550.000 KM. /kraj/

11. MZ ZGOŠĆA DOBILA NOVU AMBULANTU I MJESNE PROSTORIJE: VLADA ZDK SUFINANSIRALA PROJEKT SA 100.000 KM

KAKANJ, 11.04.2019. - Svečano su otvorene prostorije Ambulante porodične medicine i Mjesne zajednice Zgošća u općini Kakanj, čija je izgradnja i opremanje koštalo 185.000 KM. Projekt su finansirali Vlada Zeničko-dobojskog kantona sa 100.000 KM, Ministarstvo za ljudska prava i izbjeglice BiH sa 35.000 KM, dok su ostatak sredstava obezbjedili Općina Kakanj i Dom zdravlja Kakanj.

"S obzirom da je ovo Vlada kontinuiteta, mi nastavljamo sa stabilizacijom, unapređenjem poslovnog ambijenta i razvojem. Naša vizija je da našim građanima stvorimo što kvalitetnije uslove za život. Stanovnici ove mjesne zajednice dobili su savremenu ambulantu, ali želim da budete što manje bolesni i da je što manje



*posjećujete. Mi ćemo u narednom periodu zaista posvetiti posebnu pažnju ovakvim projektima od kojih interes ima šira društvena zajednica, jer samo tako možemo da napravimo boljitak i razvoj ZDK-a", kazao je otvarajući prostorije premijer **Mirza Ganić**.*

Svečano otvorenje prostorija ambulate i MZ Zgošća upriličeno je u okviru obilježavanja 08. aprila - Dana oslobođenja Kaknja i 15. aprila - Dana općine Kakanj i Dana Armije RBiH, uz prisustvo članova Vlade Zeničko-dobojskog kantona – ministra zdravstva **Adnana Jupića**, ministra unutrašnjih poslova **Darija Pekića**, ministra poljoprivrede, šumarstva i vodoprivrede **Mirnesa Bašića** i ministra prostornog uređenja, prometa i komunikacija i zaštite okoliša **Arnela Isaka**, kao i predstavnika Vijeća ministara BiH, Općine Kakanj, Doma zdravlja i građana.

"Unapređenje stanja u zdravstvu nije nimalo lako s obzirom se i zdravstvo danas oslanja na ekonomiju, koja se susreće sa brojnim izazovima. Aparati su skupi, imamo posljedice rata koje utiču na zdravlje pacijenata, kao što utiče i industrija, a sve izraženiji je i problem nedostatka ljekara. Međutim, mi ne čekamo mirno

*nego smo se posvetili da uz pomoć viših nivoa vlasti i naših privrednika unaprijedimo zdravstvenu uslugu za naše građane", kazao je načelnik općine Kakanj **Aldin Šljivo**.*

Premijer Ganić se prije toga sastao u zgradi Općine Kakanj s načelnikom Šljivom, te prisustvovao primopredaji uređaja digitajzera u Centru radiološke dijagnostike Doma zdravlja Kakanj, čiju su kupovinu finansirali Tvornica cementa Kakanj, Dom zdravlja i Općina Kakanj. Savremeni uređaj praktično iz upotrebe izbacuje klasični film u radiološkoj dijagnostici i snimke pohranjuje na servere Doma zdravlja, koji su informatičkom mrežom uvezani sa Kantonalnom bolnicom Zenica.



"Vjerujem da će ovakvi projekti doprinijeti podizanju kvaliteta usluge i zadovoljstva pacijenata i zdravstvenih radnika u Kaknju, te da ćemo sve češće imati razloge za ovakva okupljanja u Zeničko-dobojskom kantonu", kazao je ministar zdravstva Jupić.

Premijer Ganić je u pratnji načelnika Šljive obišao i radove na uređenju korita rijeke Zgošće, koji se također sufinansiraju iz budžeta Zeničko dobojskog kantona. /kraj/

12. PREMIJER GANIĆ SA DELEGACIJOM SSS BIH: SOCIJALNI DIJALOG U ZDK ZA PRIMJER DRUGIM KANTONIMA

ZENICA, 11.04.2019. - Premijer Zeničko-dobojskog kantona **Mirza Ganić** primio je u svom uredu delegaciju Saveza samostalnih sindikata Bosne i Hercegovine koju su činili predsjednik **Selvedin Šatorović**, predsjednik KO SSS ZDK **Mirnes Isaković** te članovi Ekonomsko-socijalnog vijeća ispred sindikata u ZDK. Razgovarano je o perspektivama i modalitetima buduće saradnje u okviru socijalnog dijaloga.

"Kvalitetan socijalni dijalog je jedan od temelja stabilnosti društva. Opredijeljeni smo da nastavimo socijalni



dijalog te da odluke i mjere donosimo uz saglasnost i u interesu sva tri partnera", kazao je premijer Ganić.

Posjeta premijeru Ganiću bila je prva posjeta predsjednika Saveza samostalnih sindikata BiH jednom premijeru u Federaciji BiH koji je imenovan nakon oktobarskih Općih izbora.

"Želimo sačuvati kvalitet socijalnog dijaloga koji je primjer ne samo u FBiH, nego i regionu. Vjerujem da ćemo imati saradnju kao i sa prethodnom Vladom na čelu s premijerom Miralemom Galijaševićem, u čijem mandatu je obnovljen rad Ekonomsko-socijalnog vijeća u ZDK", kazao je Šatorović. /kraj/

13. PREMIJER ZDK SA PREDSTAVNICIMA TIMA ZA BORBU PROTIV KORUPCIJE: NULTA TOLERANCIJA PREMA KORUPCIJI I KRIMINALU

ZENICA, 12.04.2019. - Premijer Zeničko-dobojskog kantona **Mirza Ganić** primio je u svom uredu predstavnike vladinog Tima za borbu protiv korupcije - predsjednicu **Melihu Omerspahić** i člana **Nermina Kadribašića**, a sastanku je prisustvovao i ministar za pravosuđe i upravu Nebojša Nikolić.

Tim je tokom dvije godine postojanja proveo niz aktivnosti na prevenciji i izgradnji sistema prevencije korupcije, koji podrazumijeva izradu akcionih planova, operativnih planova i planova integriteta. Također, u fokusu je bila i uspostava koordinirajućeg sistema sa svim institucijama u provođenju ovih strateških dokumenata, a održan je i niz radionica i panel-diskusija s ciljem upoznavanja različitih društvenih grupa



sa osnovnim pojmovima i vrstama korupcije, društvenim uzrocima i posljedicama ove pojave.

"Zeničko-dobojski kanton treba efikasne institucije u kojima rade kompetentni ljudi, treba biti sigurno područje sa niskom stopom kriminaliteta, područje konkurentne privrede, kvalitetnog zdravstva i boljeg obrazovanja. Na putu ka tim ciljevima neophodno je svesti kriminal i korupciju na najnižu razinu. Zbog toga podržavam intenziviranje rada Tima Vlade ZDK za borbu protiv korupcije u skladu sa usvojenim strateškim dokumentima", kazao je premijer Ganić. /kraj/

14. ČESTITKA PREMIJERA ZDK POVODOM DANA ARMIJE REPUBLIKE BIH

ZENICA, 15.04.2019. - Svim pripadnicima jedinica Oružanih snaga BiH proisteklih iz Armije RBiH, porodicama šehida i poginulih boraca, ratnim vojnim invalidima, demobilisanim borcima i veteranima, u ime Vlade Zeničko-dobojskog kantona i u svoje lično ime, upućujem iskrene čestitke povodom 15. aprila, Dana Armije Republike Bosne i Hercegovine.



Armija Republike Bosne i Hercegovine službeno je osnovana na današnji dan 1992., od jedinica Teritorijalne obrane BiH i organizovanih dobrovoljaca, kao odgovor na srpsku agresiju na Republiku Bosnu i Hercegovinu. Pod zastavom Armije RBiH tokom agresije na BiH borili su se pripadnici svih bh. naroda.

Armija RBiH je priča o herojskom otporu najvećih sinova BiH, a posebno onima koji su u toj hrabroj borbi položili ono najvrjednije - vlastiti život. Herojsku priču o Armiji RBiH treba pričati svaki dan, a danas je naš zadatak, odgovornost i obaveza da ne zaboravljamo uspjehe i podvige koje su ostvarile njene proslavljene jedinice.

Stoga, briga o braniteljskoj populaciji ostaje trajno opredjeljenje Vlade Zeničko-dobojskog kantona, ne samo u smislu provedbe ostvarenih prava, nego i unapređenja sveukupnog statusa. /kraj/

15. PREMIJER GANIĆ NA SVEČANOJ AKADEMIJI U VISOKOM: SAČUVATI DOSTOJANSTVO I TEKOVINE OSLOBODILAČKE BORBE ARBIH

VISOKO, 15.04.2019. - Centralna svečanost povodom obilježavanja 27. godišnjice od formiranja Armije Republike Bosne i Hercegovine za Zeničko-dobojski kanton održana je u Visokom.

Odata je počast i položeno cvijeće na Spomen kosturnici palim borcima NOR-a, Centralnom spomen obilježju šehidima i poginulim borcima te spomen obilježju na Trgu žrtava genocida u Srebrenici, a upriličen je defile učesnika ulicama Visokog na čelu sa mladima koji su nosili ratne zastave jedinica Armije



Republike Bosne i Hercegovine.

Svečana akademija održana je u Kulturnom centru "Altindag" uz bogat kulturno-umjetnički program, a pod pokroviteljstvom Vlade Zeničko-dobojskog kantona. U ime Vlade, svečanoj akademiji prisustvovali su premijer **Mirza Ganić**, ministar za boračka pitanja **Fahrudin Čolaković**, te ministrica za rad, socijalnu politiku i izbjeglice **Azra Šabanović**.

Uz čestitke svim patriotama BiH, posebno porodicama šehida i poginulih boraca, ratnim vojnim invalidima i dobitnicima najvećih ratnih priznanja, premijer Ganić se založio za očuvanje dostojanstva i tekovina borbe Armije RBiH i MUP-a protiv nesrazmjerno jače sile agresora, u uslovima međunarodnog embarga i humanitarne krize.

"Historija ratova ne pamti primjer da je bilo koja država bila prinuđena da se brani u tako složenim uslovima. Borci Armije RBiH su bili obični ljudi, skromni, hrabri, dostojanstveni, moralni, privrženi vrijednostima dobra a suprotstavljeni zlu svake vrste, bez obzira otkuda i od koga ona dolazila. Upravo zato se ponosimo našom Armijom i ponašanjem njenih pripadnika", kazao je Ganić.



Dostojanstvo ćemo, ističe, sačuvati ako budemo ispunjavali moralne i sve druge obaveze prema boračkoj populaciji, porodicama šehida, poginulih boraca, ratnim vojnim invalidima i civilnim žrtvama rata, te kada izgradimo državu i društvo u kojem će svaki poštteni građanin ove zemlje vidjeti jasnu i optimističnu budućnost za sebe i svoju zemlju.

"Nažalost, situacija u BiH je vrlo složena. Blokada nužnih reformi nosi veliku štetu svim građanima i narodima, ponavljaju se prijetnje teritorijalnom integritetu, ustavnom poretku i miru na ovim prostorima. Svi koji to čine moraju znati da ćemo našu domovinu BiH, ako zatreba, braniti svim sredstvima i po svaku cijenu. Branit ćemo je prije svega mudrošću i dobronamjernošću. Budimo optimisti, okrenimo se budućnosti, racionalno i ljudski protumačimo interese naroda i građana ove zemlje i krenimo u pravom smjeru", poručio je premijer ZDK. /kraj/

16. PREMIJER ZDK PRIMIO ZAMJENIKA ŠEFA MISIJE OSCE-A: PRIORITETI STABILNOST, POSLOVNI AMBIJENT I RAZVOJ

ZENICA, 16.04.2019. - Premijer Zeničko-dobojskog kantona **Mirza Ganić** primio je u svom uredu zamjenika šefa Misije OSCE-a u Bosni i Hercegovini, **Aleksandra Čupljugina** (Alexander Chuplygin). U fokusu razgovora bili su ciljevi i prioriteti nove koalicijske Vlade ZDK.

"Naši prioriteti su finansijska stabilnost, poslovni ambijent, razvoj, podrška mladima i borba protiv korupcije. Fokusirat ćemo se na unapređenje saradnje sa općinama, povećanje efikasnosti javne uprave kroz poboljšanje poslovnih procesa i transparentnost, kao i niz aktivnosti s ciljem smanjenja zagađenja okoliša",



kazao je premijer Ganić.

Naglasio je kako je trenutno najveći prioritet održati likvidnost Budžeta koja je narušena zbog tužbi po osnovu kolektivnih ugovora iz perioda 2004.-2015. godina, a koje samo po osnovu glavnice u ovom trenutku iznose 155 miliona KM. Vlada namjerava pripremiti akcioni plan za izvršenje presuda domaćih sudova i odluka Evropskog suda za ljudska prava u Strazburu, kojim bi se definisao način i rokovi otplate, a da se ne ugrozi finansijska stabilnost ZDK-a.

Zamjenik šefa Misije OSCE-a u BiH čestitao je premijeru Ganiću imenovanje na premijersku dužnost, istakavši da OSCE ima dobre odnose sa lokalnim vlastima u ZDK te da se nada da će se saradnja sa Vladom ZDK dodatno unaprijediti. /kraj/

17. PREMIJER GANIĆ PRIMIO UO GRUPACIJE POSLODAVACA ZDK: ZAJEDNIČKI CILJ POVEĆANJE KONKURENTNOSTI PRIVREDE

ZENICA, 17.04.2019. - Premijer Zeničko-dobojskog kantona **Mirza Ganić** održao je radno-konsultativni sastanak sa članovima Upravnog odbora Grupacije poslodavaca Zeničko-dobojskog kantona, na kojem je razgovarano o poboljšanju poslovnog ambijenta u ovom kantonu.

Premijer Ganić je podsjetio da je ZDK lider u izvozu i industrijskoj proizvodnji u FBiH, što je dijelom i rezultat mjera i aktivnosti Vlade ZDK, ali je za dodatni iskorak neophodno poboljšati ambijent za ulaganje i zapošljavanje.



"Posvetit ćemo se ukidanju administrativnih barijera i parafiskalnih nameta, skraćivanju procedura za pokretanje biznisa, generalno jačati podršku malim i srednjim preduzećima, pomoći razvoj i izgradnju poslovnih zona, jačati javno-privatno partnerstvo, a pokušat ćemo da maksimalno iskoristimo prirodne potencijale i resurse kroz dodjelu koncesija", kazao je premijer ZDK.

Predstavnici UO Grupacije poslodavaca, koja djeluje pri Udruženju poslodavaca FBiH, prezentirali su dokument "Šta poslodavci očekuju od zakonodavne i izvršne vlasti u ZDK" u kojem su sadržani zahtjevi za rasterećenje privrede, kao što je smanjenje ukupnih nameta, uvođenje poreskih olakšica, pojednostavljenje procedura za dobijanje saglasnosti i dozvola za gradnju, poboljšanje postupka javnih nabavki, učešće poslodavaca u izradi i donošenju zakona, izmjene načina plaćanja PDV-a...

"Većina zahtjeva poslodavaca je sadržana i u smjernicama rada Vlade Zeničko-dobojskog kantona tako da je unapređenje poslovnog ambijenta, uz finansijsku stabilnost i razvoj, naš prioritet. Povećanje konkurentnosti cjelokupne privrede ZDK je zajednički cilj Vlade i poslodavaca", kazao je premijer Ganić.
/kraj/

18. MINISTRICA ŠABANOVIĆ URUČILA KLJUČEVE STANA PORODICI ZUMRETE KARIĆ



ZENICA, 17.04.2019. - **Azra Šabanović**, ministrica za rad, socijalnu politiku i izbjeglice Zeničko-dobojskog kantona uručila je danas **Zumreti Karić**, raseljenoj osobi sa privremenim smještajem u Zenici, ključeve stana u zgradi u zeničkom naselju Radakovo, čime je stambeno zbrinuta još jedna raseljena osoba u ZDK-u.

Zgrada u Radakovu, jedna od dvije takve u Zenici, namijenjena je za smještaj starih i iznemoglih osoba koje se u bliskoj budućnosti ne mogu vratiti na svoja prijeratna prebivališta. Ima 35 stambenih jedinica u kojima trenutno živi 50 raseljenih osoba. /kraj/

19. ZAVRŠENI RADOVI NA VIŠOČKOJ GIMNAZIJI: UŠTEDE NA ENERGIJAMA I BOLJI USLOVI ZA IZVOĐENJE NASTAVE

VISOKO, 18.04.2019. - Prigodnom svečanošću ozvaničen je završetak radova na zgradi Gimnazije Visoko koja je u okviru projekta energetske efikasnosti, vrijednog 160.000 KM, dobila novu toplinsku fasadu, a izvršena je sanacija stropa, krova te mokrih čvorova. Radovi su započeti u decembru prošle godine.



*"Projekt energetske efikasnosti predviđa uštede na energijama od 35-40 posto, tako da smo u protekla dva mjeseca otkako je postavljena fasada već uvidjeli benefite preduzetih mjera. Zahvaljujemo se Svjetskoj banci i Vladi Federacije BiH, a posebno Vladi Zeničko-dobojskog kantona i kantonalnom Ministarstvu za obrazovanje, nauku, kulturu i sport koji su omogućili realizaciju ovog projekta", kazao je direktor **Samir Purišević**.*

Svečanu vrpcu, zajedno s direktorom škole, presjekli su premijer ZDK **Mirza Ganić** i resorni ministar **Spahija Kozlić**, u prisustvu ministara unutrašnjih poslova **Darija Pekića** te prostornog uređenja, prometa i komunikacije i zaštite okoliša **Arneta Isaka**.

Premijer Ganić je obećao da će se dodatno angažirati kako bi se obezbijedila sredstva za izgradnju fiskulturne sale, koju ova škola čeka više od dvije decenije.

"To moramo raditi u saradnji sa lokalnom zajednicom i mislim da ne bi trebalo biti problema. U ovom mandatu ćemo nastojati da stavimo tačku na materijalno i tehničko opremanje višočke Gimnazije koja proizvodi jedne od najkvalitetnijih kadrova u državi", kazao je premijer ZDK.



Ministar Kozlić je pohvalio zalaganje i konkretne aktivnosti prethodne Vlade za obezbjeđenje dva glavna uslova za odvijanje nastave - prostorne i kadrovske kapacitete, a rezultat je zaokružen sistem edukacije od predškolskog do visokog obrazovanja i nauke, što je ZDK postigao posljednjih godina.

"Maturante koji ove godine završavaju Gimnaziju Visoko pozivam da upišu da jedan od studijskih programa na Univerzitetu u Zenici, a mi ćemo iznaći načina da svi oni dobiju stipendiju Vlade ZDK po jednom od dva osnova", kazao je ministar Kozlić. /kraj/

20. PREMIJER ZDK U POSJETI IM SEMIĆ: VLADA ŽELI OMOGUĆITI SNAŽNIJI RAST PRIVREDE

VISOKO, 18.04.2019. - Delegacija Vlade Zeničko-dobojskog kantona na čelu sa premijerom **Mirzom Ganićem** i ministrom **Spahijom Kozlićem** posjetila je danas Industriju mesa "Semić" Visoko, koja je jedan od regionalnih lidera u proizvodnji i preradi mesa. Premijer Ganić je u razgovoru sa vlasnikom kompanije **Esadom Semićem** istakao opredjeljenje Vlade da nastavi raditi na unapređenju poslovnog ambijenta, kako bi se dodatno podstakao privredni razvoj na području ZDK-a.

"Privrednici zaslužuju našu pažnju jer samo zajedno možemo popraviti ekonomsku sliku države. Želimo zadržati leadersku poziciju u izvozu, podstaći zapošljavanje i kontinuiran rast industrijske proizvodnje, a za



iskorak nam je potreban još bolji ambijent. Ponosni smo što na području našeg kantona postoje kompanije kao što je IM "Semić", koja pokazuje da je uspjeh moguć uz rad i veliko zalaganje", kazao je premijer Ganić.

Industrija mesa "Semić" zapošljava oko 200 radnika, a zahvaljujući investiciji u proizvodne pogone oko 15 miliona KM, koja je realizirana posljednjih nekoliko godina, ispunjavaju najstrožije zahtjeve Evropske unije. Paletu od oko 70 proizvoda plasiraju kroz vlastiti prodajni lanac te domaće trgovačke lance.

"Vlada ZDK danas je još jednom pokazala opredjeljenje, brigu i interes za razvoj privrede i privrednih subjekata, ali i opredjeljenje za poboljšanje kvaliteta i uslova obrazovanja i obrazovnog sistema na području ZDK. IM 'Semić' želi im mnogo uspjeha u daljem radu, a u korist svih građana ZDK i privrednih subjekata koji su kičma razvoja našeg kantona", kazao je Semić.

Ovom prilikom aktueliziran je problem sporosti izgradnje saobraćajnice kroz industrijsku zonu Ozrakovići. Privrednici traže da se radovi ubrzaju, jer zbog otežane komunikacije trpe veliku štetu. /kraj/

21. VLADA ZDK I CCI: SUPROTSTAVITI SE SVIM OBLICIMA KORUPCIJE, POSEBNO U ZDRAVSTVU

ZENICA, 19.04.2019. - Premijer Zeničko-dobojskog kantona **Mirza Ganić** održao je sastanak sa predstavnicima nevladine organizacije Centri civilnih inicijativa, a razgovarano je o planovima CCI-a i Vlade na prevenciji i suzbijanju korupcije u ZDK-u, sa fokusom na korupciju u zdravstvu. Sastanku su prisustvovali ministar zdravstva **Adnan Jupić** i direktor Kantonalne bolnice Zenica **Rasim Skomorac**.



Centri civilnih inicijativa u narednom periodu, zajedno sa partnerskom organizacijom Transparency International BiH, planiraju intenzivirati aktivnosti na unapređenju sistema prevencije od korupcije u okviru zdravstvenih ustanova u cijeloj BiH, pa tako i u ZDK, kroz mapiranje rizika od korupcije te zagovaranje unapređenja sistema u oblastima koje su posebno podložne korupciji, kao što su sukob interesa, javne nabavke, finansijsko upravljanje te upravljanje ljudskim resursima. Pored toga, planirano je kreiranje modela transparentnih elektronskih listi čekanja za određene bolničke preglede i operacije.

Premijer Ganić ponovio je opredjeljenje Vlade ZDK da konkretnim mjerama radi na prevenciji i suzbijanju korupcije u svim sektorima, a posebno u zdravstvu, jer je to jedan od preduslova da svaki građanin, bez obzira na socijalni status, ima isti tretman u zdravstvenim ustanovama i isti nivo zdravstvene usluge.

"Želimo se beskompromisno uhvatiti u koštac s korupcijom. Stalno ćemo unapređivati plan borbe protiv korupcije te insistirati na njegovom provođenju. Očekujem podršku svih institucija, ali i građana kako bismo svi bili dio tima i tako jedinstveni stali u kraj onima koji uzimaju ono što im ne pripada i tako zajedno mijenjati vrijednosti sistema koji je teško narušen", kazao je premijer ZDK. /kraj/

22. URUČENA RJEŠENJA O DODJELI BORAČKIH STIPENDIJA STUDENTIMA IZ ZAVIDOVIĆA I MAGLAJA

MAGLAJ-ZAVIDOVIĆI, 19.04.2019. - Ministar za boračka pitanja ZDK **Fahrudin Čolaković** uručio je danas rješenja o dodjeli boračkih stipendija za 269 studenata sa područja općine Zavidovići i 152 studenta iz općine Maglaj.



Iz budžeta Ministarstva za boračka pitanja ZDK ove godine je za stipendije izdvojeno 2,44 miliona KM, što je za 400.000 KM više nego prošle godine, a dvostruko više nego prije četiri godine.

"Stipendije će dobiti 2.230 studenata, dakle svi studenti koji su se ove godine prijavili na konkurs, a čije su aplikacije bile formalno-pravno ispravne. Iznos stipendije je 800 KM za prvu godinu, a 1.200 KM za ostale godine studija", kazao je Čolaković.

Premijer ZDK **Mirza Ganić** pozvao je studente da ulože maksimalan trud kako bi postizali dobre rezultate, navodeći da je i on lično primjer da neko iz radničke porodice, uz državnu stipendiju ali ogromno



zalaganje i rad, može uspjeti i napredovati čak do premijerske pozicije.

"Želimo da pomognemo mladima da se školuju i ostanu u Bosni i Hercegovini. U narednim godinama težit ćemo ka tome da dodatno povećamo izdvajanja za stipendije, kroz naša dva programa, tako da svako ko želi studirati dobije stipendiju", kazao je Ganić.

Rješenja o dodjeli stipendija narednih

dana bit će uručena i stipendistima iz ostalih općina u ZDK, nakon čega slijedi isplata prve rate stipendija.

/kraj/

23. POTPISAN MEMORANDUM O RAZUMIJEVANJU: OBRAZOVNI SISTEM U ZDK POSTAJE DIO PROJEKTA ŠKOLE ZA 21. VIJEK

ZENICA, 22.04.2019. - Ministar za obrazovanje, nauku, kulturu i sport Zeničko-dobojskog kantona **Spahija Kozlić** i direktorica British Councila u Bosni i Hercegovini **Larisa Halilović** potpisali su memorandum o razumijevanju u vezi sa učešćem ZDK-a u trogodišnjem programu "Škole za 21. vijek", kojeg ova britanska međunarodna organizacija implementira na području Zapadnog Balkana.



"Aktivnosti koje program podrazumijeva fokusirane su na razvoj vještina kritičkog razmišljanja, rješavanja problema i programiranja uređaja uz pomoć džepnog računara pod imenom micro:bit, koje su neophodne za nastavak školovanja i uspješnu karijeru", kazala je Halilović.

U Zeničko-dobojskom kantonu programom će biti obuhvaćene 54 osnovne škole i oko 300 nastavnika, a svaka škola će dobiti određeni broj micro:bit uređaja.

"Mislim da mladi ljudi, djeca posebno, troše veliku energiju i vrijeme u okviru digitalnog okruženja, a da malo toga nauče. Mislim da ćemo kroz ovaj projekt to promijeniti i zbog toga hvala British Councilu što je ZDK prepoznao kao partnera koji može implementirati ovakav projekt", kazao je ministar Kozlić.

Program "Škole za 21. vijek" finansira Vlada Ujedinjenog Kraljevstva sa 10 miliona funti, a provodi se u isto vrijeme u šest zemalja - u BiH, Srbiji, Crnoj Gori, Makedoniji, Albaniji i Kosovu. Prije Zeničko-dobojskog kantona, implementacija programa započeta je u Kantonu Sarajevo, Kantonu 10 i Zapadno-hercegovačkom kantonu, a u toku su pregovori o implementaciji na području entiteta Republika Srpska. /kraj/

24. PODRŠKA SAJMU PRIVREDE U TEŠNJU, TRAŽITI RJEŠENJE ZA PROBLEM ZASTOJA SAOBRAĆAJA U VRANDUKU

ZENICA, 22.04.2019. - Premijer Zeničko-dobojskog kantona **Mirza Ganić** primio je u svom uredu **Senada Brku** i **Izudina Ahmetlića**, predsjednika i člana Upravnog odbora Udruženja privrednika "Biznis centar" Jelah-Tešanj. U fokusu sastanka bio je 15. Međunarodni sajam privrede "Tešanj 2019", koji će se održati narednog mjeseca na lokalitetu Kraševo DC – Carina.

Tema ovogodišnjeg sajma je regionalna saradnja, a zemlja partner Republika Sjeverna Makedonija. Vlada Zeničko-dobojskog kantona od samog početka pruža konkretnu podršku tešanjskom sajmu kao mjestu poslovnih susreta i godišnjoj smotri postignuća privrede Tešnja, koja značajno doprinosi leaderskoj poziciji ZDK-a na izveznoj ljestvici Federacije BiH.



"Opredjeljenje ove Vlade je stabilnost, razvoj, a posebno unapređenje poslovnog ambijenta i uklanjanje barijera, kako bi privreda dobila dodatni zamah. Privrednici moraju biti tretirani kao osobe od najvišeg javnog interesa, jer oni otvaraju nova radna mjesta i svojim znanjem i radom stvaraju dodatnu vrijednost te pružaju šansu mnogima da izdržavaju svoje porodice, a svi zajedno svojim radom omogućavaju punjenje budžeta. Zbog toga svaka privredna aktivnost, a to je i sajam, ima našu podršku", kazao je premijer Ganić.

Predstavnici UP "Biznis centar" Jelah-Tešanj ovom prilikom su ukazali i na problem otežanog saobraćaja magistralnom cestom M17 zbog rekonstrukcije tunela Vranduk. Dogovoreno je da se reaguje prema Federalnoj direkciji za ceste radi održavanja zajedničkog sastanka na kojem bi se definisale mjere kako bi se gužve na najprometnijoj saobraćajnici u državi smanjile, jer posljedice zastoja trpe kako građani, tako i privreda cijele BiH. /kraj/

25. UPRIILIČEN PRIJEM ZA ČLANOVE ARBITRAŽNOG TIMA PRAVNOG FAKULTETA U ZENICI

ZENICA, 22.04.2019. - Premijer Zeničko-dobojskog kantona **Mirza Ganić** i ministar za obrazovanje, nauku, kulturu i sport **Spahija Kozlić** upriličili su prijem za članove arbitražnog tima Pravnog fakulteta Univerziteta u Zenici koji je s Univerzitetom "Lomonosov" iz Rusije podijelio treće mjesto na svjetskom "Vis Moot" takmičenju iz međunarodne trgovačke arbitraže, koje je u petak završeno u Beču. Prijemu su prisustvovali članovi tima studenti **Amina Hasanović, Ajna Mahmić, Emir Živčić i Ibrahim Palalija**, mentori prof.dr. **Zlatan Meškić**, doc. dr. **Ivana Grubešić** i mr. sc. **Arnel Maglić** te dekan Pravnog fakulteta **Enes Bikić**.



Nakon što su se prošle godine plasirali među 16 najboljih ekipa u svijetu, tim zeničkog Pravnog fakulteta ove godine je ostvario najbolji rezultat do sada u konkurenciji 378 timova iz cijelog svijeta.

"Vi ste potvrdili da se rad, trud i zalaganje isplate, a imate i rezultat koji je veoma važan za vašu profesionalnu karijeru. Kao vlada zagovaramo da najbolji studenti ostanu vezani za fakultet, tako da ćemo tražiti načina kako da zadržimo najbolje studente na Univerzitetu u Zenici, jer to treba da bude rasadnik dobrog kadra", kazao je premijer Ganić.

Ministar Kozlić je kazao kako je sretan kao ministar, a posebno kao profesor Pravnog fakulteta u Zenici, obećavši nesebičnu podršku ministarstva na čijem je čelu kako bi nastavili nizati dobre rezultate.

"Za mene osobno, ovo je potvrda sistemskog rada, jer fakultet dvije godine zaredom uspijeva da bude u samom svjetskom vrhu. Ove godine smo bili najbolji tim iz Evrope. Pokazali smo da u Zenici možemo da od studenata napravimo svjetski nivo", kazao je profesor Meškić.

Studenti su istakli kako je njihov uspjeh poruka mladima da trebaju ostati i graditi budućnost u Bosni i Hercegovini.



"Drago mi je da smo pokazali da ono što je vani ne mora odmah da znači da je bolje i kvalitetnije, ali isto tako je dobro da smo pokazali da ne možete bez rada i bez truda, već da jednostavno morate proći taj proces učenja i istraživanja", kazala je Amina Hasanović.

Prijemu su prisustvovali i članovi UO Udruženja privrednika Biznis centar Jelah-Tešanj, **Senad Brka** i **Izudin Ahmetlić**, koji su uputili poziv studentima da posjete sajam u Tešnju, kako bi zajedno učesnicima i posjetiocima sajma poslali poruku da se u postojećem obrazovnom sistemu može steći zavidno znanje, jednako kako tešanjaska privreda ostvaruje natprosječan uspjeh u složenom poslovnom okruženju.

Ovom prilikom najavljeno je da će studenti dobiti prigodnu novčanu nagradu od Ministarstva za obrazovanje, nauku, kulturu i sport ZDK, a pored toga članove tima će lično nagraditi i privrednik Izudin Ahmetlić. /kraj/

26. ZDK I DVV INTERNATIONAL NASTAVLJAJU SARADNJU U OBLASTI OBRAZOVANJA ODRASLIH

ZENICA, 23.04.2019. - Ministar za obrazovanje, nauku, kulturu i sport ZDK **Spahija Kozlić** i direktor Instituta za međunarodnu saradnju Njemačkog saveza visokih narodnih škola – DVV International Ured za Bosnu i Hercegovinu **Emir Avdagić** potpisali su sporazum o saradnji koji omogućuje nastavak zajedničkog djelovanja na unapređenju obrazovanja odraslih na području ZDK-a.

Skupština Zeničko-dobojskog kantona je 2014. godine usvojila Zakon o obrazovanju odraslih, koji je prošle godine dobio određene izmjene, a koji se kroz primjenu pokazao kao dobar zakonski okvir za ovu oblast.



"Prije nekoliko dana sam razgovarao sa poslodavcima koji su mi rekli da taj Zakon o obrazovanju odraslih treba maksimalno koristiti kako bi se putem te vrste edukacije pospiješilo zapošljavanje, odnosno pismenost i edukacija samih ljudi. U okviru ovog projekta zaposlenici ministarstva će biti educirani o korištenju posebnog softvera u vezi sa obrazovanjem odraslih

i onda će edukaciju proći dvije grupe od 48 polaznika, a ideja je da jedna grupa bude grupa asistencijata sa Univerziteta u Zenici jer smatramo da te andragoške vještine trebaju steći oni koji rade sa odraslima, a to su i naši studenti", kazao je ministar Kozlić.

DVV International Ured za Bosnu i Hercegovinu već duži niz godina pruža različite vidove podrške u oblasti obrazovanja odraslih širom BiH. Prema novim pravilima Centrale DVV-a u Bonu, u projektnom periodu 2019. – 2021. godina radit će se samo sa onim administrativnim jedinicama u Bosni i Hercegovini koje su u ranijem periodu pokazale najveći napredak i organizacijski najkvalitetnije realizirale dogovorene aktivnosti, a ZDK je u tom kontekstu prepoznat kao jedan od najpoželjnijih partnera.

Prema Avdagićevim riječima, u ZDK po zadnjim pokazateljima popisa stanovništva ima veliki broj elementarno nepismenih, preko 7.000, te više od 33 hiljade onih koji nisu završili osnovno obrazovanje. Ipak, obrazovanje odraslih ne obuhvata samo one koji su elementarno nepismeni i koji nisu završili osnovnu školu, nego je to mehanizam za lični razvoj i razvoj društva u sredini.

"Ove godine mi na području ZDK podržavamo jačanje struktura za implementaciju Zakona o obrazovanju odraslih te jačanje kapaciteta unutar resornog ministarstva kako bi se taj proces mogao pratiti i provoditi u praksi", kazao je Avdagić. /kraj/

27. PREMIJER GANIĆ SA STRUČNJACIMA ZA JPP IZ HRVATSKE: ZDK ŽELI ISKORISTITI POTENCIJALE JAVNO-PRIVATNOG PARTNERSTVA

ZENICA, 23.04.2019. - Stručnjaci za javno-privatno partnerstvo Agencije za investicije i konkurentnost pri Ministarstvu poduzetništva Republike Hrvatske, **Domagoj Dodik** i **Slavko Čolak**, doputovali su u Zenicu u okviru stručne misije TAIX-a (Instrument tehničke pomoći i razmjene informacija Evropske komisije) o procjeni pravnog okvira za javno-privatno partnerstvo za implementaciju investicija u javnom sektoru.

Stručnu misiju organizuje Ministarstvo za privredu Zeničko-dobojskog kantona u saradnji sa Federalnim ministarstvom prostornog uređenja i Evropskom komisijom. Ovo je prvo učešće Zeničko-dobojskog kantona u jednom TAIX projektu.

Prvog dana posjete, goste iz Hrvatske primio je premijer **Mirza Ganić**, a susretu je prisustvovao i ministar privrede **Zlatko Jelić**. Ganić je ponovio opredjeljenje Vlade da se primjenom modela javno-privatnog partnerstva unaprijedi javna usluga i podstakne ekonomski razvoj ZDK-a.



"ZDK je donio pravni okvir i pripremio katalog sa 54 projekta za razdoblje 2018. - 2020. godina, procijenjene vrijednosti oko 350 miliona KM. Želimo iskoristiti potencijale javno-privatnog partnerstva koji se pokazao kao uspješan model razvoja", kazao je Ganić, podsjetivši da je nedavno potpisan prvi JPP ugovor u ZDK vezan za realizaciju projekta Interventne kardiologije u Kantonalnoj bolnici Zenica vrijedan 7,5 miliona KM.

Cilj stručne misije je podizanja svijesti o značaju javnih investicija, izazovima javnog sektora u slabim finansijskim okruženjima u kojima dominiraju budžetska ograničenja i fiskalne obaveze, jačanje administrativnih kapaciteta u implementaciji modela JPP-a, predstavljanje EU prakse i stvaranje mogućnosti za njeno prenošenje u institucionalni i zakonodavni okvir JPP-a Zeničko-dobojskog kantona.

U naredna četiri dana stručnjaci iz Hrvatske, između ostalog, održat će sastanke sa predstavnicima ministarstava finansija, zdravstva i prostornog uređenja u Vladi ZDK, a za četvrtak je planiran okrugli sto za predstavnike zakonodavne i izvršne vlasti te javnog sektora sa područja ovog kantona. /kraj/

28. USPOSTAVLJEN SISTEMSKI OKVIR, VLADA ZDK PRIPREMA KONKRETNE MJERE PROTIV KORUPCIJE

ZENICA, 23.04.2019. - Tim Vlade Zeničko-dobojskog kantona za borbu protiv korupcije u protekle dvije godine aktivno je radio na uspostavi efikasnog sistema prevencije korupcije u javnom sektoru ZDK-a.

"U svim javnim institucijama su imenovani koordinatori, sačinjeni su operativni planovi i planovi integriteta te se prati njihovo provođenje, a uspostavljena je i dobra saradnja sa međunarodnim organizacijama i institucijama. Uspostava sistema je započeta od nule, tako da smo u protekle dvije godine predano radili", kazala je predsjednica ovog tijela **Meliha Omerspahić**, tokom prezentacije dosadašnjih rezultata rada i planova za članove Vlade, Skupštine i drugih institucija ZDK-a.



Premijer **Mirza Ganić** istakao je da je borba i prevencija korupcije jedan od strateških ciljeva ove vlade, te da će zajedno sa Timom i drugim tijelima tražiti konkretna rješenja i mjere za suzbijanje korupcije.

"Ono što nama treba u institucijama jesu elektronski sistemi, od protokola do sistema za rad i praćenje sistema poticaja, kako bismo mogli pratiti procedure i prevenirati korupciju. S ovog mjesta želim poručiti da se za borbu

protiv korupcije ne zalažemo samo deklarativno, nego ćemo to pokazati i djelima. To je dvostran proces, tako da moramo raditi i na podizanju svijesti naših građana da svojim djelima ne učestvuju u korupciji", kazao je Ganić, koji je o mjerama protiv korupcije već razgovarao sa članovima kantonalnog Tima za borbu protiv korupcije, OSCE-a i CCI-a.

Ovom prilikom predstavljene su i naredne aktivnosti koje će Tim provoditi. U tom smislu o projektima i planiranim aktivnostima govorili su predstavnici OSCE-a, zatim **Zoran Jachev**, tim lider projekta "Podrška implementaciji antikorupcijskih strategija u BiH" finansiranog od strane Evropske komisije u BiH te **Erduan Kafedžić**, šef Ureda za borbu protiv korupcije i upravljanje kvalitetom Kantona Sarajevo, koji je podijelio iskustva iz projekta "Informacione tehnologije u podršci prevencije korupcije".

"U KS smo razvili različite transparentne baze podataka i uspostavili savremene mehanizme prijave korupcije. Ti mehanizmi već daju rezultate, jer po prijavama se već postupa na različitim nivoima tužilaštva, a spremni smo iskustva podijeliti sa ZDK", kazao je Kafedžić.

Hašim Šabotić, direktor Agencije za prevenciju korupcije i koordinaciju borbe protiv korupcije (APIK) založio se za proširivanje nadležnosti tijela za borbu protiv korupcije, kojih u BiH ima 14.

"Tužilac je taj koji, po Zakonu o krivičnom postupku, može da animira sve one institucije koje mogu na bilo koji način doprinijeti da se procesuiraju koruptivna krivična djela. Drugi način borbe protiv korupcije jeste upravo ovaj preventivni, ali Agencija za borbu protiv korupcije i ova ad hoc tijela ne mogu poduzimati operativne radnje, što bi im u određenoj mjeri trebalo omogućiti", kazao je Šabotić. /kraj/

29. PRIJEM U VLADI ZA NOVOG EVROPSKOG KICKBOX PRVAKA AHMEDA KRNJIĆA: VI STE PONOS I JEDAN OD NAJBOLJIH BRENDOVA BIH

ZENICA, 24.04.2019. - Premijer ZDK **Mirza Ganić** i ministar za obrazovanje, nauku, kulturu i sport Spahija Kozlić upriličili su prijem za novog kickbox prvaka Evrope **Ahmeda Krnjića** i njegovog trenera **Huseina Musu Selimovića** iz Kluba borilačkih vještina "Isak" iz Zenice. Krnjić je prošlog vikenda u Sofiji savladao bugarskog borca **Dejana Topalskog** i tako mu oduzeo titulu evropskog prvaka pri WAKO pro asocijaciji.

"Ponosan sam zbog još jednog velikog uspjeha sporta u ZDK-u. Svi moramo učiniti više da sport i istaknuti sportisti imaju još snažniju podršku, jer ste vi jedan od najboljih brendova ove države", kazao je Ganić,



čestitajući osvojenju titulu Krnjiću, kao i kompletnom timu KBV "Isak".

Ovom prilikom najavljeno je da će Ministarstvo za obrazovanje, nauku, kulturu i sport Krnjiću dodijeliti stipendiju kao istaknutom sportisti te novčano podržati KBV "Isak", a premijer Ganić je novom evropskom kickboxing WAKO prvaku odobrio novčanu nagradu kao stimulans za postizanje još boljih rezultata.

Mladom borcu iz Kaknja, koji je vlasnik i srebrene medalje sa posljednjeg Svjetskog amaterskog prvenstva u kickboxu održanom u Budimpešti, poželjeli su puno sreće i uspjeha na Državnom prvenstvu BiH u maju, a zatim na Balkanijadi u Makedoniji u mjesecu junu i krajem godine na Svjetskom amaterskom prvenstvu u Sarajevu.

Krnjić i Selimović su se zahvalili domaćinima na gostoprimstvu i podršci Vlade ZDK, kao i drugih prijatelja sporta, bez kojih bi uspjesi članova KBV "Isak" bili teško ostvarivi. /kraj/

30. PREMIJER GANIĆ I AMBASADOR KOČ: PRIVLAČENJE NOVIH INVESTITORA ZAJEDNIČKI CILJ TURSKE I ZDK



ZENICA, 25.04.2019. - Premijer Zeničko-dobojskog kantona **Mirza Ganić** primio je u svom uredu ambasadora Republike Turske u BiH **Halduna Koča**, s kojim je razgovarao o svim aspektima saradnje Turske i ZDK, a posebno na polju ekonomije. Ganić je izrazio zadovoljstvo što je ambasador Koč prvi diplomata s kojim se sastao otkako je krajem prošlog mjeseca imenovan za premijera ZDK.



"Turska je dala značajan doprinos kako u obrazovanju, tako i na polju investicija u ZDK. Osnovni zaključak je da našu saradnju treba unaprijediti unarednom periodu kako bi bila još bolja i kvalitetnija. Ono što je poseban cilj Vlade ZDK jeste poboljšanje poslovnog ambijenta i u tom pravcu očekujemo podršku ambasadora Turske u dovođenju investitora na područje ZDK. Uradit ćemo sve da budemo što bolji

domaćini i da budemo sredina koja će investitorima stvoriti dobro okruženje", kazao je premijer Ganić.

Ambasador Koč je istakao kako Turska i Zeničko-dobojski kanton imaju dugogodišnju uspješnu saradnju, te da je u ovom kantonu realizirana jedna od najvećih investicija iz Turske. Kompanija "Natron-Hayat" Maglaj uspješno posluje pod okriljem turskog holdinga „Kastamonu Entegre“ od 2005. godine i značajno učestvuje u izvozu ZDK-a.



"Saradnja Turske i ZDK-a će u narednom periodu nastaviti da bude veoma intenzivna. Naši kontakti će biti sve učestaliji u cilju produbljivanja saradnje i ostvarivanja konkretnih rezultata, rješavanja konkretnih pitanja i problema", kazao je ambasador Koč.

Prijemu u uredu premijera ZDK prisustvovali su i ministri obrazovanja, nauke, kulture i sporta Spahija Kozlić te unutrašnjih poslova Dario Pekić.

Ambasador Koč i delegacija Vlade ZDK na čelu sa premijerom Ganićem potom je prisustvovala Sedmom Dječijem festivalu u Areni „Husejin Smajlović“ Zenica, u organizaciji Instituta "Yunus Emre" u okviru projekta "Moj izbor je turski" pod pokroviteljstvom Ministarstva civilnih poslova BiH, Ministarstva kulture i turizma Republike Turske i Ambasade Republike Turske u BiH. /kraj/

31. ZDK NAJSPREMNIJI KANTON ZA PROJEKTE JAVNO-PRIVATNOG PARTNERSTVA

ZENICA, 25.04.2019. - Stručnjaci za javno-privatno partnerstvo iz Hrvatske agencije za investicije, koji borave u Zeničko-dobojskom kantonu, održali su okrugli sto za predstavnike izvršne i zakonodavne vlasti te lokalnih zajednica u ZDK-u na kojem su prezentirali iskustva iz Hrvatske. Stručna misija je organizirana u okviru Instrumenta tehničke pomoći i razmjene informacija Evropske komisije (TAIEX) o procjeni pravnog okvira za javno-privatno partnerstvo u svrhu promocije javnih investicija u ZDK-u.

"Evropska komisija je kroz TAIEX inicijativu prepoznala ZDK kao jedan od najspremnijih kantona u provedbi projekata javno-privatnog partnerstva, a tome u prilog ide i činjenica da ZDK ima preko 50 identificiranih



*projekata u svom katalogu. Ono što smo vidjeli tokom ove posjete je da je Zakon o javno-privatnom partnerstvu ZDK u visokoj dozi spremnosti za buduće programsko razdoblje te za daljnu podršku investicijama javnog sektora", kazao je **Domagoj Dodig**, voditelj Odjela za ocjenu i odobravanje projekata JPP-a pri Hrvatskoj agenciji za investicije.*

Stručna misija inicirana je prošle godine tokom posjete delegacije Vlade Zeničko-dobojskog kantona Zagrebu, a dio je napora kantonalne Vlade da podstakne projekte javno-privatnog partnerstva.

*"Uspostavili smo institucionalni okvir, donijeli propise i pripremili katalog projekata, a sada kroz ovakve aktivnosti pokušavamo da pokrenemo konkretne investicije. Ranije smo organizirali edukacije za državne službenike i kadar u lokalnim zajednicama", kazao je ministar privrede **Zlatko Jelić**.*

Katalog JPP-a u ZDK sadrži 53 projekta potencijalne vrijednosti 350 miliona KM. Nedavno je potpisan ugovor za projekt Interventne kardiologije u Kantonalnoj bolnici Zenica vrijedan 7,5 miliona KM, koji je prvi projekt javno-privatnog partnerstva u BiH.



*"Želimo da se primjenom modela JPP-a unaprijedi javna usluga i podstakne ekonomski razvoj kantona u cjelini. Međutim, znamo da na federalnom nivou nema Zakona o JPP-u i mi kao kantoni smo prepušteni da se na ovakav način snalazimo da organizujemo ovakve stolove, da dolazimo do različitih ideja i da ustvari radimo u pravcu implementacije ovakvih projekata", kazao je premijer ZDK **Mirza Ganić**.*

Stručnjaci iz Hrvatske ove sedmice održali su niz sastanaka sa predstavnicima Vlade Zeničko-dobojskog kantona, a nakon današnjeg okruglog stola, planiran je okrugli sto i sa privrednicima. /kraj/

32. MONKS: ZA PET TEKUĆIH TRANSFERA PREDVIĐENO 4 MIL. KM

ZENICA, 26.04.2019. - Vlada Zeničko-dobojskog kantona usvojila je programe utroška sredstava Ministarstva za obrazovanje, nauku, kulturu i sport (MONKS) za 2019. godinu za pet tekućih transfera u ukupnom iznosu od 3.942.232,00 KM.



Tekući transfer za ustanove kulture iznosi 3.767.232,00 KM, a namijenjen je za isplatu plaća, toplog obroka, regresa i dijela materijalnih troškova 16 ustanova kulture, i to Muzeja grada Zenice, Zavičajnog muzeja Visoko i Muzeja Tešnja, Bosanskog narodnog pozorišta te dvanaest javnih biblioteka na području ZDK.

Tekući transfer za kulturne manifestacije i izdavačku djelatnost iznosi 50.000 KM, a sufinansirat će se 67 projekata u svim općinama ZDK-a. U istom iznosu je i transfer za omladinske projektne aktivnosti iz kojeg će se finansirati 63 omladinska projekta. Za zaštitu kulturno-historijskih spomenika predviđen je transfer u iznosu od 30.000 KM, dok je za podršku vjerskim zajednicama opredijeljeno 45.000 KM.

"Ovime smo krenuli u realizaciju Budžeta Ministarstva za obrazovanje, nauku, kulturu i sport. U pripremi su i ostali transferi, kao i program kapitalnih transfera, koji će uskoro biti upućeni Vladi na usvajanje", kazao je ministar Spahija Kozlić. /kraj/

33. BORAČKE STIPENDIJE U VISOKOM DOBILO 286 STUDENATA, STOTINU VIŠE NEGO PROŠLE GODINE

VISOKO, 26.04.2019. - Premijer ZDK **Mirza Ganić** i ministar za boračka pitanja **Fahrudin Čolaković** uručili su danas rješenja o dodjeli stipendija za 286 studenata članova braniteljske populacije sa područja općine Visoko. Stipendije je dobilo stotinu studenata više nego prethodne godine, a prihvaćene su sve aplikacije koje su bile formalno-pravno ispravne.



"Meni je kao mladom čovjeku bila čast da sam svojim odlukama, u komunikaciji sa resornim ministarstvom, mogao da doprinesem da svi studenti dobiju stipendije. Ovdje sam da vas podržim kao vaš sugrađanin i kroz vlastiti primjer poručim da mlad čovjek može uspjeti ako se trudi, radi i uči. Stipendije ste zaslužili vi svojim rezultatima, kao i vaši roditelji koji su branili BiH a mnogi dali svoje živote za našu slobodu", kazao je premijer Ganić, dodajući kako će Vlada nastojati prihvatiti i sve ispravne aplikacije za stipendije koje će uskoro dodijeliti Ministarstvo za obrazovanje, nauku, kulturu i sport.

Boračke stipendije je ove godine dobilo 2.230 studenata u ZDK. Iznos stipendije je 800 KM za prvu godinu, a 1.200 KM za ostale godine studija.

"U mandatu prethodne Vlade za četiri godine je broj boračkih stipendija udvostručen, a ove godine smo prihvatili sve aplikacije, što govori o našem opredjeljenju da svake godine pravimo novi iskorak u ovom, ali i svim drugim pravima boračke populacije", kazao je ministar Čolaković.

Naredne sedmice planirano je da se ugovori o dodjeli stipendija uruče studentima iz preostalih općina ZDK, a nakon čega slijedi i uplata prve rate. /kraj/

34. FOND ZA ZAŠTITU OKOLIŠA MORA OBEZBIJEDITI INSTRUMENT OSIGURANJA ZA PROJEKT PLAVA VODA

ZENICA, 29.04.2019. - Fond za zaštitu okoliša Federacije BiH dužan je obezbijediti instrument osiguranja - mjenice za iznos sredstava kojim učestvuje u projektu Regionalni vodovod Plava voda! Ovaj jasan i precizan zaključak donesen je na prošlosedmičnom sastanku u sjedištu Vlade Srednjobosanskog kantona u Travniku, kojem su, pored predstavnika SBK-a i JP Regionalni vodovod Plava voda d.o.o. Travnik, prisustvovali premijer ZDK **Mirza Ganić** sa ministrima finansija **Josipom Lovrićem** i poljoprivrede, vodoprivrede i šumarstva **Mirnesom Bašićem**, te predstavnici Fonda za zaštitu okoliša FBiH.



"Fond je dužan da dostavi instrument osiguranja - mjenice Javnom preduzeću Regionalni vodovod Plava voda d.o.o. Travnik koje će potom isti instrument osiguranja - mjenice, izdati prema Srednjobosanskom kantonu i Zeničko-dobojskom kantonu. Realizacijom ovog zaključka steći će se uslovi da Vlada ZDK postupi prema odluci kantonalne Skupštine i pristupi potpisivanju supsidijarnog podugovora o zajmu kojim će se omogućiti efektivnost kredita EBRD-a", kazao je premijer Ganić.

Premijer ZDK održao je jutros sastanak sa ministrima Lovrićem i Bašićem koje je zadužio da svako iz svoje nadležnosti pripremi sve što je potrebno kako bi ZDK mogao izvršiti svoje obaveze, nakon što Fond za zaštitu okoliša FBiH i JP Regionalni vodovod Plava voda d.o.o. Travnik završe svoj dio posla.

Podsjetimo, prvi sastanak u sjedištu JP Regionalni vodovod Plava voda d.o.o. Travnik održan je 4. aprila na inicijativu premijera ZDK Mirze Ganića, kada je dogovoreno da se održi novi sastanak na koji će, pored predstavnika ZDK i SBK, biti pozvani i predstavnici Fonda za zaštitu okoliša FBiH, s ciljem razumijevanja i otklanjanja nedoumica u shvatanju pojma finansijska garancija.

"Fond za zaštitu okoliša FBiH, bez obzira što u projektu učestvuje kao donator, dužan je dostaviti instrument obezbjeđenja - mjenicu, oko čega je na drugom sastanku postignuta saglasnost. Na osnovu svega navedenog može se vrlo jasno utvrditi da ZDK nije kočnica za realizaciju projekta Regionalni vodovod Plava voda, već, naprotiv, pokretač konkretnih aktivnosti na iznalaženju rješenja za zastoje u realizaciji projekta", kazao je Ganić.

Premijer ZDK očekuje od Grada Zenica, čiji predstavnici nisu prisustvovali navedenom sastanku u Vladi SBK, da se aktivnije uključe i daju svoj doprinos, kako bi se omogućio nastavak realizacije ovog projekta.
/kraj/

35. MINISTARSTVO PRIVREDE USPJEŠNO REALIZIRALO PRVI TAIEX PROJEKT U ZDK

ZENICA, 29.04.2019. - Ministarstvo za privredu Zeničko-dobojskog kantona u saradnji sa Federalnim ministarstvom prostornog uređenja i Evropskom komisijom, u periodu od 23. do 26. aprila 2019. godine u Zenici realiziralo je TAIEX Projekat - Stručna misija TAIEX-a o procjeni pravnog okvira za javno-privatno partnerstvo za implementaciju investicija u javnom sektoru.



TAIEX (Technical Assistance and Information Exchange) predstavlja instrument Evropske komisije za tehničku podršku i razmjenu informacija, odnosno pružanje kratkoročne tehničke pomoći novim državama članicama te zemljama u procesu pristupanja Evropskoj uniji u oblastima preuzimanja EU zakonodavstva i njegovog provođenja u domaći pravni sistem. Ovo je prvo učešće ZDK-a u jednom TAIEX projektu.

Stručnu misiju TAIEX-a provodili su stručnjaci za javno-privatno partnerstvo Agencije za investicije i konkurentnost pri Ministarstvu poduzetništva Republike Hrvatske **Domagoj Dodig** i **Slavko Čolak**.

Prvog dana posjete, goste iz Hrvatske primio je premijer **Mirza Ganić**, a susretu je prisustvovao i ministar privrede Zlatko Jelić. Premijer Ganić je ponovio opredjeljenje Vlade da se primjenom modela javno-privatnog partnerstva unaprijedi javna usluga i podstakne ekonomski razvoj ZDK-a. Nakon sastanka sa premijerom Ganićem, održani su radno-tematski sastanci sa predstavnicima Federalnog ministarstva prostornog uređenja i Ministarstva za privredu, sa fokusom na sagledavanje zakonodavnog i institucionalnog okvira JPP u ZDK, uloge ključnih igrača u procesu JPP-a, te diskusiju o uspostavljanju JPP i identifikaciji glavnih prepreka u implementaciji propisa JPP-a.

U okviru drugog dana Stručne misije (24.04.2019. godine) održani su sastanci sa predstavnicima Ministarstva za privredu, Ministarstva finansija, Ministarstva za prostorno uređenje, promet i komunikacije i zaštitu okoliša, Ministarstva zdravstva i Ministarstva za obrazovanje, nauku, kulturu i sport. Tema sastanka je bila procjena kriterija za odobravanje projekata JPP-a, kao i diskusija o kapacitetu glavnih institucija da primjene Zakon o JPP-u.

Treći dan (25.04.2019. godine) u sjedištu ZDK održan je okrugli sto sa predstavnicima zakonodavne i izvršne vlasti i predstavnicima javnog sektora sa područja Zeničko-dobojskog kantona. Okruglom stolu su prisustvovali članovi Vlade, predstavnici ministarstava, službi i drugih kantonalnih javnih tijela, kao i predstavnici općina, razvojnih agencija, javnih preduzeća, ustanova i institucija.

Cilj okruglog stola je bio podizanje svijesti o značaju javnih investicija, izazovima javnog sektora u slabim finansijskim okruženjima u kojima dominiraju budžetska ograničenja i fiskalne obaveze, jačanje administrativnih kapaciteta u implementaciji modela JPP-a, predstavljanje EU prakse i stvaranje mogućnosti za njeno prenošenje u institucionalni i zakonodavni okvir JPP-a ZDK.

Posljednji četvrti dan (26.04.2019. godine) u sjedištu Kantona održan je okrugli sto sa predstavnicima privatnog sektora, s ciljem podizanja svijesti o značaju javnih investicija i poslovnih prilika za privatni sektor, poboljšanje standarda javnih usluga kroz dugoročno ugovaranje, izbjegavanje korupcije u investicijama javnog sektora, osiguravanje zajedničkih praksi upravljanja i saradnje, kao i podizanje svijesti o izazovima i mogućnostima JPP-a u ZDK. Okruglom stolu su prisustvovali predstavnici privrednih komora, udruženja/udruga poslodavaca/poduzetnika, te poslodavci/poduzetnici sa područja ZDK.

U završnom dijelu Stručne misije održani su sastanci i sa predstavnicima nevladinog sektora.

"Stručna misija TAIEX-a je pružila učesnicima osnovno znanje o ključnim principima koji se primjenjuju na projekte JPP, glavne korake u procedurama JPP u skladu sa zakonodavstvom EU i ZDK, praktične aspekte u vezi sa usklađivanjem nacionalnih propisa sa pravnom tekovinom EU i kroz otvorenu diskusiju i prezentaciju iskustava Republike Hrvatske u provedbi projekata JPP omogućila razmjenu dobrih praksi. Ministarstvo za privredu će nastaviti koristiti instrumente Evropske komisije koji su na raspolaganju zemljama u procesu pristupanja Evropskoj uniji, a s ciljem jačanja institucionalnih kapaciteta za primjenu modela JPP i pružanja podrške svim akterima/institucijama u pripremi i realizaciji postojećih i novih projekata", kazao je Zlatko Jelić, ministar privrede ZDK. /kraj/

36. URUČENE STIPENDIJE STUDENTIMA IZ BREZE, VAREŠA I OLOVA, PREMIJER GANIĆ I MINISTAR ČOLAKOVIĆ ODALI POČAST BRANITELJIMA BREZE

BREZA, 29.04.2019. - Premijer **Mirza Ganić** i ministar za boračka pitanja **Fahrudin Čolaković** uručili su rješenja o dodjeli stipendija studentima sa područja Breze (99), Vareša (79) i Olova (97).



Stipendiju Ministarstva za boračka pitanja ZDK ove godine su dobili svi studenti koji su aplicirali putem javnog poziva, a koji su ispunili formalno-pravne uslove - ukupno 2.230 studenata iz 12 općina ZDK. Iznos stipendije je 800 KM za prvu, a 1.200 KM za ostale godine studija.

Premijer Ganić i ministar Čolaković naglasili su važnost ulaganja i brige za mlade ljude, a posebno prema onima koji su u proteklom

ratu ostali bez svojih najbližih i čiji su roditelji dali svoj imetak i zdravlje za odbranu Bosne i Hercegovine.

Vlada će, prema riječima premijera ZDK, nastojati da dodijeli stipendije i svim studentima koji dostave formalno ispravne prijave na predstojeći konkurs Ministarstva za obrazovanje, nauku, kulturu i sport.



Premijer Ganić i ministar Čolaković prisustvovali su i programu na spomen obilježju na Plani kod Breze, a u sklopu obilježavanja 3. maja - Dana otpora Breza. Na obilježju koje je izgrađeno u spomen na prve stradale branioce Breze, **Halida Ganića - Gane** i **Elvedina Musa-Ruhle**, proučena je Fatiha i položeno cvijeće, te održan prigodan program uz čas historije.

Obraćajući se okupljenim građanima, učenicima, članovima boračke populacije te predstavnicima vlasti, premijer Ganić je istakao važnost obilježavanja ovog i sličnih datuma, kao i podsjećanja na ratna stradanja u cilju osvještavanja mlađih generacija koje ne smiju dopustiti da se nešto slično ponovo dogodi na prostorima BiH. /kraj/

37. PREMIJER GANIĆ I MINISTAR NIKOLIĆ S DELEGACIJOM VSTV-A: ZAJEDNO DO BOLJE INFRASTRUKTURE U SEKTORU PRAVOSUĐA

ZENICA, 30.04.2019. - Delegacija Visokog sudskog i tužilačkog vijeća Bosne i Hercegovine (VSTV), na čelu sa direktorom Sekretarijata VSTV-a **Admirom Suljagićem**, posjetila je Ministarstvo za pravosuđe i upravu Zeničko-dobojskog kantona, gdje je razgovarala s ministrom **Nebojšom Nikolićem** i premijerom **Mirzom Ganićem**. Razgovoru su prisustvovali **Dijana Ajanović** i **Dragica Dragičević**, predsjednice općinskih sudova u Zenici i Žepču.

Na navedenom sastanku je bilo govora o realizaciji projekata dogradnje i rekonstrukcije postojeće zgrade Općinskog suda u Zenici i izgradnje nove zgrade Općinskog suda u Žepču. Projekat dogradnje i



rekonstrukcije postojeće zgrade Općinskog suda u Zenici je u fazi pribavljanja odobrenja za građenje, dok je projekat izgradnje nove zgrade Općinskog suda u Žepču u fazi pripreme projektne dokumentacije.

Pripremu projektne dokumentacije za navedene zgrade općinskih sudova provodi VSTV putem projekta unapređenja efikasnosti pravosuđa kojeg finansira Vlada Švedske, izvođenje radova i stručni nadzor nad izvođenjem radova bit će finansirani od strane Evropske unije u sklopu projekta IPA 2017, dok će Vlada ZDK-a snositi troškove pribavljanja odobrenja za građenje i troškove taksi za komunalne priključke za navedene objekte.

Ovom prilikom je istaknuto kako Zeničko-dobojski kanton i VSTV imaju dugogodišnju uspješnu saradnju, čiji su rezultat brojni projekti jačanja sektora pravosuđa, a posebno izgradnje pravosudne infrastrukture.

"Da bi pravosuđe kao jedan od stubova države funkcionisalo, potrebno je da ima razvijenu infrastrukturu. Zahvalni smo VSTV-a na angažmanu u ZDK, jer, pored ulaganja Vlade, uz pomoć svojih donatora obezbjeđuju značajna sredstva za finansiranje infrastrukturnih projekata. To je višestruko korisna investicija, jer u isto vrijeme razvijamo infrastrukturu i jačamo ekonomiju, pošto takve investicije pokreću i građevinski sektor. Zbog toga će ovi projekti i u buduću imati punu podršku Vlade", kazao je premijer Ganić. /kraj/

38. BORAČKE STIPENDIJE DOBILA 524 STUDENTA IZ ZENICE

ZENICA, 30.04.2019. - Premijer ZDK **Mirza Ganić** i ministar za boračka pitanja **Fahrudin Čolaković** uručili su danas rješenja o dodjeli boračkih stipendija za 524 studenta sa područja grada Zenice, što je u odnosu na prošlu godinu više za oko stotinu stipendija. Iznos stipendije 800 KM za prvu te 1.200 KM za ostale godine studija.

"Došao sam da vas podržim kao mlad čovjek iz radničke porodice koji je uspio zahvaljujući predanom radu i trudu. Moja poruka vama je da se isplati učiti, raditi, truditi i biti pošten, jer samo tako možemo uspjeti", kazao je Ganić, ističući da su studenti zaslužili stipendije svojim rezultatima, a njihovi roditelji učešćem u odbrani BiH u kojoj su mnogi dali svoje živote.



Ministarstvo za boračka pitanja ZDK ove godine je za stipendije izdvojilo 2,44 miliona KM, što je 400.000 KM više nego prethodne godine. Stipendije je dobilo svih 2.230 studenata čije su aplikacije bile formalno-pravno ispravne. To je za oko 400 stipendija više nego prethodne, a skoro dvostruko više nego 2014. godine.

Rješenja o dodjeli stipendije danas je dobilo i 239 stipendista iz Žepča. Poslije prvomajskih praznika rješenja će biti uručena i studentima iz preostalih općina ZDK-a, nakon čega bi, prema riječima ministra Čolakovića, trebala biti izvršena isplata prve rate stipendije. /kraj/

39. PREMIJER GANIĆ INICIRAO SASTANAK O PROBLEMU SAOBRAĆAJA U VRANDUKU I IZ OZRAKOVIĆI - VISOKO

ZENICA, 30.04.2019. - Premijer ZDK **Mirza Ganić** uputio je JP Ceste FBiH u Sarajevu dopis u kojem traži da hitno organizira sastanak na kojem bi se tražilo rješenje za problem otežanog saobraćaja zbog rekonstrukcije tunela Vranduk na magistralnoj cesti M17 Zenica - Doboj. Održavanje sastanka sa JP Ceste FBiH, koje je nadležno za ovo pitanje, inicirano je tokom nedavnog susreta premijera ZDK sa privrednicima iz općine Tešanj. Tom prilikom je konstatovano da naizmjenični saobraćaj jednom kolovoznom trakom



koji je regulisan samaforom, uprkos pojačanim aktivnostima MUP-a ZDK, ne daje željene rezultate.

"Zastoj i kilometarske kolone izazivaju opravdano nezadovoljstvo vozača, a reflektiraju se i na privredu, jer zbog usporenog saobraćaja kompanije kasne s isporukama roba i usluga. Tražimo da kao nadležna institucija hitno organizirate sastanak svih aktera koji učestvuju u

realizaciji projekta rekonstrukcije tunela Vranduk, kao i predstavnika ZDK, lokalnih zajednica i udruženja privrednika, jer se s dolaskom ljeta, kao i zbog planirane rekonstrukcije dva mosta preko rijeke Bosne, očekuju još veće saobraćajne gužve", navodi u pismu Ganić.

Također, premijer ZDK je reagirao i nakon zahtjeva privrednika iz Visokog da se ubrza izgradnja glavne saobraćajnice kroz Industrijsku zonu Ozrakovići. Izgradnju puta Vlada ZDK sufinansira sa 424.364,23 KM preko Direkcije za ceste ZDK te 97.500,00 KM koje je osiguralo Ministarstvo privrede ZDK iz transfera za razvoj poslovnih zona, a u finansiranju projekta učestvuje Federalno ministarstvo razvoja, poduzetništva i obrta sa 250.000,00 KM te Grad Visoko koji će sa 200.000,00 KM finansirati izgradnju vodovodne mreže u ovoj poslovnoj zoni.

*"Prilikom nedavne posjete Ozrakovićima privrednici su ukazali da izgradnja puta traje isuviše dugo te da je kretanje vozila kroz zonu veoma otežano. S tim u vezi, održao sam sastanak sa ministrom za prostorno uređenje, promet i komunikacije i zaštitu okoliša **Arnelom Isakom** i direktorom Direkcije za ceste ZDK **Refikom Zekovićem** sa kojima sam dogovorio konkretne aktivnosti koje ćemo poduzeti u narednom periodu, a kako bi se ubrzala izgradnja navedenog puta", kazao je Ganić. /kraj/*

40. KAKANJSKIM STUDENTIMA 207 STIPENDIJA, ZGRADA GIMNAZIJE U NOVOM RUHU

KAKANJ, 03.05.2019. - Premijer Zeničko-dobojskog kantona **Mirza Ganić** i ministar za boračka pitanja Fahrudin Čolaković uručili su danas rješenja o dodjeli stipendija Ministarstva za boračka pitanja za 207 studenata sa područja općine Kakanj. Stipendije su dobili svi studenti koji su zadovoljili uslove konkursa, a u odnosu na prethodnu godinu stipendiju je Kakanju dobilo dodatnih 67 studenata.



"U budžetu za 2019. godinu za stipendije smo obezbijedili 2,44 miliona KM ili 400.000 KM više nego prethodne godine, tako da je stipendije dobilo ukupno 2.230 studenata iz branilačke populacije. Nastojat ćemo, također, da prihvatimo i sve aplikacije na predstojećem konkursu Ministarstva za obrazovanje, nauku, kulturu i sport. Svojim dolaskom u Kakanj želio sam poručiti studentima da mogu računati na pomoć Vlade, ali i da im kroz vlastiti primjer, kao mlad čovjek iz radničke porodice, a takav primjer je i načelnik općine Kakanj Aldin Šljivo, pošaljem poruku da mogu uspjeti u BiH, ali da se moraju obrazovati, biti uporni, raditi i iskoristiti šansu koja im se ukaže", kazao je premijer Ganić.

Iznos stipendije je 800 KM za prvu godinu i 1.200 KM za ostale godine studija. Stipendiranje braniteljske populacije jedan od programa Ministarstva za boračka pitanja ZDK, koje ove godine raspolaže budžetom od 10,6 miliona KM, što je najviše do sada.

"Vlada bi ubrzo trebala usvojiti program zapošljavanja i samozapošljavanja braniteljske populacije u ZDK, tako da bi javni oglas mogao biti raspisan u drugoj polovici mjeseca maja", kazao je ministar Čolaković.

Delegacija Vlade ZDK prisustvovala je i priredbi povodom završetka radova na utopljavanju zgrade Gimnazije "Muhsin Rizvić" Kakanj. Zamjenu vanjske stolarije, ugradnju termofasade i zamjenu oluka sa

140.000 KM finansirali su Federalno ministarstvo prostornog uređenja, Svjetska banka i Vlada Zeničko-dobojskog kantona, što je jedan od najkapitalnijih projekata od osnivanja škole prije 60 godina.



"Desetine škola u ZDK je zahvaljujući projektu energetske efikasnosti dobilo novu stolariju, fasadu, krovove, kotlovnice. Naše opredjeljenje je da nastavimo razvijati infrastrukturu, bez koje nema kvalitetnog obrazovanja. U ovoj gimnaziji nastojat ćemo da u narednom periodu pomognemo unutrašnju rekonstrukciju i obnovu sale, jer želimo da napravimo poseban ambijent za naše učenike", kazao je Ganić.

Ministar obrazovanja, nauke, kulture i sporta Spahija Kozlić pozvao je maturante Gimnazije „Muhsin Rizvić“ da upišu neki od studijskih programa Univerziteta u Zenici, a Vlada će nastojati da osigura adekvatnu podršku kroz jedan od dva stipendijska programa.

Delegacija Vlade ZDK posjetila je Kraljevu Sutjesku, te obišla Muzej koji djeluje pri JU KSC Kakanj. /kraj/

41. NOVOIZABRANI MUFTIJA ZENIČKI UPRILIČIO PRIJEM ZA DELEGACIJU VLADE ZDK

ZENICA, 06.05.2019. - Novoizabrani muftija zenički, **hafiz Mevludin ef. Dizdarević** upriličio je u svom uredu u Zenici prijem za delegaciju Vlade Zeničko-dobojskog kantona na čelu sa premijerom **Mirzom Ganićem**. Delegacija Vlade, kako je rekao, najznačajnija je delegacija koju je primio otkako je stupio na novu dužnost.



"Muftijstvo je veoma zainteresovano za rad Vlade ZDK, jer mi živo osjećamo probleme našeg naroda, posebno na perifernim krajevima i povratničkim mjestima, tako da nam je stalo da što bolje radite. Svaki projekt i svako novo radno mjesto znači opstanak ljudi i jačanje vjere. Nadam se da ćemo uspješno raditi za boljitak svih građana našeg kantona", kazao je muftija Dizdarević.

Premijer Ganić je istakao da je ovo Vlada kontinuiteta koja želi nastaviti uspješnu saradnju i unapređivati odnose sa Islamskom zajednicom, ali i drugim vjerskim zajednicama u ZDK. Vjerske zajednice svake godine dobijaju podršku iz budžeta, a dio sredstava izdvaja se i na ime pomoći za izgradnju vjerskih objekata.

"Kroz podršku vjerskim zajednicama želimo doprinijeti pozitivnim promjenama na terenu. Naš pravac će ubuduće biti da svaki projekt koji započnemo odmah i završimo. Samo tako možemo odaslati poruku da smo kao mladi ljudi ozbiljni, da imamo rezultat i da težimo da radimo posao što je moguće bolje. U tom smislu, Islamska zajednica i druge vjerske zajednice u ZDK će imati našu podršku", kazao je premijer Ganić, čestitajući ef. Dizdareviću imenovanje na ovu visoku dužnost.

Prijemu u Muftijstvu prisustvovali su i glavni imam Medžlisa Islamske zajednice Zenica Jakub ef. Salkica i Edin ef. Kavazović, rukovodilac Službe za vjerske poslove i obrazovanje.

Muftija Dizdarević upoznao je članove Vlade sa najvažnijim projektima u narednom periodu, izdvajajući svečanu inauguraciju novoizabranog muftije, planiranu za 24. maj, izgradnju Sultan-Ahmedovog kompleksa u Zenici, izgradnju nove zgrade Islamskog pedagoškog fakulteta u Zenici i obilježavanje 300 godina od osnivanja Sultan-Ahmedove medrese u Zenici. /kraj/

42. TRI MILIONA KM ZA PODRŠKU POLJOPRIVREDNOJ PROIZVODNJI U ZDK

ZENICA, 07.05.2019. - Vlada Zeničko-dobojskog kantona je na 4. sjednici usvojila Program utroška sredstva Budžeta ZDK-a za poticaje u poljoprivredi za 2019. godinu u iznosu od tri miliona KM. Od ukupnog iznosa, za poticaje animalnoj proizvodnji namijenjeno je 1.118.000,00 KM, biljnoj proizvodnji 1.249.000,00 KM, za podršku prerađivačima i otkupljivačima 450.000,00 KM, dok je za kapitalna ulaganja predviđeno 95.000,00 KM.

"Svrha ovog programa je da se nastave započeti i otvore novi procesi u poljoprivrednom sektoru. Ciljevi su povećanje obima poljoprivredne proizvodnje, zadovoljavanje potreba domaćeg tržišta, razvoj i snabdijevanje prehrambene industrije domaćim sirovinama, smanjivanje uvoza i stvaranje pretpostavki za izvoz, povećanje sjetvenih površina, ravnomjerniji razvoj poljoprivrede te otvaranje radnih mjesta u ZDK-u", kazao je ministar poljoprivrede, vodoprivrede i šumarstva Mirnes Bašić.

U okviru modela poticaja animalnoj proizvodnji, za podršku registrovanim farmama goveda planirano je 610.000,00 KM, za uzgoj brojlera 380.000,00 KM, uzgoj koka nosilica 80.000,00 KM, registrovanu ovčiju i kozju proizvodnju 40.000,00 KM te registrovanu svinjogojску proizvodnju 8.000,00 KM.



Kroz model poticaja biljnoj proizvodnji, za podršku proizvodnji maline, kupine i jagode predviđeno je 700.000,00 KM te dodatnih 10.000,00 KM za podizanje novih zasada jagodičastog voća. Proizvodnja u plastenicima i staklenicima bit će podržana sa 400.000,00 KM, proizvodnja gljiva 40.000,00 KM, proizvodnja krastavca - kornišona, paprika feferona i presadnica povrća sa po 20.000,00 KM, podrška za nove zasade koštičavog, jabučastog i jezgrastog voća iznosi 15.000,00 KM, koliko je planirano i za podršku za nove zasade vinove loze. Za podršku organskoj poljoprivrednoj proizvodnji planirano je 5.000,00 KM, dok je za podršku proizvodnji plantažne borovnice i aronije planirano 3.000,00 KM.

Model podrške prerađivačima i otkupljivačima predviđa poticaje za otkupljivače i prerađivače mlijeka (220.000,00 KM), prerađivače pilećeg mesa (60.000,00 KM), otkupljivače jagodičastog voća (65.000,00 KM), otkupljivače jagodičastog voća koji vrše zamrzavanje - hladnjače (75.000,00 KM), podršku otkupljivačima svježeg voća i povrća (20.000,00 KM) te podršku otkupljivačima ljekovitog bilja (10.000,00 KM).

Sredstva u iznosu od 95.000,00 KM, koliko je predviđeno za model kapitalnih ulaganja, bit će utrošena za podršku kupovini poljoprivredne mehanizacije (25.000,00 KM), nabavku plastenika (20.000,00 KM), dok je za opremanje hladnjača za skladištenje i čuvanje jagodičastog voća planirano 50.000,00 KM.

Za model ostalih podrški planirana su sredstva u iznosu od 76.000,00 KM, od čega je za podršku projektima iz oblasti pčelarstva predviđeno 35.000,00 KM, koliko je predviđeno i za finansiranje sajмова i izložbi, te 6.000,00 KM za nabavku repromaterijala i opreme.

Iznos programa podsticaja na nivou je iz 2018. godine, a kako je pojašnjeno na sjednici, ovisno o broju zahtjeva moguće je i prelijevanje sredstava iz jednog poticaja u drugi.

"Poljoprivreda ima veoma važnu ulogu u ukupnom ekonomskom razvoju ZDK. Naš cilj je stvoriti uslove za integriranu poljoprivrednu proizvodnju i primjenu savremenih agrotehničkih mjera koje će omogućiti proizvodnju ekonomski isplativih i ekološki prihvatljivih proizvoda", kazao je premijer Mirza Ganić. /kraj/

42. MINISTARSTVO OBRAZOVANJA ZDK ZA STIPENDIRANJE STUDENATA IZDVAJA MILION KM

ZENICA, 08.05.2019. - Ministarstvo za obrazovanje, nauku, kulturu i sport ZDK izdvojit će jedan milion konvertibilnih maraka za stipendiranje studenata u akademskoj 2018/2019. godini. Prema programu kojeg je usvojila Vlada na 4. sjednici, pravo na stipendiju imaju redovni studenti prvog i drugog ciklusa studija, do 30 godina starosti i koji nisu ni u kakvom radnom odnosu, s prebivalištem na području ZDK-a.

"Konkurs za dodjelu stipendija bit će objavljen tokom mjeseca maja, a nakon okončanja konkursne procedure Vlada će posebnim aktom utvrditi visinu pojedinačnog iznosa stipendije i broja rata za isplatu", kazao je resorni ministar Spahija Kozlić.

Konkursnu proceduru ranije je okončalo Ministarstvo za boračka pitanja ZDK koje je za stipendije 2.230 studenata izdvojilo 2,44 miliona KM. Po prvi put, ove godine su stipendije dobili svi studenti sa formalno ispravnim konkursnim prijavama.



*"Sa dodatnih milion maraka koje je izdvojilo Ministarstvo za obrazovanje, nauku, kulturu i sport, nadam se da ćemo uspjeti dodijeliti stipendiju svakom studentu u ZDK koji je ove godine podnio prijavu i ispunjavao uslove, što je politika ove vlade", rekao je premijer **Mirza Ganić.***

Vlada je usvojila programe utroška sredstava još tri transfera Ministarstva za obrazovanje, nauku, kulturu i sport, od kojih je finansijski najvredniji Tekući transfer za smještaj studenata u studentske centre u iznosu od 1.659.500,00 KM. Ovim sredstvima subvencionira se smještaj i ishrana studenata u studentskim centrima u Sarajevu i Tuzli, te dva studentska centra u Mostaru. Ova četiri centra su za akademsku 2018/2019. godinu dobila saglasnost za smještaj i ishranu ukupno 700 studenata sa područja ZDK.

Transfer za naučno-istraživačku djelatnost ove godine je planiran u iznosu od 40.000,00 KM. Od toga, za odbranu doktorskih radova planirano je 8.000,00 KM, pomoć organizaciji naučno-stručnih skupova i učešće naučnih radnika i studenata na naučnim skupovima u zemlji i inostranstvu te izdavanje univerzitetskih udžbenika 16.000,00 KM, za takmičenja studenata sa univerziteta u ZDK 12.000,00 KM, dok je za nagrade najboljim studentima sa prebivalištem u Zeničko-dobojskom kantonu planirano 4.000,00 KM.

Usvojen je i program utroška sredstava Tekućeg transfera za organizaciju takmičenja učenika osnovnih i srednjih škola u iznosu od 45.000,00 KM. Za finansiranje troškova učešća učenika iz ZDK na federalnim, državnim i međunarodnim takmičenjima planirano je 5.000,00 KM, a 40.000,00 KM za nagrade nastavnicima - voditeljima sekcija - ekipa i drugih oblika vannastavne aktivnosti čiji učenici postignu izuzetne rezultate na tim takmičenjima. /kraj/

43. PREMIJER GANIĆ PRIMIO DELEGACIJU NOGOMETNOG SAVEZA ZDK



ZENICA, 08.05.2019. - Premijer ZDK **Mirza Ganić** primio je u svom uredu delegaciju Nogometnog saveza Zeničko-dobojskog kantona - predsjednika **Muhameda Begagića** i generalnog sekretara **Safiju Mahmić**.

Gosti su informisali premijera o aktivnostima NS ZDK, realiziranim projektima kao i projektima koji su u toku. Razgovarano je i o saradnji Vlade i resornog ministarstva sa krovnom kućom nogometa u ovom kantonu na projektima poboljšanja infrastrukture i ukupnom unapređenju sporta.

Predstavnici Nogometnog saveza upoznali su premijera Ganića sa stanjem u nogometnim klubovima u općinama ZDK-a.

Premijeru su ovom prilikom uručili plaketu u znak zahvalnosti za podršku i doprinos Vlade ZDK razvoju nogometa. /kraj/

44. ZA IZGRADNJU I RAZVOJ POSLOVNIH ZONA 1,12 MILIONA KM, JER SU TO MJESTA ZA OBRT KAPITALA

ZENICA, 09.05.2019. - Ministarstvo za privredu Zeničko-dobojskog kantona najveći dio sredstava od koncesija i ove godine će usmjeriti za sufinansiranje uspostavljanja industrijskih/poslovnih zona. Prema programu utroška sredstava koji je usvojila Vlada, od ukupno 1,2 mil. KM za poslovne zone planirano je 1,12 miliona, a preostalim sredstvima od 55.000,00 KM finansirat će se provođenje postupaka dodjele i nadzora i realizacije koncesionih ugovora, uz rezervu od 25.000,00 KM.



Ministar privrede **Zlatko Jelić** ističe da je posljednjih nekoliko godina napravljen značajan iskorak u ovoj oblasti, te da su planirana sredstva za 2019. godinu najveća do sada.

"Od 2009. godine, kada smo ušli u projekt podrške izgradnji poslovnih zona, do 2017. godine, izdvojili smo ukupno 3 miliona KM. Samo prošle godine projekte općina smo sufinansirali sa 900.000,00 KM, a ove godine smo planirali 1,2 miliona, tako da

očekujemo dodatni zamah i iskorak u stvaranju ambijenta za privlačenje investitora i zapošljavanje u ZDK", kazao je ministar Jelić.

Koncesione naknade su sredstva koja Ministarstvo za privredu ZDK ubire po osnovu ugovora sa privrednim subjektima koji realiziraju koncesione projekte istraživanja i eksploatacije čvrstih nematanih mineralnih sirovina. Raspodjela prihoda od koncesione naknade vrši se na način da 70 posto ostaje općinama na čijem teritoriju se vrši eksploatacija, a 30 posto ZDK-u. /kraj/

45. 1,5 MILIONA KM ZA ZAPOSŁJAVANJE I SAMOZAPOSŁJAVANJE PRIPADNIKA BRANILAČKE POPULACIJE

ZENICA, 09.05.2019. - Vlada Zeničko-dobojskog kantona na posljednjoj sjednici usvojila je programe poticaja zapošljavanja i samozapošljavanja pripadnika branilačke populacije za koje su u ove svrhe planirana sredstva u Budžetu ZDK u iznosu od skoro 1.500.000,00 KM. Time je Vlada potvrdila svoju opredijeljenost za razvoj ZDK-a, poticanje privrede te posebnu brigu za boračku populaciju kroz kontinuitet implementacije projekata koji imaju za cilj poboljšanje statusa najzaslužnije kategorije društva.

Za Program poticaja zapošljavanja pripadnika branilačke populacije putem zapošljavanja u pravnim licima planiran je iznos od 500.000,00 KM, a visina pojedinačnog poticaja za zapošljavanje iznosi 7.200,00 KM



po jednom novozaposlenom radniku NK, KV, SSS i VŠS struke, te 8.400,00 KM za osobu sa visokom stručnom spremom (VSS).

Programom poticaja samozapošljavanja pripadnika branilačke populacije ZDK planirana su sredstva u iznosu od 990.000,00 KM raspoređena u dva programa.

Prvi je program "**Prvi biznis**" namijenjen osobama koje su registrovale privrednu djelatnost nakon 1. januara 2018. godine, a najkasnije s danom okončanja javnog poziva po ovom programu, a iznos pojedinačnog poticaja

je 8.000,00 KM.

Drugi program pod nazivom "**Biznis plus**" namijenjen je korisnicima programa poticaja samozapošljavanja Ministarstva za boračka pitanja ZDK iz prethodnih godina, a koji su svojim zalaganjem ostvarili nadprosječne poslovne rezultate, te koji imaju planove proširenja poslovne djelatnosti ili zapošljavanja člana vlastitog domaćinstva koji nema prava prednosti u zapošljavanju po članu 15. Zakona o dopunskim pravima branilaca i članova njihovih porodica („SL ZDK“ 01/14). Iznos ovog poticaja je 5.000,00 KM.

*"Javni poziv će biti objavljen u narednih desetak dana, a shodno dosadašnjim pozitivnim iskustvima u radu iznosi po navedenim programima su ove godine uvećani", kazao je ministar **Fahrudin Čolaković**.*

Ministarstvo za boračka pitanja kroz ovakve programe je posljednjih godina pomoglo rješavanje egzistencijalnog statusa nekoliko stotina branilaca i članova branilačkih porodica u svim općinama ZDK.

Premijer **Mirza Ganić** pozvao je članove branilačke populacije da iskoriste ovu priliku i prijave se za dodjelu poticaja.

"Ovo je jedan od najboljih načina rješavanja socijalno-ekonomskog statusa pripadnika branilačke populacije, jer svojim radom mogu obezbijediti egzistenciju za sebe i svoju porodicu te pomoći drugima", kazao je Ganić. /kraj/

46. MINISTAR KOZLIĆ POTPISAO MEMORANDUM O SARADNJI O DUALNOM OBRAZOVANJU SA EBRD-OM

SARAJEVO, 10.05.2019. - U okviru EBRD investicijske konferencije koja je održana u Sarajevu i koja je okupila preko tri hiljade gostiju iz cijelog svijeta, ministar obrazovanja, nauke, kulture i sporta prof. dr. **Spahija Kozlić** potpisao je Memorandum o saradnji sa Evropskom bankom za obnovu i saradnju (EBRD).



Ovaj važan dokument, koji je sa strane EBRD-a potpisao potpredsjednik **Pierre Heilbronn**, tretira aktivnosti uvođenja dualnog obrazovanja na području Zeničko-dobojskog kantona. Radi se o modelu putem kojeg se predviđa sinergija obrazovanja i privrede, to jest fokusiranja obrazovanja na vještine i kompetencije koje su potrebne tržištu rada. EBRD je za ovu aktivnost izabrao Zeničko-dobojski kanton jer ga je prepoznao kao regiju koja napreduje i koja je najaktivnija u ovoj oblasti.

Nakon potpisivanja memoranduma uslijedit će konkretni sporazumi implementacije opredjeljenja koji tamo stoje, to jest iznalaženja najboljeg i primjenjivog modela dualne edukacije u školama na području našeg kantona. /kraj/

47. KUCZ ZDK PLANIRALA VEĆI DIO SREDSTAVA ZA HITNE MJERE I SPAŠAVANJE

ZENICA, 10.05.2019. - Kantonalni štab civilne zaštite Zeničko-dobojskog kantona, kojim je predsjedavao komandant, kantonalni ministar **Arnel Isak**, usvojio je Program utroška budžetskih sredstava i plan korištenja sredstava posebne vodne naknade za zaštitu i spašavanje za 2019. godinu. Ukupan budžet Kantonalne uprave civilne zaštite za ovu godinu planiran je u iznosu od 1.440.056,00 KM, od čega su 852.182,00 KM namjenska sredstva posebne vodne naknade za zaštitu i spašavanje, a 587.874,00 KM sredstva iz Budžeta Zeničko-dobojskog kantona.



*"Osim za opremanje i obučavanje struktura civilne zaštite, veći dio sredstava namijenjen je za hitne mjere i spašavanje, što je naša primarna zadaća. Za hitne mjere i spašavanje imamo na raspolaganju 500.000,00 KM namjenskih sredstava plus 400.000,00 KM budžetskih sredstava koja u svakom trenutku možemo staviti na raspolaganje uz zaključak Vlade ZDK", obrazložio je direktor KUCZ **Džavid Aličić**, navodeći*

kako će Program utroška budžetskih sredstava i plan korištenja sredstava posebne vodne naknade za zaštitu i spašavanje biti upućen na usvajanje Vladi Zeničko-dobojskog kantona.

Vezano za najave meteorologa da bi BiH početkom iduće sedmice mogle pogoditi obilne kišne padavine, Aličić je istakao da KUCZ prati stanje na terenu te poduzima mjere koje će omogućiti pravovremenu reakciju i mobilnost svih struktura civilne zaštite ukoliko dođe do nepogoda. /kraj/

48. U POLJOPRIVREDNE POTICAJE UKLJUČENI I PROIZVOĐAČI JAGODE

ZENICA, 10.05.2019. - Ministarstvo za poljoprivredu, šumarstvo i vodoprivredu ZDK ove godine je za poticaje u poljoprivredi opredijelilo 3 miliona KM. Iznos je na nivou prošlogodišnjeg i omogućava kontinuitet u realizaciji svih mjera poticaja koje su do sada pokazale zadovoljavajuće rezultate. U prvom planu su vrste proizvodnji koje su zauzele leadersku poziciju u Federaciji BiH, a to su peradarstvo i proizvodnja jagodičastog voća - maline i kupine. Novina je da će poticaje ove godine moći koristiti i proizvođači jagode.

*"S obzirom da su se proizvodnjom maline u prethodnom periodu uglavnom bavila fizička lica kojima to nije osnovna djelatnost, a da se proizvodnja pokazala veoma ovisnom od niza faktora koje nije moguće kontrolisati i da je zbog toga ova proizvodnja veoma rizična, u poticaje su uključeni proizvođači jagode proizvedene po principima organske proizvodnje. Ministarstvo je stava da se u narednom periodu poticaji u ovoj proizvodnji moraju postepeno usmjeriti samo prema proizvođačima kojima je to osnovna djelatnost", kazao je resorni ministar **Mirnes Bašić**.*



Programom utroška sredstava koji je ove sedmice usvojila Vlada ZDK, unutar podrški za registrovane farme goveda, osim dosadašnjih, planirani su poticaji i za registrovane farmere koji nisu uključeni u organizovani otkup mlijeka i koji to mogu ostvariti pod određenim uslovima.

Pored toga, planirani su poticaji za neke vrste poljoprivrednih proizvodnji za koje postoje potrebni

uslovi, a koje se pokazuju dugoročno opravdanim, kao što je proizvodnja feferona. Također, u program su uvrštene proizvodnja presadnica i organizovana proizvodnja šampinjona.

U skladu sa dugoročnim opredjeljenjem ovog ministarstva, naglašena je potreba daljeg razvoja plasteničke i stakleničke proizvodnje, kao i povećanju rashladnih kapaciteta za skladištenje jagodičastog voća i povrća, planiranjem kapitalnih ulaganja u nabavku opreme za hladnjače.

Usvojena su i dva programa u oblasti veterinarstva - Program utroška sredstava za zdravstvenu zaštitu životinja i Program utroška sredstava od prikupljenih veterinarskih naknada za mjere zdravstvene zaštite životinja i veterinarskog javnog zdravstva na području ZDK, a ukupan iznos planiranih sredstava je 400.000,00 KM. Ovim programima su planirane obavezne mjere zdravstvene zaštite životinja, kao i mjere veterinarskog javnog zdravstva koje se provode u cilju očuvanja zdravlja životinja i ljudi. Treba napomenuti da je posebna pažnja posvećena kontroli zdravlja vimena životinja čije se mlijeko stavlja u javnu potrošnju, kao važnom elementu u lancu ishrane. Za provođenje ovih mjera planirana su sredstva u iznosu od 92.000,00 KM.

Osim toga, planirano je sufinansiranje implementacije Programa samokontrole i sistema HACCP kod svih subjektima u poslovanju sa hranom koji su registrovani kao obrti i koji posjeduju veterinarski kontrolni broj. Planirani iznos sredstava je 120.000,00 KM.

Vlada ZDK usvojila je i Program utroška sredstava za uređenje poljoprivrednog zemljišta u iznosu od 1.000.000,00 KM, te Program utroška namjenskih sredstava iz oblasti šumarstva za 2019. godinu, u iznosu od 1.125.400,00 KM. /kraj/

49. PRIVREDNICI NE SMIJU TRPJETI POSLJEDICE - INVESTICIJA TREBA BITI ŠTO PRIJE REALIZOVANA

VISOKO, 10.05.2019. - Delegacija Vlade Zeničko-dobojskog kantona koju su činili premijer **Mirza Ganić**, ministar za prostorno uređenje, promet i komunikacije i zaštitu okoline **Arnel Isak** te direktor Kantonalne direkcije za ceste **Refik Zeković**, održala je danas sastanak sa privrednicima čije su firme smještene u Industrijskoj zoni Ozrakovići u Visokom te predstavnicima izvođača radova i nadzornog organa na izgradnji glavnog puta kroz ovu industrijsku zonu koju najvećim dijelom finansira Vlada Zeničko-



dobojskog kantona. Sastanak je organiziran nakon što su se privrednici nedavno požalili premijeru Ganiću da izgradnja prve dionice puta u dužini oko 400 metara traje isuviše dugo te da zbog otežanog saobraćaja trpe štetu.

Konstatirano je da je izgradnja dionice jednim dijelom usporena zbog nepovoljnih vremenskih prilika i nedovoljne sinhronizacije poslova. Konzorcij firmi "Trgošped" Kakanj i "Mušibegović

gradnja" Visoko uveden je u posao 18. marta, a drugi izvođač se namjerava uvesti u posao tek iduće sedmice.

"Nismo ovdje došli radi vlastite promocije, nego da pokušamo riješiti problem jer u Industrijskoj zoni Ozrakovići radi oko 1.100 ljudi. Privrednici ne smiju trpjeti nikakve posljedice i moramo poduzeti sve da investicija bude u što kraćem roku realizovana. Doprinos u realizaciji projekta, obzirom da je u isti uključena saradnja različitih nivoa vlasti, mjeri se iznosom finansiranja i svakom pripada onolika zasluga koliko učestvuje. Svi imamo samo jedan cilj, a to je zadovoljstvo naših građana", kazao je premijer Ganić.

Vrijednost radova na izgradnji prve dionice puta je 624.364,23 KM, od čega je 424.364,23 KM osigurala Direkcija za ceste ZDK, a 200.000,00 KM su sredstva Ministarstva razvoja, poduzetništva i obrta FBiH, dok je Općina Visoko za izgradnju vodovoda obezbjedila 200.000,00 KM. Pored toga, Ministarstvo privrede ZDK izdvojilo je 97.500,00 KM na ime troškova organizacije i izgradnje Industrijske zone Ozrakovići.

Direktor Direkcije za ceste Refik Zeković zadužen je da preuzme koordinaciju između dva investitora i izvođača radova, kako se ne bi gubilo dragocjeno vrijeme u građevinskoj sezoni. Zaključeno je da se navedena trasa pusti u saobraćaj čim budu završeni nasipni radovi te da se učine dodatni naporu kako bi se ispoštovao rok za završetak radova koji je, prema ugovoru, planiran za sredinu jula. /kraj/

50. U VLADI ZDK ODRŽAN SASTANAK O DODJELI KONCESIJE RMU KAKANJ

ZENICA, 10.05.2019. - Premijer ZDK **Mirza Ganić**, ministar za poljoprivredu, šumarstvo i vodoprivredu Mirnes Bašić i ministar privrede **Zlatko Jelić** održali su u sjedištu Vlade sastanak sa načelnikom Općine Kakanj **Aldinom Šljivom** i v.d. direktorom Rudnika mrkog uglja Kakanj **Seadom Imamovićem**. Tema razgovora bile su aktivnosti na dodjeli koncesije za eksploataciju uglja kakanjskom ugljenokopu.



RMU Kakanj podnio je zahtjev za dodjelu koncesije 2017. godine, nakon čega su Uprava rudnika i Vlada ZDK, svako iz svoje nadležnosti, poduzeli niz koraka kako bi se stvorili uslovi za potpisivanje koncesionog ugovora. Ocijenjeno je kako aktivnosti idu u dobrom pravcu, te da bi kakanjskom rudniku ubrzo mogla biti izdata prva koncesija za eksploataciju uglja u ZDK-u.

"Uređivanje ove oblasti je izuzetno važno za budžete lokalnih zajednica i ZDK-a, jer će rudnici po osnovu koncesionih naknada izdvajati značajna finansijska sredstva koja će se ulagati u infrastrukturu i unapređenje uslova života ljudi koji žive u blizini koncesionih područja i čiji je život zbog toga otežan", kazao je premijer Ganić, napominjući da se koncesiona naknada dijeli u omjeru 70 posto u korist općine, a 30 posto u korist kantona. /kraj/

51. GANIĆ: VLADA ŽELI OPTIMIZIRATI POSLOVNE PROCESSE KROZ DIGITALIZACIJU JAVNE UPRAVE

ZENICA, 13.05.2019. - Predstavnici firme "E-arhiva" iz Sarajeva održali su za članove Vlade Zeničko-dobojskog kantona prezentaciju softverskog sistema "Hermes". Radi se o jedinstvenom integralnom informacionom sistemu organiziranom modularno, sa oko 150 pojedinačnih rješenja kojim su obuhvaćeni svi segmenti poslovanja javne uprave, između ostalog, od pisarnice, rada organa uprave, praćenja poticaja, kadrovske evidencije, do komunikacije sa građanima i mobilnih aplikacija.

"Sistem javne uprave u kantonalnim organima ZDK-a je spor i nedovoljno razvijen. Ova vlada treba da bude prepoznata po digitalizaciji koja će štedjeti vrijeme i poboljšati proces rada. Od optimizacije poslovnih

*procesa koristi će imati i građani i mi kao institucija, a napraviti će i određene uštede", kazao je premijer **Mirza Ganić**.*



U toku je implementacija ovog softverskog rješenja u Kantonu Sarajevo, a od ranije se primjenjuje u još nekim administrativnim područjima u BiH, te Srbiji i Crnoj Gori. Iskustva sa sličnim informacionim sistemima su itekako pozitivna jer su procesi

transparentni, odvijaju se u digitalnom okruženju, omogućuje lako praćenje predmeta, nema mogućnosti gubljenja dokumenata, riješeno je pitanje arhive, kao i sva druga pitanja važna za kancelarijsko poslovanje.

"Optimizaciju poslovnih procesa nije moguće postići bez dobrih softverskih alata. Spremni smo prihvatiti sva rješenja koja su se u praksi pokazala uspješnim i integrisati u svoje procese, tako da ćemo kao vlada u narednom periodu donijeti odluku o budućem pravcu djelovanja", kazao je premijer ZDK. /kraj/

52. TEKUĆI TRANSFER ZA SPORT 800.000 KM, U ODNOSU NA 2018. POVEĆAN ZA 100.000 KM

ZENICA, 14.05.2019. - Vlada Zeničko-dobojskog kantona na današnjoj sjednici usvojila je program utroška sredstava Tekućeg transfera za sport Ministarstva za obrazovanje, nauku, kulturu i sport, u ukupnom iznosu od 800.000,00 KM. Transfer je namijenjen sportskim savezima, klubovima, sportskim udruženjima, udruženjima koja se bave organiziranjem sportskim aktivnostima te sportistima pojedincima.

Od ukupnog iznosa, za sufinansiranje kotizacija za natjecanja sportskih klubova planirano je 222.960,00 KM, podršku aktivnostima sportskih klubova 216.328,00 KM, aktivnosti klubova osoba sa invaliditetom 52.400,00 KM, kotizacije za natjecanje ovih klubova 5.050,00 KM, a aktivnosti saveza i udruženja osoba sa invaliditetom 30.500,00 KM. Podrška za natjecanja učenika osnovnih i srednjih škola i edukaciju učenika i nastavnika planirana je u iznosu od 52.500,00



KM, aktivnosti i natjecanja studenata Univerziteta u Zenici 17.480,00 KM, aktivnosti sportskih saveza ZDK i udruženja 21.500,00 KM, podrška perspektivnim i uspješnim sportistima planirana u iznosu od 46.200,00 KM, dok je podrška organizaciji međunarodnih turnira, sportskih mitinga i podrška vrhunskim sportistima, osvajačima medalje na OI, SP i EP planirana u iznosu od 70.000,00 KM.

*"U odnosu na 2018. godinu transfer za sport povećan je za 100.000,00 KM", kazao je resorni ministar **Spahija Kozlić**.*

Usvojen je i program utroška Tekućeg transfera za predškolski odgoj i obrazovanje, planiran u iznosu od 550.000,00 KM, a koji je namijenjen za finansiranje Programa obaveznog predškolskog odgoja i obrazovanja za djecu u godini prije polaska u osnovnu školu. Izvođenje programa počelo je 4. marta 2019. godine, a traje 180 sati.

"Realizaciju ovog transfera izvršit će 29 predškolskih ustanova u ZDK-u. Ove godine ukupno je upisano 2.716 djece i raspoređena su u 171 odgojnu grupu", kazao je Kozlić.

Također, usvojen je i program utroška Tekućeg transfera za zdravstvenu zaštitu neosiguranih osoba u ukupnom iznosu od 63.168,00 KM. Sredstva ovog transfera koriste se za zdravstveno osiguranje učenika i studenata na redovnom školovanju koji nisu zdravstveno osigurani po drugom osnovu, a u 2019. godini planirana su za 764 neosigurane osobe. /kraj/

53. DELEGACIJA VLADE OBIŠLA POPLAVLJENA PODRUČJA NA SJEVERU ZDK

ZENICA, 14.05.2019. - Delegacija Vlade Zeničko-dobojskog kantona u kojoj su bili premijer **Mirza Ganić**, ministar za prostorno uređenje, promet i komunikacije i zaštitu okoliša **Arnel Isak**, u svojstvu komandanta Kantonalnog štaba civilne zaštite, te ministri poljoprivrede, šumarstva i vodoprivrede **Mirnes Bašić**, ministar za boračka pitanja **Fahrudin Čolaković** i ministar privrede **Zlatko Jelić**, obišla je danas općine Tešanj, Doboj Jug i Usora u kojima je zbog razornih poplava proglašeno stanje prirodne nesreće.



Usljed izljevanja rijeke Usore u ove tri općine poplavljen je veliki broj domaćinstava i privrednih subjekata, uništena infrastruktura te poljoprivredni usjevi. Angažirane su službe civilne zaštite za zaštitu i spašavanje u ovim općinama i radi se na otklanjanju posljedica nevremena.

"Ovdje smo da pružimo podršku lokalnim vlastima i građanima. Vlada je na današnjoj

sjednici usvojila program utroška sredstava Kantonalne uprave civilne zaštite u kojem su planirana sredstva za hitne mjere i spašavanje, što nam omogućuje da pomognemo poplavljenim područjima", kazao je premijer Ganić. /kraj/

54. ŽELIMO PROFESIONALNU, EFIKASNU I DOBRO OPREMLJENU POLICIJU U ZDK

ZENICA, 15.05.2019. - Centralnoj svečanosti povodom 15. maja, Dana policije Zeničko-dobojskog kantona, prisustvovala je delegacija kantonalne Vlade koju je predvodio premijer **Mirza Ganić**. Čestitajući pripadnicima MUP-a Dan policije, premijer ZDK je odao posebno poštovanje policijskim službenicima koji su položili svoje živote u odbrani BiH ili u obavljanju drugih službenih dužnosti.

"Zaštita života i imovine te zajamčenih prava i sloboda građana je naša trajna obaveza. Svojim radom svjedočite da izvršavate ove obaveze i iskreno vam se zahvaljujem na tome. Ono što vas odlikuje jeste i činjenica da učestvujete u akcijama policijskih agencija na nivou FBiH i BiH, što potvrđuje vaš profesionalan odnos spram posla koji obavljate", kazao je Ganić.



Ekonomsko i socijalno stanje stanovništva, dodaje, utiče na sigurnosni ambijent koji je nažalost nepovoljan u BiH, što pogoduje razvoju organiziranog kriminala i porasta upotrebe opojnih droga.

"Stoga se kao imperativ nameće potreba za popunjavanjem redova policije mladim školovanim kadrovima, insistiranje na poštivanju najviših profesionalnih i etičkih standarda u radu, opremanje policije savremenom opremom i tehnologijama, a što je ujedno i dio Vladine vizije policije kao javnog servisa koji je takav trebao biti u službi građana. Mi želimo profesionalnu, efikasnu i dobro opremljenu policiju i radit ćemo u tom pravcu", poručio je premijer ZDK. /kraj/

55. CESTE FBiH ULAŽU DODATNA SREDSTVA KAKO BI SE UBRZALA REKONSTRUKCIJA TUNELA VRANDUK

ZENICA, 15.05.2019. - Problem odvijanja saobraćaja na dionici magistralnog puta M17 Zenica-Nemila, zbog rekonstrukcije tunela i dva mosta u Vranduku, bila je tema sastanka u Uredu premijera Zeničko-dobojskog kantona **Mirze Ganića**, kojem su, pored kantonalnog ministra prostornog uređenja, prometa i komunikacija i zaštite okoliša **Arnela Isaka** i predstavnika Kantonalne direkcije za ceste ZDK, prisustvovali predstavnici JP Ceste FBiH, Grada Zenice i mjesnih zajednica koje gravitiraju ovom području.

Direktor JP Ceste FBiH **Ljubo Pravdić** najavio je kako će ovo preduzeće investirati dodatnih oko 700.000 KM kako bi izvođač radova uveo nove tehnologije, a rok izvođenja radova smanjio sa 18 na 16 mjeseci.



Pravdić je podsjetio da su radovi započeti u septembru prošle godine, nakon čega je saobraćaj preusmjeren regionalnom cestom Nemila-Zenica, ali se zbog činjenice da ta regionalna cesta nije mogla izdržati promet, nakon mjesec i po pristupilo naizmjeničnom saobraćaju kroz tunele.

"Premijera smo upoznali da ćemo u dogovoru s izvođačem

radova skratiti rokove. Planiramo da se radovi završe u martu iduće godine. Planiramo uložiti dodatna sredstva kako bi izvođač prilagodio tehnologiju i izbjegao potpune obustave saobraćaja, što je bilo predviđeno na četiri mjeseca, jer bi to totalno uništilo regionalnu cestu i ljudima koji žive pored te ceste stvorilo dodatne probleme", kazao je Pravdić, dodajući da će se od septembra saobraćaj tokom dana puštati u oba smjera, a samo u večernjim satima, od 22.00 sata do ujutro, odvijat će se naizmjenično.

Nakon hitne sanacije udarnih rupa, regionalnom cestom ovog ljeta će moći saobraćati samo manja vozila, dok će se teški saobraćaj i dalje odvijati magistralnim putem M17 i kroz tunele.

Premijer Ganić, na čiju inicijativu je održan sastanak, smatra da je sastanak bio uspješan, posebno iz razloga što su prisustvovali i predstavnici mjesnih zajednica kroz koje prolazi zaobilaznica, te što su svi shvatili ozbiljnost problema. JP Ceste FBiH koje su rekonstrukciju tunela Vranduk ulažu 16,7 miliona KM, obavezale su se da će sanirati saobraćajnicu kojom će biti usmjeren saobraćaj tokom ljeta.

"Važno je kad se završi projekt da se regionalni put potpuno sanira, kako bi nakon ove čitave patnje stanovnicima naselja kroz koja prolazi zaobilaznica ostao lijep i uređen put. Postoji potreba za boljom koordinacijom između svih nivoa koji su uključeni u rekonstrukciju i održavanje puteva, kao i mjesnih zajednica. Čim se poboljša koordinacija imamo veći nivo razumijevanja, a kada imamo veći nivo razumijevanja onda možemo doći i do dogovarajućih rješenja", kazao je Ganić. /kraj/

56. TRANSFERI POJEDINCIMA I NEPROFITNIM ORGANIZACIJAMA: ZA SOCIJALNU POLITIKU I IZBJEGLICE 27,3 MILIONA KM

ZENICA, 16.05.2019. - Vlada Zeničko-dobojskog kantona usvojila je na svojoj 5. sjednici programe utroška sredstava tekućih transfera pojedincima i neprofitnim organizacijama Ministarstva za rad, socijalnu politiku i izbjeglice u ukupnom iznosu od 27.331.540 KM. Korisnici ovih transfera su centri za socijalni rad i nadležne općinske službe za socijalnu zaštitu i raseljena lica, ustanove socijalne zaštite, kantonalna i općinska/gradska udruženja, pravna i fizička lica na osnovu ugovora i lica u stanju socijalne potrebe.



Tekući transferi pojedincima planirani su u iznosu od 27.210.540 KM, od čega su naknade za porodijsko odsustvo 10.100.000 KM, dodatak za djecu 3.500.000 KM, novčana pomoć za nezaposlene porodilje 80.000 KM, pomoć u prehrani djeteta do šest mjeseci i dodatna ishrana za majke dojilje 280.000 KM, a jednokratna pomoć za opremu novorođenog djeteta 70.000 KM. Izdvajanja za civilne žrtve rata planirana su u iznosu od 3.230.000 KM, sredstva za poticaj povratka izbjeglih i raseljenih lica

400.000 KM, izdaci za raseljena lica 87.540 KM, transfer za alternativni smještaj 65.000 KM, transfer za osobe sa invaliditetom 42.000 KM. Za smještaj u ustanove socijalne zaštite planirano je 5.050.000 KM, smještaj u drugu porodicu 300.000 KM, Centar za djecu i odrasle osobe sa posebnim potrebama ZDK 1.030.000 KM, stalnu novčanu pomoć 1.300.000 KM, osposobljavanje za život i rad 115.000 KM, a zdravstvenu zaštitu neosiguranih lica 135.000 KM.

*"Ukupan iznos planiranih sredstava za ova dva transfera ostao je na nivou iz 2018. godine, ali su se desile određene promjene u raspodjeli po pojedinim stavkama. Imamo tendenciju povećanja broja zaposlenih porodilja, pa je tako transfer za porodijsko odsustvo u odnosu na prošlogodišnji plan povećan za oko 850.000 KM. Planirali smo i povećanje transfera za smještaj u ustanove socijalne zaštite za 600.000 KM, a razlog je povećanje cijene troškova smještaja u ustanovama zaštite. Također, izdvajanja za stalnu novčanu pomoć povećana su za oko 150.000 KM, a razlog je blagi porast broja korisnika kao i rast prosječne plaće u ZDK koja je osnov za obračun i isplatu ovih naknada", pojašnjava ministrica za rad, socijalnu politiku i izbjeglice **Azra Šabanović**.*

Ostali socijalni transferi planirani su u iznosu do 1.060.000 KM, od čega je za finansiranje Sigurne kuće za žene žrtve nasilja u porodici i zajednici sa područja općina ZDK-a nevladine organizacije Medica Zenica opredijeljeno 54.720 KM, pomoć javnim-humanitarnim kuhinjama 240.000 KM, jednokratne i privremene novčane pomoći 165.100 KM, sufinansiranje obnove stambenih objekata, obnovu infrastrukturnih

objekata te plaćanje privremenog smještaja za osobe nastradale usljed elementarnih nepogoda 85.000 KM, podršku u radu Roditeljske kuće za djecu koja boluju od raka u FBiH 20.000 KM, socijalno zbrinjavanje osoba koje su usljed stečaja, likvidacije ili prestrukturiranja ostale bez posla 140.000 KM, novčanu pomoć socijalno-intervenirajućeg karaktera 110.000 KM, a ostale potrebe i intervencije socijalno-zaštitnog karaktera 245.180 KM.

Transfer JU Službi za zapošljavanje za podsticaj aktivnih mjera zapošljavanja iznosi 200.000 KM, poticaji zapošljavanja mladih 135.000 KM, dok je transfer za Ekonomsko socijalno vijeće i Mirovno vijeće planiran u iznosu od 31.000 KM.

Za tekuće transfere neprofitnim organizacijama opredijeljeno je ukupno 121.000 KM, od čega je transfer udruženjima 81.000 KM, transfer za Crveni križ 10.000 KM, a za obilježavanje Dječije nedjelje planirano je 30.000 KM. /kraj/

57. DELEGACIJA VLADE ZDK OBIŠLA POPLAVLJENA PODRUČJA U OPĆINI MAGLAJ



ZENICA, 16.05.2019. - Delegacija Vlade Zeničko-dobojskog kantona obišla je poplavljena područja u općini Maglaj. Premijer **Mirza Ganić** te ministri **Arnel Isak**, **Fahrudin Čolaković** i **Mirnes Bašić**, u pratnji maglajskog načelnika **Mirsada Mahmutagića**, obišli su mjesta u novošeherskom kraju - Kopice, Čobe, Domislica i Liješnica, gdje su poplave prčinile veliku štetu na infrastrukturi i poljoprivrednim usjevima.

"Ovdje smo da damo podršku građanima koji su pretrpjeli štete u poplavama. Moramo svi zajedno učiniti više da iznađemo sredstva za projekte prevencije, kako bi se posljedice prirodnih nepogoda u budućnosti svele na najmanju moguću mjeru", kazao je premijer Ganić. /kraj/

58. SVEČANO OTVOREN NOVI MOST U JELAHU: VLADA ZDK FINANSIRALA IZGRADNJU SA 1,5 MILIONA KM

TEŠANJ, 17.05.2019. - Prigodnom svečanošću ozvaničen je završetak izgradnje mosta preko rijeke Usore u Jelahu, općina Tešanj. Projekt vrijedan 1,8 miliona KM finansirali su Vlada Zeničko-dobojskog kantona, koja je putem Ministarstva za prostorno uređenje, promet i komunikacije i zaštitu okoliša te Direkcije za ceste ZDK obezbijedila 1,5 miliona KM, te općina Tešanj koja je osigurala ostatak sredstava.



*"Izuzetno sam sretan što ulažemo finansijska sredstva u razvoj infrastrukture, jer bez dobro razvijene infrastrukture ne možemo imati ni dobro razvijene lokalne zajednice. Vlada ZDK je trajno opredjeljena za razvoj infrastrukture i mi ćemo u narednom periodu raditi na realizaciji ovakvih i sličnih projekata. Ovaj most koji spaja dvije obale je jedna predivna građevina, ona treba da oslika naše jedinstvo i da izvučemo pouku i poruku da budemo jedno - jedno koje spaja i jedno koje će zauvijek trajati", kazao je premijer **Mirza Ganić**, koji je predvodio delegaciju Vlade Zeničko-*

*dobojskog kantona u kojoj su, među ostalima, bili ministar za prostorno uređenje, promet i komunikacije **Arnel Isak** i direktor Kantonalne direkcije za ceste **Refik Zeković**.*

Izgradnja mosta, projektovanje i nadzor koštali su 1,5 miliona KM, dok je ostatak sredstava investiran u zaobilaznicu i gradnju privremenog mosta.

*"Vjerujem da izgradnja ovog mosta obezbjeđuje budućnost ravnomjernog razvoja obje obale Usore, te da će donijeti sigurnost pješaka i svih učesnika u saobraćaju. Ovo je generacijski projekat i nadam se da će most koristiti i naši unuci za 50 ili 100 godina", kazao je općinski načelnik **Suad Huskić**, izrazivši posebnu zahvalnost prethodnoj kantonalnoj Vladi na čelu sa premijerom **Miralemom Galijaševićem** koja je osigurala sredstva i bezrezervno podržala izgradnju novog mosta na mjestu gdje se nalazio stari most izgrađen prije 70 godina.*



Novi most nosi ime **Lejle Mulalić**, petogodišnje djevojčice koja je 4. juna 1992. godine poginula u naručju svoje majke i prva je žrtva agresije na BiH u Jelahu. /kraj/

59. SUBVENCije PREDUZEĆIMA I PODUZETNICIMA 2,4 MILIONA KM

ZENICA, 17.05.2019. - Vlada Zeničko-dobojskog kantona, na svojoj 5. sjednici, usvojila je Program utroška budžetskih sredstava Ministarstva za privredu namijenjenih za subvencije privatnim preduzećima i poduzetnicima - ESCROW u iznosu od 2,4 miliona KM.

Od ukupnog iznosa, za razvoj konkurentnosti privrede planirano je 750.300 KM, od toga za podršku jačanja konkurentnosti kroz investiranje u opremu, obuke radne snage, promociju i sajmove, standarde i kontrolu kvalitete te patente 700.000 KM, dok je za subvencioniranje projekata komora i udruženja iz



područja privrede opredijeljeno 50.300 KM.

Razvoj poduzetništva i poduzetničke kulture Ministarstvo privrede će poticati sa iznosom od 600.000 KM, kroz subvencioniranje administrativnih troškova i investicija kod obrta (300.000 KM) te subvencioniranje administrativnih troškova kod pokretanja poslovnih ideja i registracije privrednih subjekata (300.000 KM).

Za razvoj turističke infrastrukture i ponude planirano je 542.650 KM - od toga, za subvencioniranje izgradnje i obnove javne turističke infrastrukture 500.000 KM te subvencioniranje povećanja iskorištenja kapaciteta u ugostiteljskim objektima za smještaj i seoskom turizmu 42.950 KM. U 2019. godinu je preneseno i neisplaćenih 397.050 KM poticaja za projekte razvoja turističke infrastrukture koji su odobreni prošle godine.

*"U odnosu na prošlu godinu, planirani iznos sredstava za subvencije preduzećima je povećan za 400.000 KM. Javni pozivi će biti raspisani krajem ovog mjeseca", kazao je ministar privrede **Zlatko Jelić**. /kraj/*

60. PREMIJER GANIĆ POSJETIO FIRMU SECOM VISOKO



VISOKO, 17.05.2019. - Premijer ZDK **Mirza Ganić** posjetio je danas firmu Secom d.o.o. Visoko gdje je sa vlasnikom i direktorom **Mirzom Semićem** razgovarao o problematici sirovine u drvoprerađivačkoj industriji te osiguranju neophodnih količina za sve drvoprerađivače sa područja ZDK-a.

Također, razgovarano je i o plasmanu proizvoda na inozemno tržište, jer ova kompanija najveći dio svoje proizvodnje izvozi. Posjeta je okončana obilaskom proizvodnih pogona. /kraj/

61. PREMIJER GANIĆ PISAO PREMIJERU NOVALIĆU: PONOVO RAZMOTRITI INICIJATIVU DA SE KBZ-U DODIJELI STATUS UNIVERZITETSKE BOLNICE

ZENICA, 20.05.2019. - Premijer Zeničko-dobojskog kantona **Mirza Ganić** uputio je pismo premijeru FBiH Fadilu Novaliću i federalnom ministru zdravstva Vjekoslavu Mandiću u kojem traži da se još jednom razmotri inicijativa da se Kantonalnoj bolnici Zenica dodijeli status univerzitetske bolnice.

Zastupnica u Parlamentu FBiH prof.dr. **Belma Pojskić** uputila je nedavno inicijativu za usklađivanje Pravilnika o uvjetima koje moraju ispunjavati bolnice za dodjelu naziva univerzitetska bolnica sa



odredbama Zakona o zdravstvenoj zaštiti Federacije BiH, nakon što je Vlada FBiH odbila da zeničkoj bolnici dodijeli ovaj status, uz obrazloženje da ne ispunjava uvjete iz navedenog pravilnika.

"U KBZ se već provodi praktičan rad za studente Zdravstvenog fakulteta, i to bez problema ali, nažalost, zbog odredbi navednog Pravilnika to nije moguće za studente Medicinskog fakulteta. S

obzirom da je veliko interesovanje mladih za upis na Medicinski fakultet i stalna potreba naših zdravstvenih ustanova za upošljavanjem doktora medicine, apeliramo da ponovo razmotrite naš zahtjev za usklađivanjem Pravilnika sa zakonom, što bi omogućilo KBZ da bude nastavna baza za studente fakulteta zdravstvenog smjera, odnosno kako bi se na zakonit način reguliralo zvanje univerzitetske bolnice, te kako bi se omogućio rad velikom broju stručnjaka iz KBZ da rade na Medicinskom fakultetu i KBZ-u u skladu sa važećim zakonskim propisima", navodi u pismu premijer Ganić. /kraj/

62. ZA MEDICINSKU REHABILITACIJU BRANITELJSKE POPULACIJE 300.000 KM

ZENICA, 20.05.2019. - Zeničko-dobojski kanton dugi niz godina izdvaja značajna finansijska sredstva za medicinsku rehabilitaciju branitelja i članova njihovih porodica. Ministarstvo za boračka pitanja je 2018. godine sa tri banjska lječilišta - JZU Banjsko-rekreativni centar "Aquaterm" Olovo, JU Rekreativno-rehabilitacijski centar "Reumal" Fojnica i JZU Centar za fizikalnu medicinu, rehabilitaciju i banjsko liječenje "Ilidža" Gradačac, potpisalo trogodišnji ugovor vrijedan 900.000 KM.

*"Sve je veća potreba braniteljske populacije za medicinskom rehabilitacijom, jer je usljed starenja povećan broj oboljenja na lokomotornom sistemu. Prošle godine je za rehabilitaciju 364 korisnika utrošeno 296.410 KM, što predstavlja izvršenje godišnjeg plana od 98,8 posto. Očekujemo da ćemo i ove godine utrošiti planirani iznos od 300.00 KM", kazao je resorni ministar **Fahrudin Čolaković**.*

Ističe kako su korisnici zadovoljni nivoom zdravstvenih i drugih usluga, posebno u "domaćem" olovskom "Aquatermu", koji svake godine povećava broj pacijenata, a u to lječilište je prošle godine upućena polovina ukupnog broja korisnika programa medicinske rehabilitacije iz ZDK-a. U RRC "Reumal" upućuju se teško pokretni ili potpuno nepokretni pacijenti, dok se u banju "Ilidža" Gradačac upućuje najmanji broj pacijenata, oko 15 posto ukupnog broja, i to uglavnom pripadnici braniteljske populacije iz općina koje geografski gravitiraju tom lječilištu. /kraj/



63. ISPLAĆENA PRVA RATA BORAČKIH STIPENDIJA ZA 2.232 KORISNIKA

ZENICA, 21.05.2019. - Vlada Zeničko-dobojskog kantona je osigurala i izvršila isplatu prve rate stipendija za 2.232 korisnika stipendija za studijsku 2018/2019. godinu u iznosu od 304.200,00 KM. Visina stipendije za prvu godinu je 800,00 KM, za drugu i ostale godine studija te za prvu i drugu godinu drugog ciklusa 1.200,00 KM, a isplata se vrši u osam jednakih rata.

Raspodjela sredstava po lokalnim zajednicama za jednu ratu je sljedeća: Grad Zenica – 70.850,00 KM, Općina Breza – 13.650,00 KM, Općina Doboju Jug – 8.200,00 KM, Općina Kakanj – 28.000,00 KM, Općina Maglaj – 20.550,00 KM, Općina Olovo – 13.300,00 KM, Općina Tešanj – 23.950,00 KM, Općina Usora –

6.850,00 KM, Općina Vareš – 10.800,00 KM, Općina Visoko – 38.250,00 KM, Općina Zavidovići – 36.550,00 KM i Općina Žepče – 33.250,00 KM.



U Budžetu ZDK za 2019. godinu za ovu namjenu osigurana su sredstva u iznosu od 2.433.600,00 KM. U tekućoj budžetskoj godini Vlada ZDK-a je obezbijedila

sredstva za 384 stipendije više (391.600,00 KM) nego prethodne studijske godine i na taj način omogućila, po prvi put u dugogodišnjoj praksi, da stipendiju dobiju svi redovni i samofinansirajući studenti prvog i drugog ciklusa Bolonjskog sistema studiranja koji su aplicirali na konkurs Ministarstva za boračka pitanja, a koji su ispunjavali formalne uslove. /kraj/

64. U ZDK POČELA IMPLEMENTACIJA PROGRAMA ŠKOLE ZA 21. VIJEK

ZENICA, 21.05.2019. - Trodnevnom obukom i radionicama za direktore 53 osnovne škole sa područja Zeničko-dobojskom kantonu, koja je počela danas u Zenici, u ovom kantonu je krenula implementacija trogodišnjeg programa "Škole za 21. vijek". Uz finansijsku podršku Vlade Velike Britanije, program zajedno implementiraju britanska organizacija "British Council" i Ministarstvo za obrazovanje, nauku, kulturu i sport ZDK-a.

Program "Škole za 21. vijek" istovremeno se implementira u šest zemalja Zapadnog Balkana, a na području



ZDK-a bit će obuhvaćeno oko 16.400 učenika uzrasta od 10 do 15 godina. Svim školama će u okviru ovog programa biti donirani Micro: bit uređaji za kodiranje, kako bi se poboljšale i unaprijedile vještine kodiranja, rješavanja problema i kritičkog mišljenja.

"Vještine kritičkog razmišljanja, rješavanja problema i programiranje uređaja su vještine s kojima se mi već svakodnevno susrećemo. Djeca su ta koja rade na razvijanju svoje kreativnosti uz pomoć tehnologija.

Ovaj program će nam dati priliku da skupa sa nastavnicima i direktorima i cjelokupnim obrazovnim sistemom ojačamo kapacitete samih škola, kako bismo svi mi u nastavnom procesu dali podršku djeci koja već napreduju velikim koracima i prema zanimanjima u budućnosti, a i aktuelnim trendovima digitalizacije u svijetu", kazala je Larisa Halilović, direktorica British Councila u BiH.

Ministarstvo za obrazovanje, nauku, kulturu i sport, pored ovog pokrenulo je aktivnosti na realizaciji još



dva važna projekta čiji je cilj poboljšanje odgoja i edukacije djece i odraslih u ZDK-u. Prvi je uvođenje dualnog obrazovanja na osnovu memoranduma koji je potpisan sa EBRD-om, a drugi je projekt obrazovanja odraslih koji se implementira u saradnji s njemačkom organizacijom DVV, uz učešće Univerziteta u Zenici.

"Nama je zaista cilj da popravimo edukaciju na području ZDK-a, kako u osnovnim i srednjim školama

tako i UNZE. Posebice su važna djeca jer je danas odgoj osnova bilo čega drugog i u tom smislu ovaj projekat nastoji da djecu skloni sa stranica na internetu koje za njih nisu primjerene i da ih usmjerimo u pravcu u kojem djeca trebaju da idu", kazao je ministar obrazovanja prof.dr. Spahija Kozlić.

Program "Škole za 21. vijek" finansira Vlada Ujedinjenog Kraljevstva sa 10 miliona funti, a provodi se u isto vrijeme u šest zemalja - BiH, Srbiji, Crnoj Gori, Makedoniji, Albaniji i Kosovu. Prije Zeničko-dobojskog kantona, implementacija je započeta u Kantonu Sarajevo, Kantonu 10 i Zapadno-hercegovačkom kantonu, a u toku su pregovori o implementaciji na području entiteta Republika Srpska. /kraj/

65. OSNOVNA ŠKOLA U VELIKOM ČAJNU DOBILA MODERNU FISKULTURNU SALU: VLADA ZDK FINANSIRALA ADAPTACIJU SA 61.000 KM

VISOKO, 22.05.2019. - U OŠ "Musa Ćazim Ćatić" u Velikom Čajnu kod Visokog, na Dan škole, svečano je ozvaničen završetak radova na rekonstrukciji fiskulturne sale. Projekt ukupne vrijednosti 87.000 KM najvećim dijelom je finansirala Vlada Zeničko-dobojskog kantona, koja je putem Ministarstva za obrazovanje, nauku, kulturu i sport izdvojila 61.000 KM, instalisanje grijanja finansirala je Općina Visoko sa 15.000 KM, dok je kompanija „Prevent“ uložila 11.000 KM u zamjenu krova.



Direktorica **Amra Pajt** posebno se zahvalila premijeru **Mirzi Ganiću**, koji je prošle godine, prije imenovanja na premijersku dužnost, svojim zalaganjem doprinio da se obezbijede sredstva za rekonstrukciju sale, na što se čekalo 25 godina.

"Pokazali smo da zajedno možemo uraditi mnogo za našu zajednicu. Iskreno se nadam da ćemo nastaviti raditi na taj način i u budućе, jer samo tako možemo da

stvaramo plodove rada koji ostaju generacijama da ih koriste", kazao je premijer Ganić, koji je presjekao svečanu vrpcu zajedno sa kantonalnim ministrom obrazovanja, nauke, kulture i sporta Spahijom Kozličem, direktoricom škole te predstavnicima Općine Visoko.

Ministar Kozlić je istakao kako će ovo ministarstvo nastaviti s ulaganjima u školsku infrastrukturu širom ZDK-a, ali da će se posebno fokusirati na prilagođavanje nastavnih planova kako bi djeca efikasnije koristila stečena znanja, kao i odgoju i promociji temeljnih vrijednosti društva.

Premijer Ganić i ministar Kozlić potom su posjetili OŠ "Mula Mustafa Bašeskija" u Donjem Moštru, gdje je prije nekoliko godina započeta izgradnja nove školske zgrade, koja bi trebala riješiti prostorne probleme



jedne od najvećih osnovnih škola u ZDK-u, koju u centralnoj i četiri područne škole pohađa 1.160 učenika. Zbog nedostatka prostora nastava se odvija u tri smjene. Ukupna vrijednost projekta je 1,2 miliona KM, a za završetak izgradnje nove zgrade potrebno je obezbijediti još 400.000 KM.

"Nastojat ćemo da ove i naredne godine zaokružimo finansijsku konstrukciju kako bi

učenici i nastavnici dobili adekvatne uslove za rad i boravak u školi", kazao je Ganić.

Također, posjetili su i Područnu školu "Orašac" u kojoj je zahvaljujući "Caritasu" realiziran projekt utopljanja te instalirano geotermalno grijanje. Preostalo je još da se riješi pitanje snabdijevanja vodom, jer je postojeći bunar potpuno zagađen, u čemu je obećana pomoć kantonalne Vlade. /kraj/

66. PREMIJER MIRZA GANIĆ NOVI PREDSJEDNIK ESV ZDK

ZENICA, 23.05.2019. - Ekonomsko-socijalno vijeće (ESV) za područje Zeničko-dobojskog kantona, na svojoj prvoj sjednici nakon imenovanja nove kantonalne vlade, izabralo je premijera ZDK **Mirzu Ganića** za prvog predsjednika ovog tijela. Težište današnje sjednice bilo je na Prostornom planu grada Zenice te Uredbi o postupku prijema u radni odnos u javnom sektoru u ZDK-u.

"Dogovoreno je da se uputi inicijativa prema resornom ministarstvu i Vladi ZDK da Prostorni plan u što kraćem periodu upute na usvajanje u Skupštini ZDK-a te apelira na skupštinske zastupnike da Plan usvoje, jer će se time povećati nivo investicija i izgradnja na području Zenice", kazao je Ganić.



Uredba o zapošljavanju u javnom sektoru u ZDK-u, izuzimajući zapošljavanje u državnoj službi koje je od ranije regulisano propisima, uvažila je većinu prijedloga i primjedbi koje su dostavljene u fazi izrade teksta Uredbe, a određeni prijedlozi izneseni su i na današnjoj sjednici ESV-a.

"Resorno ministarstvo je zaduženo da analizira iznesene prijedloge, kako bi Uredba mogla biti dostavljena Vladi na

usvajanje. Najvažnije je da smo prepoznali zajednički interes da Uredba definiše određene podzakonske okvire koji će spriječiti mogućnost zloupotreba u toj oblasti, ali da istovremeno Uredba ne bude omča koja će usporavati zapošljavanje u javnom sektoru", kazao je Ganić.

Predsjednik UO Udruženja poslodavaca **Ibrahim Meškić** izrazio je zadovoljstvo što se novi saziv Vlade opredijelio za nastavak socijalnog dijaloga i već na prvoj sjednici ESV-a prihvatio inicijativu privrednika da se ubrza donošenje Prostornog plana grada Zenice.

"Izuzetno je važno da se nastavi socijalni dijalog kroz rad ESV-a koje je u mandatu prethodne vlade održalo čak 12 sjednica", kazao je Meškić.

Predsjednik KO SSS ZDK **Mirnes Isaković** pozdravio je opredjeljenje nove Vlade, naročito zbog značaja ESV-a kod usaglašavanja novih zakonskih rješenja važnih za život građana ZDK-a. /kraj/

67. PREMIJER GANIĆ POSJETIO KOMPANIJU PAK RAMPART U VISOKOM

VISOKO, 24.05.2019. - Premijer Zeničko-dobojskog kantona **Mirza Ganić** posjetio je kompaniju "PAK Rampart" u Visokom, jednog od najvećih proizvođača keksa i vafla u BiH koji veći dio proizvodnje plasira na strano tržište.



Sa direktorom i vlasnikom **Nihadom Smailagićem** razgovarao je o plasmanu proizvoda na američko i azijsko tržište te saradnji sa velikim trgovačkim lancima u Evropi, kao što su "Lidl", "Spar", "Kaufland"...

"Radi se o domaćoj kompaniji koja svojim kvalitetom svakodnevno osvaja tržište. Ovakve kompanije jačaju ekonomiju ZDK, stvaraju novu vrijednost i zapošljavaju, zbog čega zaslužuju pažnju vlade", kazao je premijer Ganić. /kraj/

68. FOND ZA ZAŠTITU OKOLIŠA ZDK: POLA MILIONA KM ZA ČIŠĆENJE OBALA RIJEKE BOSNE

ZENICA, 24.05.2019. - Vlada Zeničko-dobojskog kantona, na svojoj 6. sjednici, usvojila je Program utroška sredstava Fonda za zaštitu okoliša za 2019. godinu u ukupnom iznosu od 2.540.000,00 KM. Od toga, za finansiranje ekoloških projekata planiran je iznos od 1,5 miliona KM, tekuće transfere neprofitnim organizacijama 150.000,00 KM, dok je za nabavku opreme planirano 850.000 KM.

Programom su, po prvi put, planirana sredstva za čišćenje obala rijeke Bosne. Ukupno 500.000,00 KM putem javnog poziva bit će usmjereno prema općinama u slivu rijeke Bosne u ZDK-u. Nedovoljan obuhvat organiziranim sakupljanjem otpada u općinama, kao i štete nastale od posljedica elementarnih nepogoda, posredno utiču na onečišćenje obala rijeka različitim vrstama otpada. Pored



finansijskog, ekološkog i tehničkog, ovo predstavlja i krupan društveno sociološki problem - naglašava **Arnel Isak**, ministar za prostorno uređenje, promet i komunikacije i zaštitu okoliša ZDK.

"Na ovaj način ćemo pomoći općinama u realizaciji projekata koji se odnose na aktivnosti uklanjanja divljih deponija sa obala i korita rijeke Bosne, čišćenje priobalnog pojasa od krutog otpada, PET i PVC otpada, kao i svih drugih vrsta ambalažnog otpada, te omogućavanje prohodnosti i pješačenja kroz kresanje granja, drveća i šiblja", kaže Isak.

U Vladi očekuju da će projekt doprinijeti podizanju ekološke svijesti građana i smanjenju onečišćenja obala Bosne duž njenog toka kroz ZDK od Visokog do Doboj Juga.

*"Naše opredjeljenje je da u ovom mandatu kroz ovaj i slične projekte omogućimo da se temeljito očisti i uredi korito rijeke Bosne, ali i ostalih rijeka u ZDK. Također, moramo raditi i na podizanju ekološke svijesti građana, jer je to ključ zdravlja nas i budućih generacija", kaže premijer **Mirza Ganić**.*

Programom utroška sredstava Fonda, planirana je i pomoć općinama ZDK u postupku zbrinjavanja komunalnog otpada te podizanje svijesti o okolišu kroz konkretne projekte nevladinog sektora i medija. Za nabavku opreme za tretman infektivnog otpada u zdravstvenim ustanovama na području ZDK planirano je 850.000,00 KM, a 100.000,00 KM planirano je za projekt izgradnje Eko kuće Smetovi kod Zenice. /kraj/

69. TRANSFER ZA KANTONALNU BOLNICU ZENICA PLANIRAN U IZNOSU OD 1.150.00,00 KM

ZENICA, 27.05.2019. - Vlada Zeničko-dobojskog kantona usvojila je na 6. sjednici Program utroška sredstava planiranih u budžetu ZDK-a za 2019. godinu na poziciji Tekući transferi drugim nivoima vlasti i drugi tekući rashodi Ministarstva zdravstva, u ukupnom iznosu od 1.650.900,00 KM.

Od toga, za JU Kantonalna bolnica Zenica planiran je transfer u iznosu od 1.150.000,00 KM, od čega je 950.000,00 KM opredijeljeno za pokriće dijela troškova tekućeg održavanja opreme i informacionih sistema KBZ-a. Preostalih 200.000,00 KM planirano za plaćanje poreza na dodatnu vrijednost za realizaciju projekta "Poboljšanje energetske efikasnosti u JU Kantonalna bolnica Zenica", s obzirom da prema ugovoru o zajmu vrijednom 10 miliona eura, koji je potpisan sa Evropskom bankom za obnovu i razvoj (EBRD), sredstva za plaćanje PDV-a treba obezbijediti Zeničko-dobojski kanton.



*"Sredstva će se transferirati na račun JU Kantonalna bolnica Zenica na osnovu pojedinačnih odluka Vlade ZDK kojima će biti preciziran način i dinamika transferiranja sredstava", kaže **dr. Adnan Jupić**, ministar zdravstva ZDK.*

Transfer za Kantonalni zavod za bolesti ovisnosti iznosi 130.000,00 KM, Kantonalni zavod za medicinu rada i sportsku medicinu 29.000,00 KM, plus 125.000,00 KM za zdravstvenu zaštitu sportista,

Institut za zdravlje i sigurnost hrane Zenica 88.900,00 KM te dodatnih 20.000,00 KM za istraživanje. Za nabavku vakcina planirano je 70.000,00 KM, sistematske preglede školske i predškolske djece u domovima zdravlja 25.000,00 KM, dok je domovima zdravlja planiran transfer za mrtvozorstvo u iznosu od 3.000,00 KM.

U okviru transfera neprofitnim organizacijama, planirano je 10.000,00 KM udruženjima za dobrovoljno darivanje krvi. /kraj/

70. JAVNI POZIVI ZA DODJELU 2,4 MILIONA KM SUBVENCIIJA PRIVREDNIM DRUŠTVIMA U ZDK OTVORENI DO 27. JUNA

ZENICA, 28.05.2019. - Ministarstvo za privredu Zeničko-dobojskog kantona objavilo je sedam javnih poziva za dodjelu finansijskih sredstava poslovnim subjektima u okviru programa subvencija vrijednog 2,4 miliona KM. Javni pozivi su objavljeni na internet stranici Vlade Zeničko-dobojskog kantona (zdk.ba), a otvoreni su do 27. juna.



Za podršku razvoju konkurentnosti privrede opredijeljeno je 700.000,00 KM, što je pojedinačno i najvrjednija grant shema. Od toga, za tehnološko unapređenje MSP-a, unapređenje kvaliteta proizvoda i standardizaciju poslovanja i proizvodnih procesa predviđeno je 500.000,00 KM, za prekvalifikaciju i dokvalifikaciju radnika radi postizanja višeg stepena produktivnosti i kreiranje radnih mjesta 125.000,00 KM, a za pristup tržištu i promociju proizvoda malih i srednjih preduzeća (MSP) 75.000,00 KM.

Na javni poziv za podršku konkurentnosti mogu se prijaviti MSP koja posluju minimalno šest mjeseci te imaju tri i više zaposlenih. Podnosilac prijave mora osigurati vlastito finansiranje od minimalno 50 posto ukupnog iznosa za realizaciju predloženog projekta.

*"Očekivani rezultati grant sheme su da u roku od 12 mjeseci minimalno 21 malo i srednje preduzeće ostvari povećanje prihoda, po mogućnosti izvoznih poslova, u iznosu od minimalno tri posto u odnosu na ostvareni prihod iz prošle godine, da kreira najmanje 50 novih radnih mjesta kao rezultat unapređene tehnološke opremljenosti, obučene radne snage i promocije podržanih MSP-a te da se unaprijede znanja i kvalifikacija najmanje 70 osoba za bolji pristup tržištu rada", kaže **Zlatko Jelić**, ministar privrede ZDK.*

Također, objavljen je javni poziv za podršku fizičkim licima i obrtima za subvencioniranje administrativnih troškova kod pokretanja poslovnih ideja i registracije privrednih subjekata, zatim za subvencioniranje investicija kod obrta iz područja prerađivačkih djelatnosti i starih zanata, kao i subvencioniranje administrativnih troškova kod pokretanja poslovnih ideja i registracije privrednih subjekata - samo za korisnike koji su prošle godine koristili prvu godinu poticaja "troškovi doprinosa za uposlenika privrednog sistema". Predloženi projekti moraju biti završeni najkasnije šest mjeseci nakon potpisivanja ugovora.

"Prednost prilikom rangiranja projekata imat će preduzeća koja izvoze 50 posto i više prometa, čije vlastito učešće u projektu iznosu više od 50 posto, koja su u većinskom vlasništvu osoba mlađih od 35 godina starosti ili u vlasništvu žena, posluju u općinama koje su izrazito nerazvijene ili nedovoljno razvijene, do sada nisu koristila naše poticaje, obavljaju pretežnu djelatnost proizvodnje s visokim stepenom finalizacije, unapređenje tehnološke opremljenosti za rezultat ima novo zapošljavanje te doprinosi integraciji inovacija u poslovanje", kaže Jelić, napominjući da se ove godine po prvi put mogu prijaviti i firme iz IT sektora.

Ministarstvo za privredu objavilo je i javni poziv za dodjelu subvencija za projekte izgradnje i obnove javne turističke infrastrukture, za subvencioniranje povećanja iskorištavanja kapaciteta u ugostiteljskim objektima iz skupine "druge vrste objekata za smještaj", "ugostiteljske usluge u domaćinstvu" i "ugostiteljski objekti u seoskom domaćinstvu" i podsticanje turizma u seoskim domaćinstvima, a posljednji je javni poziv za dodjelu i refundiranje subvencija za projekte komora i udruženja iz područja privrede.



Premijer Mirza Ganić ističe kako Vlada kroz ovakve programe subvencija želi vratiti privredi dio sredstava koja preduzeća izdvajaju prema državi te na taj način pomoći jačanje konkurentnosti, otvaranje novih radnih mjesta i zadržavanje liderske pozicije ZDK-a u izvozu.

"Privrednici moraju biti tretirani kao osobe od najvišeg javnog interesa, jer oni otvaraju radna mjesta i svojim znanjem i radom stvaraju dodatnu vrijednost, a svi zajedno omogućuju punjenje budžeta", kaže premijer Ganić. /kraj/

71. MUP ZDK PLANIRA KAPITALNA ULAGANJA U IZNOSU OD 930.000 KM

ZENICA, 28.05.2019. - Ministarstvo unutrašnjih poslova Zeničko-dobojskog kantona planira u 2019. godini realizirati kapitalna ulaganja u iznosu od 930.000 KM, od čega će 800.000 KM biti utrošeno za nabavku opreme, a 135.000 KM za rekonstrukciju i investiciono održavanje prostorija i zgrada organizacionih jedinica MUP-a.



Prema programu utroška sredstava, kojeg je Vlada ZDK usvojila na 6. sjednici, pored ostaloga, planirana je nabavka specijalnih kombi vozila i putničkih vozila, alkometara, mobilnih radara, opreme za krim-tehniku, računara i kancelarijske opreme te dogradnja video nadzora u PS Breza i PS Visoko.

MUP planira uložiti 140.000 KM u rekonstrukciju elektromreže u organizacionim jedinicama MUP-a, rekonstrukciju sistema ventilacije u prostorijama centralne arhive te rekonstrukciju lifta u sjedištu MUP-a u Zenici.

U okviru stavke "nabavka stalnih sredstava u obliku prava" planirano je 40.000 KM za nabavku licenci za vještačenje mobitela kao i nadogradnju, optimizaciju i administraciju softvera za automatsku obradu prekršaja sa radarskih sistema. /kraj/

72. VLADA USVOJILA UREDBU O POSTUPKU PRIJEMA U RADNI ODNOS U JAVNOM SEKTORU ZDK – BIRA SE PRVORANGIRANI KANDIDAT

ZENICA, 29.05.2019. - Vlada Zeničko-dobojskog kantona usvojila je Uredbu o postupku prijema u radni odnos u javnom sektoru u ZDK-u, kojom se regulira postupak zapošljavanja u zavodima, agencijama, direkcijama, pravnim licima sa javnim ovlaštenjima na teritoriji ZDK, javnim ustanovama i javnim preduzećima čiji je osnivač ZDK, Grad ili općina, te u privrednim društvima u kojima ZDK, Grad ili općine učestvuju sa više od 50 posto ukupnog kapitala. Uredba se ne odnosi na postupak prijema radni odnos državnih službenika i namještenika u organima državne službe, kao i na postupak zapošljavanja u javno-obrazovnim ustanovama u državnoj svojini, koji su regulisani posebnim zakonima i podzakonskim propisima.



"Dosadašnja uredba je pretrpjela značajnu transformaciju. Ministarstvo je s ciljem obezbjeđenja transparentnosti u pripremi propisa provelo konsultacije sa zainteresiranom

*javnošću na način da je prijedlog Uredbe dostavljen Savezu samostalnih sindikata BiH - Kantonalni odbor ZDK, Udruženju poslodavaca ZDK, Timu Vlade ZDK za borbu protiv korupcije i organizaciji Transparency International BiH. Veći broj primjedbi je ugrađen u konačnu verziju Uredbe", kaže **Azra Šabanović**, ministrica za rad, socijalnu politiku i izbjeglice ZDK.*

Uredba propisuje obavezu javnog oglašavanja prilikom prijema u radni odnos, pa i u slučaju prijema pripravnika, izuzev u slučaju otkaza sa ponudom izmijenjenog ugovora o radu, u slučaju prijema na određeno vrijeme po programima zapošljavanja putem Službe za zapošljavanje te u slučaju prijema u radni odnos na određeno vrijeme najduže do tri mjeseca. Javni oglas se obavezno objavljuje najmanje u jednom listu koji se distribuira na teritoriji cijele FBiH i putem web stranice poslodavca, te se obavezno dostavlja JU Služba za zapošljavanje ZDK.

Najvažniji element Uredbe jeste da se bira prvorangirani kandidir, a što je veoma bitna novina u odnosu na dosadašnju praksu.

*"Mi smo drugi kanton u Federaciji BiH koji je uredio ovu oblast na ovakav način. Kvalitetnim podzakonskim aktom želimo spriječiti mogućnost zloupotreba prilikom zapošljavanja, a istovremeno imati funkcionalnu Uredbu koja će omogućiti transparentnost i dati priliku najboljim", kazao je premijer **Mirza Ganić**. /kraj/*

73. NARODNIM KUHINJAMA 240.000 KM, ZA SIGURNU KUĆU U ZENICI 54.720 KM

ZENICA, 29.05.2019. - Vlada Zeničko-dobojskog kantona usvojila je odluku o odobravanju sredstava za rad javnih - humanitarnih kuhinja na području ZDK u ukupnom iznosu od 240.000 KM.

Humanitarnoj organizaciji MDD „Merhamet“ Zenica odobreno je 70.000 KM, MDD „Merhamet“ Maglaj 45.000 KM, Narodnoj kuhinji Zenica 50.000 KM, dok je „Caritasu zeničkih župa“, Pučkoj kuhinji Vareš i Javnoj kuhinji "Mladi volonteri" Visoko odobreno po 25.000 KM.



*"Ovaj oblik podrške je od velikog značaja za najsiromašnije građane ZDK-a. Navedene javne kuhinje u 2018. godini svakodnevno su pripremale 2.240 obroka, što znači da postoji realna potreba i društvena opravdanost ovakvog vida podrške", kaže **Azra Šabanović**, ministrica za rad, socijalnu politiku i izbjeglice ZDK.*

Na prijedlog ovog ministarstva, Vlada je odobrila sredstva u iznosu od 54.720 KM nevladinoj organizaciji "Medica" Zenica na ime učešća Zeničko-dobojskog kantona u

projektu "Sigurna kuća za žene žrtve nasilja u porodici i zajednici sa područja općina ZDK". Vlada Zeničko-dobojskog kantona učestvuje u finansiranju ovog projekta od 2009. godine, a navedeni iznos predstavlja 30 posto potrebnih sredstava, dok ostatak osiguravaju "Medica" Zenica i općine u ZDK. /kraj/

74. KANTONALNA BOLNICA ZENICA DRUGU GODINU POSLOVALA POZITIVNO, VLADA ODOBRILO MILION MARAKA ZA NABAVKU OPREME

ZENICA, 30.05.2019. - Javna ustanova Kantonalna bolnica Zenica ostvarila je u 2018. godini ukupne prihode od 64.479.655 KM, dok su rashodi iznosili 63.767.942 KM, tako da je ostvaren pozitivan finansijski rezultat u iznosu od 711.713 KM. Najveća javna zdravstvena ustanova u ZDK-u poslovala je pozitivno drugu godinu zaredom, a ostvarena dobit je u odnosu na prošlogodišnji plan bila veća za 660.000 KM.

Prema izvještaju o poslovanju u 2018. godini, kojeg je usvojila Vlada Zeničko-dobojskog kantona, prihodi su povećani za oko 4,7 miliona KM ili 7,8 posto, na što je najveći utjecaj imalo povećanje prihoda po ugovoru sa Zavodom zdravstvenog osiguranja ZDK, koji je iznosio 55,6 miliona KM ili 86 posto ukupnih prihoda. Istovremeno, Vlada ZDK je kroz kapitalne i tekuće transfere KBZ-u dodijelila sredstva u iznosu 2.335.000 KM. Prošle godine je počela otplata dugoročnog kredita u iznosu od 16 miliona KM, a za ovu namjenu je izdvojeno 3.402.956 KM.

U Kantonalnoj bolnici Zenica prošle godine liječeno je 31.341 bolesnika, ostvareno 220.906 bolesničkih, tzv. BO dana, te urađeno 13.209 operacija. Trenutni kapacitet bolnice je 858 kreveta, plus 48 kreveta za hemodijalizu i 11 kreveta u dnevnoj bolnici.



*„Dobri rezultati ostvareni su zahvaljujući zajedničkom zalaganju UO, menadžmenta i svih zaposlenika, kao i podršci kantonalne Vlade. Generalno je u 2018. godini liječen veći broj bolesnika nego godinu ranije, ostvaren veći broj BO dana, veći broj operacija, veći broj ambulantnih pregleda i usluga. Tako je i stepen iskorištenosti kapaciteta bio veći, a to je jedan od najvažniji kriterija za ocjenu uspješnosti bolnice”, kazao je dr. **Rasim Skomorac**, direktor KBZ-a.*

Pored ugovora o liječenju pacijenata, sa kantonalnim Zavodom zdravstvenog osiguranja prošle godine je potpisan i prvi ugovor o obavljanju usluga imunohistohemije za osiguranike ZDK-a. Sa Zavodom za medicinu rada i sportsku medicinu potpisan je ugovor o pružanju usluga koje nisu obuhvaćene obaveznim vidom zdravstvene zaštite. KBZ je potpisao ugovor o pružanju zdravstvenih usluga koje se finansiraju iz sredstava Fonda solidarnosti FBiH za 2018. godinu iz oblasti hemodijalize, neurohirurgije, humane reprodukcije, radioterapije, vaskularne hirurgije te programa subvencija HIV/AIDS. Također, potpisan je i ugovor sa Zavodom zdravstvenog osiguranja SBK o pružanju zdravstvenih usluga sekundarnog i tercijarnog nivoa.

U 2018. nastavljene su aktivnosti na realizaciji Projekta energetske efikasnosti JU Kantonalne bolnice Zenica, koji je bez sumnje najznačajniji projekt KBZ-a od njene izgradnje. Projektni ugovor sa EBRD-om vrijedan 10 miliona eura potpisan je u julu 2018. godine. Također, nastavljene su i aktivnosti na JPP projektu "Interventna kardiologija", koji je prvi ugovor o javno-privatnom partnerstvu u BiH. Ugovor vrijedan 7,5 miliona KM potpisan je u februaru 2019. godine sa njemačkom firmom D. Med Healthcare AG koja će izgraditi i upravljati novim objektom u krugu KBZ-a.



Krajem prošle godine, zenička bolnica je imala 1.672 radnika, tako da, ako se posmatra broj radnika na neodređeno vrijeme, u odnosu na sistematizaciju nedostaje 228 radnika, i to 156 medicinskog i 72 nemedicinskog profila.

"Želimo poboljšati nivo usluge, smještaja i boravka pacijenata u KBZ-u. Pored razvojnih projekata, fokusirani smo na aktivnosti da KBZ dobije status univerzitetske bolnice, što je vrlo važno za Medicinski fakultet, te da bude

*pozicionirana među vodeće bolnice u BiH", kazao je premijer **Mirza Ganić**.*

Vlada Zeničko-dobojskog kantona je na istoj sjednici donijela set odluka o odobravanju sredstava za nabavku opreme za potrebe KBZ-a u ukupnoj vrijednosti 1.030.000 KM. Odobreno je po 200.000 KM za nadogradnju linearnog akceleratora, kupovinu endoskopske opreme, nabavku operacionog stola te ultrasoničnog aspiratora, 100.000 KM za nabavku defibrilatora i infuzomata, 56.760 KM za radove na održavanju infrastrukture, 20.700 KM za nabavku opreme za potrebe Odjela ortopedije i traumatologije i Bolničke apoteke, dok je za nabavku rezervnih dijelova za medicinsku opremu i sanitetsko vozilo izdvojeno 52.970 KM. /kraj/

75. MINISTRICA ŠABANOVIĆ ODRŽALA RADNI SASTANAK SA RUKOVODIOCIIMA CENTARA I SLUŽBI SOCIJALNE ZAŠTITE U ZDK

ZENICA, 30.05.2019. - Ministrica za rad, socijalnu politiku i izbjeglice **Azra Šabanović** održala je prvi radni sastanak sa rukovodiocima centara za socijalni rad i nadležnih općinskih službi socijalne zaštite sa područja Zeničko-dobojskog kantona.



Ocijenjeno je kako je dosadašnja međusobna saradnja resornog ministarstva i ovih ustanova bila uspješna, posebno kod rješavanja problema i donošenja propisa u oblasti socijalne zaštite.

Ministrica Šabanović je podsjetila da je Vlada jučer odobrila centrima za socijalni rad i službama socijalne zaštite 165.100 KM za finansiranje jednokratne i privremene novčane pomoći za potencijalne i povremene korisnike socijalne zaštite u ZDK-u.

"Nastojat ćemo da ovakve sastanke održavamo češće, jer kroz razmjenu iskustava možemo doći do kvalitetnijih rješenja u ovoj oblasti. Naredne godine ćemo kroz preraspodjele, a ako budemo u mogućnosti i izdvajanjem dodatnih sredstava, nastojati generalno unaprijediti sistem socijalne zaštite u ZDK", kazala je Šabanović. /kraj/

76. VLADA ZDK: ZA HITNE INTERVENCIJE NA ŠKOLSKIM OBJEKTIMA PLANIRANO 385.100 KM



ZENICA, 31.05.2019. -

Ministarstvo za obrazovanje, nauku, kulturu i sport Zeničko-dobojskog kantona ove godine će za rekonstrukciju i investiciono održavanje školskih objekata, prema programu utroška sredstava kojeg je Vlada usvojila na 7. sjednici, na raspolaganju imati 385.100 KM.

"Navedena sredstva namijenjena su za interventna ulaganja u

*rekonstrukciju i sanaciju krovova, zamjenu stolarije, nabavku i instalaciju novih kotlova, uređenje prilaza i druge sanacione radove na školskim objektima. U pripremi je prijedlog utroška prvog dijela sredstava, koja će se dodjeljivati posebnim zaključkom Vlade", kazao je resorni ministar **prof. dr. Spahija Kozlić**. /kraj/*

77. BAJRAMSKI PAKETI ZA RASELJENA LICA U RADAKOVU I CRKVICAMA

ZENICA, 31.05.2019. -

Predstavnici Ministarstva za rad, socijalnu politiku i izbjeglice Zeničko-dobojskog kantona su povodom Ramazanskog bajrama posjetili raseljena lica smještena u zgradama u zeničkim naseljima Radakovo i Crkvice, namijenjenim za stambeno zbrinjavanje starih i iznemoglih raseljenih i lica koja se u bliskoj budućnosti ne mogu vratiti na svoja prijeratna prebivališta.



Ministrica **Azra Šabanović** tom prilikom je uputila čestitke za nastupajuće bajramske blagdane te uručila simbolične bajramske pakete u svih 45 domaćinstava. /kraj/

78. PREMIJER GANIĆ POSJETIO GLAVNOG IMAMA MIZ VISOKO



VISOKO, 31.05.2019. - Premijer Zeničko-dobojskog kantona **Mirza Ganić** sa saradnicima bio je danas u zvaničnoj posjeti Medžlisu Islamske zajednice Visoko. Goste je primio glavni imam **Midhat ef. Čakalović**.

S obzirom da je ovo bila prva posjeta premijera ZDK, novoizabranom glavnom imamu su upućene iskrene čestitke uz želje za uspješan rad u interesu svih vjernika. Razgovarano je o radu Islamske zajednice te realizaciji određenih aktivnosti od značaja za cjelokupno društvo. /kraj/

79. KORISNICI KONCESIJA NA VODAMA PROŠLE GODINE UPLATILI 382.000 KM KONCESIONIH NAKNADA

ZENICA, 03.06. - Korisnici koncesija na vodi tokom prošle godine su na ime koncesione naknade uplatili Zeničko-dobojskom kantonu sredstva u iznosu od 382.019,00 KM, od čega 232.984,00 KM za korištenje hidropotencijala za proizvodnju električne energije, a 149.035,00 KM naknada za korištenje prirodne, mineralne i termo-mineralne vode. Prema informaciji Ministarstva za poljoprivredu, šumarstvo i vodoprivredu, koju je na 7. sjednici usvojila Vlada ZDK, trenutni dug koncesionara za 2018. godinu iznosi 55.765,00 KM.



"Sredstva koja su prošle godine uprihodovana po osnovu koncesionih naknada su veća za 71 posto u odnosu na 2017. godinu. Obaveze koncesionara su na kraju 2018. bile veće, ali je jedan broj koncesionara izmirio obaveze početkom ove godine. Od ukupno uplaćenih sredstava 70 posto je alocirano gradu/općinama na čijem području se nalazi predmet

*koncesije", kazao je resorni ministar **Mirnes Bašić.***

Gradu Zenici je prebačeno 59.984 KM, Općini Olovo 76.230 KM, Općini Tešanj 69.884 KM, Općini Vareš 30.496 KM, Općini Zavidovići 34.922 KM te Općini Žepče 991 KM, a iz tih sredstava je finansirano više vodnih projekata.

Prema informaciji, do 2018. godine u ZDK-u je dodijeljeno ukupno sedam koncesija za crpljenje mineralne vode - tri na području Tešnja, dvije u Zenici te po jedna u Olovu i Varešu. Kada se radi o minihidroelektranama, do sada je dodijeljeno 13 koncesija za gradnju, od čega je osam MHE u funkciji, jedna je u izgradnji, dok je za četiri MHE u toku pribavljanje odobrenja za građenje što je uslov za potpisivanje ugovora.

"Prošle godine nije dodijeljena nijedna koncesija, ali je vođeno nekoliko postupaka koji su u toku ili su obustavljeni. U toku su postupci za dodjelu koncesija za MHE 'Megara 1' u općini Maglaj i MHE 'Trstionica' u Kraljevoj Sutjesci, općina Kakanj, te postupci dodjele koncesije za eksploataciju izvorske vode u Maglaju, Tešnju i Zenici", kazao je Bašić.

Prekinuti su postupci za dodjelu koncesije za MHE "Orlja" u općini Olovo i MHE "Luke" u općini Visoko, jer nisu dobijene saglasnosti općinskih vijeća, a zbog nepotpune dokumentacije prekinut je i postupak za zahvatanje i flaširanje mineralne i izvorske vode na lokalitetu Matina - Ponijevo u općini Žepče. /kraj/

80. DELEGACIJA VLADE ZDK POLOŽILA CVIJEĆE I ODALA POČAST NA ŠEHIDSKOM OBILJEŽJU KAMENI SPAVAČ

ZENICA, 05.06.2019. - U okviru centralnog obilježavanja Dana šehida Bosne i Hercegovine za područje Medžlisa Islamske zajednice Zenica, brojne delegacije položile su cvijeće i odale počast na centralnom šehidskom obilježju "Kameni spavač" u Zenici. U ime Vlade Zeničko-dobojskog kantona cvijeće su položili premijer **Mirza Ganić**, ministri **Spahija Kozlić**, **Arnel Isak** i **Nebojša Nikolić** te šefica Ureda premijera **Zahida Šišić**.



Nakon polaganja cvijeća na spomen obilježju u Zenici, premijer i ministri u Vladi ZDK prisustvovat će obilježavanju Dana šehida po općinama.

U Zenici je u drugom dijelu programa upriličeno učenje Jasini-šerifa i dove na mezarju Prašnice, sa šehidskim porodicama iz Medžlisa Islamske zajednice Jajce.

Programom je predviđen prijem za porodice šehida u MIZ Zenica, učenje dove na mezaru prvog zeničkog šehida, rahmetli **Semira Arnauta** i posjeta njegovoj majci **Muneveri Arnaut**, a nakon ikindije namaza u Čaršijskoj džamiji održat će se prigodan mevludski program. /kraj/

81. VLADA ZDK TRAŽI DA SE HITNO SANIRA OŠTEĆENJE NA PUTU NEMILA-BISTRIČAK

ZENICA, 06.06.2019. - Vlada Zeničko-dobojskog kantona izražava žaljenje zbog oštećenja na dijelu novoizgrađenog regionalnog puta Nemila - Bistričak, koje se, kako je utvrđeno, najvjerovatnije desilo usljed pucanja cjevovoda MHE „Bistričak“, koji se nalazi u trupu saobraćajnice.



Rekonstrukcija navedene dionice završena je prošlog mjeseca, a finansirana je sredstvima Budžeta ZDK-a u iznosu od milion KM.

Ministarstvo za prostorno uređenje, promet i komunikacije i zaštitu okoliša te Kantonalna direkcija za ceste ZDK su zaduženi da provedu temeljitu istragu i ukoliko se potvrde dosadašnja saznanja o uzrocima oštećenja, nalože vlasniku cjevovoda da put vrati u prvobitno stanje te preduzme mjere kako se ovakve havarije ubuduće ne bi ponavljale.

Vlada Zeničko-dobojskog kantona moli mještane za strpljenje dok se ne izvrši sanacija oštećenja te još jednom potvrđuje svoje opredjeljenje da kroz ulaganja u putnu infrastrukturu, koja je teško oštećena u poplavama 2014. godine, stvori uslove za normalan život stanovnika na tom području. /kraj/

82. ZA ODRŽAVANJE I IZGRADNJU REGIONALNIH CESTA 17 MILIONA KM

ZENICA, 06.06.2019. - Vlada Zeničko-dobojskog kantona opredijelila je u ovogodišnjem budžetu 17 miliona KM za zaštitu, održavanje, rekonstrukciju i izgradnju regionalnih cesta na području ZDK-a. Od toga, za rekonstrukciju i izgradnju regionalnih cesta i cestovnih objekata, izradu projektne i druge tehničke dokumentacije i stručno-tehnički nadzor kod implementacije poslova rekonstrukcije i izgradnje regionalnih cesta planirano je 9 miliona i 778.000 KM, dok je preostalih 7 miliona opredijeljeno za održavanje cesta.



Prema Planu zaštite, održavanja, rekonstrukcije i izgradnje u 2019. godini kojeg je danas usvojila Vlada Zeničko-dobojskog kantona, za rekonstrukciju cesta i izgradnju mostova predviđena su sredstva u iznosu od 6 miliona i 690.000 KM, a finansirat će se ukupno 17 projekata na regionalnim putnim pravcima. Pojedinačno najveći iznos - 2 miliona KM, opredijeljen je za nastavak radova na izgradnji Glavne gradske magistrale (GGM)

u Zenici u sastavu regionalne ceste R445 te jedan milion i 140.000 KM za sanaciju i modernizaciju dijela ceste R445 Visoko-Kakanj na dionici Moštre – Visoko.

Ukupno 307.000 KM opredijeljeno je za sanaciju klizišta Šaš na putu R444 Podlugovi - Breza - Vareš, 237.000 za sanaciju klizišta i izgradnju pješačke staze u naselju Ulišnjak na putu R465 Zavidovići - Maglaj, a 222.000 KM opredijeljeno je za modernizaciju dijela ceste R465 Zavidovići - Maglaj na ulazu u Maglaj. Vlada će sa 450.000 KM finansirati nabavku i postavljanje vertikalne signalizacije i ostale cestovne opreme na pravcima R445 Kakanj - Visoko - Podlugovi i R474 Tešanj - Jelah - Prnjavor. Također, planirana su i sredstva za projekte na regionalnim putnim pravcima R474 Perkovići - Novi Šeher i R465 Žepče - Zavidovići (izgradnja pješačke staze na spoju s magistralnom cestom M17 i izgradnja autobuskih stajališta - 257.000 KM), R466 Kakanj - Kraljeva Sutjeska - Ponijeri (rekonstrukcija dijela ceste kroz vikend naselje Ponijeri - 407.000 KM), R474 Novo Šeher - Crni Vrh - Tešanj (sanacija klizišta Ćetin Greb - 407.000 KM), R468 Olovo - Sokolac (sanacija klizišta - 257.000 KM), R444 Podlugovi - Breza - Vareš (sanacija klizišta Vrankamen - 16.000 KM), R467 Zavidovići - Vozuća - Olovo (sanacija klizišta u naselju Vozuća - 105.000 KM), R466 Kakanj - Kraljeva Sutjeska (izgradnja mosta na rijeci Trstionici u Kraljevoj Sutjesci - 207.000 KM), R445 Bilješevo - Kakanj - Visoko - Podlugovi (izgradnja mosta na rijeci Bosni u naselju Modrinje - 210.000 KM), R467 Zavidovići - Olovo (sanacija i modernizacija oštećenih dionica ceste - 207.000 KM) te na regionalnom putu R413a Čajdraš - Ovnak (sanacija i modernizacija dijela ceste u dužini od dva kilometra - 120.000 KM).

Vlada je za projekte obnove i vanredno održavanje regionalnih cesta i mostova planirala ukupno jedan milion i 624.900 KM, a finansirat će se ukupno devet projekata na regionalnim putnim pravcima R466 Zavidovići - Kamenica - Ponijeri (izgradnja pješačke staze od mosta na 6. kilometru do OŠ Gostović - 105.000 KM te sanacija i modernizacija ceste sa izradom potpornih zidova - 210.000 KM), R443 Visoko - Kiseljak (sanacija i rehabilitacija ceste od Gradskih grobalja prema Bucima - 410.000 KM), R444 dionica Breza - Vareš (sanacija i rehabilitacija dijela ceste kroz općinu Vareš - 105.000 KM), R467 Zavidovići - Olovo (postavljanje habajućeg sloja asfalta na zaobilaznici kroz općinu Olovo - 105.000 KM), R441 Vjetrenice - Zenica (sanacija i modernizacija dijela ceste u dužini od 3,8 km - 430.000 KM), R473 Nemila-Bistričak (sanacija mosta Ograina - 127.000 KM) te projekt uspostavljanja prohodnosti i sanacije oštećenja na regionalnim cestama na području Grada Zenice oštećenih u elementarnim nepogodama 02. i 03. aprila 2019. godine - 132.900 KM.

Planom je opredijeljeno 2 miliona i 827.500 KM za plaćanje ugovorenih obaveza iz 2018. godine, dok je za izradu projektno-tehničke dokumentacije predviđeno ukupno 270.500 KM, a planirano je i 150.000 KM za eksproprijaciju zemljišta. /kraj/

83. ODOBREN PLAN UPISA NA FAKULTETIMA UNIVERZITETA U ZENICI

ZENICA, 07.06.2019. - Vlada Zeničko-dobojskog kantona dala je saglasnost na planove upisa na dodiplomski i postdiplomski studij na fakultetima Univerziteta u Zenici. Odobren je upis 1.425 studenata u prvu godinu prvog ciklusa te 570 studenata na prvu godinu drugog studijskog ciklusa.



"Utvdili smo plan upisa ranije s namjerom da Univerzitet u Zenici bude među prvima koji će objaviti konkurs za upis studenata. Radi se o ukupno 30 studijskih programa dodiplomskog i desetak studijskih programa na postdiplomskom studiju", kazao je Spahija Kozlić, ministar za obrazovanje, nauku, kulturu i sport ZDK.

Visina školarina na Univerzitetu u Zenici nije se promijenila u odnosu na prethodnu akademsku godinu. Upisnina za redovni studij koji finansira osnivač iznosi 50 KM, odnosno 100 KM kod ponovnog upisa u istu godinu studija, za redovni samofinansirajući i vanredni studij 800 KM, studij Softverskog inženjerstva 1.500 KM, a integrirani studij Opće medicine 3.000 KM. Iznos godišnje školarine za strane državljane na fakultetima društveno-humanističkih i tehničkih nauka kreće se od 1.300 do 3.000 KM, dok školarina za studij opće medicine iznosi 6.000 KM. Upisnina za redovni samofinansirajući i vanredni studij drugog ciklusa za domaće studente iznosi 1.500 KM, a za studente iz inostranstva 3.000 KM.

"Školarina na Univerzitetu u Zenici su među najnižima u državi, a nastojimo da upisna politika bude primamljiva i da što više studenata usmjerimo ka našim fakultetima. Pokušat ćemo zadržati najbolje studente na našim fakultetima, jer ovi studenti kroz nekoliko godina mogu postati dobri docenti i profesori i na taj način doprinijeti razvoju UNZE", kazao je premijer Mirza Ganić.

Vlada je odobrila novčane nagrade za studente Pravnog fakulteta u Zenici - Arnelu Maglić, Ibrahima Palaliju, Emira Živčića, Ajnu Mahmić i Aminu Hasanović, koji su kao tim osvojili treće mjesto na svjetskom takmičenju iz oblasti Međunarodnog trgovačkog prava i međunarodne arbitraže "Willem C. Vis International Commercial Arbitration Moot" koje je održano u Beču. /kraj/

84. ODRŽAN SASTANAK O PROJEKTU IZGRADNJE NOVE ZGRADE SUDA U ŽEPČU

ZENICA, 07.06.2019. - Izgradnja nove zgrade Općinskog suda u Žepču bila je tema sastanka ministra pravosuđa Zeničko-dobojskog kantona **Nebojše Nikolića** sa predstavnicima Visokog sudskog i tužilačkog vijeća BiH, Općinskog suda Žepče i Općine Žepče, koji je održan u Žepču.



VSTV BiH je proveo postupak i zaključio ugovor za izradu projektne dokumentacije sa projektantskom kućom "Urbis centar" iz Banja Luke, a finansijska sredstva je osigurala je Vlada Švedske. Rok za izradu projektne dokumentacije je 135 dana.

Ovaj infrastrukturni projekt se realizira u okviru druge faze Projekta unapređenja efikasnosti sudova i odgovornosti sudija i tužilaca u BiH.

"Izgradnja nove zgrade Općinskog suda u Žepču bit će finansirana putem programa IPA 2017. Na sastanku je postignut visok stepen saglasnosti te definisani rokovi i zadaci vezani za ovaj kapitalni projekt. Imamo punu podršku lokalne zajednice tako da vjerujem da ćemo zajedničkim snagama uspjeti stvoriti okruženje u kojem će ovaj sud moći odgovoriti očekivanjima i potrebama građana", kazao je ministar Nikolić. /kraj/

85. PREMIJER GANIĆ PRIMIO PRVOG KOMANDANTA TURKBATA I SAVJETNIKA ZA TURIZAM U VLADI TURSKE

ZENICA, 10.06.2019. - Premijer Zeničko-dobojskog kantona **Mirza Ganić** primio je danas penzionisanog generala **Mehmetalija Erdogana**, prvog komandanta Turskog bataljona UNPROFOR-a koji je tokom rata bio stacioniran u Zenici, te dr. **Nusreta Sancaklija**, savjetnika za turizam u Vladi Republike Turske. Erdoan i Sancakli, koji imaju bošnjačke korijene, u posjetu premijeru su došli u pratnji penzionisanog generala Armije RBiH Sakiba Mahmuljina.



General Erdoan više puta je posjećivao BiH nakon završetka vojne službe, a proglašen je i počasnim građaninom Zenice. Dr. Sancakli je stručnjak za turizam, a pored angažmana u Vladi Republike Turske, predaje na univerzitetima u Turskoj i Japanu.

Ovom prilikom razgovarano je o značaju turizma za Bosni i Hercegovinu i Zeničko-dobojski kanton, te načinima mogućeg povezivanja Turske i Bosne i Hercegovine u dijelu turističke ponude, a posebno promocije osmanskog naslijeđa u dvije prijateljske zemlje.

"Pokušat ćemo da uvežemo turističku ponudu na način da strane turističke grupe nakon posjete Turskoj dođu u BiH, jer imamo veliki broj spomenika iz vremena Osmanskog carstva, ali i prirodne ljepote koje moramo iskoristiti za privlačenje turista i jačanje ekonomije", kazao je premijer Ganić. /kraj/

86. PREMIJER GANIĆ I MINISTAR KOZLIĆ UPRIILIČILI PRIJEM ZA ESADA ČOLAKOVIĆA

ZENICA, 10.06.2019. - Premijer Zeničko-dobojskog kantona **Mirza Ganić** i ministar za obrazovanje, nauku, kulturu i sport Spahija Kozlić upriličili su danas prijem za **Esada Čolakovića**, sina poznatog bosanskohercegovačkog pisca **Envera Čolakovića**. Esad Čolaković boravi u Zenici radi promocije dosad neobjavljene Čolakovićeve knjige "Lirika", koja je upriličena u sklopu obilježavanja dana OŠ "Enver Čolaković" u Janjicima kod Zenice.



"Mladi naraštaji imaju priliku da se iz prve ruke upoznaju sa piščevim životom i djelom te spoznaju koliko je važno što ova škola nosi ime Envera Čolakovića. Veoma rijetko imamo priliku da živi nasljednici svjedoče o životu velikana kakav je bio Enver Čolaković, tako da sam počastvovan posjetom",

kazao je Ganić.

Esad Čolaković, uspješni zagrebački privrednik, u Zenicu je došao i kao izaslanik zagrebačkog gradonačelnika Milana Bandića u čije ime je pozvao premijera Ganića da posjeti glavni grad Hrvatske prilikom skorog otvorenja parka posvećenog Enveru Čolakoviću. Tada bi se razgovaralo i o povezivanju Zagreba i Zeničko-dobojskog kantona te jačanju saradnje na polju privrede i kulture.

Direktor OŠ "Enver Čolaković" Janjići **Elvir Ibrahimagić** ovom prilikom uručio je premijeru Ganiću zahvalnicu za pomoć i podršku promociji knjige. /kraj/

87. MINISTARSTVO MIJENJA UPUTSTVO ZA DODJELU PODSTICAJA ZA JAGODIČASTO VOĆE

ZENICA, 10.06.2019. - Ministar za poljoprivredu, šumarstvo i vodoprivredu **Mirnes Bašić** održao je sastanak sa predstavnicima Udruženja poljoprivrednika Zeničko-dobojskog kantona, na kojem se razgovaralo o ovogodišnjem programu podsticaja proizvodnji maline i kupine u kojoj je ovaj kanton lider u FBiH.

S namjerom da spriječi zloupotrebe prilikom otkupa, resorno ministarstvo se u 2019. opredijelilo da subvencionira samo proizvođače koji malinu i kupinu predaju otkupljivačima sa područja Zeničko-dobojskog kantona. Međutim, pošto je značajan broj proizvođača dugoročno vezan ugovorima za otkupljivače sa područja cijele FBiH, odlučeno je da se još ove godine zadrži dosadašnja politika podsticaja.



"Uvažili smo zahtjev proizvođača, tako da ćemo i ove godine subvencionirati proizvođače maline, kupine i organske jagode koji urod predaju bilo kojem otkupljivaču na području FBiH. Rekli smo da je to prijelazno rješenje, jer je naše strateško opredjeljenje da uspostavimo kontrolu otkupa preko domaćih hladnjača. Također, prihvatili smo zahtjev Udruženja poljoprivrednika ZDK za produženje roka za predaju dokumentacije za kasne sorte maline i kupine, jer je zbog nepovoljnih vremenskih prilika došlo do kašnjenja vegetacije", kazao je ministar Bašić.

Ministarstvo za poljoprivredu, šumarstvo i vodoprivredu ove godine je za podsticaje poljoprivrednoj proizvodnji planiralo 3 miliona KM, od čega je 700.000 KM namijenjeno za podsticaje proizvođačima maline, kupine i organske jagode. /kraj/

88. VLADA FINANSIJSKI PODRŽALA ATLETSKI MITING ZENICA

ZENICA, 11.06.2019. - Vlada Zeničko-dobojskog kantona odobrila je Atletskom klubu "Zenica" sredstva u iznosu od 15.000 KM kao pomoć pri organizaciji 10. Međunarodnog atletskog mitinga "Zenica 2019"

koji će se održati 12. juna na Atletskom stadionu Kamberovića polje, uz prijenos uživo na BHT-u.

Na jubilarnom mitingu očekuje se učešće više od 150 takmičara i takmičarki iz 28 zemalja Evrope i svijeta, koji će se natjecati u osam disciplina muškog i sedam ženskog dijela programa. Natjecatelji organizatora - Atletskog kluba "Zenica", ostvaruju vrhunske rezultate na evropskim, svjetskim takmičenjima i olimpijskim igrama, a ovogodišnji miting nova je prilika za dokazivanje zeničkih, ali i atletičara iz drugih bh. klubova, u konkurenciji vrhunskih takmičara iz Kenije, Francuske, Italije, Ukrajine, Bugarske, Turske, Mađarske, Brazila, Katara, UAE, Švedske i zemalja okruženja.

"Atletski miting Zenica jedan je od najvećih atletskih događaja u regionu, a od početka ima punu podršku Vlade Zeničko-dobojskog kantona. Želimo da iz Zenice, kao središta ZDK-a, u svijet pošaljemo

najljepšu sliku i poruku da smo posvećeni razvoju sporta i sportske infrastrukture", poručio je premijer ZDK Mirza Ganić. /kraj/



89. OŠ VLADIMIR NAZOR ZENICA U NOVOM RUHU: VLADA ZDK SUFINANSIRALA PROJEKT UTOPLJAVANJA VRIJEDAN 671.541 KM

ZENICA, 12.06.2019. - Osnovna škola "Vladimir Nazor" Zenica 60. rođendan dočekala je u potpuno novom ruhu. Kroz projekt energetske efikasnosti vrijedan 671.541 KM rekonstruisana su tri školska paviljona te fiskulturna sala, koji su dobili novu fasadu, stolariju i krov. Sredstva su osigurali Federalni fond za okoliš, Svjetska banka i Vlada Zeničko-dobojskog kantona.



*"Školska zgrada je dobila potpuno novi izgled i funkcionalnost, a đaci i nastavnici mnogo bolje uslove za rad. Razvoj infrastrukture je jedan od glavnih ciljeva Vlade ZDK jer smo svjesni da je ulaganje u škole i objekte za mlade ulaganje u našu budućnost", kazao je premijer **Mirza Ganić**, koji je u okviru svečanosti povodom dana škole presjekao svečanu vrpцу zajedno s ministrom za obrazovanje, nauku, kulturu i sport **Spahijom Kozličem** i direktorom škole **Mirnesom Varupom**.*

Ministar Kozlić je istakao kako je do sada rekonstruisana jedna petina školskih zgrada u Zeničko-dobojskom kantonu, te da će vlada nastojati da u iduće četiri godine programom energetske efikasnosti obuhvati sve škole na području ZDK-a.

"Na taj način ćemo postići značajne uštede u energentima, a sredstva ostvarena uštedama planiramo preusmjeriti u nabavku udžbenika budući da je naša politika i konačni cilj da svi učenici osnovnih škola imaju besplatne udžbenike", kazao je Kozlić.

Program energetske efikasnosti provodi se u saradnji sa Svjetskom bankom, UNDP-om i Caritasom, a prema riječima ministra Kozlića, Svjetska banka za potrebe utopljanja škola u BiH na raspolaganju ima oko 20 miliona dolara, od čega će dio biti usmjeren i za nove projekte u Zeničko-dobojskom kantonu.



Direktor Varupa zahvalio se Vladi Zeničko-dobojskog kantona i Ministarstvu za obrazovanje, nauku, kulturu i sport što su prepoznali potrebe ove gradske škole, koju pohađa 390 učenika.

"Naša škola je poznata po kvaliteti obrazovno-odgojnog procesa, a zahvaljujući ulaganju u infrastrukturu očekujemo veće interesovanje učenika za upis u našu školu", kazao je Varupa, koji je premijeru Ganiću i ministru Kozliču uručio prigodne zahvalnice za doprinos realizaciji projekta. Učenici OŠ "Vladimir Nazor" izveli su prigodan kulturno-umjetnički program. /kraj/

90. VLADA ZDK U KONTINUITETU PODRŽAVA JEDAN OD NAJVEĆIH ATLETSKIH DOGAĐAJA U REGIONU

ZENICA, 12.06.2019. - Najbolji bh. atletičar **Amel Tuka** osvojio je prvo mjesto u trci na 800 metara, a **Mesud Pezer** bio je treći u bacanju kugle na 10. Međunarodnom atletskom mitingu koji je održan na Atletskom stadionu Kamberovića polje u Zenici. Domaćin mitinga bio je Atletski klub Zenica, a generalni pokrovitelji Vlada Zeničko-dobojskog kantona i Grad Zenica.



*"Zeničko-dobojski kanton je u kontinuitetu sponzor ovog veoma značajnog međunarodnog mitinga koji je postao jedan od najvažnijih atletskih događaja u regionu. Drago mi je da je iz Zenice, kao središta Zeničko-dobojskog kantona, poslata izuzetno lijepa slika. Organizatorima čestitam izuzetno uspješnu organizaciju, a atletičarima osvajanje medalja", kazao je premijer **Mirza Ganić**, kome je pripala čast da otvori ovogodišnji miting.*

Ganić je uručio medalje najboljima u utrci na 800 metara - **Amelu Tuki**, drugoplasiranom **Yevhenu Hutsolu** iz Ukrajine te trećeplasiranom Albancu **Qerami Eraldu**.

Na mitingu su nastupila 152 takmičara iz 28 zemalja Evrope i svijeta. /kraj/

91. PREMIJER GANIĆ NA SAJMU PRIVREDE U TEŠNJU: PRIVREDA ZE-DO KANTONA JE KIČMA PRIVREDE BIH

TEŠANJ, 13.06.2019. - U Kraševu kod Tešnja svečano je otvoren 15. Međunarodni sajam privrede, koji je okupio 300 izlagača iz deset zemalja. Zemlja partner ovogodišnjeg sajma je Sjeverna Makedonija, generalni pokrovitelj Vijeće ministara BiH, a partneri Vlada Federacije BiH, Vlada Zeničko-dobojskog kantona, Općina Tešanj i Privredna komora FBiH.



Sajam su svečanim presjecanjem vrpce otvorili ambasador Sjeverne Makedonije **Ekrem Ebibi**, predsjedavajući Vijeća ministara BiH **Denis Zvizdić**, premijeri FBiH i ZDK **Fadil Novalić** i **Mirza Ganić**, te u ime domaćina i organizatora predsjednik Udruženja privrednika "Biznis centar" Jelah - Tešanj Senad Brka.

Premijer Ganić je istakao kako Vlada Zeničko-dobojskog kantona podržava ovu privrednu manifestaciju od samog početka, te da je sajam prilika da se predstave dobri poslovni rezultati ZDK-a.

"Zeničko-dobojski kanton učestvuje u ukupnom izvozu FBiH sa oko 20 posto i držimo leadersku poziciju u izvozu. Pokrivenost uvoza izvozom je 90 posto, što je iznad prosjeka FBiH. To su pokazatelji koji govore da je Zeničko-dobojski kanton kičma privrede BiH", kazao je Ganić, navodeći kako u ZDK-u posluju neki od najvećih bh. izvoznika, kao što su Mann+Hummel, Natron Hayat, ArcelorMittal, Tvornica cementa Kakanj, Prevent grupa, kao i brzorastuće kompanije HIFA, AS grupa, MI Madi, Ovako, ALMA Ras i mnoge druge.

Istakao je posvećenost Vlade da kroz razne podsticaje i subvencije doprinese unapređenju poslovnog ambijenta, otvaranju novih pogona i zapošljavanju. U tom smislu je poželjno okupljanje privrednika na sajmovima, razmjena iskustava i povezivanje kako između domaćih kompanija tako i sa kompanijama u regionu.

"Sretan sam što na sajmu vidim i veliki broj domaćih izlagača koji se bave proizvodnom djelatnošću. Uvjerem sam da će svi izlagači na sajmu sklopiti nova partnerstva i poslovne ugovore i aranžmane", kazao je premijer Ganić.



Pored premijera, u delegaciji Vlade koja je posjetila Sajam prvog dana bili su ministri privrede **Zlatko Jelić**, prostornog uređenja, prometa i komunikacija i zaštite okoliša **Arnel Isak** te ministrica za rad, socijalnu politiku i izbjeglice **Azra Šabanović**.

Vlada ZDK podržala je organizaciju jubilarnog Sajma privrede sa 30.000 KM, što je više nego ranijih godina.

Sajam traje tri dana, a pripremljen je i bogat program pratećih manifestacija, panel diskusija, tematskih predavanja, prezentacija, susreta privrednika, koje trebaju doprinijeti poslovnom povezivanju, razmjeni iskustava i dobrih praksi. /kraj/

92. VLADA ODOBRILO MILION I 443.000 KM ZA USPOSTAVU CENTRA ZA MONITORING OKOLIŠA ZDK

ZENICA, 14.06.2019. - Vlada Zeničko-dobojskog kantona odobrila je JU Univerzitet u Zenici sredstva u iznosu od 1.443.480,00 KM za projekt uspostave "Centra za monitoring okoliša ZDK" na Institutu "Kemal Kapetanović" u Zenici.

Projektom je predviđena nabavka i ugradnja opreme IT centra, kalibracione i ispitne laboratorije, modernizacija postojećih stanica za mjerenje kvaliteta zraka, nabavka opreme za određivanje teških metala u lebdećim česticama i taložnoj prašini, nabavka gradskog displeja, kao i dvije fiksne stanice za monitoring kvaliteta zraka u Maglaju i Visokom, kupovina servisnog vozila i neophodnog softvera. Centar



će se baviti prikupljanjem, sistematizacijom i analizom podataka do kojih će dolaziti pomoću mjernih stanica na području ZDK, softverskim povezivanjem mjernih stanica i umrežavanjem sistema monitoringa sa višim organima vlasti, kao i izradom kantonalnog registra o postrojenjima i zagađivačima te propisa o

zaštiti kvaliteta zraka, a predviđena je i izrada Akcionog plana zaštite kvaliteta zraka.

"Univerzitet u Zenici će po dobijanju sredstava raspisati tendere, izvršiti nabavku opreme te uspostaviti Centar u okviru Instituta 'Kemal Kapetanović'", kazao je ministar za obrazovanje, nauku, kulturu i sport Spahija Kozlić, precizirajući kako se projekt finansira iz namjenskih sredstava Fonda za zaštitu okoliša.

Premijer **Mirza Ganić** istakao je posvećenost Vlade da rješava nagomilane probleme u oblasti okoliša, koji su posljedica same strukture privrede u ZDK-u.

"Centar za monitoring okoliša bit će važna karika u sistemu zaštite okoliša i uspostave održivog razvoja u Zeničko-dobojskom kantonu. Želimo uspostaviti pouzdan i kontinuirani sistem monitoringa zagađenosti zraka, zemlje i vode u svim općinama, izraditi katastar zagađivača, unaprijediti pravni okvir kroz harmonizaciju i približavanje standardima okoliša EU, jačati inspekcijski nadzor te uticati na podizanje ekološke svijesti", kazao je Ganić. /kraj/

93. ZA REKONSTRUKCIJU I INVESTICIONO ODRŽAVANJE ŠKOLSKIH OBJEKATA 285.692,00 KM



ZENICA, 17.06.2019. - Vlada Zeničko-dobojskog kantona, usvajanjem odluke o preraspodjeli sredstava u budžetu Ministarstva za obrazovanje, nauku, kulturu i sport za 2019. godinu, stvorila je pretpostavke za realizaciju projekata rekonstrukcije i investicionog održavanja školskih objekata na području ZDK-a u ukupnoj vrijednosti 285.692,00 KM. Za

rekonstrukciju i investiciono održavanje osnovnih škola predviđeno je 179.670,00 KM, srednje škole 77.172,00 KM, a za visokoškolske ustanove 28.850,00 KM.

*"Uglavnom se radi o projektima zamjene krovova, stolarije, poboljšanja sistema grijanja, uređenja sanitarnih čvorova, dvorišta i prilaza školskim objektima, a sve s ciljem da se u infrastrukturnom smislu unaprijede uslovi za odvijanje nastavnog procesa i boravak u školama i fakultetima", kazao je ministar za obrazovanje, nauku, kulturu i sport **Spahija Kozlić**.*

Programom su planirana ulaganja u 12 osnovnih, sedam srednjih škola te Filozofskom fakultetu Univerziteta u Zenici. /kraj/

94. ODOBRENA SREDSTVA ZA ODRŽAVANJE OPREME U KBZ-U TE NABAVKU OPREME ZA DOMOVE ZDRAVLJA U ZENICI I OLOVU

ZENICA, 18.06.2019. - Vlada Zeničko-dobojskog kantona odobrila je na prijedlog kantonalnog Ministarstva zdravstva sredstva u iznosu od 760.520 KM za plaćanje usluga održavanja medicinske opreme i informacionih sistema u JU Kantonalna bolnica Zenica. Radi se o MRI, CT i drugoj opremi u Službi za onkologiju i radiologiju, te informacionim sistemima za



laboratoriju, transfuziju, mikrobiologiju, PACS/RIS sistem, pravne i ekonomsko finansijske poslove.

Na prijedlog Ministarstva zdravstva, JU Dom zdravlja Zenica su odobrena sredstva u iznosu od 50.000 KM za nabavku ultrazvučnog aparata i dentalnog RTG aparata, a JU Dom zdravlja Olovo odobreno je 20.000 KM za nabavku sanitetskog vozila. /kraj/

95. NERIJEŠENI IMOVINSKO-PRAVNI ODNOSI USPORAVAJU REALIZACIJU PROJEKTA INTERVENTNE KARDIOLOGIJE UZ KBZ-U

ZENICA, 18.06.2019. - Premijer Zeničko-dobojskog kantona **Mirza Ganić** i ministar zdravstva dr. Adnan Jupić održali su sastanak sa predstavnicima njemačke kompanije **D. Med Healthcare AG**, sa kojom je u februaru ove godine potpisan ugovor o izgradnji Interventne kardiologije u sklopu Kantonalne bolnice Zenica.

Direktor D. Med Healthcare **AG Sven-Axel Krentorz**, direktor za Istočnu Evropu **Medin Okić**, projekt menadžer **Samir Bećirović**, konsultantica **Šemsa Alić** i direktor Kantonalne bolnice Zenica **dr. Rasim Skomorac** upoznali su premijera Ganića sa dinamikom realizacije projekta investicione vrijednosti 7,5 miliona KM. Radi se o prvom ugovoru javno-privatnog partnerstva u BiH.



Istaknuto je da je glavni projekt finaliziran, obavljani su razgovori sa proizvođačima opreme, a pri kraju je i tender za nabavku opreme, ali realizaciju projekta usporava problem neriješenih imovinsko-pravnih odnosa jer je zemljište na kojem se treba graditi zgrada u krugu Kantonalne bolnice Zenica

uknjiženo na Grad Zenicu.

Direktor KBZ-a dr. Rasim Skomorac kazao je kako je Kantonalna bolnica 20. maja uputila Gradu Zenica zahtjev da se ustupi zemljište za građenje, ali da još nema odgovora.

Premijer Ganić je ponovio kako projekt ima punu podršku Vlade te da će učiniti sve da Zeničko-dobojski kanton napokon dobije Interventnu kardiologiju, jer trenutno zbog nemogućnosti primjene procedure "zlatnog sata" svaki dan biva životno ugroženo 6-10 pacijenata iz ZDK-a.

"Očekujemo od Uprave grada Zenice da podrži projekt i pomogne rješavanje imovinsko-pravnih odnosa jer je to u interesu građana Zenice, ali i svih ostalih građana Zeničko-dobojskog kantona. Pored toga, realizacijom projekta Interventne kardiologije, KBZ će odmah krenuti i u realizaciju novih JPP projekata poput "gama nož" i "hemodijaliza", što će značajno unaprijediti nivo usluge ove bolnice i pomoći našim građanima", kazao je premijer Ganić. /kraj/

96. ZDK PRVI U BIH ZAPOČEO ANDRAGOŠKO OSPOSOBLJAVANJE PO JAVNO VAŽEĆEM PROGRAMU

ZENICA, 19.06.2019. - Obukom za grupu od 24 asistenta i mlada docenta sa Univerziteta u Zenici, koja je počela danas na Pravnom fakultetu, Zeničko-dobojski kanton prvi je u Bosni i Hercegovini započeo realizaciju andragoškog osposobljavanja po javno važećem programu. Ministarstvo za obrazovanje, nauku, kulturu i sport ZDK donijelo je program "Osnovna andragoška obuka" kao program neformalnog obrazovanja od posebnog interesa za Zeničko-dobojski kanton, koji implementira u saradnji sa Pedagoškim zavodom ZDK, a uz stručnu i finansijsku podršku DVV International - Ureda za Bosnu i Hercegovinu.



*"Obuka za drugu grupu, nastavni kadar srednjih škola, bit će održana u petak. Ovo su prve dvije grupe polaznika koje imaju priliku da razvijaju vještine i kompetencije za rad sa odraslim polaznicima po javno važećem programu", kazao je ministar za obrazovanje, nauku, kulturu i sport **Spahija Kozlić**.*

Program "Osnovna andragoška obuka" podrazumijeva interaktivnu obradu četiri tematske cjeline, kao obavezna modula: Učenje odraslih - psihološke osnove, karakteristike, stilovi učenja, Komunikacija, grupna dinamika i upravljanje obrazovnom grupom, Vizualizacija i prezentacija u obrazovnom radu sa odraslima te Interaktivne metode obrazovanja odraslih.

*"Pored navedena četiri modula, polaznici će na zadnjem, petom modulu, imati individualno samostalno učenje i samostalni praktični rad uz monitoring - praćeni praktični rad u stvarnim uvjetima uz mentorstvo i usmjeravanje, te grupni rad - demonstracija vještina i supervizija na kraju same obuke. Ukupno trajanje programa je 120 sati", kazala je **Emina Herić** iz DVV International - Ured za BiH.*



Obuka će biti realizirana u pet višednevnih termina u periodu od juna do novembra 2019. godine, a polaznici će dobiti odgovarajuće certifikate. Prvi modul, "Učenje odraslih - psihološke osnovne, karakteristike i stilovi učenja", realizira prof.dr. **Šefika Alibabić**, redovni profesor na Katedri za andragogiju Filozofskog fakulteta Univerziteta u Beogradu.

*"Mislim da je vrlo značajno za Univerzitet u Zenici da naši mladi kadrovi budu obučeni u onim vještinama koje su ključne za prenošenje znanja, a nadam se da će se u budućem periodu program proširiti i na ostale zaposlenike. Mijenjaju se metode i načini rada tako da su ovakve obuke itekako dobrodošle", kazao je prof.dr. **Enes Hašić**, prorektor za nastavu i studentska pitanja Univerziteta u Zenici.*

Skupština ZDK je 2014. godine donijela Zakon o obrazovanju odraslih, kao okvir za ovu oblast, a saradnja sa DVV International dio je napora na jačanju struktura za implementaciju navedenog zakona, kao i kapaciteta unutar resornog ministarstva kako bi se proces obrazovanja odraslih mogao pratiti i provoditi u praksi. /kraj/

97. VLADA ZDK I JP PLAVA VODA POTPISALI PREDUGOVORE O PROJEKTU PLAVA VODA

ZENICA, 20.06.2019. - Premijer Zeničko-dobojskog kantona **Mirza Ganić** i direktor JP "Plava voda" d.o.o. Travnik **Ernad Granić** potpisali su u sjedištu Zeničko-dobojskog kantona Podugovor o zajmu za "**Projekat regionalni vodovod Plava voda**" i Ugovor u vezi sa otplatom kredita za projekat "Plava voda", čime je učinjen važan korak u procesu realizacije ovog regionalnog projekta u koji su uključeni Grad Zenica te općine Travnik, Novi Travnik i Busovača.

Premijer Ganić potpisao je i Podugovor o zajmu za "Projekat regionalni vodovod Plava voda" između Zeničko-dobojskog kantona i Federacije BiH, koji će biti proslijeđen Ministarstvu finansija FBiH.

"Podugovor mora potpisati i Federacija BiH i nakon toga se ulazi u drugu fazu koju diktira EBRD. Zeničko-dobojski kanton je potvrdio svoju opredjeljenost da uđe u veliki projekat, koji je infrastrukturni i omogućit će zapošljavanje, a s druge strane obezbjeđujemo da Zenica i njeni građani dugoročno imaju riješeno pitanje vodosnabdijevanja. Ovo je definitivno jedan od najvećih infrastrukturnih projekata koji će se realizirati u ZDK i SBK u narednom periodu", kazao je Ganić.



Premijer ZDK je izrazio zadovoljstvo što je došlo do potpisivanja ugovora i podugovora o zajmu, te istakao da je današnje potpisivanje ujedno i potvrda da je ovo vlada kontinuiteta.

JP "Plava voda" će izdati mjenice za iznos od 14,3 miliona KM, na osnovu odluke Skupštine Zeničko-dobojskog kantona. Direktor Granić je najavio kako će nakon potpisivanja svih ugovora uskoro ubrzo biti raspisani tenderi za nadzor i izvođača radova. Radovi bi trebali početi za devet mjeseci, nakon čega počinje rok od dvije i po godine za završetak vodovoda.

"Potpisivanje ugovora sa ZDK je veoma bitan korak, jer omogućuje da EBRD ostane u igri kao finansijer. Vrijednost projekta je 22 miliona eura, od čega po 11 miliona finansiraju Evropska banka za obnovu i razvoj (EBRD) i Razvojna banka Vijeća Evrope (CEB), a uz projekt je pridodat i grant od 5 miliona KM koji je obezbjedila Švedska razvojna agencija (SIDA), tako da u konačnici dobijemo iznos od 25 miliona eura", kazao je Granić, napominjući da je općina Vitez odustala od projekta, ali da ostaje otvorena mogućnost da se vrati ukoliko izrazi takav interes. /kraj/

98. PREMIJER NOVALIĆ RAZGOVARAO SA PREMIJEROM GANIĆEM I MINISTRIMA U VLADI ZDK

ZENICA, 28.06.2019. - Delegacija Vlade Federacije BiH na čelu sa premijerom **Fadilom Novalićem** posjetila je danas sjedište Zeničko-dobojskog kantona gdje je razgovarala sa premijerom **Mirzom Ganićem** i ministrima u kantonalnoj Vladi te predsjedavajućim Skupštine ZDK **Čazimom Huskićem**. U delegaciji Vlade FBiH bili su i federalni ministri razvoja, poduzetništva i obrta **Amir Zukić** i raseljenih osoba i izbjeglica **Edin Ramić**.



Premijer Ganić je rekao kako je ovo prva posjeta premijera Novalića novom sastavu kantonalne Vlade, te da je susret bio konkretan i konstruktivan.

"Razgovarali smo o podršci privredi i povratku na čemu ćemo zajedno raditi u narednom periodu, jer je opredjeljenje ove Vlade da stvaramo bolji poslovni ambijent, razvijamo

privredu i širimo poslovne zone", kazao je premijer Ganić.

Tom prilikom najavljene su aktivnosti u pravcu zahtjeva ZDK-a da Kantonalna bolnica Zenica dobije status univerzitetske bolnice, kako bi mogla biti nastavna baza u ZDK, a bilo je riječi i o projektu Plava voda.

"Premijer Novalić nas je informisao da je Vlada FBiH dala saglasnost Fondu za okoliš FBiH da izda mjenice JP Plava voda Travnik, čime će se završiti administrativni dio ovog velikog infrastrukturnog projekta koji je izuzetno važan za vodoopskrbu Zenice", kazao je Ganić.

Također, razgovarano je i o infrastrukturnim projektima, posebno u dijelu razvoja cesta.

"Zahvaljujući akcizama, ove godine je na nivo ZDK sa nivoa FBiH spušteno tri miliona KM. Mi smo se opredijelili da radimo kilometre, a ne metre ceste", rekao je Ganić.

Premijeri FBiH i ZDK razgovarali su i o mogućnosti uključivanja kompanija metalske industrije iz ZDK u namjensku industriju FBiH.

"To se ne može realizovati brzo, ali moramo razmišljati u tom pravcu jer namjenska industrija ostvaruje značajan rast i mi moramo tražiti svoje mjesto u toj priči. Imamo Institut "Kemal Kapetanović" koji može biti podrška namjenskoj industriji i na tome želimo raditi", kazao je Ganić.

Premijer Fadil Novalić je izrazio zadovoljstvo posjetom Vladi ZDK, rekavši kako bi drugačija raspodjela javnih prihoda donijela dodatna sredstva ZDK-u. Sadašnji model, s kojim je nezadovoljan jedan broj

kantona, među njima i ZDK, fokusiran je na distribuciju prikupljenih sredstava a ne na raspodjelu u skladu sa ostvarenim prihodima.

"Budući model raspodjele bi trebao biti kombinacija distribucije i raspodjele prihoda prema doprinosu kantona. Zakon je pripremljen, ali treba vrlo veliki društveni konsenzus, ne samo politički, da se promijeni sistem raspodjele koji bi uvažavao koliko nastaje na nekoj teritoriji, barem sa nekim procentom. Time bi ZDK imao veće prihode, barem za desetak miliona KM", kazao je Novalić. /kraj/

99. ISPLAĆENA DRUGA RATA STIPENDIJA ZA 2.232 STUDENTA IZ BORAČKE POPULACIJE

ZENICA, 28.06.2019. - Vlada Zeničko-dobojskog kantona je gradskim/općinskim službama za boračko-invalidsku zaštitu u ZDK-u danas doznala drugu ratu stipendija za 2.232 korisnika stipendija za studijsku 2018./2019. godinu u iznosu od 304.200,00 KM, koji obuhvata redovni i samofinansirajući studij prvog i drugog ciklusa Bolonjskog sistema studiranja. Nadležne gradske/općinske službe će izvršiti isplatu sredstava korisnicima stipendija.



U Budžetu Kantona za 2019. godinu za ovu namjenu osigurana su sredstva u iznosu od 2.433.600,00 KM. Po prvi put u dugogodišnjoj aktivnosti Ministarstva za boračka pitanja, stipendije su dobili svi studenti koji su aplicirali na

konkurs i koji su ispunjavali uslove.

*"Visina stipendije za prvu godinu je 800,00 KM, za drugu i ostale godine studija, te za prvu i drugu godinu drugog ciklusa 1.200,00 KM. Nastojat ćemo da održimo kontinuitet i da svaki mjesec bude izvršena isplata jedne rate stipendije", kazao je **Fahrudin Čolaković**, ministar za boračka pitanja ZDK.*

Raspodjela sredstava po lokalnim zajednicama je slijedeća: Grad Zenica 70.850,00 KM, Općina Breza 13.650,00 KM, Općina Doboju 8.200,00 KM, Općina Kakanj 28.000,00 KM, Općina Maglaj 20.550,00 KM, Općina Olovo 13.300,00 KM, Općina Tešanj 23.950,00 KM, Općina Usora 6.850,00 KM, Općina Vareš 10.800,00 KM, Općina Visoko 38.250,00 KM, Općina Zavidovići 36.550,00 KM i Općina Žepče – 33.250,00 KM. /kraj/

100. ZA VODNE PROJEKTE OD LOKALNOG ZNAČAJA 8,5 MILIONA KM

ZENICA, 01.07.2019. - Vlada Zeničko-dobojskog kantona usvojila je Program utroška sredstava vodnih naknada za 2019. godinu Ministarstva za poljoprivredu, vodoprivredu i šumarstvo ZDK u ukupnom iznosu od 8.500.000,00 KM.

Od toga, za finansiranje izgradnje ili rekonstrukcije vodnih objekata od općinskog značaja - zaštitnih



vodnih objekata, vodnih objekata za snabdijevanje i vodnih objekata za zaštitu od zagađenja, uključujući izradu projektne dokumentacije, u ovoj godini je planirano 5.157.270,00 KM, te 52.000,00 KM za finansiranje vršenja stručno-tehničkog nadzora nad izgradnjom ili rekonstrukcijom ovih objekata.

"Raspodjela planiranih sredstava za realizaciju projekata od općinskog i drugog značaja vrši se na osnovu iskazanih prioriteta od strane

*općina, a prema kriterijima ovog ministarstva za utvrđivanje prioriteta projekata iz oblasti upravljanja vodama. Kao i ranijih godina, planirano je finansiranje vodnih projekata u svim općinama ZDK. Ministarstvo će sa gradom Zenica i svim općinama ZDK-a zaključiti sporazume, kojim će biti regulisane međusobne obaveze i način realizacije odobrenih sredstava", kazao je **Mirnes Bašić**, ministar za poljoprivredu, šumarstvo i vodoprivredu ZDK.*

Za realizaciju nezavršenih projekata ugovorenih u 2018. godini u ovogodišnjem programu je predviđeno 2.844.207,50 KM. /kraj/

101. PRIJEM ZA ZENIČKE HUMANITARCE KOD PREMIJERA GANIĆA: GRADE BUNARE I DŽAMIJE U AFRICI, POMAŽU SIROMAŠNE U BIH

ZENICA, 01.07.2019. - Premijer **Mirza Ganić** upriličio je prijem za humanitarce iz Zenice **Anela Okića**, ljekara Kantonalne bolnice, **Aldina Kajmakovića** i **Harisa Hećimovića**, koji posljednjih nekoliko godina uspješno provode humanitarne akcije u BiH i Africi.



Početna ideja da izdvajaju simboličan iznos svaki mjesec za pomoć ugroženima, nakon osam godina prerasla je u humanitarni rad velikih razmjera. Pored pomoći velikom broju siromašnih porodica u Africi, vlastitim sredstvima i uz pomoć prijatelja pomogli su izgradnju čak 2.200 bunara i 25 džamija u Obali Slonovače, Gvineji Bisao, Gambiji, Gani, Nigeriji, Maliju i Togu.

Istovremeno provode humanitarne akcije i u domovini Bosni i Hercegovini. Plaćanje računa za vodu i struju te čišćenje više od 100 džamija u Zenici, Visokom, Kaknju, Brezi, Žepču, Maglaju, Doboju i Travniku, osiguravanje školskih sendviča za djecu iz socijalno ugroženih porodica, liječenje djece, kupovina veš-mašina samohranim majkama, organiziranje besplatnih odlazaka na umru, samo su dio nevjerovatnog rada grupe mladih humanitaraca iz Zenice.

Premijer Ganić se zahvalio gostima kao i svim ljudima koji učestvuju u ovim akcijama na izvanrednoj požrtvovanosti i posvećenosti humanoj misiji, ističući kako humanitarna udruženja imaju važnu ulogu da nadopunjuju sistem socijalne zaštite.

"Oni su primjer kako se sa iskrenom namjerom, odricanje i zajedništvo, a ne nužno i velika ulaganja, može napraviti mnogo za društvo a posebno za siromašne. Njihov rad zaslužuje pažnju i zahvalnost kompletne zajednice", kazao je Ganić. /kraj/

102. VRANDUK: PRIJEVOZ ŽIVOTNO-UGROŽENIH PACIJENATA POD PRATNJOM POLICIJE

ZENICA, 03.07.2019. - Uprava policije MUP-a Zeničko-dobojskog kantona će putem Policijske stanice Nemila osigurati da sanitetska vozila sa pacijentima čije je stanje akutno-životno ugrožavajuće, prođu bez zadržavanja ili uz minimalno zadržavanje uzrokovano radovima na tunelu Vranduk - zaključeno je na sastanku ministra zdravstva dr. **Adnana Jupića** sa predstavnicima Ministarstva unutrašnjih poslova i Zavoda zdravstvenog osiguranja ZDK.

Sastanak je organiziran s ciljem traženja rješenja za problem prijevoza pacijenata sa područja općina Žepče, Zavidovići, Maglaj, Doboj Jug, Usora i Tešanj u pravcu Kantonalne bolnice Zenica, izazvan zastojem



i velikim gužvama zbog rekonstrukcije tunela Vranduk, naročito posljednjih dana kada zbog povećanih gužvi nije moguće provoditi ranije postignute dogovore sa MUP-om o načinu prijevoza pacijenata.

"PS Nemila će osigurati da sanitetsko vozilo bude preuzeto od policijske patrole i praćeno na

najefikasniji način kroz mjesto izvođenja radova ili alternativnim putem. U slučaju da se transport vrši u vremenu kada na spomenutoj dionici nema gužve i velikih zastoja, dežurni u PS Nemila će dati uputu vozaču da u pravcu Zenice prođe bez policijske pratnje što će iziskivati najmanji utrošak vremena. Sa rješenjem su upoznate sve zdravstvene ustanove, a uvjereni smo da će doći do pozitivnih iskoraka i olakšanja transporta naših pacijenata", kazao je dr. Jupić.

Također, u koordinaciji sa Zavodom zdravstvenog osiguranja ZDK vode se pregovori sa Univerzitetskim kliničkim centrom Tuzla, kako bi se, dok traje rekonstrukcija tunela u Vranduku, pojednostavilo upućivanje životno ugroženih pacijenata u ovu zdravstvenu ustanovu.

"Poseban akcent će biti stavljen na izbjegavanje bilo kakvih zloupotreba u okviru ponuđenih rješenja, kako bismo obezbijedili prijem i stvarnu korist za životno-ugrožene pacijente sa sjevera Zeničko-dobojskog kantona u UKC Tuzla", kazao je ministar Jupić. /kraj/

103. ZDK MEĐU PRVIMA OMOGUĆIO ORGANIZIRANJE NASTAVE ZA UČENIKE NA BOLNIČKOM LIJEČENJU

ZENICA, 03.07.2019. - Ministarstvo za obrazovanje, nauku, kulturu i sport Zeničko-dobojskog kantona donijelo je Pravilnik o organiziranju rada škole u bolnici, čime je među prvima u Federaciji BiH uredilo način organiziranja nastave za učenike koji se nalaze na dužem bolničkom liječenju.

Pravilnik predviđa organiziranje nastave u okviru odjeljenja, grupe ili individualno za osnovce koji su hospitalizirani duže od tri sedmice, dok će adekvatno prilagođeno obrazovanje za djecu na kućnom liječenju pružati najbliža škola mjestu stanovanja uz primjenu adekvatnih oblika nastavnog rada.

"Cilj organiziranja ovakvog oblika nastave je da se hospitaliziranoj djeci olakša odvojenost od porodice i primarne socijalne sredine, umanjí stres od boravka u bolnici, omogući kontinuitet u usvajanju nastavnih sadržaja, te da se dani provedeni u bolnici učine zanimljivim i sadržajnijim, što osigurava lakšu reintegraciju u matičnu školu nakon povratka iz



*bolnice i prelazak u viši razred bez polaganja razrednih ispita ili ponavljanja razreda", ističe **Spahija Kozlić**, ministar za obrazovanje, nauku, kulturu i sport ZDK.*

Prema pravilniku, koji je početkom sedmice objavljen u Službenim novinama ZDK, u gradu ili općini u kojoj postoji zdravstvena ustanova koja nudi usluge bolničkog liječenja za djecu, a u ZDK-u su to Kantonalna bolnica Zenica i Opća bolnica Tešanj, organizaciju i realizaciju škole u bolnici vrši geografski najbliža osnovna škola, a u odgojno-obrazovni rad bit će uključeni nastavnici razredne i predmetne nastave. /kraj/

104. GANIĆ: AMRA BABIĆ OD STRAHA ZA POZICIJU NAPADA VLADU ZDK I PREMIJERA GANIĆA KOJI NA NJENU ŽALOST DOLAZI IZ VISOKOG

ZENICA, 03.07.2019. - Premijer Zeničko-dobojskog kantona **Mirza Ganić** uputio je reakciju povodom učestalih napada na instituciju Vlade i Premijera od strane gradonačelnice Grada Visoko **Amre Babić**, u kojoj se navodi:



"Ne tako davno, od prije tri mjeseca krenula su spinovanja protiv Vlade ZDK i premijera Mirze Ganića, od podnošenja raznih populističkih inicijativa prema kantonalnoj Vladi do naručenih tekstova koji imaju za cilj negativan marketing kako bi se diskreditovao rad premijera, jer isti, na žalost gradonačelnice Babić, dolazi iz Visokog i kao takav, s obzirom da je i predsjednik SDA Visoko, predstavlja najveću političku prijetnju na lokalnim izborima 2020. godine.

Mislimo da je svima jasno da iznenadno buđenje gradonačelnice Amre Babić u smislu kritičkog osvrta spram Vlade ZDK i premijera Mirze Ganića te populističko djelovanje nije borba za Visoko, već je to borba za vlast i svoju ličnu poziciju tj. za poziciju gradonačelnice koju želi da uživa i naredne četiri godine mandata. Pomenuto vrlo jasno i precizno opisuje narodna izreka koja kaže "ne pad snijeg da prekrije brijeg, već da svakoj zvjerci prekrije trag".

Gradonačelnici Amri Babić je bolje da pokaže odgovornost i pomete ispred svojih vrata kako bi mogla držati lekcije drugima. Za početak bi bilo lijepo da zakrpi sve udarne rupe u svim mjesnim zajednicama i njihovim podružnicama te da prestane povećavati namete građanima koji su direktno u nadležnosti lokalne vlasti, a paralelno da bolje upravlja povlačenjem odobrenih kreditnih sredstava, jer zbog sporosti u implementaciji projekta koji je od posebnog interesa za građane Visokog u odnosu na planiranu dinamiku dolazi do rasta troškova po osnovu odobrenih a nepovučenih sredstava, gdje je Grad Visoko oštećen za 75.375 KM. Dalje, o sigurnosti i bezbjednosti građana, podršci poljoprivredi, visini komunalnih taksi, poskupljenju vode, divljim deponijama i smeću, plaćanju javne rasvjete iz budžeta Grada za ruralna područja i brojnim drugim problemima na području grada Visokog, koji najviše utiču na život građana, ovom prilikom nećemo govoriti, ali očigledno da ćemo se morati baviti ovim pitanjima koja su direktno u nadležnosti lokalne zajednice, jer se gradonačelnica umjesto ovim pitanjima bavi podmetanjima i jeftinim populizmom.

Najnovija tvrdnja gradonačelnice Amre Babić da je Grad Visoko oštećen prilikom raspodjele sredstava vodnih naknada kojima se finansiraju projekti u lokalnim zajednicama predstavlja pokušaj manipulacije brojkama kako bi se javnosti prikazalo da premijer Ganić, tobože, radi protiv Visokog. Naime, programom utroška obuhvaćena su sredstva vodnih naknada od 8,5 miliona KM, s tim da je za projekte u ovoj godini opredijeljeno 5.157.270,00 KM, dok su preostalih 2.844.207,50 KM sredstva za nezavršene projekte koji su ugovoreni u 2018. godini.

Nezavršeni projekti u gradu Visoko su: Regulacija Muhašinovićkog potoka u iznosu od 271.158,13 KM, Rekonstrukcija vodovodne i kanalizacione mreže s kolektorom u ulici Mladih Muslimana u iznosu od 83.483,06 KM, Izgradnja kanalizacionog sistema u Gornjim Porječanima u iznosu od 91.000,00 KM te utvrđivanje vodnog dobra na rijeci Fojnici u iznosu od 5.148,00KM, što je ukupno 450.789,19 KM. U ovoj godini, od ukupno planiranih 5.157.270,00 KM, za Visoko je izdvojeno 480.000,00 KM za projekt Izgradnje rezervoara Dubrave. Dakle, za projekte u općini Visoko u ovogodišnjem programu planirano je ukupno 930.789,19 KM. Osim toga, nije tačno da je broj stanovnika jedini kriterij za raspodjelu sredstava vodnih naknada, jer se kao kriterij uzima iznos općinskog budžeta kako bi se, sukladno Strategiji razvoja ZDK, omogućio ravnomjeran razvoj i malih općina.

Dakle, statistika ne ide u korist gradonačelnice Amre Babić, a naročito joj smeta podatak da su izdvajanja za vodne projekte u gradu Visoko sa nivoa Zeničko-dobojskog kantona značajno povećana u posljednje dvije godine. U 2017. izdvojeno je 278.000 KM, prošle godine 450.000 KM, a u ovoj, kao što smo naveli, 480.000 KM! Treba istaći da je planirani iznos za 2019. godinu mogao biti i veći da je gradonačelnica Babić prihvatila prijedlog premijera da predloži i dva projekta koji bi se finansirali iz rezervnih sredstava, a to su projekt vodosnabdijevanja Područne škole "Orašac" u sastavu OŠ "Mula Mustafa Bašeskija" Visoko vrijedan 20.000 KM te projekt uređenja obale rijeke Zimašnice kroz Gornje Moštre u vrijednosti 40.000 KM, kako bi se spriječilo plavljenje cca 20 domaćinstava i značajne površine poljoprivrednog zemljišta vlasnicima kojima je poljoprivreda osnovno zanimanje. Međutim, gradonačelnica je prijedlog premijera odbila jer evidentno da joj se isti ne uklapaju u strategije i planove. Bez obzira na sve, Vlada Zeničko-dobojskog kantona još jednom zahtijeva od gradonačelnice Babić da dostavi prijedlog za ova dva projekta, kako bi Vlada odobrila finansijska sredstva za njihovu realizaciju.

Vlada Ze-do kantona na čelu s premijerom Mirzom Ganićem u proteklom periodu odobrila je desetina miliona KM od čije implementacije će značajne koristi imati građani Visokog, a sredstva se nalaze u transferima za socijalna davanja, javne kuhinje, socijalne ustanove, podršku kulturnim manifestacijama, zaštitu kulturno-historijskih spomenika, omladinske projekte, podršku vjerskim zajednicama, ustanovama kulture, za zapošljavanje boračke populacije, za sport, javne zdravstvene ustanove, stipendiranje studenata, smještaj studenata u studentske centre, za takmičenja učenika osnovnih i srednjih škola, za podršku privredi i stvaranju boljeg poslovnog ambijenta, za poljoprivredu, izgradnju cesta, zaštitu okoliša itd.

Da ne bismo pojedinačno predstavljali finansirane projekte u Visokom, istaknut ćemo samo dva koja su veoma bitna, ali oni nisu i sigurno neće biti popraćeni u medijima kojim upravlja grad Visoko, a potpuno pobijaju tezu koju nameće gradonačelnica Grada Visoko i svjedoče da mjesto premijera Visokom donosi pravdu i više sredstava sa nivoa Zeničko-dobojskog kantona. U 2019. godini zahvaljujući novoj vladi i premijeru Mirzi Ganiću svaki student u Visokom koji je aplicirao na boračku stipendiju, istu je i dobio. U prevodu to znači da je u Visokom ove godine 100 studenata više dobilo stipendiju, gdje imamo 100 porodica kojima je olakšano finansiranje školovanja djece. Finansijski posmatrano radi se o dodatno izdvojenim sredstvima za Visoko u iznosu cca 100.000,00 KM. Također, drugi projekat je odobrenje

1.550.000,00 KM za izgradnju i rekonstrukciju regionalnih cesta i to 1.140.000,00 KM za cestu Moštre – Visoko i 410.000,00KM za cestu od Gradskih grobalja do Buka, a što je u prevodu četiri puta više nego u prethodnoj godini ili pak više za 1.150.000,00 KM.

Premijer poručuje gradonačelnici Babić da svoje resurse ne troši na brigu da li premijer Mirza Ganić voli grad u kojem živi i podiže porodicu i da li će svoj rad usmjeriti na osiguranje dodatnih finansijskih sredstava za realizaciju projekata koje od njega traže građani grada Visoko, nego da se posveti stvaranju boljeg ambijenta i ravnomjernog razvoja svih mjesnih zajednica na području grada Visokog i rješavanju nagomilanih problema koji su direktno u njenoj nadležnosti." /kraj/

105. PRIHOD OD KONCESIJA ZA EKSPLOATACIJU MINERALNIH SIROVINA U 2018. VIŠE OD 2 MILIONA KM

ZENICA, 04.07.2019. - Ukupni prihod po osnovu koncesione naknade za istraživanje i eksploataciju čvrstih mineralnih sirovina na području Zeničko-dobojskog kantona u 2018. godini iznosio je 2.045.879,69 KM. Po osnovu jednokratne koncesione naknade uplaćeno je 1.011.537,27 KM, a kontinuirane naknade 1.034.342,42 KM.



U periodu 2015-2017. godina ostvareni su prihodi od koncesione naknade u ukupnom iznosu od 2.890.031,82 KM.

"U 2018. godini znatno je povećana uplata koncesionih naknada, dijelom i kao rezultat donesenih sudskih presuda. Koncesiona naknada se dijeli u omjeru 70:30 posto između općina i Kantona. Od ukupnog

*iznosa općinama u kojima se vrši eksploatacija prošle godine alocirano je 1.434.642,09 KM, dok je preostalih 611.237,60 KM pripalo Zeničko-dobojskom kantonu", kazao je ministar privrede **Zlatko Jelić**, precizirajući da je Zeničko-dobojski kanton svoj dio sredstava utrošio u sufinansiranje pripreme i izgradnje poslovnih zona.*

Tokom proteklog perioda više domaćih i stranih investitora je iskazalo interes za dodjelu koncesija za istraživanje i eksploataciju čvrstih metalnih i nemetalnih mineralnih sirovina. Zahtjevi su se odnosili na istraživanje i eksploataciju krečnjaka, dijabaza, fliša, dolomita, spilita, glina, lapora, rožnaca, gabra, kvarcnog pijeska i td., nemetalnih mineralnih sirovina olova-ceruzita, cinka, barita, te istraživanje i eksploataciju uglja. Od ukupno 23 ugovora koja su potpisana zaključno s krajem prošle godine, aktivno je 18 ugovora.

U 2018. godini nije potpisan nijedan novi ugovor, ali su potpisani aneksi ugovora sa četiri koncesionara. Intenzivne aktivnosti su vođene u postupku pripreme dodjele koncesije za eksploataciju uglja rudnicima u Zenici, Kaknju i Brezi.

"Nastavak izgradnje trase autoputa na koridoru 5C kroz područje ZDK-a trebalo bi rezultirati povećanjem potražnje za proizvodima od mineralnih sirovina, što bi znatno poboljšalo stanje kod koncesionara", kazao je Jelić. /kraj/

106. VLADA PODRŽALA ORGANIZACIJU VJERSKO-KULTURNE MANIFESTACIJE LASTAVICA 2019

ZENICA, 04.07.2019. - Vlada Zeničko-dobojskog kantona i ove godine je podržala organizaciju vjersko-kulturne manifestacije "Lastavica", odobrivši Muftijstvu zeničkom kao organizatoru sredstva u iznosu od 5.000 KM.

Radi se o tradicionalnoj manifestaciji koja se organizira u okviru obilježavanja značajnih datuma Islamske zajednice BiH. Program ovogodišnje "Lastavice" bit će upriličen od 29. jula do 04. avgusta, kada će se održati centralni program.



U okviru "Lastavice" realiziraju se različiti kulturni i vjerski sadržaji kao što su večeri Kur'ana, ilahija i kasida, promocija knjiga, organiziranje tribina i sličnih aktivnosti s ciljem afirmacije kulturnih, vjerskih i nacionalnih vrijednosti Bošnjaka. /kraj/

107. GANIĆ: SUMNJAMO U DOBRE NAMJERE GRADONAČELNICE BABIĆ I NUDIMO RJEŠENJE

ZENICA, 04.07.2019. - Premijer Zeničko-dobojskog kantona **Mirza Ganić** uputio je reakciju na populističku medijsku inicijativu vezanu za poskupljenje plina gradonačelnice **Amre Babić** s jasnim prijedlogom rješenja nastale situacije, u kojoj se navodi:



"Pozivamo gradonačelnicu Babić da se uozbilji i konačno počne rješavati nagomilane probleme koje je priredila građanima Visokog svojim neradom, bahatošću i strahovladom. Sumnjamo u dobre namjere gradonačelnice te smatramo da je ovo samo još jedan od spinova koje priređuje javnosti u nedostatku konkretnih rezultata rada. Jednako kako traži subvencije za cijenu plina, bilo bi očekivano da po toj i takvoj logici, gradonačelnica Babić traži subvencije za enormno i nerazumno

povećanje cijena komunalnih usluga u Visokom. Ali, takvo nešto gradonačelnica nije i neće zatražiti, jer je to ogromno povećanje cijena komunalnih usluga prozrokovalo upravo ona svojom bahatom politikom usmjerenom protiv interesa građana.

Nedopustvo je da voda građanima samo u ovoj godini bude 50% skuplja nego što je to bilo ranije, s tendencijom kontinuiranog poskupljenja, kao što je nedopustivo da cijena priključka bude 1.000,00 KM umjesto prijašnjih 600,00 KM. Nedopustivost leži u činjenici da se povećava broj priključaka što direktno utiče na povećanje potrošnje i veću zaradu, a istovremeno za realizaciju projekta imaju osigurana kreditna sredstva. Nedopustivo je još mnogo toga kada govorimo o nametima u gradu Visoko koji idu preko leđa građana, ali to nećemo ovom prilikom!

Vlada Ze-do kantona je trajno opredjeljenja da olakša građanima kreditno zaduženje, tako što je iz vodnih naknada finansirala izgradnju rezervoara na Kula Banjeru u iznosu od 350.000,00 KM, te nedavno odobrila 480.000,00 KM za finansiranje izgradnje rezervoara Dubrave, a što bi u konačnici trebalo da umanju trošak projekta po odobrenom kreditu za 830.000,00 KM. Ostaje nam da vidimo u šta će biti utrošena uštedena sredstva od kredita!

Ako su u interesu gradonačelnice grada Visokog manje cijene plina logično je da gradsko vijeće grada Visoko ODMAH donese odluku kojom će smanjiti maržu koju zarađuje JP Visoko Ekoenergija, te ukine namet koji je uveden i koji se plaća na mjerno mjesto u iznosu od 2KM mjesečno. Evidentno je da je JP Visoko Ekoenergija u 2018. godini imalo dobit u iznosu od 622.656,00 KM što je sasvim dovoljno da se iz dobiti preduzeća pomogne građanima grada Visoko, jer je gradonačelnica u svojoj populističkoj inicijativi izjavila da očekuje od Vlade ZDK subvenciju u iznosu od 624.295,95KM. Cijeneći da dobit JP Visoko

Ekoenergija ne treba da se ostvaruje preko leđa građana grada Visoko, Vlada Zeničko-dobojskog kantona će subvencionirati razliku između dobiti i stvarnog povećanja cijene plina u iznosu od 1.639,95 KM kako ni taj iznos ne bi pao na teret našim građanima.

Podcrtavamo da Vlada Zeničko-dobojskog kantona neće ostaviti građane u nemilosti bahate gradonačelnice. Mi ćemo učiniti sve da se sigurnost, sloboda, red i rad ponovo vrate u Visoko. Puno je primjera općina u Ze-do kantonu koje poštuju svoje građane i bore se za uvjete života i rada. Visoko zaslužuje puno bolje i mi ćemo to omogućiti. Napominjemo da se u gradu Visoko realizuje značajan broj projekata koji se finansira iz budžeta Zeničko-dobojskog kantona, ali vrlo često imate priliku gledati kako gradonačelnica Babić sve projekte pripisuje sebi." /kraj/

108. U KPZ ZENICA POČINJE IZGRADNJA NOVOG PAVILJONA ZA SMJEŠTAJ OSUĐENIKA

ZENICA, 05.07.2019. - U Kazneno-popravnom zavodu Zenica ovog mjeseca bi trebala da počne izgradnja Paviljona IX, kapaciteta 236 osuđenika, koji će u potpunosti biti usklađen sa zahtjevima Evropske unije kada je u pitanju smještaj, boravak i aktivnosti osuđenih osoba. Projekt vrijedan 2 miliona i 157 hiljada eura finansirat će Delegacija EU iz sredstava IPA 2015, namijenjenih razvoju sektora pravosuđa u BiH.

Izgradnja objekta površine 2.686 m², koji bi trebao biti u funkciji za godinu dana, povjerena je konzorciju kompanija "Almy Gradnja", "Almy" i "Deling" iz Zenice, a nadzor će vršiti zenička firma "Aksa". Planovi i dinamika izgradnje objekta predstavljeni su na prezentaciji u upravi KPZ-a u prisustvu premijera **Mirze Ganića** i ministra pravosuđa i uprave **Nebojše Nikolića**.



"Razvoj sektora pravosuđa je među prioritetima Vlade i ovom prilikom se zahvaljujem institucijama EU koja je osigurala sredstva za ovaj kapitalni projekt. Investicije imaju punu podršku Vlade, jer pokreću domaći sektor građevinarstva i ekonomiju Zeničko-dobojskog kantona, a paralelno se proširuju zatvorski kapaciteti sukladno propisima EU", kazao je premijer Ganić. /kraj/

109. VLADA ŽELI NASTAVITI DOBRU SARADNJU SA ORGANIZACIJAMA BORAČKE POPULACIJE U ZDK

ZENICA, 08.07.2019. - U Vladi Zeničko-dobojskog kantona upriličen je prijem i radni sastanak sa predstavnicima temeljnih boračkih organizacija Armije RBiH i HVO-a u ZDK, čiji su domaćini bili predsjedavajući Skupštine **Čazim Huskić** i ministar za boračka pitanja **Fahrudin Čolaković**. Sastanku su prisustvovali **Fatima Mahmutagić**, predsjednica Udruženja porodica šehida i poginulih boraca, **Nazim Bećirović**, predsjednik Saveza dobitnika najvećih ratnih priznanja, **Vernest Karzić**, predsjednik JOB "Unija veterana", **Jusuf Rakman** i **Asim Omanović** iz Saveza ratnih vojnih invalida, **Pero Lujić**, predsjednik HVIDRA-e te **Dragan Janko**, čelnik Udruge nositelja ratnih odličja HVO-a u ZDK-u.



Prenoseći pozdrave premijera **Mirze Ganića**, koji je bio spriječen da prisustvuje prijemu zbog sastanka u Vladi Federacije BiH, predsjedavajući Huskić je ponovio opredjeljenje aktuelne vlasti u Zeničko-dobojskom kantonu da nastavi saradnju sa boračkim udruženjima na način kako je to činila prethodna vlada na čelu s premijerom **Miralemom**

Galijaševićem.

"Želimo da radimo zajedno i da održimo kontinuitet dobre saradnje. Nastojat ćemo da sve probleme rješavamo dogovorom", kazao je Huskić.

Boračka udruženja očekuju od Zeničko-dobojskog kantona da uskladi svoje propise sa Zakonom o dopunskim pravima boraca i članova njihovih porodica FBiH, čim bude donesen u Parlamentu FBiH. Traže da se sistemski riješi pitanje pravne pomoći za branitelje koji su optuženi ili učestvuju kao svjedoci u predmetima ratnih zločina, te da se institucionalno jačaju braniteljska udruženja kako bi se ova populacija mogla efikasnije boriti za pripadajuća prava. Poručili su kako žele graditi istinsko povjerenje a probleme rješavati kroz dijalog s vlastima, a ne proteste i šatorska naselja.

"U protekle četiri godine smo postigli napredak u rješavanju položaja boračke populacije i želimo ostati na tom kursu. Moramo se izboriti za dodatno povećanje budžeta kako bismo kroz nove projekte napravili još veći iskorak", kazao je ministar Čolaković. /kraj/

110. REGIONALNI PUT ČAJDRAŠ-OVNAK I VODNI PROJEKTI OD ŽIVOTNOG ZNAČAJA ZA STANOVNIKE KOČEVSKOG SLIVA

ZENICA, 10.07.2019. - Premijer Zeničko-dobojskog kantona **Mirza Ganić** razgovarao je sa predstavnicima mjesnih zajednica u slivu rijeke Kočeve na području grada Zenice - Janjac, Stranjani, Pojske i Vrselje. Na sastanku su učestvovali ministar za poljoprivredu, šumarstvo i vodoprivredu **Mirnes Bašić** te ministar za prostor uređenje, promet i komunikacije i zaštitu okoliša **Arnel Isak**.

U fokusu razgovora bio je projekt rekonstrukcije regionalnog puta R413A Čajdraš-Ovnač, za čiju je prvu dionicu Čajdraš-Lokvine Vlada Zeničko-dobojskog kantona prošle godine obezbijedila jedan milion KM te izabrala izvođača radova. Međutim, radovi još nisu otpočeli jer još nije završena eksproprijacija



zemljišta, a Grad Zenica nije završio izgradnju kanalizacije, vodovoda i ostalih instalacija koje se pružaju trasom puta.

Iz Vlade je najavljeno da bi, dok Kantonalna direkcija za ceste ZDK i Grad Zenica rješavaju ove probleme, radovi ubrzo trebali krenuti na dionicama koje ne presjecaju instalacije i

na kojima su riješeni imovinsko pravni odnosi.

Istaknuto je kako je regionalni put Čajdraš-Ovnač od životnog značaja za stanovnike tog kraja, a omogućit će i kvalitetnu alternativnu vezu između Zenice i Travnika, jer Vlada SBK sa druge strane već radi rekonstrukciju postojećeg puta.

Razgovarano je i o planu ulaganja u vodne projekte koji se finansiraju iz sredstava vodnih naknada. Za projekte na području Grada Zenice ove godine je predviđeno 1.493.440,00 KM, među ostalima i određen broj projekata u mjesnim zajednicama Kočevskog sliva, ali je prije operativnosti programa potrebno da predloženi sporazum potpiše Grad Zenica.

Na sastanku sa delegacijom mjesnih zajednica, koju je predvodio **Besim Spahić**, razgovarano je o ulaganjima u infrastrukturu školstva i zdravstva, sanaciji udarnih rupa i postavljanju saobraćajne signalizacije na regionalnom putu, kao i problemima odlaganja jalovine iz Rudnika Stranjani, divljih deponija i nelegalne sječe šume, pogotovo na području gdje žive povratnici.

Premijer Ganić je najavio da će zadužiti Ministarstvo unutrašnjih poslova da intenzivira prisustvo službenika policije na povratničkim područjima, dok će preko resornih ministarstava urgirati da Grad Zenica rješava probleme iz lokalne nadležnosti. /kraj/

111. DELEGACIJA VLADE ZDK PRISUSTVOVALA KOMEMORACIJI I UKOPU 33 ŽRTVE GENOCIDA U SREBRENICI

SREBRENICA, 11.07.2019. - Delegacija Vlade Zeničko-dobojskog kantona prisustvovala je danas komemoraciji povodom 24. godišnjice genocida nad Bošnjacima Srebrenice te posljednjem ispraćaju i ukopu 33 identifikovane žrtve genocida u mezarju Memorijalnog centra Potočari.



Premijer Mirza Ganić i ministri poljoprivrede, vodoprivrede i šumarstva **Mirnes Bašić**, boračkih pitanja **Fahrudin Čolaković** te prostornog uređenja, prometa i komunikacija **Arnel Isak**, zajedno sa brojnim delegacijama iz BiH i svijeta, odali su počast žrtvama najvećeg zločina u Evropi nakon

Drugog svjetskog rata te se upisali u knjigu žalosti.

Na spisku ubijenih Srebreničana nalazi se 8.372 imena, a do sada je ukopano 6.643 žrtava genocida. /kraj/

112. UPRILIČEN PRIJEM ZA SAVEZ RVI FBIH I OO 16. SPORTSKIH IGARA RVI FBIH

ZENICA, 12.07.2019. - Premijer Zeničko-dobojskog kantona **Mirza Ganić** i predsjedavajući Skupštine **Čazim Huskić** upriličili su danas prijem za predstavnike Saveza ratnih vojnih invalida Federacije BiH i Organizacionog odbora 16. Sportskih igara RVI FBiH, koje će se ovog vikenda održati u Zenici.

Premijer Ganić je izrazio zadovoljstvo što će tradicionalni sportski događaj ove godine biti održan u Zenici, gdje će se okupiti 360 takmičara iz cijele FBiH, ističući kako ratni vojni invalidi zaslužuju svaki vid podrške države.



"Vlada u prošlom mandatu, kao i u novom sazivu, u kontinuitetu ulaže značajna finansijska sredstva za podršku boračkoj populaciji. Osigurali smo boračke stipendije za sve studente koji su podnijeli formalno-ispravne prijave, radimo na stambenom zbrinjavanju, zapošljavanju, finansiramo liječenje i druge potrebe, kako bismo osigurali dostojanstvo za one koji su nas branili kada nam je bilo najteže. Počašćeni smo posjetom i ovo je prilika da otvoreno kažemo da smo uz njih i da imaju našu punu podršku", kazao je Ganić.

Predsjednik Saveza RVI FBiH **Esad Delić** i predsjednik Saveza RVI ZDK **Jusuf Rakman** zahvalili su se Vladi ZDK za posvećenost unapređenju položaja ove populacije, kao i za podršku organizaciji 16. Sportskih igara RVI FBiH.

Prijemu su prisustvovali ministar za boračka pitanja **Fahrudin Čolaković** i ministrica za rad, socijalnu politiku i izbjeglice **Azra Šabanović**. /kraj/

113. DATA SAGLASNOST NA TROGODIŠNJI PLAN OBRAZOVANJA ODRASLIH ZDK

ZENICA, 12.07.2019. - Vlada Zeničko-dobojskog kantona dala je saglasnost na Plan obrazovanja odraslih ZDK za period od 2019. do 2021. godine, kojim su definirane prioritetne oblasti obrazovanja odraslih i nadležne institucije, potrebna infrastruktura, raspodjela po jedinicama lokalne samouprave, okvirni obim sredstava kao i dinamika realizacije ovog plana. Ministarstvo za obrazovanje, nauku, kulturu i sport ZDK do sada je plan pripremalo na godišnjem nivou, a ove godine aktivnosti su po prvi put planirane za trogodišnje razdoblje.



Ovo ministarstvo u saradnji sa drugim ministarstvima, asocijacijama privrednika, poslodavaca i obrtnika te jedinicama lokalne samouprave u ZDK-u u iduće tri godine će, između ostalog, nastaviti provedbu programa osnovnog i srednjeg obrazovanja odraslih, andragoško osposobljavanje obrazovnog kadra, kreiranje i ažuriranje baza podataka i registara, praćenje potreba tržišta rada te promoviranje obrazovanja

odraslih i cjeloživotnog učenja. Strategiju razvoja obrazovanja odraslih ovaj kanton bi, prema planu, trebao dobiti 2021. godine.

Osnovna zadaća obrazovanja odraslih je da bude brz odgovor na izmjenjive potrebe tržišta rada i osigura trajnu zaposlenost radno sposobnog stanovništva. Aktivnosti na ovom planu konkretizirane su 2014. godine kada je Skupština ZDK donijela Zakon o obrazovanju odraslih.

Prošle godine usvojen je Program za osnovno obrazovanje odraslih, koje je jedan od prioriteta navedenog zakona, osigurana budžetska sredstva, raspisani javni pozivi za upis u program, a na koncu se krenulo s realizacijom. Međutim, zabilježen je neočekivano slab odziv za upis, tako da se broj građana bez završene osnovne škole nije znatnije popravio u odnosu na godinu ranije kada su prezentirani podaci o 5.491 osobe.

Kada je u pitanju srednjoškolsko obrazovanje odraslih, zaključno sa 2018. godinom doneseno je 27 programa, a interes je iskazan za veliki broj stručnih i zanatskih zanimanja.

„Najveće zanimanje je bilo za sticanje kvalifikacija medicinska sestra tehničar, ekonomski tehničar, vozač motornih vozila i zavarivač. Ipak, potražnja za radnom snagom na području ZDK je izuzetno slaba i

*poslodavci rijetko iskazuju potrebe, ali je, imajući u vidu kretanja na tržištu rada, za očekivati da u narednim godinama dođe do povećane potražnje za radnom snagom", kaže **Spahija Kozlić**, ministar obrazovanja, nauke, kulture i sporta.*

Značajni rezultati u 2018. su postignuti i u oblasti promoviranja obrazovanja odraslih, na čemu se radilo kroz okrugle stolove organizirane uz finansijsku podršku DVV International, kao i u oblasti andragoškog osposobljavanja nastavnog kadra.

"Slabiji rezultati su ostvareni u segmentu razvijanja standarda zanimanja, kao prve faze u izradi standarda kvalifikacija i razvijanja programa obrazovanja odraslih, te primjene registra poslodavaca kod kojih se može realizirati praktična nastava, a što su ključne stavke za usklađivanje obrazovanja sa potrebama tržišta rada", ističe Kozlić.

Za obrazovanje odraslih u 2019. godini planirana su budžetska sredstva u iznosu od 258.500 KM, a minimalno u tom iznosu planirat će se i budžet za iduće dvije godine. /kraj/

114. ZDK POTPISAO UGOVOR O SMJEŠTAJU STUDENATA U STUDENTSKI CENTAR ISLAMSKJE ZAJEDNICE U SARAJEVU



SARAJEVO, 15.07.2019. - Ministar za obrazovanje, nauku, kulturu i sport Zeničko-dobojskog kantona Spahija Kozlić i direktor Studentskog centra Islamske zajednice u Sarajevu **Muamer Tinjak** potpisali su ugovor o subvencioniranju troškova smještaja i ishrane studenata sa područja ZDK u narednoj akademskoj godini.

Ugovorom su predviđena sredstva za maksimalno 50 studenata po 219,00 KM mjesečno, tako da je za ovu namjenu opredijeljen maksimalan iznos do 109.500,00 KM.

Zeničko-dobojski je prvi kanton koji je potpisao ugovor sa Studentskim centrom Islamske zajednice u Sarajevu.

Centar je otvoren prošle godine i ima sve uslove za smještaj i ishranu studenata, a prijem studenata se vrši na osnovu Kriterija za bodovanje studenata za prijem u studentske domove u Federaciji BiH. /kraj/

115. OBJAVLJEN JAVNI POZIV ZA SUBVENCIONIRANJE TROŠKOVA ORGANIZACIJE I IZGRADNJE POSLOVNIH ZONA

ZENICA, 16.07.2019. - Ministarstvo za privredu Zeničko-dobojskog kantona objavilo je javni poziv za prikupljanje zahtjeva za odobravanje i dodjelu finansijskih sredstava namijenjenih subvencioniranju troškova organizacije i izgradnje poslovnih zona na području ZDK.

Općine/grad, odnosno jedinice lokalne samouprave u ZDK koje realiziraju projekte pripreme i izgradnje poslovnih zona, mogu se prijaviti na dva programa - Program I - subvencioniranje troškova izrade projektne dokumentacije i Program II - opremanje zemljišta komunalnom infrastrukturom unutar poslovne zone, s tim da



mogu kandidirati samo jednu poslovnu zonu. Maksimalan iznos poticaja je 160.000,00 KM, od čega je za projektovanje predviđeno najviše 10.000,00 KM, a opremanje poslovne zone do 150.000,00 KM.

Sredstva će se odobravati projektima prema bodovnoj listi, a pregled pristiglih prijava izvršit će komisija koju će formirati Ministarstvo za privredu ZDK. Vlada će na prijedlog ovog ministarstva donijeti odluku o odobravanju sredstava, nakon čega će sa svim jedinicama lokalne samouprave potpisati pojedinačne ugovore.

Javni poziv objavljen je na internet stranici Zeničko-dobojskog kantona (www.zdk.ba) i ostaje otvoren 15 dana.

Troškove organizacije i izgradnje poslovnih zona Zeničko-dobojski kanton finansira iz prihoda od koncesionih naknada za istraživanje i eksploataciju čvrstih mineralnih sirovina, koje se dijele između općina/Grada i Kantona u omjeru 70:30 posto.

Ministarstvo za privredu ZDK je za tu namjenu ove godine planiralo 1,2 miliona KM, što je najveći iznos do sada. Od 2009. do 2017. je u poslovne zone uloženo ukupno 3 miliona KM, a samo prošle godine je za sufinansiranje ovih projekata izdvojeno 900.000,00 KM. /kraj/

116. EKONOMSKO-SOCIJALNO VIJEĆE ISKAZALO ZADOVOLJSTVO RADOM VLADE ZDK U PRVIH 100 DANA

ZENICA, 16.07.2019. - U sjedištu Vlade održana je 14. sjednica Ekonomsko-socijalnog vijeća za područje Zeničko-dobojskog kantona (ESV ZDK) na kojoj su razmatrani Program rada Vlade ZDK, Program rada ESV ZDK za period juli-decembar i Smjernice ekonomske i fiskalne politike ZDK za period 2020.-2022. godina.



Socijalni partneri su Program rada Vlade ocijenili sveobuhvatnim i ambicioznim dokumentom i jednoglasno primili k znanju te iskazali punu podršku Vladi u njoj opredjeljenosti za proaktivan rad u narednom periodu u smislu ostvarivanja planiranih programskih ciljeva i zadataka.

Iskazano je zadovoljstvo socijalnih partnera radom Vlade u prvih 100 dana rada, sa posebnim akcentom na postignuti visoki stepen socijalnog dijaloga i opredjeljenost

za zajedničko ostvarivanje programskih ciljeva i zadataka Vlade sa socijalnim partnerima kroz rad Ekonomsko-socijalnog vijeća.

S tim u vezi, posebnim zaključkom socijalni partneri su zaduženi da sačine prijedlog ključnih tematskih oblasti značajnih za stvaranje boljeg ambijenta za razvoj i jačanje privrede, a koje će biti osnov za izradu Tematskog programa rada Ekonomsko-socijalnog vijeća za mandatni period ove Vlade. /kraj/

117. 100 DANA RADA VLADE: OPRAVDALI EPITET VLADE KONTINUITETA I POTVRDILI POSVEĆENOST IZGRADNJI BOLJEG AMBIJENTA U ZDK

ZENICA, 17.07.2019. - Za ovo kratko vrijeme uspjeli smo pokrenuti određene procese i poduzeti aktivnosti čiji će se rezultati osjetiti tek u narednom periodu, a u nekim slučajevima su već vidljivi. Vjerujem da su građani Zeničko-dobojskog kantona prepoznali našu iskrenu namjeru da se upustimo u rješavanje najvećih problema i izazova sa kojima se suočava ZDK te da radimo na unapređenju uslova za život i rad - kazao je premijer **Mirza Ganić** na konferenciji za novinare povodom 100 dana rada Vlade ZDK.



Najveći izazov i problem s kojim se Vlada suočila su akumulirane obaveze Zeničko-dobojskog kantona po osnovu izvršnih presuda po tužbama zaposlenih u javnom sektoru radi nepoštivanja kolektivnog ugovora. Prema riječima premijera ZDK, ove presude ozbiljno prijete stabilnosti budžeta i izvršavanju obaveza prema socijalnim

kategorijama, porodiljama, studentima kao i zaposlenima koji primaju plate iz budžeta, obrazovanju, policiji, upravi. Ukupne obaveze iznose 325 miliona KM, od čega je 155 miliona KM glavnica a preostali iznos je kamata, i to je dug koji je nastajao od 2004. godine kada su podnesene prve tužbe zbog kršenja kolektivnog ugovora.

"Ranije vlade su izdvajale određeni iznos sredstava za izmirenje obaveza, posljednjih nekoliko godina oko milion maraka godišnje, ali to nije bilo dovoljno i dug je rastao. Mi smo se opredijelili da riješimo problem, tako da trenutno radimo na izradi akcionog plana kojim ćemo smanjiti rokove otplate i utvrditi način izmirenja obaveza, jer ove tužbe predstavljaju omču oko vrata Zeničko-dobojskog kantona", kazao je Ganić.

Vlada je poduzela određene aktivnosti u oblasti borbe i prevencije korupcije, a jedna od najvažnijih mjera jeste donošenje Uredbe o zapošljavanju u javnom sektoru čiji je najvažniji element da se bira prvorangirani kandidat. To je veoma bitna novina u odnosu na dosadašnju praksu, jer se do sada izbor vršio sa liste uspješnih kandidata što je stvaralo prostor za zloupotrebe.

Boračke stipendije dodijeljene su svim studentima koji su se prijavili na konkurs Ministarstva za boračka pitanja, a čije su aplikacije bile formalno-pravno ispravne. Za ovu namjenu je izdvojeno 2,4 miliona KM, što je 400.000 KM više nego prethodne godine.

"Stipendije je u odnosu na 2018. dobilo dodatnih 400 studenata, a u odnosu na 2014. godinu broj stipendija je udvostručen što govori o kontinuitetu politike da se svake godine povećava izdvajanje za stipendije. Naravno tu je podrška i studentima za smještaj u studentske dom. Nastojat ćemo da ovakav pristup

ponovimo i kod dodjele stipendija Ministarstva za obrazovanje, nauku, kulturu i sport, jer želimo olakšati porodicama a mlade podstaći da se obrazuju i svoju budućnost grade u BiH", kazao je Ganić.

U prvih 100 dana Vlada je otklonila i barijere koje su usporavale realizaciju projekta Regionalni vodovod Plava voda, a koje, ponovio je Ganić, nisu bile na strani Vlade, tako da su krajem prošlog mjeseca potpisani određeni predugovori čime je Zeničko-dobojski kanton gotovo izvršio ispunio svoje obaveze u ovom projektu, koji je važan za ZDK, a posebno za vodoopskrbu Zenice.



Također, sva ministarstva su izvršila zakonsku obavezu i donijela programe utroška sredstava, a u pojedinim resorima su urađene određene korekcije i poboljšanja u pravcu povećanja izdvajanja za privredu, poljoprivredu, održavanje i izgradnju puteva, komunalnu infrastrukturu...

Vlada je ove godine izdvojila 500.000 KM za čišćenje obala rijeke Bosne od Visokog do Doboja-juga i to su prva sredstva koja su opredijeljena za ovu namjenu nakon 15 godina.

Pokrenuti su i određeni procesi u zdravstvu, sa fokusom na inicijativu da Kantonalna bolnica Zenica dobije status univerzitetske bolnice, jer je intencija Vlade da KBZ bude nastavna baza za Medicinski fakultet u Zenici. Tu je i JPP projekat Interventne kardiologije, projekt energetske efikasnosti vrijedan 11 miliona eura koji je od posebnog značaja za Vladu ZDK i sve građane ovog kantona, a Vlada poduzima sve korake kako bi što prije došlo do početka radova.

"U svakom slučaju, smatram da je Vlada opravdala epitet vlade kontinuiteta te da je svojim radom u punom kapacitetu radila na svim segmentima koji su bitni za stvaranje ugodnog ambijenta za rad i život građana. Mislim da danas nema dileme, da mladi i vrijedni ljudi mogu zadržati dostignuti nivo i raditi na unapređenju rezultata. Važno je istaknuti da Vlada radi i funkcionira bez poteškoća, iako u njoj sjede ministri iz četiri stranke. Sve odluke smo donijeli jednoglasno, što pokazuje da je koaliciona vlada jedinstvena i da je stabilna", poručio je premijer ZDK.

Novinarima su se na konferenciji obratili svi članovi Vlade, koji su rezimirali najvažnije aktivnosti u prvih 100 dana rada. /kraj/

118. U VLADI ZDK UPRIILIČEN PRIJEM ZA POBJEDNIKE 16. SPORTSKIH IGARA RVI FBIH

ZENICA, 17.07.2019. - Vlada Zeničko-dobojskog kantona upriličila je prijem za reprezentaciju Saveza ratnih vojnih invalida ZDK koja je osvojila prvo mjesto na 16. Sportskim igrama RVI Federacije BiH, održanim prošlog vikenda u Zenici. Članove reprezentacije primili su premijer **Mirza Ganić**, ministar za boračka pitanja **Fahrudin Čolaković** i ministar za obrazovanje, nauku, kulturu i sport **Spahija Kozlić**.

"Hvala vam što se borite, što ne posustajete i što pričate jednu lijepu priču zbog koje smo ponosni. Nadamo se da ćete osvojiti još mnogo pehara, a u ime Vlade poručujem da ćemo ostati uz vas i biti podrška vašim aktivnostima", kazao je premijer Ganić.



Reprezentacija Saveza RVI ZDK sa 35 takmičara osvojila je medalje u svim disciplinama i u konačnici ponijela pobjednički pehar po treći put uzastopno, a šesti put otkako se održavaju Sportske igre RVI u FBiH.

"Ponosan sam na naše sportiste koji su dali maksimum od sebe, jer

nije mala stvar biti prvi među sedam kantona. Drago mi je da smo ispunili očekivanja Vlade ZDK i ovo je potvrda da izdvajanje za rehabilitaciju ratnih vojnih invalida nije bilo uzaludno", kazao je Jusuf Rakman, predsjednik Saveza RVI ZDK.

Istaknuto je kako je briga za boračku populaciju među ključnim prioritetima Vlade Zeničko-dobojskog kantona, a potvrda kontinuiteta te politike je da je budžet za boračku populaciju u posljednjih pet godina udvostručen. U 2015. iznosio je 5 miliona KM, prošle godine 9,6 miliona a u 2019. izdvajanja za ovu populaciju planirana su u iznosu od 10,6 miliona KM.

Implementiraju se projekti zapošljavanja i samozapošljavanja, liječenja i medicinske rehabilitacije, stambenog zbrinjavanja, a ove godine po prvi put su odobrene stipendije za sve studente iz boračke populacije čije su prijave bile formalno-pravno ispravne. /kraj/

119. SASTANAK O POLOŽAJU RADNIKA KOJI PRIMAJU PLAĆU IZ BUDŽETA ZDK: ISPLATA REGRESA 9. AVGUSTA

ZENICA, 18.07.2019. - Premijer Zeničko-dobojskog kantona **Mirza Ganić** i ministar finansija **Josip Lovrić** razgovarali su sa predsjednikom Saveza samostalnih sindikata BiH **Selvedinom Šatorovićem** o aktuelnom položaju radnika koji primaju plaće iz Budžeta ZDK.



Dogovoreno je da će isplata regresa za 2019. godinu biti izvršena 9. avgusta, i to u iznosu od 50 posto prosječne plaće u FBiH, a prema posljednjem objavljenom podatku Federalnog zavoda za statistiku, što će u konačnici iznositi 463 KM.

Istaknuto je kako je socijalni dijalog između socijalnih partnera u ZDK na zadovoljavajućem nivou te da će biti nastavljen i u narednom periodu razgovorima o svim aktuelnim pitanjima.

Predsjednik Saveza samostalnih sindikata BiH uputio je čestitku premijeru i kantonalnim ministrima za uspješnih prvih 100 dana rada Vlade Zeničko-dobojskog kantona. /kraj/

120. U MINISTARSTVU PRIVREDE ODRŽANI SASTANCI O POSTUPCIMA DODJELE KONCESIJE ZA UGALJ U BREZI I ZENICI

ZENICA, 18.07.2019. - Ministar za privredu Zeničko-dobojskog kantona **Zlatko Jelić** sa saradnicima održao je odvojene sastanke sa predstavnicima Općine Breza i Grada Zenice na kojima je razgovarano o postupcima dodjele koncesija za eksploataciju uglja na području ove dvije lokalne zajednice.



Rudnik mrkog uglja Breza podnio je zahtjev za dodjelu koncesije 2018. godine, dok je Općina Breza u isto vrijeme pokrenula tužbu protiv JP Elektroprivreda BiH, Vlade Federacije BiH i Zeničko-dobojskog kantona zbog navodnog kršenja zakona o rudarstvu i koncesiji. Na sastanku sa načelnikom **Munibom Zaimovićem** i zamjenicom općinskog

pravobranioca **Dženanom Telalović** konstatirano je da je jedan od uslova za nastavak postupka dodjele koncesije odustajanje od tužbe i zahtjeva za reviziju tužbi. Iako je bio uredno pozvan, sastanku se nije odazvao direktor ZD RMU Breza.

Nakon rasprave zaključeno je kako će načelnik Općine Breza informirati Kolegij Općinskog vijeća Breza sa ishodom ovog sastanka te inicirati održavanje tematske sjednice Općinskog vijeća radi upoznavanja vijećnika sa trenutnom situacijom, vezano za postupak dodjele koncesije, tokom sudskog procesa kao i zahtjevom za odustajanje od tužbi i revizije, kao uslova za nastavak postupka dodjele koncesije. Sjednica bi se trebala održati najkasnije do 31. avgusta.

Zahtjev za dodjelu koncesije prošle godine je podnio i Rudnik mrkog uglja Zenica. Na sastanku sa delegacijom RMU Zenica, koju je predvodio direktor **Nevzet Vrškić**, pomoćnikom gradonačelnika **Amrom Mehmedić** i zamjenicom gradskog pravobranitelja **Armelom Beganović**, konstatirano je da postoji interes svih subjekata za pokretanje procedure dodjele koncesije, te da će RMU Zenica pokušati prije definiranja kriterija za dodjelu koncesije



pribaviti rješenje Ministarstva energije, rudarstva i industrije FBiH o prenošenju nekorištenih površina trenutnog istražno-eksploatacionog polja sa Rudnika na Grad Zenica.

Zaključeno je kako će Grad Zenica i RMU Zenica dogovoriti međusobna prava i obaveze vezane za tretman industrijskih otpadnih voda i održavanje i sanaciju deponije jalovine, kao i druga prava i obaveze, te da će najkasnije do 30. septembra Grad Zenica donijeti i dostaviti Ministarstvu za privredu bezuslovnu saglasnost Gradskog vijeća za dodjelu koncesije. Nakon dobivanja bezuslovne saglasnosti Ministarstvo privrede će nastaviti procedure dodjele koncesije.

Najveći napredak u postupku dodjele koncesije postignut je po zahtjevu Rudnika mrkog uglja Kakanj koji je podnesen krajem 2017. godine. Prema zaključcima sa sastanka održanog prošle sedmice u Vladi ZDK, Općina Kakanj i RMU Kakanj bi trebali ispuniti svoje obaveze do kraja jula, nakon čega će Ministarstvo za privredu pokrenuti procedure u skladu sa Zakonom o koncesijama, počevši od objavljivanja javnog poziva do konačnog potpisivanja prvog koncesionog ugovora za istraživanje i eksploataciju mrkog uglja u ZDK.
/kraj/

121. ODOBRENA JEDNOKRATNA POMOĆ ZA 63 PENZIONERA KOJI SU PRETRPJELI ŠTETE U MAJSKIM POPLAVAMA

ZENICA, 19.07.2019. - Vlada Zeničko-dobojskog kantona odobrila je nedavno jednokratnu novčanu pomoć za 63 penzionera iz općina Tešanj, Doboju-jug i Maglaj čija su domaćinstva pretrpjela štete u poplavama koje su pogodile sjever Zeničko-dobojskog kantona u maju ove godine. Predstavnici Saveza udruženja penzionera ZDK tim povodom su uručili zahvalnicu ministrici za rad, socijalnu politiku, raseljene osobe i izbjeglice **Azri Šabanović**.



*"Odobrena je jednokratna pomoć u iznosu od po 150 KM i ovo je jedinstven primjer pomoći penzionerima u Federaciji BiH. Hvala Vladi i ministrici Šabanović što su prepoznali stanje u kojem se nalazi ova populacija, jer skoro polovina penzionera u ZDK prima najnižu penziju. Nakon poplava u maju 2014. penzioneri nisu dobili nikakvu pomoć, tako da je ovo gesta za svaku pohvalu", kazao je **Mustafa Trakić**, predsjednik Saveza udruženja penzionera ZDK.*

Tokom prijema za Trakića i člana UO kantonalnog Saveza udruženja penzionera **Mehmeda Mostarlića** naglašen je kontinuitet podrške i pomoći ovoj populaciji.

"Nova Vlada je, kao i Vlada u prethodnom sazivu, opredijeljena da nastavi pružati pomoć najugroženijim kategorijama u ovom kantonu, među kojima su svakako i penzioneri sa najnižim primanjima ", kazala je Šabanović. /kraj/

122. AMBASADOR WIGEMARK POSJETIO SJEDIŠTE ZDK: RAZGOVORI O EU INTEGRACIJAMA I AKTUELNIM PROBLEMIMA U ZDK

ZENICA, 22.07.2019. - Šef Delegacije Evropske unije u BiH i Specijalni predstavnik Evropske unije u BiH ambasador **Lars Gunnar Wigemark** posjetio je sjedište Zeničko-dobojskog kantona gdje se sastao sa premijerom **Mirzom Ganićem** i ministrima u Vladi ZDK te predsjedavajućim Skupštine **Čazimom Huskićem**.



Razgovarano je o ulozi kantona u procesu evropskih integracija Bosne i Hercegovine, a posebno nakon objavljivanja Mišljenja Evropske komisije u kojem je naveden niz preporuka koje održavaju obaveze BiH u kontekstu obaveze iz procesa stabilizacije i pridruživanja, ali i obaveza koje EU ima prema BiH u smislu pružanja podrške ovim procesima.

Teme razgovora bile su jačanje vladavine prava, borba protiv korupcije, jačanje kapaciteta koji su dostupni u ZDK-u za borbu protiv korupcije, a naglašena je i potreba postojanja konkretnih presuda u predmetima korupcije, a ne samo optužnica.

Predstavnici Zeničko-dobojskog kantona aktuelizirali su problem kvota za izvoz čelika u Evropsku uniju, koje su uzrokovale probleme za ArcelorMittal Zenica koji je jedan od vodeći izvoznika iz BiH.

"Tražili smo pomoć EU jer je to problem koji ne može da riješi ZDK. Naišli smo razumijevanje ambasadora Wigemarka", kazao je premijer Ganić.

Ambasador Wigemark je istakao kako namjera EU nije bila da se ograniči izvoz iz BiH, nego da se radi o globalnim kvotama gdje se BiH natječe u izvozu u EU sa drugim zemljama. Napomenuo je kako su ove

mjere trenutno predmetom revizije od strane EU, a konkretne mjere bi trebale biti objavljene početkom oktobra.

Također, razgovarano je i o problematici izvršenja presuda po tužbama budžetskih korisnika u ZDK. U Vladi smatraju da je rok od 13 godina za izvršenje ovih presuda, koliko traži Vijeće Evrope, izuzetno kratak period te da bi ekonomski stručnjaci trebali predložiti vremenski okvir uzimajući u obzir finansijske mogućnosti ovog kantona.

Tema razgovora je bila i raspodjela javnih prihoda u Federaciji BiH jer bi ZDK prema studiji Ekonomskog fakulteta u Zenici trebao da dobije dodatnih 20 miliona KM, što bi omogućilo lakše servisiranje obaveza prema izvršnim presudama ali i veća izdvajanja za razvoj privrede.



"Ukazali smo i na učestale inicijative prema Vladi za koje smatramo da su populističke. Nama ne treba populizam, jer se svi možemo deklarativno zalagati za nešto, nego nam treba rezultat. Pozivam političare da se ne bave jeftinim populizmom nego da se svi borimo protiv oni koji uzimaju ono što im ne pripada. Mi imamo Tim za borbu protiv korupcije koji uspješno radi. Donijeli smo i Uredbu o zapošljavanju u javnom sektoru koja je najkvalitetnije rješenje, jer se bira prvorangirani kandidat, ali se time nismo hvalili", kazao je Ganić. /kraj/

123. DELEGACIJA ZDK ODALA POČAST RAHMETLI AHMETU HADŽIPAŠIĆU

ZENICA, 23.07.2019. - Članovi porodice, prijatelji i kolege obilježili su na gradskom groblju Crkvice u Zenici jedanaestu godišnjicu od smrti bivšeg federalnog premijera i univerzitetskog profesora **Ahmeta Hadžipašića**.



Cvijeće su položili federalni ministar **Amir Zukić**, u ime aktuelnog premijera FBiH **Fadila Novalića**, bivši premijeri **Edhem Bičakčić** i **Nedžad Branković**, delegacije Vlade i Skupštine Zeničko-dobojskog kantona, predvođene premijerom **Mirzom Ganićem** i predsjedavajućim **Ćazimom Huskićem**, Federalnog ministarstva za pitanja boraca, Univerziteta u Zenici te OO SDA Zenica, a upriličen je i prigodan vjerski program.

"Ahmed Hadžipašić je dužnost obavljao časno, uporno, cjelodnevno i sa velikom ljubavlju. U dva mandata premijera je postigao zavidne rezultate jednog ljepšeg dijela BiH. Imao sam čast da sam sarađivao sa Hadžipašićem još dok je bio direktor kompanije Metalno Zenica. Imao je rješenja i ideje. Živio je, vjerovao i dobra djela činio i doista mu hvala na svemu tome. On je dostojno nosio svoje prezime Hadžipašić, jer je bio i hadžija i general", kazao je bivši premijer Bičakčić.

Ahmet Hadžipašić rođen je 1. jula 1952. godine u Cazinu, a smrt ga je zatekla na poziciji prorektora Univerziteta u Zenici. Predavao je na univerzitetima u Sarajevu, Mostaru i Bihaću. U periodu od 2003. do 2007. godine bio je premijer FBiH. /kraj/

124. VLADA POSVEĆENA RAZVOJU MALINARSTVA U ZDK: USKORO ODLUKA O VISINI PODSTICAJA ZA PROIZVODNJU MALINE

ZENICA, 23.07.2019. - Premijer Zeničko-dobojskog kantona **Mirza Ganić** i predsjedavajući Skupštine **Ćazim Huskić** primili su danas predstavnike proizvođača maline u žepačkoj mjesnoj zajednici Željezno Polje - predsjednika Udruženja malinara Željezno Polje **Edina Šišića**, direktora Poljoprivredne zadruge "Žepački rolend" **Mirzeta Krehmića**, šefa Hladnjače "Natural Food" u Željeznom Polju **Mustafu Efendića** te predsjednika UO Udruženja poljoprivrednika ZDK **Emira Tutnjića**. Sastanku u uredu predsjedavajućeg Skupštine su prisustvovali ministar za poljoprivredu, vodoprivredu i šumarstvo **Mirnes Bašić** te ministar za boračka pitanja **Fahrudin Čolaković**.

MZ Željezno Polje je pionir u malinarskoj proizvodnji i najvećim dijelom je zaslužna što je ZDK lider u ovoj poljoprivrednoj grani u BiH.

Zahvaljujući organiziranoj proizvodnji i otkupu te kontinuiranim mjerama podsticaja Vlade ZDK, egzistenciju u malinarstvu ostvaruje veliki broj domaćinstava u Željeznom Polju. Proizvođači su posljednjih nekoliko



godina suočeni sa nizom problema, a najveći su niske otkupne cijene maline, tako da su najave povećanja cijene dočekane s olakšanjem.

Prema podacima iz Registra poljoprivrednih gazdinstava, pod zasadima maline i kupine je 650 hektara zemljišta u Zeničko-dobojskom kantonu, a malinarstvom se bavi 3.500 proizvođača, ne računajući članove domaćinstava. Vlada je prošle godine za podršku malinarstvu izdvojila jedan milion KM, a proizvođači su dobili podsticaj od 25 feninga po kilogramu.

Premijer Ganić je ponovio posvećenost Vlade da nastavi provoditi mjere podrške malinarskoj proizvodnji, istakavši da će proizvođači maline i drugog jagodičastog voća i ove godine moći računati na novčanu podršku, tako da će ubrzo biti donesena odluka o visini podsticaja. U narednom periodu u fokusu Vlade će biti izgradnja novih hladnjača i prerađivačkih pogona na području ZDK-a, kako bi se preradom malini dala nova vrijednost, a novim skladišnim kapacitetima ublažili potresi na tržištu. /kraj/

125. UDRUŽENJE TAKSI PRIJEVOZNIKA ĆE PRIPREMITI PREDNACRT ZAKONA O TAKSI PRIJEVOZU U ZDK

ZENICA, 24.07.2019. - Premijer Zeničko-dobojskog kantona **Mirza Ganić** i ministar za prostorno uređenje, promet i komunikacije i zaštitu okoliša **Arnel Isak** održali su sastanak sa predstavnicima Udruženja taksi prijevoznika u ovom kantonu. Tema sastanka bila je primjena Odluke o organizaciji i načinu obavljanja taksi prijevoza te donošenje Zakona o taksi prijevozu na području ZDK.



Istaknuto je da postoji volja Vlade da se sistemski uredi oblast taksi prijevoza te da će se donositi rješenja u interesu struke. Predstavници Udruženja taksi prijevoznika ponovili su zahtjev da budu uključeni u donošenje propisa u ovoj oblasti, ukazavši da je zbog ignorisanja stavova Udruženja u pojedinim općinama/gradovima nastao kaos u oblasti taksi prijevoza. Sve općine/gradovi nisu dali ni saglasnost na nove pravilnike u oblasti taksi prijevoza, tako da se još uvijek primjenjuju propisi iz 2010. godine.

Zaključeno je da općine/gradovi moraju uskladiti svoje propise sa Odlukom o organizaciji i načinu obavljanja taksi prijevoza na području ZDK. Namjera je da se oblast taksi prijevoza uredi posebnim zakonom, po uzoru na Kanton Sarajevo, Hercegovačko-neretvanski ili Tuzlanski kanton.

Udruženje taksi prijevoznika je zaduženo da pripremi prednacrt Zakona o taksi prijevozu ZDK i tekst dostavi Ministarstvu za prostorno uređenje, promet i komunikacije i zaštitu okoliša koje će navedeni zakon poslati u skupštinsku proceduru. Na kraju, zaključeno je da je neophodno povećati broj inspektora za cestovni prijevoz radi efikasnijeg suzbijanja nelegalnog taksi prijevoza. /kraj/

126. PREMIJER GANIĆ PISAO PREDSDJEDAVAJUĆEM ZVIZDIĆU I PREMIJERU NOVALIĆU: TRAŽITI OD EU DRŽAVNU KVOTU ZA ČELIK PC16 IZ BIH

ZENICA, 20.07.2019. - Premijer Zeničko-dobojskog kantona **Mirza Ganić** uputio je pismo predsjedavajućem Vijeća ministara BiH **Denisu Zvizdiću** i premijeru FBiH **Fadilu Novaliću** od kojih traži da se angažiraju na rješavanju problema kompanije "ArcelorMittal" Zenica izazvanim uvedenim mjerama zaštite Evropske unije na uvoz čelika i proizvoda od čelika, koje bi trebale ostati na snazi do jula 2021. godine.



S obzirom da BiH za proizvod toplovaljana žica i rebro u koturu PC16 nije dobila državnu kvotu, to ArcelorMittal Zenica, kao najveći izvoznik čelika iz BiH, ovu kvotu primjenjuje samo na rebrasti betonski čelik u šipkama PC13, dok se PC16 može uvesti u EU samo u okviru Globalne kvote jer su količine ArcelorMittala ispod pet posto od ukupnog uvoza EU. Kako su turski proizvođači za vrlo kratko vrijeme ispunili svoju državnu kotu, to su isti iskoristili i cjelokupnu Globalnu

kvotu, tako da ArcelorMittal pošto je mali proizvođač više ne može prodavati svoju žicu i rebro u koturu preko Globalne kvote, jer je ova kvota već potrošena.

Premijer Ganić u pismu podsjeća da je privreda Zeničko-dobojskog kantona kičma razvoja privrede BiH, te imajući u vidu činjenicu da je ovaj kanton zadržao leadersku poziciju u FBiH kad je u pitanju pokrivenost uvoza izvozom, uvedene mjere zaštite EU već negativno utječu na izvoz iz ZDK, a ako se ovakvo stanje nastavi postoji mogućnosti i za eventualni gubitak radnih mjesta jer proizvodi PC16 - žica i rebro u koturu čine 65 posto ukupne proizvodnje ArcelorMittala Zenica.

"S obzirom da BiH ima potpisan Sporazum o stabilizaciji i pridruživanju sa EU, kojim su regulirani odnosi BiH i EU, a koji podrazumijeva slobodnu trgovinu i ukidanje carina, smatramo da EU treba izuzeti našu državu iz zaštitnih mjera, te smanjiti granicu od 5% izvoza u periodu 2016-2018 na 3% izvoza za PC16. Sve članice Svjetske trgovinske organizacije (WTO) su dobile Državnu kvotu, a BiH nije, iako je izvoz ArcelorMittala bio 4,958 %", navodi u pismu premijer ZDK.

Pored potrebe brzog rješavanja nastale situacije u smislu da se izdejstvuje dodjela Državne kvote za EU za PC16, u Vladi Zeničko-dobojskog kantona očekuju da se intenzivira pristup ka punopravnom članstvu u Svjetsku trgovinsku organizaciju koja bi omogućila postizanje boljih trgovinskih dogovora sa drugim državama, odnosno da se obezbijedi slobodna trgovina sa EU. /kraj/

127. UPLAĆENA SREDSTVA ZA TREĆU RATU BORAČKIH STIPENDIJA ZA 2.232 STUDENTA U ZDK



ZENICA, 30.07.2019. - Vlada Zeničko-dobojskog kantona je gradskim/općinskim službama za boračko-invalidsku zaštitu u ZDK-u danas uplatila treću ratu stipendija za 2.232 studenta za studijsku 2018./2019. godinu u iznosu od 304.200,00 KM, koji obuhvata redovni i samofinansirajući studij prvog i drugog ciklusa Bolonjskog sistema studiranja. Nadležne gradske/općinske službe će izvršiti isplatu sredstava korisnicima stipendija.

U Budžetu Kantona za 2019. godinu za ovu namjenu osigurana su sredstva u iznosu od 2.433.600,00 KM. Po prvi put u dugogodišnjem radu Ministarstva za boračka pitanja, stipendije su dobili svi studenti koji su aplicirali na konkurs i koji su ispunjavali uslove.

*"Visina stipendija za prvu godinu je 800,00KM, za drugu i ostale godine studija, te za prvu i drugu godinu drugog ciklusa 1.200,00 KM. Nastojat ćemo da održimo kontinuitet i da svaki mjesec bude izvršena isplata jedne rate stipendije", kazao je **Fahrudin Čolaković**, ministar za boračka pitanja ZDK.*

Raspodjela sredstava po lokalnim zajednicama je slijedeća: Grad Zenica 70.850,00 KM, Općina Breza 13.650,00 KM, Općina Doboj Jug 8.200,00 KM, Općina Kakanj 28.000,00 KM, Općina Maglaj 20.550,00 KM, Općina Olovo 13.300,00 KM, Općina Tešanj 23.950,00 KM, Općina Usora 6.850,00 KM, Općina Vareš 10.800,00 KM, Općina Visoko 38.250,00 KM, Općina Zavidovići 36.550,00 KM i Općina Žepče - 33.250,00 KM. /kraj/

128. PREMIJER GANIĆ I MINISTAR ČOLAKOVIĆ PRIMILI UPRAVU I IGRAČE NOVOG PREMIJERLIGAŠA SKISO-BREZA 304

ZENICA, 30.07.2019. - Premijer Zeničko-dobojskog kantona **Mirza Ganić** i ministar za boračka pitanja **Fahrudin Čolaković** upriličili su prijem za dio uprave i igrača Sportskog kluba invalida sjedeće odbojke "Breza 304" iz Breze (SKISO-BREZA 304), koji će se od iduće sezone takmičiti u Premijer ligi sjedeće odbojke BiH.



SKISO-BREZA 304 je za četiri godine postojanja uspio da se iz najnižeg ranga plasira u Premijer ligu i uđe u društvo deset najboljih ekipa iz BiH, zajedno sa još tri ekipe iz ZDK koje se takmiče u ovom elitnom rangu - Zenicom, Čelikom i Zavidovićima. SKISO-BREZA 304 posljednje tri godine uspješno je organizirao i turnire u sjedećoj odbojci povodom Dana šehida, gdje su se pokazali kao odlični organizatori i domaćini.

Članovi uprave i igrači istakli su da je ovo uspjeh i Vlade ZDK i resornog ministarstva koji u kontinuitetu podržavaju rad kluba.

Čestitajući plasman u viši rang takmičenja, premijer Ganić je najavio kontinuiranu podršku Vlade kako bi SKISO-BREZA 304 nastavio dostojno predstavljati Brezu i Zeničko-dobojski kanton, a u skladu sa mogućnostima podržat će i odlazak ekipe na pripreme uoči početka jesenjeg dijela takmičenja.

Ministar Čolaković je izrazio zadovoljstvo rezultatima kluba iz Breze, ističući da je ovo potvrda opravdanosti ulaganja u rehabilitaciju ljudi koji su stekli invaliditet boreći se za svoju državu. /kraj/

129. VLADA ZDK USVOJILA PROGRAM UTROŠKA SREDSTAVA IZ BUDŽETA ZA NABAVKU UDŽBENIKA

ZENICA, 01.08.2019. - Vlada Zeničko-dobojskog kantona na prijedlog Ministarstva za obrazovanje, nauku, kulturu i sport usvojila je Program utroška sredstva za nabavku udžbenika za 2019. godinu.



Ukupno odobrena sredstva iz Budžeta ZDK iznose 80.000, 00 KM i koristit će se za nabavku udžbenika za sve učenike drugih razreda devetogodišnjeg osnovnog obrazovanja, koji nastavu pohađaju po Nastavnom planu i programu Zeničko-dobojskog kantona.

Pored navedenih sredstva, Ministarstvo je dobilo sredstva tekućeg transfera od Federalnog ministarstva za obrazovanje i nauku u iznosu od 103.680,00 KM koja su namijenjena za učenike drugih razreda devetogodišnjeg osnovnog obrazovanja, i to prvenstveno za učenike koji su u stanju socijalne potrebe. /kraj/

130. MINISTRICA ŠABANOVIĆ ŠTIĆENICIMA USTANOVE DOM PORODICA URUČILA BAJRAMSKE PAKETIĆE



ZENICA, 15.08.019. - **Azra Šabanović**, ministrica za rad, socijalnu politiku i izbjeglice, povodom Kurban bajrama posjetila je JU Dom porodica u Zenici i štićenicima Doma uručila bajramske paketiće kao i donaciju u vidu higijenskog materijala.

Tom prilikom štićenici Doma su izveli priredbu u znak zahvalnosti. Direktorica **Draženka Subašić**, svi zaposlenici i štićenici Doma iskazali su zadovoljstvo zbog posjete ministrice i zahvalili se na donaciji. /kraj/

131. ZA PROJEKTE UPRAVLJANJA OTPADOM 900.000 KM



ZENICA, 19.08.2019. - Ministar za prostorno uređenje, promet i komunikacije i zaštitu okoliša ZDK **Arnel Isak** potpisao je ugovore sa predstavnicima općina i gradova te javnih komunalnih preduzeća o finansiranju projekata za 2019. godinu, a koji se odnose na oblast upravljanja otpadom - LOT1.

Putem javnog poziva Vlada Zeničko-dobojskog kantona je odabrala 17 (sedamnaest) projekata u ukupnom iznosu od 900.000,00 KM, a iz sredstava Fonda za zaštitu okoliša finansirat će se projekti sljedećih subjekata: Regionalna deponija Mošćanica Zenica 60.000,00 KM, JKP "Vis" d.o.o. Doboj Jug 80.000,00 KM, JP "Rad" d.d. Tešanj 40.000,00 KM, JKP "Radnik" d.o.o. Zavidovići 20.000,00 KM, JKP "Visoko" d.o.o. Visoko 90.000,00 KM, JP "Komunalno" d.o.o. Žepče 50.000,00 KM, JP "Vodokom" d.o.o. Kakanj 70.000,00 KM, JKP "Vareš" d.o.o. Vareš 40.000,00 KM, KJD d.o.o. Maglaj 70.000,00 KM, "Alba Zenica" d.o.o. Zenica 40.000,00 KM, JKP "Usora" d.o.o. Usora 75.000,00 KM, JKP "Bioštica" d.o.o. Olovo 30.000,00 KM, JP "Komunalno" d.o.o. Breza 32.221,80 KM, Grad Zenica 90.000,00 KM, Općina Doboj Jug 22.778,20 KM, Općina Zavidovići 70.000,00 KM i Općina Maglaj 20.000,00 KM.

"Iznos sredstava je veći nego prošle godine. Potrudili smo se da sredstva dobiju sve općine i gradovi kako bi mogli realizovati svoje projekte zbrinjavanja komunalnog otpada, kao i pomoći zbrinjavanje otpada na Regionalnoj deponiji Mošćanica. Procedura javnog poziva je bila javna i transparentna, a isto tako ćemo kontrolisati i utrošak sredstava", kazao je ministar Isak.



Potpisivanjem ugovora za projekte upravljanja otpadom otpočela je realizacija Programa utroška sredstava Fonda za zaštitu okoliša Ministarstva za prostorno uređenje, promet i komunikacije i zaštitu okoliša ZDK vrijednog 1,5 miliona KM. Za srijedu je planirano potpisivanje ugovora sa općinama i gradovima te javnim komunalnim preduzećima o finansiranju projekata čišćenja obala rijeke Bosne u vrijednosti od 423.497,60 KM. /kraj/

132. VLADA ZDK POMAŽE LOKALNIM ZAJEDNICAMA: ZA ČIŠĆENJE OBALA RIJEKE BOSNE OD VISOKOG DO DOBOJ JUGA 423.497,60 KM

ZENICA, 21.08.2019. - Ministar za prostorno uređenje, promet i komunikacije i zaštitu okoliša **Arnel Isak** potpisao je sa predstavnicima općina i gradova te javnih komunalnih preduzeća ugovore o finansiranju projekata čišćenja obala rijeke Bosne duž njezinog toka kroz Zeničko-dobojski kanton. Iz kantonalnog Fonda za zaštitu okoliša za ovu namjenu su izdvojena sredstva u iznosu od 423.497,60 KM, a prvi put nakon petnaest godina finansirat će se čišćenje rijeke Bosne u sedam gradova i općina, od Visokog do Doboj Juga.

Sredstva su odobrena JKP "Vis" d.o.o. Doboj Jug (70.000,00 KM), JKP "Radnik" d.o.o. Zavidovići (70.000,00 KM), KJD d.o.o. Maglaj (68.121,60 KM), Gradu Zenica (50.000,00 KM), Općini Doboj Jug (25.376,00 KM), Općini Kakanj (70.000,00 KM) i Gradu Visoko (70.000,00 KM). Općina Žepče nije se prijavila na javni poziv resornog ministarstva, tako da planirana sredstva od 500.000,00 KM nisu u cjelosti utrošena.



"Projektom je planirano uklanjanje divljih deponija, čišćenje priobalnog pojasa od svih otpada i omogućavanje prohodnosti obalama rijeke Bosne. Očekujemo da će lokalne zajednice odmah otpočeti realizaciju projekta te da će čišćenje biti završeno do kraja godine. Želimo da pomognemo gradovima i općinama da očiste rijeku Bosnu kako bismo imali čišći i ljepši okoliš. Nadam se da ćemo projekt nastaviti i iduće godine", kazao je ministar Isak.

Potpisivanjem ugovora Ovime je nastavljena realizacija programa utroška sredstava Fonda za zaštitu okoliša ZDK vrijednog 1,5 miliona KM. Početkom sedmice Ministarstvo za prostorno uređenje, promet i komunikacije i zaštitu okoliša potpisalo je ugovore o finansiranju 17 projekata lokalnih zajednica i javnih komunalnih preduzeća, koji se odnose na oblast upravljanja otpadom, a za koje je izdvojeno 900.000,00 KM. /kraj/

133. POLJOPRIVREDNIM PROIZVOĐAČIMA ODOBRENE NOVČANE SUBVENCije U IZNOSU OD 442.118,50 KM

ZENICA, 23.08.2019. - Vlada Zeničko-dobojskog kantona odobrila je za 101 poljoprivrednog proizvođača koji se bave proizvodnjom u plastenicima i staklenicima novčane subvencije u ukupnom iznosu od 417.118,50 KM.



Pravo prijave na javni poziv imali su proizvođači sa minimalno 500 kvadratnih metara zasada pod plastenicima i staklenicima, a odobrena je novčana podrška od 5 KM po kvadratu, uz maksimalan iznos podsticaja do 5.000 KM. Odobrenom subvencijom podržana je proizvodnja u gotovo 97.000 kvadrata plastenika i

staklenika na području Zenice, Visokog, Usore, Tešnja, Maglaja, Zavidovića, Žepča, Kaknja, Breze i Olova.

Na prijedlog Ministarstva za poljoprivredu, šumarstvo i vodoprivredu, Općoj poljoprivredno-proizvodno-prometnoj-uslužnoj zadruzi (OPPPUZ) "Bios" p.o. Visoko odobreno je 20.000,00 KM na ime podrške za proizvodnju presadnica povrća.

Također, Vlada je odobrila 5.000,00 KM za pet organskih poljoprivrednih proizvođača, pojedinačno po 1.000 KM, na ime podrške za certifikaciju organske poljoprivredne proizvodnje. /kraj/

134. PREMIJER GANIĆ POSJETIO KOMPANIJU MELIK GROUP VISOKO

ZENICA, 23.08.2019. - Premijer Zeničko-dobojskog kantona **Mirza Ganić** posjetio je danas kompaniju "MELIK Group" d.o.o. Visoko, gdje je sa vlasnikom **Anesom Prohićem** razgovarao o poziciji na tržištu i planovima jednog od vodećih proizvođača kafe i toplih napitaka u BiH.



"MELIK Group" svoje proizvode trenutno plasira na tržištu BiH, a uskoro planira početi s izvozom. Najpoznatiji proizvod je "MELIK espresso" koji je na tržištu prisutan već 17 godina i konzumira se u preko 400 ugostiteljskih objekata. Sve proizvodne linije kompanije su usklađene sa sistemom upravljanja kvalitetom ISO 9001:2015 kao i strogim HALAL i HACCP standardima.

"MELIK Group je kompanija koja ima izuzetno veliki trend rasta i ima ambiciozne planove za budućnost. Vlada je opredijeljena da podržava ovakve kompanije koje značajno doprinose jačanju domaće ekonomije i supstituciji uvoza", kazao je premijer Ganić. /kraj/

135. ODOBRENA SREDSTVA ZA IZGRADNJU SPOMEN-OBILJEŽJA U OLOVU, DOBOJ JUGU, KAKNJU I ZAVIDOVIĆIMA

ZENICA, 26.08.2019. - Vlada Zeničko-dobojskog kantona odobrila je finansijska sredstva u iznosu od 107.000,00 KM za izgradnju braniteljskih spomen-obilježja u općinama Olovo, Kakanj, Zavidovići i Doboj Jug.



Općini Olovo odobreno je 40.000,00 KM za završetak projekta izgradnje centralnog spomen-obilježja i uređenja platoa oko spomen-obilježja šehidima i palim borcima Olovske brigade i MUP-a, kao i drugim palim borcima, nestalim i civilnim žrtvama rata poginulim na području općine Olovo tokom agresije na BiH. Projektom je predviđena djelimična rekonstrukcija spomen-obilježja izgrađenog 1999. godine na Trgu **Senahid Bolić Bolo**, a nalazi se ispred

zgrade Općine Olovo.

Općini Doboj Jug odobreno je 30.000,00 KM u svrhu sufinansiranja uređenja objekta u Karušama namijenjenog za spomen-sobu na protekli odbrambeno-oslobodilački rat 1992-1995. godine, kao i kancelarijskog prostora za boračke organizacije koje djeluju na području ove općine.

Općini Kakanj odobreno je 22.000,00 KM za projekt spomen-obilježja Zlatnim ljiljanima općine Kakanj, koji će se izgraditi ispred upravne zgrade JU Kulturno-sportski centar Kakanj.

Vlada je sa 15.000,00 KM podržala 3. fazu projekta izgradnje spomen kompleksa Centralnog spomen obilježja Zavidovići, kojom je predviđeno uređenje enterijera spomen-sobe, nabavka eksponata, vanjsko uređenje, izgradnja prilazne pješačke staze sa rampom za invalidne osobe. U sklopu spomen-sobe bit će opremljene i kancelarije za sjedišta boračkih udruženja. /kraj/

136. PREMIJER GANIĆ OBIŠAO POPLAVLJENA PODRUČJA U OPĆINI TEŠANJ



TEŠANJ, 26.8.2019. - Premijer Zeničko-dobojskog kantona **Mirza Ganić**, u pratnji tešanjskog načelnika **Suada Huskića** i direktora Kantonalne uprave civilne zaštite **Džavida Aličića**, obišao je danas naselja u općini Tešanj koja su u petak navečer pogodile razorne poplave.

"Došao sam da se solidarišem sa građanima i pružim moralnu podršku. O materijalnoj pomoći je još rano govoriti. Nastojat ćemo shodno našim mogućnostima da pomognemo, ali ovo što vidimo prevazilazi mogućnosti lokalne zajednice i zaista je neophodna pomoć svih nivoa vlasti", kazao je Ganić.

Bujične vode poplavile su oko 220 domaćinstava i privrednih objekata na području Jelah-Piljužići, a šteta se procjenjuje na nekoliko miliona maraka. Kantonalna uprava civilne zaštite stavila je na raspolaganje sve svoje resurse.



"U fazi smo zbrinjavanja ljudi i čišćenja terena. Sve isušivače koje smo imali na raspolaganju smo dopremili u Tešanj, a imamo i pomoć iz susjednih općina. Činimo sve što je u našoj moći da se život što prije normalizuje", istakao je Aličić. /kraj/

137. UPLAĆENA SREDSTVA ZA ČETVRTU RATU BORAČKIH STIPENDIJA ZA 2.232 KORISNIKA U IZNOSU OD 304.200,00 KM

ZENICA, 27.08.2019. - Vlada Zeničko-dobojskog kantona je gradskim/općinskim službama za boračko-invalidsku zaštitu u ZDK-u danas uplatila četvrtu ratu stipendija za 2.232 korisnika stipendija za studijsku 2018/2019. godinu u iznosu od 304.200,00 KM. Nadležne gradske/općinske službe će izvršiti isplatu sredstava korisnicima stipendija.



U Budžetu Kantona za 2019. godinu za ovu namjenu osigurana su sredstva u iznosu od 2.433.600,00 KM, a programom stipendiranja su obuhvaćeni studenti redovnog i samofinansirajućeg studija prvog i drugog ciklusa Bolonjskog sistema studiranja. Po prvi put u dugogodišnjem radu Ministarstva za boračka pitanja, stipendije su dobili svi studenti koji su aplicirali na konkurs i koji su ispunjavali uslove.

"Visina stipendija za prvu godinu je 800,00KM, a za drugu i ostale godine

*studija te prvu i drugu godinu drugog ciklusa 1.200,00 KM. Nastojat ćemo da održimo kontinuitet i da svaki mjesec bude izvršena isplata jedne rate stipendije", rekao je **Fahrudin Čolaković**, ministar za boračka pitanja ZDK.*

Raspodjela sredstava po lokalnim zajednicama je slijedeća: Grad Zenica 70.850,00 KM, Općina Breza 13.650,00 KM, Općina Doboju Jug 8.200,00 KM, Općina Kakanj 28.000,00 KM, Općina Maglaj 20.550,00 KM, Općina Olovo 13.300,00 KM, Općina Tešanj 23.950,00 KM, Općina Usora 6.850,00 KM, Općina Vareš 10.800,00 KM, Općina Visoko 38.250,00 KM, Općina Zavidovići 36.550,00 KM i Općina Žepče - 33.250,00 KM. /kraj/

138. UPLAĆENA SREDSTVA ZA NABAVKU OBAVEZNIH UDŽBENIKA DJECI BRANILACA ZA ŠKOLSKU 2019/2020. GODINU

ZENICA, 28.08.2019. - Vlada Zeničko-dobojskog kantona je gradskim/općinskim službama za boračko-invalidsku zaštitu u ZDK-u danas uplatila novčanu pomoć za nabavku obaveznih udžbenika za 1.974 djece branilaca za školsku 2019/2020. godinu u iznosu od 259.500,00 KM. Nadležne gradske/općinske službe će izvršiti isplatu sredstava korisnicima ovog vida novčane pomoći. Visina novčane pomoći za nabavku udžbenika za osnovno obrazovanje je 100,00 KM, a za srednje obrazovanje 150,00 KM.



U Budžetu ZDK za 2019. godinu, kao i prethodnih godina osigurana su sredstva za nabavku obaveznih udžbenika za potrebe redovnog obrazovanja u osnovnim i srednjim školama, kao i za učenike koji se ne ocjenjuju.

"Napominjem da su i ove godine obuhvaćena djeca porodica teškog socijalno-materijalnog stanja. Drago mi je da smo uspjeli osigurati sredstva i donijeti odluke na vrijeme kako bismo roditeljima pomogli u trenutku kada je pomoć potrebna. Svim osnovcima i srednjoškolcima želim

*zdravlje i puno uspjeha u novoj školskoj godini", kazao je ministar za boračka pitanja **Fahrudin Čolaković**.*

Raspodjela sredstava po lokalnim zajednicama je slijedeća: Grad Zenica 51.050,00 KM, Općina Breza 7.850,00 KM, Općina Doboju Jug 4.750,00 KM, Općina Kakanj 17.700,00 KM, Općina Maglaj 21.850,00 KM, Općina Olovo 15.000,00 KM, Općina Tešanj 21.700,00 KM, Općina Usora 3.500,00 KM, Općina Vareš 8.650,00 KM, Općina Visoko 38.800,00 KM, Općina Zavidovići 47.400,00 KM i Općina Žepče 21.250,00 KM.
/kraj/

139. ZAVRŠEN ACCESS KAMP 2019: PREMIJER GANIĆ SE ZAHVALIO AMBASADI SAD U BIH

VISOKO, 28.08.2019. - U Medresi "Osman-ef. Redžović" u Velikom Čajnu kod Visokog svečano je zatvoren šestodnevni "Access kamp 2019" na kojem je učestvovalo 80 polaznika iz medresa u Visokom, Tuzli i Travniku te dvije srednje škole iz Busovače.

Access program je dvogodišnji

program učenja engleskog jezika i praktičnih vještina Ambasade SAD koji implementiraju

Rijaseta Islamske zajednice u BiH i NVO Američka vijeća za međunarodno

obrazovanje. Osim časova engleskog jezika i razvijanja akademskih i praktičnih vještina kroz radionice, učenici su imali

priliku da posjete i upoznaju se sa kulturno-historijskim naslijeđem kroz posjete nacionalnim spomenicima, vjerskim objektima, muzejima i značajnim mjestima u ovom dijelu države. Program je do sada uspješno završilo devet generacija polaznika u BiH.

Ceremoniji u amfiteatru medrese "Osman-ef. Redžović" prisustvovali su **Holly Zardaus**, ataše za kulturu Ambasade SAD u BiH, **Mirza Ganić**, premijer ZDK, direktor Uprave za obrazovanje i nauku Rijaseta IZ u BiH te drugi ugledni gosti.

Premijer Ganić zahvalio se Ambasadi SAD na podršci u implementaciji programa, naglašavajući značaj kampa sa aspekta edukacije mladih, ali i međusobnog povezivanja i jačanja zajedništva, kao i sticanja vještina koje će biti veoma korisne u nastavku obrazovanja i razvoju karijera. /kraj/



140. ODRŽANA 15. SJEDNICA EKONOMSKO-SOCIJALNOG VIJEĆA ZA PODRUČJE ZDK

ZENICA, 29.08.2019. - U sjedištu Vlade Zeničko-dobojskog kantona održana je petnaesta sjednica Ekonomsko-socijalnog vijeća za područje ZDK na kojoj su, prema usvojenom dnevnom redu, razmatrane Informacija o gospodarenju šumama na području Zeničko-dobojskog kantona u 2018. godini i planovi gospodarenja za 2019. godinu, te Informacija o koncesijama na vodama za 2018. godinu.



U nastavku sjednice razmatrani su prijedlozi tema predloženih od strane Udruženja poslodavaca FBiH - Grupacija poslodavaca ZDK i Saveza Samostalnih sindikata BiH - Kantonalni odbor ZDK za izradu Tematskog programa rada Ekonomsko-socijalnog vijeća za mandatni period ove Vlade.

Socijalni partneri su nakon razmatranja predložene tačke jednoglasno usvojili, te iskazali spremnost za nastavak zajedničkog rada na rješavanju ključnih pitanja koja su prepoznata od sva tri partnera kao goruća za stvaranje boljeg socio-ekonomskog ambijenta na području Zeničko-dobojskog kantona. /kraj/

141. DAN ZENIČKO-DOBOJSKOG KANTONA: DODIJELJENA JAVNA PRIZNANJA, ODATA POČAST BRANIOCIMA I OBILJEŽEN DAN IZDAVANJA POVELJE KULINA BANA



ZENICA, 29.08.2019. - Povodom Dana ZDK održana je svečana sjednica kantonalne Skupštine na kojoj su dodijeljena javna priznanja. Priznanje Počasni građanin ZDK dobio je akademik **Ferid Muhić**, a Plaketa Zeničko-dobojskog kantona dodijeljena je penzionisanom generalu

ARBiH **Sakibu Mahmuljinu, Aldinu Kajmakoviću, Semiru Osmanagiću, Amiru Brki** i posthumno profesoru **Salihu Jalimamu**. Prigodan umjetnički program izveli su članovi Kamernog simfonijskog orkestra Zenica.



Premijer **Mirza Ganić** u svom obraćanju uputio je građanima čestitke povodom Dana ZDK, koji je ustanovljen 2013. godine, a obilježava se 29. avgusta na dan kada je 1189. godine potpisana Povelja Kulina bana, kojom se reguliraju prava dubrovačkih trgovaca koji su se kretali teritorijem srednjovjekovne Bosne. Povelja je najstariji sačuvani pisani dokument i potvrda državnosti bosanske države, jezika i kulture.

"Stanje u kojem se danas nalazi Zeničko-dobojski kanton je politički stabilno. Zato nam današnji dan nalaže da se sa puno samokritike i što manje sujete suočimo sami sa sobom, sa svojim učinkom kada je ova zemlja u pitanju i odgovorimo sebi na pitanje: Koliko i šta smo učinili da nam bude bolje? Dan Kantona je novina u političkoj praksi. Iskoristimo ga upravo za traženje pravog puta i pravnog odgovora na pitanje kako dalje. A kako ga mijenjati - moramo naći način, i to da s ciljem boljitka, ponekad uklonimo stranačke barijere i nacionalne interese, da zarad općeg dobra činimo ono što je najbolje za sve nas", kazao je premijer ZDK.

Naša obaveza, dodao je Ganić, je da u svemu što radimo istovremeno promoviramo i evropske vrijednosti i da što prije i što hrabrije uđemo u proces reformskih promjena kojem članice Evropske unije i cjelokupna međunarodna zajednica daju jasnu i nedvosmisleni podršku.



"Mi tražimo poštivanje ustavnih nadležnosti na svim nivoima vlasti. Moja poruka sa ovog mjesta je da samo činjenjem dobra i dobrih djela možemo da izgradimo bolje okruženje, bolju budućnost i bolju Bosnu i Hercegovinu, svoju jedinu domovinu", zaključio je Ganić, uputivši čestitke i građanima Visokog koji danas također slave Dan

grada Visoko.

U okviru obilježavanja Dana Zeničko-dobojskog kantona, delegacije Skupštine i Vlade ZDK jutros su položile cvijeće i odale počast poginulim braniocima Armije Republike BiH i svim civilnim žrtvama rata na centralnom spomen obilježju Kameni spavač u Zenici.

Potom je upriličen svečani prijem predsjedavajućeg Skupštine i premijera ZDK za predstavnike boračkih organizacija, civilnih žrtava rata i predstavnika Saveza logoraša.



Premijer Ganić i predsjedavajući **Ćazim Huskić** prisustvovali su i svečanosti povodom 830. godišnjice izdavanja Povelje Kulina bana, koju je Forum građana Zenice organizirao u zeničkom Parku Kulina bana, a svečanosti su prisustvovali i članovi Predsjedništva BiH **Željko Komšić** i **Šefik Džaferović**. /kraj/

142. PREMIJER GANIĆ POSJETIO KOMPANIJU ECOCOMFORT DOO ZENICA



ZENICA, 30.08.2019. - Premijer Zeničko-dobojskog kantona **Mirza Ganić** posjetio je danas kompaniju "ECOCOMFORT" d.o.o. ZENICA, gdje je sa vlasnikom **Fikretom Ramovićem** razgovarao o poziciji na međunarodnom tržištu ove kompanije koja je 100% izvozno orijentirana.

ECOCOMFORT se bavi proizvodnjom tekstilnih odjevnih predmeta i ima izuzetno veliki trend rasta, te ambiciozne planove za budućnost. Svoje proizvode trenutno plasira na tržišta Danske, Njemačke, Italije, Slovenije i Turske zadovoljavajući stroge standarde navedenih zemalja i EU.

Prilikom obilaska proizvodnih pogona bila je u toku proizvodnja veoma zahtjevnih odjevnih kompleta za policiju i sigurnosne snage Kraljevine Danske.

Također, primjetno je da kompanija nastoji angažirati mladi kadra koji u ovoj kompaniji i ima priliku za osposobljavanje i usavršavanje u struci.

Vlada je u proteklom periodu odobravanjem sredstava za potrebe podrške razvoju konkurentnosti privrede (investiranje u opremu, obuke radne snage, promocija i sajmovi, standardi i kontrola kvalitete, patent) osigurala mogućnost kroz javne pozive za podršku ovakvim i sličnim kompanijama. /kraj/

143. POČELA NOVA ŠKOLSKA GODINA U ZDK: OŠ VLADIMIR NAZOR ZENICA UZ PODRŠKU VLADE IMPLEMENTIRA PILOT-PROJEKT PRODUŽENOG BORAVKA UČENIKA

ZENICA, 02.09.2019. - U Zeničko-dobojskom kantonu počela je nova 2019/2020. školska godina u koju je upisano 3.442 osnovca i 1.048 učenika srednjih škola. Početak nastave kasnit će jedino u OŠ "Hasan Kikić" Tetovo Zenica, gdje bi učenici trebali sjesti u školske klupe iduće sedmice, zbog završnih radova na izgradnji nove školske zgrade koju finansira Vlada ZDK sa 2,3 miliona KM.



Centralna svečanost povodom početka nove školske godine u ZDK održana je u Osnovnoj školi "Vladimir Nazor" Zenica, a učenicima su dobrodošlicu i uspjeh u novoj školskoj godini poželjeli premijer ZDK **Mirza Ganić**, ministar za obrazovanje, nauku, kulturu i sport **Spahija Kozlić** te direktorica kantonalnog Pedagoškog zavoda **Aida Salkić**.

"U osnovne škole u ZDK je upisano 316 učenika manje nego prethodne godine. Smanjenjem kriterija o broju učenika u odjeljenjima sa 23 na 21 zadržali smo postojeći broj nastavnika i na taj način uspjeli riješiti problem tehnološkog viška. Sa ovom negativnom tendencijom zajednica se mora uhvatiti u koštac", kazao je ministar Kozlić.

OŠ "Vladimir Nazor" počela je s implementacijom pilot-projekta Produženog boravka za učenike od prvog do trećeg razreda, a sredstva za adaptaciju prostorija obezbijedila je Vlada Zeničko-dobojskog kantona. Za oko 40 učenika u pilot-fazi su osigurani uslovi za boravak, učenje i zabavu u vremenu od 07.00 do 18.00 sati, a roditelji će boravak plaćati 80 KM. Toliko iznosi trošak ishrane, dok će sve ostale troškove snositi Vlada.



"Ponosni smo na ovaj projekt i nadam se da će se pokazati ne samo ekonomski isplativ, nego i da je od posebnog interesa za roditelje i djecu. Vjerujem da će se nakon pilot-faze projekt proširiti i na druge škole u ZDK", kazao je premijer Ganić. Podsjetio je da Vlada

u kontinuitetu osigurava sredstva za razvoj infrastrukture, kao i za nabavku seta besplatnih udžbenika za učenike od 2. do 9. razreda škole.

U srednje škole na području ZDK u nadležnosti Ministarstva za obrazovanje, nauku, kulturu i sport, bez općina Usora i Žepče, upisano je 69 učenika manje nego prethodne godine. Ipak, zbog povećanog interesovanja za određena zanimanja, posebno medicinska, resorno ministarstvo je odobrilo upis po jedno dodatno odjeljenje u Zenici, Žepču i Brezi. /kraj/

144. U KPZ-U ZENICA POČELA IZGRADNJA PAVILJONA IX

ZENICA, 03.09.2019. - U Kazneno-popravnom zavodu zatvorenog tipa Zenica 22. jula počela je izgradnja Paviljona IX, projektovane površine 2.686 m² u kojem je predviđen smještaj 238 osuđenika.



Cilj izgradnje novog paviljona je rasterećenje postojećih neuslovnih smještajnih kapaciteta, kao i bolji nadzor osuđenika. Izgradnja Paviljona IX finansirana je sredstvima Evropske unije namijenjenim za podršku BiH u području vladavine prava i osiguravanju učinkovitosti, profesionalnosti i nezavisnosti sektora pravosuđa.

Vrijednost radova je 2.152.000 eura, a

planirano vrijeme izgradnje je 12 mjeseci. Izvođač je "Almy-Gradnja" d.o.o. Zenica, dok je nadzor nad izvođenjem radova povjeren firmi "Aksa" d.o.o. Zenica.

*"Razvoj sektora pravosuđa je među prioritetima Vlade ZDK. Zahvaljujem se institucijama EU koje su osigurale sredstva za ovaj kapitalni projekt. Očekujem da će izvođač završiti radove u predviđenom roku", izjavio je premijer ZDK **Mirza Ganić**. /kraj/*

145. PREMIJER GANIĆ POSJETIO ARCELORMITTAL ZENICA I PAK RAMPART VISOKO

ZENICA, 04.09.2019. - Premijer Zeničko-dobojskog kantona **Mirza Ganić** posjetio je danas kompaniju ArcelorMittal Zenica gdje je sa generalnim direktorom **Biju Nairom** i saradnicima razgovarao o aktuelnim problemima sa kojima se suočava najveći proizvođač čelika u regionu.



Ganić je podsjetio da kantonalna Vlada, prepoznavajući značaj ArcelorMittala za ekonomiju Zeničko-dobojskog kantona i Bosne i Hercegovine, u kontinuitetu pokušava da pomogne rješavanje problema sa kojima se suočava ova kompanija, a nedavno je reagirala prema Vijeću ministara BiH, Vladi FBiH i Delegaciji EU u BiH vezano za problem izvoznih

kvota za čelik.

"Kompanije u ZDK trebaju znati da imaju partnera u Vladi ZDK. Došli smo da vam damo podršku, jer svi moramo pomoći i podržavati razvoj i zapošljavanje", kazao je premijer Ganić.

Nair se zahvalio Vladi Zeničko-dobojskog kantona rekavši kako javnost mora shvatiti značaj fabrike, te da je u ovom trenutku važno vratiti povjerenje dioničara koje je narušeno zbog pritiska pojedinih medija. Naglasio je da je u ArcelorMittalu u toku realizacija više ekoloških projekata koji u konačnici trebaju smanjiti štetne emisije iz pogona za oko 95 posto.

Do kraja ove godine očekuje se završetak projekata sekundarnog otprašivanja u pogonu Čeličane u vrijednosti 11 mil. KM i drugog hibridnog filtera na Aglomeraciji u koji je investirano 6 mil. KM, a u oktobru 2020. godine trebalo bi biti završen i projekt Toplane Zenica vrijedan 106 miliona KM koji najvećim dijelom finansira ArcelorMittal.



Premijer Ganić danas je posjetio i pogone kompanije "PAK Rampart" Visoko, jednog od vodećih proizvođača kexa i vafla u BiH. Ova kompanija uskoro planira proširenje proizvodnih pogona, što će omogućiti osvajanje novih stranih tržišta i povećanje izvoza. /kraj/

146. PREMIJER GANIĆ RAZGOVARAO SA PREDSTAVNICAMA UDRUŽENJA DJECE I MLADIH OBOLJELIH OD DIJABETESA U ZDK

ZENICA, 05.09.2019. - Premijer ZDK **Mirza Ganić** primio je predstavnice Udruga djece i mladih oboljelih od šećerne bolesti u Zeničko-dobojskom kantonu, a razgovarano je o inzulin ovisnom dijabetesu sa fokusom na djecu oboljelu od dijabetesa TIP-1 kojih u ovom kantonu ima oko 120.



Pravilna kontrola šećerne bolesti može omogućiti kvalitetan, zdrav i dug život, ali su oboljeli svakodnevno izloženi bolnim ubodima prilikom mjerenja nivoa glukoze i inzulinske terapije. Nove tehnologije kao što su senzori za kontinuiranu kontrolu nivoa glukoze u krvi i uređaji za kontinuirano snabdijevanje organizma inzulinom, tzv. inzulinske pumpe, omogućile su da se broj uboda svede na minimum.

Zbog toga u ovom udruženju traže da se sagledaju mogućnosti uvođenja senzora na listu ortopedskih pomagala u ZDK, kao i da se obezbijede sredstva za nabavku većeg broja inzulinskih pumpi za djecu oboljelu od šećerne bolesti. Važeća lista pomagala predviđa uvođenje i održavanje o trošku Zavoda zdravstvenog osiguranja ZDK do pet inzulinskih pumpi godišnje.

Premijer Ganić dao je podršku roditeljima u borbi za prava oboljele djece, podržavši i inicijativu "Za život sa manje boli". Rješenja za uvođenje i nabavku ovih pomagala tražit će se u saradnji sa ZZO ZDK i Zavodom zdravstvenog osiguranja i reosiguranja FBiH. /kraj/

147. U VLADI ZDK UPRIILIČEN PRIJEM ZA NAJBOLJU BH. PARAOLIMPIJSKU STRELJAČICU ZERINU SKOMORAC

ZENICA, 06.09.2019. - Premijer **Mirza Ganić** i ministar za obrazovanje, nauku, kulturu i sport ZDK **Spahija Kozlić** upriličili su prijem za članicu Streljačkog kluba osoba sa invaliditetom iz Zenice **Zerinu Skomorac** i trenera reprezentacije BiH **Mirsada Redića**.



Mlada reprezentativka Bosne i Hercegovine je na nedavno održanom GRAND PRIX 2019 Shooting Para Sport u streljaštvu za osobe sa invaliditetom u Novom Sadu osvojila drugo mjesto sa upucanih 636,3 krugova, čime je potvrdila normu za Svjetsko prvenstvo u Sidneju i Paraolimpijske igre u Tokuju 2020 godine. Pored ispunjenih i potvrđenih normi, postavila je i novi rekord Bosne i Hercegovine.

Skomorac i Redić su se zahvalili Vladi Zeničko-dobojskog kantona koja je odobrila finansijska sredstva za odlazak na takmičenje u Novi Sad.

Uz čestitke na postignutom rezultatu, premijer Ganić i ministar Kozlić su najavili podršku Vlade ZDK tokom priprema i odlaska na nadolazeća takmičenja, a za osvojeno drugo mjesto u Novom Sadu najboljoj bh. paraolimpijskoj streljačici odobrena je novčana nagrada u iznosu od 1.000 KM. /kraj/

148. VLADA OPREDIJELILA JEDAN MILION KM ZA PRVU FAZU REKONSTRUKCIJE CESTE ZENICA - ARNAUTI



ZENICA, 06.09.2019. - Vlada Zeničko-dobojskog kantona donijela je odluku kojom je opredijelila sredstva u iznosu od jedan milion KM za realizaciju projekta "Rekonstrukcija 1 faze lokalne ceste Zenica - Babino - Arnauti" na području grada Zenice.

Sredstva za rekonstrukciju prve poddionice Bolnica -

Arnauti bila su opredijeljena i u budžetu za 2018. godinu, ali je tenderska procedura prekinuta u završnoj fazi jer se zbog političkih opstrukcija ušlo u kraj građevinske sezone. Pošto odobrena sredstva nisu utrošena, prema zakonu se nisu mogla prenijeti u narednu godinu, tako da se Vlada Zeničko-dobojskog kantona opredijelila da opredijeli isti iznos i u 2019. godini.

*"Put Zenica - Arnauti je jedan od strateških ciljeva Vlade Zeničko-dobojskog kantona. Čvrsto smo opredijeljeni da izvršimo rekonstrukciju kompletne saobraćajnice, koja se nalazi na trasi buduće regionalne ceste Zenica - Ponijeri - Kakanj, kako bismo osigurali kvalitetnije uslove za život stanovnika na tom području", izjavio je premijer **Mirza Ganić**.*

Nakon odobravanja sredstava uskoro slijedi raspisivanje tendera za izbor izvođača radova i nadzor. /kraj/

149. VLADA OSTVARILA CILJ STIPENDIJA ZA SVE STUDENTE: 1.590 REDOVNIH STUDENATA JEDNOKRATNO ĆE DOBITI STIPENDIJU OD 600 KM

ZENICA, 06.09.2019. - Vlada Zeničko-dobojskog kantona donijela je odluku o utvrđivanju visine stipendije i broja rata za isplatu u akademskoj 2018/2019. godini, za što je u budžetu Ministarstva za obrazovanje, nauku, kulturu i sport opredijeljeno jedan milion KM. Stipendiju u iznosu od 600,00 KM dobit će 1.590 redovnih studenata prvog ili drugog ciklusa studija na visokoškolskim ustanovama u BiH ili izvan BiH, od čega će 30 studenata koji studiraju za deficitarna zanimanja dobiti i novčanu nagradu u visini stipendije, tako da će stipendija za ove studente iznositi 1.200 KM.



"U odnosu na prošlu godinu, iznos stipendije je povećan za 40 KM. Neće biti isplate u ratama, nego će stipendije biti isplaćene jednokratno. Vlada će do kraja septembra doznačiti sredstva resornim općinskim i gradskim službama koje će izvršiti uplatu na tekuće račune

*studenata, a prema konačnoj listi koju je općinama i gradovima dostavilo resorno ministarstvo", pojasnio je ministar za obrazovanje, nauku, kulturu i sport ZDK **Spahija Kozlić**.*

Stipendiju su dobili svi studenti koji su ispunjavali kriterije, kao i prilikom dodjele stipendija Ministarstva za boračka pitanja ZDK. Podsjetimo, početkom ljeta stipendije u iznosu od 800 KM za prvu te 1.200 KM za drugu i ostale godine studija, dobilo je 2.230 studenata iz boračke populacije, za što je u budžetu za 2019. godinu osigurano 2,44 miliona KM ili 400.000 KM više nego prethodne godine.

*"U 2019. godini smo po prvi put uspjeli osigurati sredstva za dodjelu stipendija svim studentima koji su dostavili formalno ispravne aplikacije. Nastojat ćemo da tu politiku nastavimo i narednih godina, kako bi svi studenti dobili šansu da se obrazuju i grade svoju budućnost u Bosni i Hercegovini", kazao je premijer **Mirza Ganić**. /kraj/*

150. PREMIJER GANIĆ PRIMIO DELEGACIJU HO MERHAMET MDD SARAJEVO

ZENICA, 09.09.2019. - Premijer Zeničko-dobojskog kantona **Mirza Ganić** primio je delegaciju Humanitarne organizacije "Merhamet" MDD Sarajevo, koju su činili predsjednik **Kenan Vrbanjac**, član Upravnog odbora dr. **Edin Selimović** te generalni sekretar **Sidik Aždahić**.



Uz čestitke premijeru na imenovanju, predstavnici "Merhameta" zahvalili su se Vladi Zeničko-dobojskog kantona za podršku i dobru saradnju u proteklom periodu, izrazivši nadu da će saradnja biti unapređena za dobrobit svih koji su u stanju socijalne potrebe, a posebno povratničke populacije.

Premijer Ganić najavio je podršku Vlade budućim projektima najstarije bošnjačke humanitarne organizacije, kao i nastavak podrške narodnim kuhinjama „Merhameta“ na području ovog kantona, čiji se rad godinama sufinansira iz budžeta ZDK. /kraj/

151. MINISTARSTVO ZA OBRAZOVANJE, NAUKU, KULTURU I SPORT ZDK I ŠVICARSKI CARITAS POTPISALI MEMORANDUM O SARADNJI NA PROJEKTU POPOiO

ZENICA, 10.09.2019. - Ministar za obrazovanje, nauku, kulturu i sport ZDK **Spahija Kozlić**, predsjednica Asocijacije za razvoj LEDA **Adela Mehinagić** i direktor Caritasa za Bosnu i Hercegovinu **Daniel Bronkal** potpisali su danas memorandum o saradnji na promociji predškolskog odgoja i obrazovanja u Zeničko-dobojskom kantonu, prvenstveno realizaciju Programa obaveznog predškolskog odgoja i obrazovanja za djecu u godini pred polazak u školu (POPOiO).



Caritas Švicarske je nosilac projekta "Predškolsko obrazovanje za svu djecu Bosne i Hercegovine" (PEACH), a partner u implementaciji ovog projekta u Zeničko-dobojskom kantonu je lokalna nevladina organizacija Asocijacija za razvoj LEDA, koja djeluje u uskoj saradnji sa tri predškolske ustanove: JU za predškolski odgoj i obrazovanje "Mladost" iz Kaknja, JU Predškolski odgoj i obrazovanje Zenica i JU Gradski dječiji vrtić Zavidovići, kao i osnovnim školama u kojima se realizuje cjeloviti razvojni program u godini pred polazak u školu.

Projekat "Predškolsko obrazovanje za svu djecu Bosne i Hercegovine" ima za cilj promociju pristupa kvalitetnom predškolskom odgoju i obrazovanju koje doprinosi cjelovitom razvoju predškolskog djeteta i daje snažne temelje za dalje obrazovanje djeteta. Pored toga, projekat uključuje i aktivnosti zagovaranja značaja predškolskog odgoja, a ciljevi projekta su omogućavanje pristupa predškolskom odgoju i obrazovanju djeci iz ranjivih kategorija, pružanje prijatnog okruženja za djecu te poboljšanje predškolskog odgoja i obrazovanja kroz nove načine i savremenu metodologiju rada, socijalnu uključenost i prava djeteta, sa posebnim naglaskom na ranjive kategorije djece.

Kao partner švicarskog Caritasa, LEDA je tokom protekle školske 2018/2019. godine realizovala aktivnosti u predškolskoj ustanovi i osnovnim školama vezanim za program POPOiO, te je u saradnji i dogovoru sa predstavnicima resornog ministarstva izvršila procjenu kapaciteta dvanaest osnovnih škola, od kojih je izabrala četiri područne osnovne škole u cilju poboljšanja kvaliteta POPOiO u ruralnim područjima općina Zenice, Zavidovića i Kakanja, i to: Područna škola u sastavu OŠ "Ahmed Muradbegović" Kakanj, PŠ "Termoelektrana" JU OŠ "15. April" Kakanj, PŠ "Dolina" JU OŠ "Druga osnovna škola" Zavidovići i PŠ "Lokvine" JU OŠ "Ahmed Muradbegović" Zenica.

U školskoj 2019/2020. godini predviđena je realizacija javne kampanje o važnosti predškolskog odgoja i obrazovanja za djecu, sa posebnim fokusom na socijalno ranjive porodice, opremanje i/ili renoviranje prostora za realizaciju obaveznog predškolskog odgoja i obrazovanja (jedne prostorije), nabavka namještaja, didaktičkog materijala, igračaka i potrošnih materijala, realizacija tematskih roditeljskih sastanaka sa roditeljima čija su djeca uključena u POPOiO u cilju boljeg razumijevanja značaja predškolskog odgoja i obrazovanja za pravilan rani razvoj djece, održavanje komunikacije sa roditeljima u cilju praćenja napretka djeteta, nabavka užina na dnevnoj osnovi za grupu do 25 djece koja budu uključena u POPOiO u školskoj 2019/2020. godini te nabavka higijenskih sredstva za održavanje prostora u kojem se realizuje POPOiO.

Za vrijeme trajanja PEACH projekta, ali i nakon njegove implementacije, Ministarstvo za obrazovanje, nauku, kulturu i sport će obezbijediti plate profesora predškolskog odgoja i obrazovanja za realizaciju POPOiO u školskoj 2019/2020. godine, kao i naredne dvije godine, obezbijediti izvještavanje od strane angažovanih profesora za realizaciju POPOiO u odabranim školama, u skladu sa smjernicama LEDE, kao i pružiti sve potrebne informacije neophodne za praćenje napretka projekta, zatim osigurati redovno čišćenje prostorija koje se koriste u svrhu projektnih aktivnosti, pružiti podršku pri realizaciji programa POPOiO na četiri lokacije tokom cijelog trajanja aktivnosti, odobriti učešće profesora predškolskog odgoja i obrazovanja u edukacijama koje će biti obezbijeđene od strane Caritasa Švicarske u cilju unapređenja realizacije POPOiO, osigurati da se prostorije namijenjene za realizaciju POPOiO, kao i didaktički materijal koriste isključivo za realizaciju ovog programa kao i da se čuvaju za naredne generacije djece koje će koristiti isti didaktički materijal, te podržati nesmetan monitoring aktivnosti u školama i vrtićima koje su podržane projektom. /kraj/

152. POČELA SANACIJA KROVA NA ZGRADI ODJELJENJA SUDA U MAGLAJU



MAGLAJ, 11.09.2019. - Na zgradi Odjeljenja suda u Maglaju počela je sanacija limenog krova koju finansira Ministarstvo za pravosuđe i upravu Zeničko-dobojskog kantona. Radove izvodi firma Ćosić-promex iz Usore, a nadzor je povjeren Javnom preduzeću za planiranje i uređenje grada Zenica. Rok za završetak radova je kraj septembra.

*"Sud godinama radi u otežanim uslovima zbog oštećenja na krovu koji prokišjava. Ovo je nastavak aktivnosti Vlade na obezbjeđivanju što boljih uslova za rad pravosudnih institucija u Zeničko-dobojskom kantonu", rekao je ministar za pravosuđe i upravu **Nebojša Nikolić**. /kraj/*

153. PREMIJER GANIĆ OTVORIO MEĐUNARODNO OTVORENO PRVENSTVO I 16. SPORTSKE IGRE PARAPLEGIČARA I OBOLJELIH OD DJEČIJE PARALIZE FBiH

ZENICA, 13.09.2019. - Na Atletskom stadionu u Zenici održava se Međunarodno otvoreno prvenstvo i 16. sportske igre paraplegičara i oboljelih od dječje paralize FBiH. Organizator je Savez paraplegičara i oboljelih od dječje paralize Federacije BiH, a domaćin, po treći put, je Udruženje paraplegičara i oboljelih od dječje paralize Zenica.



Prvenstvo je svečano otvorio premijer Zeničko-dobojskog kantona **Mirza Ganić**, koji je, uz čestitke svim učesnicima igara, poželio da na borilištima pokažu da su ravnopravni članovi sportske zajednice. Istakao je da Vlada pruža finansijsku podršku perspektivnim sportistima, redovno izdvaja i sredstva za potporu turnirskih i ligaških takmičenja klubova, zatim za kotizaciju i članarine, kao i za invalidski i školski sport.

"Ovo sve radimo zato što smo svjesni činjenice da sportski rezultati jednim dijelom zavise i od finansijske podrške, uz druge faktore koji su potrebni za njihovo ostvarenje, kao što su talenat, dobra organizacija i stručni rad. Naša je obaveza da pružimo materijalnu podršku sportu i da ga usmjeravamo u pravcu koji je u skladu sa onim što se naziva javni interes u sportu. Javni interes podrazumijeva kako postizanje vrhunskih rezultata, tako i sve one sportske aktivnosti kojima se postiže unapređenje zdravlja građana, a posebno djece i osoba sa tjelesnim invaliditetom", kazao je premijer ZDK, naglasivši da se cjelokupno društvo, kako institucije vlasti tako i društvene organizacije, mora intenzivnije posvetiti osmišljavanju kreativnih programa za osobe sa invaliditetom.

Na prvenstvu učestvuju 130 takmičarki i takmičara iz Crne Gore, Hrvatske, Makedonije, Slovenije, Srbije te BiH. Natječu se u tri discipline - trka u kolicima na 100, 200 i 400 metara, bacačke discipline koplje, kugla, disk i čunj te u šahu. /kraj/

154. ULAGANJA VLADE ZDK U ŠKOLSKU INFRASTRUKTURU: ZAVIDOVIĆI DOBILI NOVI SPORTSKI POLIGON

ZAVIDOVIĆI, 13.09.2019. - JU Gimnazija "Rizah Odžević" Zavidovići dobila je novi sportski poligon. Izgradnju poligona koji će koristiti i učenici Srednje mješovite škole finansirala je Vlada Zeničko-dobojskog kantona sa 175.000,00 KM, dok je Općina Zavidovići platila porez te osigurala dio sredstava za kupovinu zemljišta.



*"Vlada je u zgrade Gimnazije 'Rizah Odžević' i Srednju mješovitu školu do sada uložila oko 500.000 KM, čime su značajno poboljšani uslovi za boravak i odvijanje nastavnog procesa. Konkretnim projektima pokazujemo da je ulaganje u školsku infrastrukturu i budućnost mladih jedan od ključnih prioriteta ove vlade", kazao je premijer **Mirza Ganić**, pozdravljajući okupljene na svečanosti povodom otvaranja sportskog poligona upriličenoj na Dan općine Zavidovići.*

Premijer ZDK je pozvao mlade da nakon završetka srednjeg obrazovanja nastave školovanje na Univerzitetu u Zenici ili nekom drugom univerzitetu u BiH, gdje mogu računati na podršku Vlade koja je ove godine dodijelila čak 3.820 stipendija, a stipendije su po prvi put dobili svi studenti koji su dostavili formalno ispravne aplikacije. /kraj/

155. ODOBRENA SREDSTVA ZA PROJEKTE PODRŠKE ODRŽIVOM POVRATKU

ZENICA, 16.09.2019. - Vlada Zeničko-dobojskog kantona odobrila je finansijska sredstva koja će udružiti sa Federalnim ministarstvom raseljenih osoba i izbjeglica radi finansiranja projekata podrške održivom povratku na području ZDK. Ukupna vrijednost ovih projekata u 2019. godini je 350.000 KM.



Prema potpisanom sporazumu kojeg su dogovorili premijer ZDK **Mirza Ganić** i ministar za raseljene osobe i izbjeglice FBiH **Edin Ramić**, realizirat će se ukupno pet projekata u općinama Tešanj, Visoko, Olovo i Žepče.

Izgradnja puta Trepče - Šljivice u općini Tešanj projekt je vrijedan 80.000,00 KM, a u finansiranju učestvuje i Općina Tešanj.

Na području grada Visokog predviđena je izgradnja puta u MZ Kralupi na potezu lokalnog puta od Slatine prema Čifluku za što je osigurano 120.000,00 KM, dok je u općini Olovo

predviđena sanacija lokalnog puta Olovske Luke - Gurdići u vrijednosti od 60.000,00 KM.

Na području općine Žepče predviđeno je asfaltiranje puta Gornji Vitlaci - Brijeg, za što će biti izdvojeno 60.000,00 KM, te rekonstrukcija lokalnog puta u MZ Vinište, dionica prijelaz preko pruge - Križ u vrijednosti 30.000,00 KM.

"Udruživanjem finansijskih sredstava sa Vladom FBiH omogućili smo značajna ulaganja u infrastrukturu koja je važna pretpostavka za održivi povratak. Tenderi su raspisani i veoma brzo očekujemo početak izvođenja radova", kazao je premijer Mirza Ganić.

Pored navedenih projekata, u budžetu Zeničko-dobojskog kantona osigurana su dodatna sredstva za podršku održivom povratku, a za dva projekta u općinama Zavidovići i Breza već su donesene odluke o odobravanju sredstava.

"Za drugu fazu rekonstrukcije Stare džamije u povratničkom mjestu Rujnica u općini Zavidovići izdvojili smo 30.000,00 KM. S obzirom na značaj obnove društvene infrastrukture, uključujući i vjerske objekte, za održivi povratak, Vlada se opredijelila da nakon podrške od 25.000,00 KM prvoj fazi obnove koja je izvršena 2018. godine, odobri sredstva za nastavak rekonstrukcije ovog nacionalnog spomenika BiH", kazao je premijer Ganić.

Drugi projekt je izgradnja dijela saobraćajnice u naselju Podgora u općini Breza, dionica raskrsnica - Plošnik, ukupne dužine 520 metara, koji zajedno finansiraju Vlada ZDK i Općina Breza. Iz budžeta ZDK za ovaj projekt je odobreno 20.000,00 KM. Naselje Podgora pripada MZ Župča, a u toku agresije na BiH bilo je u neposrednoj blizini linija razdvajanja, tako da je veći dio ovog naselja bio potpuno iseljen i porušen.

/kraj/

156. DELEGACIJA ZDK U ZAGREBU PRISUSTVOVALA OTVARANJU PARKA ENVERA ČOLAKOVIĆA

ZAGREB, 18.09.2019. - Delegacija Zeničko-dobojskog kantona koju čine izaslanik premijera i ministar za obrazovanje, nauku, kulturu i sport **Spahija Kozlić**, šefica Ureda premijera **Zahida Šišić** i direktor OŠ "Enver Čolaković" Zenica **Elvir Ibrahimagić**, boravi u službenoj posjeti Zagrebu. Povod posjeti je otvaranje **Parka Envera Čolakovića**, bosanskohercegovačkog, hrvatskog i mađarskog književnika, pjesnika, prevoditelja i profesora, koji je djelovao i živio u Budimpešti, Sarajevu i Zagrebu.



Delegaciju je jučer u zgradi Gradske uprave primio zagrebački gradonačelnik Milan Bandić sa saradnicima, a razgovarano je o mogućnostima saradnje na različitim poljima, od kulture do privrede. "S gradonačelnikom smo također razgovarali i o uspostavi bliže saradnje između Grada Zagreba i Zeničko-dobojskog kantona te se nadamo uzvratnoj posjeti kada će biti dogovoreni adekvatni protokoli", naglasio je ministar Kozlić.

Sastanku su također prisustvovali predsjednik Mešihata Islamske zajednice u Hrvatskoj i zagrebački muftija **Aziz ef. Hasanović**, sekretar Mešihata **Nermin Botonjić**, predsjednik Vijeća bošnjačke nacionalne manjine Grada Zagreba **Armin Hodžić** i predsjednik Hrvatskog udruženja menadžera i poduzetnika CROMA **Esad Čolaković**, sin književnika Envera Čolakovića.

Gradonačelnik Bandić otkrio je spomen-ploču s natpisom Park Envera Čolakovića u Martićevoj ulici u Zagrebu, preko puta zgrade poznate pod nazivom Mali Vatikan.

"Ovaj grad su gradili istaknuti Hrvati, ali i pripadnici nacionalnih zajednica koji žive u njemu. Njihov trud je vidljiv u javnome životu, kulturi, politici i gospodarstvu, a Enver Čolaković je dokaz te tradicije i tolerancije. To je bogatstvo i budućnost našega grada i naše domovine", poručio je okupljenima Bandić.



Delegacija Zeničko-dobojskog kantona posjetila je i predsjednika Mešihata Islamske zajednice u Hrvatskoj i zagrebačkog muftiju Aziza ef. Hasanovića, kao i Vijeće bošnjačke nacionalne manjine Grada Zagreba, a sinoć je prisustvovala promociji najpoznatijeg Čolakovićevog romana "Legenda o Ali-paši" te nedavno objavljenog romana "Lirika", koju su u saradnji s Gradom Zagrebom organizirali Vijeće bošnjačke nacionalne manjine Grada Zagreba i Kulturno društvo Bošnjaka Hrvatske "Preporod". /kraj/

157. VLADA ZA IZGRADNJU POSLOVNIH ZONA ODOBRILO 887.000 KM

ZENICA, 18.09.2019. - Vlada Zeničko-dobojskog kantona donijela je odluku o odobravanju finansijskih sredstava za subvencioniranje troškova organizacije i izgradnje poslovnih zona na području ovog kantona. Ukupno 887.078,62 KM opredijeljeno je za poslovne zone u sedam općina Zeničko-dobojskog kantona, kojima su sredstva odobrena putem javnog poziva.



Sredstva su dobili Grad Zenica (PZ "Zenica I", 155.078,62 KM), Grad Visoko (PZ "Ozrakovići", 150.000,00 KM), Općina Usora (PZ "Srednja Omanjska", 160.000,00 KM), Općina Tešanj (PZ "Glinište", 150.000,00 KM), Općina Maglaj (PZ "Liješnica", 142.000,00 KM), Općina Vareš (PZ "Kram", 120.000,00 KM) i Općina Žepče (PZ Radovlje", 10.000,00 KM).

Od 2009. godine, kada je pokrenut program podrške izgradnji poslovnih zona, do 2017. godine, Vlada ZDK je za poslovne zone izdvojila ukupno 3 miliona KM. Iznos je značajno povećan posljednje dvije godine. Prošle godine je izdvojeno 900.000,00 KM, a samo ove godine planirano je 1,2 mil. KM, što je najveći iznos do sada.

*„Aplikacije je dostavilo ukupno devet gradova i općina, a tražena sredstva su odobrena za sedam lokalnih zajednica koje su ispunjavale uvjete iz konkursa. Programom je bio predviđen maksimalan iznos od 10.000,00 KM za projektiranje, te 150.000,00 KM za uređenje poslovnih zona”, kazao je ministar privrede **Zlatko Jelić**, dodavši da će sa lokalnim zajednicama ubrzo biti potpisani ugovori.*

Izgradnja poslovnih zona jedan je od prioriteta Vlade u oblasti privrede, što pokazuje i sve snažnija podrška lokalnim zajednicama iz budžeta Zeničko-dobojskog kantona.

*"Želimo na ovaj način pomoći lokalnim zajednicama da poboljšaju poslovni ambijent te podstaknemo privlačenje investicija i zapošljavanje u ZDK", kazao je premijer **Mirza Ganić**. /kraj/*

158. ODOBRENA POMOĆ ZA RADNIKE PD KRIVAJA-MOBEL ZAVIDOVIĆI

ZENICA, 18.09.2019. - Vlada Zeničko-dobojskog kantona, na prijedlog ministrice za rad, socijalnu politiku i izbjeglice **Azre Šabanović**, odobrila je sredstva u iznosu od 85.200 KM kao pomoć socijalno-intervenirajućeg karaktera Zeničko-dobojskog kantona za bivše radnike privrednog društva "Krivaja Mobil" d.o.o. Zavidovići.



"Ukupno 426 radnika dobit će jednokratnu novčanu pomoć u iznosu od 200 KM. Sredstva će biti doznačena Općini Zavidovići, koja će pomoć plasirati preko Centra za socijalni rad", kazala je ministrica Šabanović.

Radnici "Krivaje" su izvjestan vremenski period ostvarivali pravo na naknadu zbog nezaposlenosti zavisno od dužine radnog staža, ali je za većinu radnika ovo pravo prestalo. Bivši

radnici nalaze se u veoma teškom socijalnom stanju, jer nemaju sredstva za osnovne životne potrebe i sredstva za liječenje.

Isplata novčane pomoć za radnike dogovorena je na nedavnom sastanku u Vladi Federacije BiH, na kojem su učestvovali predstavnici Vlade ZDK, radnika i Općine Zavidovići.

*"Moramo pomoći radnicima dok se ne riješi situacija u ovom privrednom društvu. Vlada ZDK je ovime ispoštovala svoju obavezu, a u obezbjeđivanje finansijske pomoći će se uključiti i Vlada Federacije BiH i Općina Zavidovići", izjavio je premijer **Mirza Ganić**. /kraj/*

159. POZITIVNA ISKUSTVA S PRIMJENOM ALTERNATIVNE KRIVIČNE SANKCIJE RAD ZA OPĆE DOBRO NA SLOBODI

ZENICA, 20.09.2019. - Izvršavanje alternativne sankcije za rad za opće dobro na slobodi u Ministarstvu za pravosuđe i upravu Zeničko-dobojskog kantona provodi se od 2014. godine, a do 2018. godine ovo ministarstvo je posredovalo u uspješnom izvršavanju preko 70 presuda. Prema informaciji koju je primila na znanje Vlada Zeničko-dobojskog kantona, u toku 2018. godine izvršeno je sedam presuda, dok je jedna presuda vraćena sudu zbog nesposobnosti za rad osuđenika usljed bolesti.



Pored opće i posebne svrhe kažnjavanja koje su trebaju postići kod učinitelja krivičnog djela ali i društvo u cjelini, primjena alternativne sankcije za rad za opće dobro na slobodi ima i svoje ekonomske efekte, kako za Federaciju BiH tako i poslodavca. Prema informaciji, u sedam izvršenih presuda u 2018. izrečeno je 55 mjeseci

zatvora, što je ukupno 1.650 dana, tako da je, s obzirom da jedan zatvorski dan košta 100 KM, postignuta ušteda od 165.000 KM. Osuđenicima je izrečeno 355 dana rada za opće dobro na slobodi ili 2.840 sati, pa je računajući minimalnu satnicu od 2,31 KM za poslodavce postignuta ušteda od 6.560,40 KM.

Presude kojima je izricana alternativna sankcija za rad za opće dobro u 2018. su donosili samo općinski sudovi u Zenici, Kaknju i Visokom te Kantonalni sud u Zenici, zbog čega je zaključeno da je potrebno dodatno animirati sve sudove sa područja ovog kantona na izricanje ove alternativne krivične sankcije. Pozitivna su i iskustva poslodavca, a kako se uglavnom radi o mlađim osobama stvara se i razvija radna navika.

*"U narednom periodu ćemo raditi na proširivanju potencijalnih poslodavaca na širi spektar organizacija i obuka novih povjerenika, kao i raditi na podizanju svijesti stručne i opće javnosti o značaju ove sankcije", kazao je ministar za pravosuđe i upravu **Nebojša Nikolić**. /kraj/*

160. DELEGACIJA ZAKONODAVNE I IZVRŠNE VLASTI FBIH I ZDK POSJETILA ARCELORMITTAL ZENICA

ZENICA, 20.09.2019. - Delegacija zakonodavne i izvršne vlasti Federacije BiH i Zeničko-dobojskog kantona na čelu sa federalnim premijerom **Fadilom Novalićem** posjetila je kompaniju ArcelorMittal Zenica, na poziv generalnog direktora ove kompanije **Biju Naira**.



Delegaciju su još činili federalni ministar energije, rudarstva i industrije **Nermin Džindić**, federalna ministrica okoliša i turizma **Edita Đapo**, direktor Federalne uprave za inspekcijske poslove **Anis Ajdinović**, federalni zastupnik **Miralem Galijašević** te izaslanik premijera Zeničko-dobojskog kantona i ministar za obrazovanje, nauku, kulturu i sport **Spahija Kozlić**.

Nair se zahvalio na posjeti, rekavši kako vlada razumije važnost ArcelorMittala za ekonomiju Bosne i Hercegovine. Istakao je kako se globalna industrija suočava sa velikom krizom i da svi zajedno moraju raditi kako bi se održalo poslovanje AMZ-a te završili ekološki projekti koji su započeti.

"Ekonomija i zaštita okoliša moraju ići zajedno i s ovim timom pokušavamo razjasniti sve aspekte poslovanja", kazao je generalni direktor AMZ.

Premijer Novalić je istakao kako AMZ ima nemjerljiv doprinos za privredu FBiH i BiH, te da je posjetom želio poručiti koliko je vladi stalo do ove kompanije.

"Nije mali broj 2.400 zaposlenih te još 10.000 u sekundarnom ciklusu. Veliki je uticaj na Željeznice FBiH koje su se tek stabilizirale nakon 25 godina, na BH Gas, Elektroprijenos i Elektroprivredu BiH. Poremećaj u AMZ-u bi izazvao veliku distorziju u privrednom sistemu FBiH, a uvjeta za poremećaj ima. Imamo na sceni trgovinske ratove, Evropa je odgovorila na našu štetu, a oni mogu plasirati samo u okruženje, a ne i u Hrvatsku koja je članica EU", rekao je Novalić.

U fokusu razgovora bili su ekološki projekti koji bi trebali značajno smanjiti negativan uticaj AMZ-a na okoliš, među kojima je posebno značajan projekt nove toplane koja će iz upotrebe izbaciti ugalj i koristiti gas.

Ministar Nermin Džindić je najavio da će iduće sedmice biti održani sastanci predstavnika AMZ-a sa čelnicima Elektroprivrede BiH i BH Gasa, na kojima će se razgovarati o isporuci i rokovima plaćanja električne energije te priključenju nove toplane na gasnu mrežu, a održat će se i poseban sastanak u Ministarstvu za energiju, rudarstvo i industriju FBiH na temu izdavanja energetske dozvole za toplanu.

/kraj/

161. VLADA NAGRADILA MLADE OSVAJAČE MEDALJA U TEKVANDOU

ZENICA, 23.09.2019. - Premijer ZDK **Mirza Ganić** i ministar za obrazovanje, nauku, kulturu i sport **Spahija Kozlić** upriličili su prijem za osvajače medalja iz Zeničko-dobojskog kantona na nedavno održanom Balkanskom tekvando prvenstvu u Bugarskoj.

Sajra Kajević iz TK "Bosna" Visoko osvojila je zlato, **Irma Kulačić** iz TK "Zenica" i **Anes Kovač** iz TK "Nur"



Kakanj srebro, dok je **Fahrudin Adilović** iz TK "Bosna" Visoko osvojio bronzanu medalju. U pratnji mladih sportista bili su njihovi treneri **Halim Fejzić** (TK Nur), **Edin Kajević** (TK Bosna) te **Emir Skopljak** (TK Zenica).

"Ponosni smo što smo imali priliku da ugostimo četvero mladih sportista koji su na ovom takmičenju dostojno predstavili ZDK i domovinu Bosnu i Hercegovinu. Vlada podržava sport kroz izdvajanja iz budžeta, a promocijom ovakvih rezultata animiramo mlade da se bave sportom što je jedan od naših ciljeva", kazao je premijer Ganić.

Najavio je da će Vlada ZDK osvajače medalja nagraditi novčano te im na taj način pomoći u daljem razvoju. Za osvojeno zlato izdvojit će 1.000, srebro 700, a za bronzanu medalju 500 KM. /kraj/

162. ZDK ANGAŽIRAO JOŠ 20 ASISTENATA ZA RAD SA DJECOM SA POTEŠKOĆAMA U RAZVOJU

ZENICA, 23.09.2019. - Ministar za obrazovanje, nauku, kulturu i sport ZDK **Spahija Kozlić** i direktor Službe za zapošljavanje ZDK **Anto Pešić** potpisali su ugovor o sufinansiranju zapošljavanja 20 asistenata u nastavi za rad sa djecom sa poteškoćama u razvoju u osnovnim školama na području Zeničko-dobojskog kantona.

Vrijednost ugovora je 81.000 KM, a finansiranje novih asistenata, uz do sada angažiranih 16, finansira Federalni zavod za zapošljavanje.



"Postoji velika potreba u osnovnim školama za rad sa djecom s poteškoćama u razvoju. Asistenti će biti angažirani devet mjeseci, zaključno s krajem školske 2019/2020. godine. Praksa je pokazala da je ovaj vid saradnje izuzetno bitan, tako da ćemo nastojati da s vremenom pojačamo broj asistenata u osnovnim školama", kazao je ministar Kozlić.

Asistenti su angažirani sa biroa za zapošljavanje. Projekt se sufinansira drugu godinu zaredom, a plan je da se nastavi i u buduće.

"Projekt je pokazao odlične rezultate, a sama djeca koja do sada nisu imala adekvatan pristup obrazovanju, sada imaju priliku da se prilagode društvu, nastavi, učenju i obrazovanju, a sutra i tržištu rada", rekao je direktor Pešić. /kraj/

163. PREMIJER GANIĆ I MINISTAR ISAK OBIŠLI RADOVE NA CESTI ČAJDRAŠ - OVNAK

ZENICA, 24.09.2019. - Premijer Zeničko-dobojskog kantona **Mirza Ganić** i ministar za prostorno uređenje, promet i komunikacije i zaštitu okoliša **Arnel Isak** obišli su danas u naselju Lokvine radove na rekonstrukciji regionalne ceste Čajdraš - Ovnak. Izvođač "Almy Transport" Zenica radove je započeo sredinom avgusta na poddionici dužine 500 metara na kojoj su riješeni imovinsko-pravni odnosi.



"Regionalni put Zenica - Ovnak je od životnog značaja za stanovnike Kočevskog sliva. To je projekt koji je započela prethodna vlada osiguravši milion maraka za rekonstrukciju prve dionice. Ovo je potvrda da i pored brojnih prepreka izvršavamo ono što smo započeli", kazao je premijer Ganić.

Sporazum o rekonstrukciji regionalnog puta Čajdraš - Ovnak potpisan je u novembru prošle godine, a sredstva su osigurana za prvu poddionicu Čajdraš - Lokvine. Radove usporava kašnjenje izgradnje vodovoda i kanalizacije koja se nalazi na trasi saobraćajnice.

"Očekujemo da se gradske vlasti i JP Vodovod i kanalizacija Zenica više angažuju kako bi ubrzali izgradnju kanalizacione i vodovodne mreže, jer je to uslov za nastavak radova na izgradnji ceste. U tom slučaju bi izgradnja ove poddionice mogla biti završena prije zime, što je i naš i interes građana", kazao je ministar Isak, dodavši da će se pokušati ubrzati rješavanje imovinsko-pravnih odnosa na ostatku dionice.

Regionalna cesta Čajdraš - Ovnak duga je oko osam kilometara, a projektom je predviđena izgradnja ceste široke šest metara sa svom pratećom infrastrukturom. Plan Vlade ZDK je da se rekonstrukcija kompletne ceste završi u narednih nekoliko godina. Saobraćajnica je značajna i za regionalno povezivanje, jer će njenom rekonstrukcijom Zenica dobiti kvalitetniju cestovnu vezu sa Travnikom. /kraj/

164. VLADA JEDNKRATNO UPLATILA STIPENDIJE ZA 1.590 STUDENATA U ZDK

ZENICA, 25.09.2019. - Vlada Zeničko-dobojskog kantona doznala je gradovima i općinama sredstva za isplatu stipendija Ministarstva za obrazovanje, nauku, kulturu i sport za akademsku 2018/2019. godinu, koji će izvršiti uplatu stipendija na račune studenata, prema konačnoj listi koju je dostavilo resorno ministarstvo.



Stipendije u iznosu od 600,00 KM dobilo je 1.590 redovnih studenata prvog ili drugog ciklusa studija na visokoškolskim ustanovama u BiH ili izvan BiH, dok stipendija za 30 studenata koji studiraju za deficitarna zanimanja iznosi 1.200 KM.

*"Iznos stipendija je u odnosu na prethodnu akademsku godinu povećan za 40 KM. Nadležnim gradskim i općinskim službama prebačen je cjelokupan iznos sredstava, tako da će stipendije studentima biti isplaćene jednokratno", kazao je ministar **Spahija Kozlić**.*

Stipendije Ministarstva za obrazovanje, nauku, kulturu i sport dobili su svi studenti koji su ispunjavali kriterije i čije su aplikacije bile formalno-pravno ispravne, kao i prilikom dodjele stipendija Ministarstva za boračka pitanja ZDK. Tako je u 2019. godini stipendije iz budžeta ZDK dobilo 3.820 studenata. /kraj/

165. POTPISANI UGOVORI O SAMOZAPOŠLJAVANJU 104 PRIPADNIKA BORAČKE POPULACIJE



ZENICA, 25.09.2019. - Ministar za boračka pitanja Zeničko-dobojskog kantona **Fahrudin Čolaković** potpisao je ugovore sa 104 pripadnika boračke populacije koji su odabrani putem javnog poziva za dodjelu poticaja za samozapošljavanje u okviru programa "Prvi biznis". Za ovu namjenu izdvojeno je 817.000,00 KM, a pravo korištenja poticaja imali su korisnici koji su registrirali djelatnost ili obrt nakon 01. januara 2018. godine, a najkasnije sa danom zatvaranja javnog poziva. Odobreno je 104 od ukupno 135 podnesena zahtjeva za dodjelu poticaja.

*"Ovo je nastavak programa samozapošljavanja pripadnika boračke populacije koji je do sada bio izuzetno uspješan. Najčešće se radi o zanatskim djelatnostima, građevinarstvu, poljoprivredi, stočarstvu te trgovini", izjavio je ministar za boračka pitanja **Fahrudin Čolaković**.*

Premijer **Mirza Ganić** zaželio je korisnicima poticaja puno uspjeha u privatnom biznisu, istakavši da je ZDK kičma privrede BiH zahvaljujući i poslovnom ambijentu koji je u značajnoj mjeri i rezultat rada i mjera vlade.

"Najmanje što možemo učiniti za boračku populaciju jeste da kroz programe zapošljavanja i samozapošljavanja pomognemo da borci i članovi njihovih porodica osiguraju egzistenciju. Ova vlada snažno podržava poduzetničku inicijativu i želimo omogućiti svima koji imaju poslovnu ideju da pokrenu biznis i stvaraju novu vrijednost", kazao je premijer Ganić.

Za programe zapošljavanja i samozapošljavanja pripadnika boračke populacije ove godine je planirano 1,6 miliona KM. U narednom periodu planirano je i zaključivanje ugovora o poticaju samozapošljavanju "Biznis plus".



Pravo na ovaj vid poticaja moći će ostvariti korisnici programa poticaja samozapošljavanja iz prethodnih godina, a koji su svojim zalaganjem ostvarili nadprosječne poslovne rezultate, te koji imaju planove proširenja poslovne djelatnosti ili zapošljavanja člana vlastitog domaćinstva. /kraj/

166. UPLAĆENA SREDSTVA ZA PETU RATU BORAČKIH STIPENDIJA ZA 2.232 STUDENTA U ZDK



ZENICA, 26.09.2019. - Vlada Zeničko-dobojskog kantona je gradskim/općinskim službama za boračko-invalidsku zaštitu danas uplatila petu ratu stipendija za 2.232 korisnika stipendija za studijsku 2018/2019. godinu u iznosu od 304.200,00 KM.

U Budžetu ZDK za 2019. godinu za ovu namjenu osigurana su sredstva u iznosu od 2.433.600,00

KM, a programom stipendiranja su obuhvaćeni studenti redovnog i samofinansirajućeg studija prvog i drugog ciklusa Bolonjskog sistema studiranja. Po prvi put, stipendije su dobili svi studenti koji su aplicirali na konkurs i koji su ispunjavali uslove.

Raspodjela sredstava po lokalnim zajednicama je slijedeća: Grad Zenica 70.850,00 KM, Općina Breza 13.650,00 KM, Općina Doboju Jug 8.200,00 KM, Općina Kakanj 28.000,00 KM, Općina Maglaj 20.550,00 KM, Općina Olovo 13.300,00 KM, Općina Tešanj 23.950,00 KM, Općina Usora 6.850,00 KM, Općina Vareš 10.800,00 KM, Općina Visoko 38.250,00 KM, Općina Zavidovići 36.550,00 KM i Općina Žepče 33.250,00 KM. /kraj/

167. VLADA ZDK I GRAD ZENICA POTPISALI PROTOKOL O REKONSTRUKCIJI CESTE ZENICA - BABINO

ZENICA, 26.09.2019. - Premijer Zeničko-dobojskog kantona **Mirza Ganić**, ministar za prostorno uređenje, promet i komunikacije i zaštitu okoliša **Arnel Isak** i gradonačelnik Zenice **Fuad Kasumović** potpisali su danas Protokol o zajedničkom učešću u rekonstrukciji puta Zenica - Babino, poddionica Bolnica-Arnauti. Vlada ZDK je u budžetu za 2019. godinu za ovu poddionicu opredijelila jedan milion KM.

"Ovaj projekt je od velikog značaja za stanovnike Babinskog sliva i uopće grad Zenicu, a također je značajan jer se nalazi na trasi buduće regionalne ceste koja će povezati Zenicu i Kakanj preko Ponijera. Vlada potvrđuje svoje opredjeljenje da će svako obećanje dato građanima u predviđenom roku ispuniti. I ovaj sastanak i potpisivanje Protokola su potvrda da radimo i gradimo za sve građane Zeničko – dobojskog kantona. Zaista se radujem skorom početku realizacije ovog projekta", kazao je premijer Ganić.



Zaista se radujem skorom početku realizacije ovog projekta", kazao je premijer Ganić.

Projekt je 2018. godine pokrenula Vlada ZDK, koja je odobrila jedan milion KM, ali je tenderska procedura prekinuta u završnoj fazi zbog

političkih opstrukcija, tako da sredstva nisu utrošena. S obzirom da se radi o lokalnoj cesti, koja je u nadležnosti lokalne zajednice, tendersku proceduru će provesti Grad Zenica.

"Od samog imenovanja na funkciju ministra, moj primarni interes i predmet rada i zalaganja je stvaranje boljih uslova za život svih građana Zenice i ZDK. Kao rođeni Zeničanin, odmah po preuzimanju dužnosti usmjerio sam angažman ka ostvarivanju interesa građana, a jedan od prioriteta je rješavanje dugogodišnjih problema loše putne komunikacije na lokalnoj cesti Zenica-Babino-Arnauti, te me iskreno raduje današnje potpisivanje Protokola o saradnji sa Gradskom upravom Zenica što je bio preduvjet za dalje aktivnosti na realizaciji ovog projekta za kojeg smo opredijelili milion KM", izjavio je ministar Isak.

Gradonačelnik Fuad Kasumović je pozdravio opredjeljenje Vlade ZDK da unaprijedi kvalitet i uslove života za građane Babinskog sliva.

Članovi Vlade Zeničko-dobojskog kantona iskoristili su ovu priliku da zatraže od gradonačelnika Kasumovića da ubrza rješavanje imovinsko-pravnih odnosa s Kantonalnom bolnicom Zenica, a kako bi se pristupilo izgradnji zgrade Interventne kardiologije vrijedne 7,5 miliona KM, kao i Projekta energetske efikasnosti u KBZ-u za koji je Vlada Zeničko-dobojskog kantona obezbijedila 11 miliona eura. /kraj/

168. POTPISANI UGOVORI SA SEDAM OPĆINA I GRADOVA: 887.000 KM ZA ORGANIZACIJU I IZGRADNJU POSLOVNIH ZONA U ZDK

ZENICA, 27.09.2019.

- U sjedištu Vlade Zeničko-dobojskog kantona danas su potpisani ugovori o načinu realizacije odobrenih sredstava subvencija za organiziranje i izgradnju poslovnih zona u ZDK. U prisustvu premijera **Mirze Ganića**, ugovore je sa



predstavnicima sedam gradova i općina potpisao ministar za privredu **Zlatko Jelić**. Vrijednost ugovora je 887.078,62 KM, a sredstva su odobrena putem javnog poziva.

Sredstva su dobili Grad Zenica (PZ "Zenica I", 155.078,62 KM), Grad Visoko (PZ "Ozrakovići", 150.000,00 KM), Općina Usora (PZ "Srednja Omanjska", 160.000,00 KM), Općina Tešanj (PZ "Glinište", 150.000,00 KM), Općina Maglaj (PZ "Liješnica", 142.000,00 KM), Općina Vareš (PZ "Kram", 120.000,00 KM) i Općina Žepče (PZ Radovlje", 10.000,00 KM).

Od 2009. godine, kada je pokrenut program podrške izgradnji poslovnih zona, do 2017. godine, Vlada ZDK je za poslovne zone izdvojila ukupno 3 miliona KM. Iznos je značajno povećan posljednje dvije godine. Prošle godine je izdvojeno 900.000,00 KM, a samo ove godine planirano je 1,2 mil. KM, što je najveći iznos do sada. Radi se o namjenskim sredstvima od koncesija, od čega se odlukama Vlade 70 posto transferira prema općinama, a 30 posto ulaže u organizaciju i razvoj poslovnih zona u ZDK.

"Programom je bio predviđen maksimalan iznos od 150.000 KM za uređenje poslovnih zona, a 10.000,00 KM za izradu projektne dokumentacije i pripremu poslovnih zona, a jedna općina mogla podnijeti dva zahtjeva i dobiti subvenciju od 160.000 KM. Na javni poziv je pristiglo devet aplikacija, a uvjete iz poziva ispunjavalo je sedam općina i gradova", kazao je ministar Jelić.

Premijer Ganić je rekao kako je stvaranje povoljnog poslovnog ambijenta strateški cilj Vlade ZDK te da u tom pravcu podstiče razvoj poslovnih zona koje su najbolja mjesta za obrt kapitala.

"Potrebna je cirkulacija novca jer što je više bogatstva u jednom društvu to veći dio bogatstva pripada svima, a razvojem privrede i budžet ZDK će biti stabilniji. Imamo poslovne zone koje se tek razvijaju ali postoje i poslovne zone u kojima rade desetine kompanija i zapošljavaju veliki broj radnika. Nastavit ćemo pružati podršku lokalnim zajednicama kako bi poboljšale poslovni ambijent, privukle investicije i podstakli zapošljavanje", kazao je Ganić. /kraj/

169. PREMIJER GANIĆ PRIMIO DELEGACIJU UDRUŽENJA SRCE ZA DJECU OBOLJELU OD RAKA U FBIH



ZENICA, 27.09.2019. - Premijer Zeničko-dobojskog kantona **Mirza Ganić** primio je delegaciju udruženja Srce za djecu oboljelu od raka u FBiH na čelu s predsjednikom **Fikretom Kubatom**, a u kojoj su bili **Adna Mujezinović, Fuad Halilović i Vedad Hodžić**, mladi Zeničani koji su tokom liječenja koristili Roditeljsku kuću u Sarajevu. Prijemu je prisustvovala i ministrica za rad, socijalnu politiku i izbjeglice **Azra Šabanović**.

Udruženje Srce za djecu oboljelu od raka u FBiH osnovano je 2003. godine, a iz neformalne grupe roditelja i prijatelja oboljele djece izraslo je u snažnu organizaciju sa preko 400 članova. Djeci oboljeloj od raka i njihovim porodicama u Roditeljskoj kući pružaju smještaj, hranu i psihosocijalnu podršku, pomažu kod nabavke lijekova, medicinske opreme i liječenja u inostranstvu. Do sada je kuću koristilo preko 30 djece i porodica iz Zeničko-dobojskog kantona.

Premijer Ganić obećao je dalju podršku plemenitoj misiji ovog udruženja, kako bi se djeci i porodicama omogućili kvalitetniji uslovi za liječenje i oporavak nakon liječenja.

Predstavnici Udruženja uručili su domaćinima prigodnu zahvalnicu uz poziv da posjete Udruženje i Roditeljsku kuću, kao i da prisustvuju svečanoj premijeri dokumentarnog filma "Velika bijela kuća" koja će se održati sutra u Bosanskom narodnom pozorištu u Zenici. /kraj/

170. VLADA ODOBRILO SREDSTVA ZA JOŠ OSAM PROJEKATA PODRŠKE ODRŽIVOM POVRATKU



ZENICA, 30.09.2019. - Nakon što su početkom prošle sedmice premijer **Mirza Ganić** i ministrica za rad, socijalnu politiku i izbjeglice Azra Šabanović sa federalnim ministrom za raseljene osobe i izbjeglice **Edinom Ramićem** potpisali ugovor o udruživanju sredstava za finansiranje projekata podrške održivom povratku, Vlada Zeničko-dobojskog kantona je donijela osam novih odluka o finansiranju projekata podrške održivom

povratku u općinama sredstvima iz budžeta ZDK.

"Iz budžeta ZDK je za ovih osam projekata izdvojeno 170.000,00 KM. Vlada je posvećena ravnomjernom razvoju kantona, tako da smo projektima podrške održivom povratku u 2019. godini nastojali da obuhvatimo sve lokalne zajednice. Korist će imati svi građani, a posebno povratnička populacija", kazao je premijer Ganić.

Općini Zavidovići odobreno je 50.000,00 KM kao učešće Zeničko-dobojskog kantona u sufinansiranju projekta "Izgradnja mosta preko rijeke Krivaje u naseljenom mjestu Stog".

Mjesnoj zajednici Kopice odobreno je 30.000,00 KM na ime sufinansiranja projekta "Izgradnja društvenog doma MZ Kopice u Maglaju - I faza".

U Općini Usora Vlada će sa 20.000,00 KM sufinansirati građevinske radove na izgradnji ograde oko mezarja u MZ Alibegovci, zaselak Tokme i postavljanju ulične rasvjete.

Općini Zavidovići odobreno 20.000,00 KM za projekt "Izgradnja javne rasvjete na području MZ Dolina-Alići".

Vlada je Crkvenoj opštini Kakanj odobrila 20.000,00 KM kao pomoć za rekonstrukciju i proširenje prostornih kapaciteta parohijskog doma u sklopu pravoslavne crkve Svetih apostola i Pavla, dok je Srpskoj pravoslavnoj crkvenoj opštini Visoko odobreno 10.000,00 KM kao pomoć u obnovi Hrama svetog Prokopija u Visokom.

Medžlisu Islamske zajednice Vareš odobrena su novčana sredstva u iznosu od 10.000,00 KM na ime učešće ZDK u sufinansiranju osiguranja boljih infrastrukturnih uslova: sanacije lokalnog puta prema naseljenom mjestu Karići, izgradnje mokrih čvorova te rekonstrukcije krova na Hajder-dedinoj džamiji u Karićima.

Župi Svete Ane u Žablaku, općina Usora, odobreno je 10.000,00 KM na ime učešća ZDK u sufinansiranju obnove župne kuće. /kraj/

171. VLADA ZDK I GRAD ZENICA ZAJEDNO GRADE EKO-KUĆU NA SMETOVIMA

ZENICA, 01.10.2019. - Ministar za prostorno uređenje, promet i komunikacije i zaštitu okoliša ZDK **Arnel Isak** i gradonačelnik Zenice **Fuad Kasumović** potpisali su protokol o zajedničkom učešću Vlade Zeničko-dobojskog kantona i Grada Zenice u projektu izgradnje Eko-kuće na Smetovima kod Zenice. Projekt je vrijedan 600.000 KM, a realizirat će se iduće dvije godine.



"Protokolom je utvrđen način realizacije i obaveze obje strane. U 2019. Vlada Zeničko-dobojskog kantona i Grad Zenica će osigurati po 100.000 KM, a iduće godine po još 200.000 KM, kada je planiran završetak objekta. Kuća će biti izgrađena od eko-prihvatljivih materijala. Cilj nam je razvoj Zenice i Zeničko-dobojskog kantona, za što se opredijelila ova vlada, a i meni kao rođenom

Zeničaninu je drago što se grad Zenica razvija i što će korist imati svi građani ZDK", kazao je ministar Isak, dodajući da bi uskoro trebao biti raspisan tender za izgradnju objekta.

Gradonačelnik Kasumović se zahvalio ministru Isaku s kojim je Grad Zenica do sada potpisao pet protokola o zajedničkoj realizaciji projekata.

"Na Smetovima se ove godine užurbano rade igrališta i klupe. Želja nam je da oživimo Smetove jer ovaj grad mora imati izletišta. Zahvaljujemo se resornom ministru Isaku koji je našao znanja i snage da nam pomogne da svi građani imaju korist od ovoga", kazao je Kasumović. /kraj/

172. ZA SUBVENCIONIRANJE INVESTICIJA KOD OBRTA VLADA ODOBRILO 311 HILJADA KM

ZENICA, 01.10.2019. - Vlada Zeničko-dobojskog kantona donijela je odluku o odobravanju finansijskih sredstava za subvencioniranje investicija kod obrta iz područja prerađivačkih djelatnosti u ukupnom iznosu od 310.958,31 KM. Sredstva su dodijeljena putem javnog poziva na koji je dostavljeno 72 zahtjeva od kojih su 53 bili uredni.



*"Obrtnici su imali pravo na subvenciju od 35 posto od iznosa investicije, a mlađi od 35 godina i žene imali su po tom osnovu pravo na uvećanje poticaja za 20 posto. Pravo na poticaj je ostvarilo 12 obrtnika mlađih od 35 godina, a među korisnicima je i 13 obrtnica", kazao je ministar privrede **Zlatko Jelić**.*

Dva obrtnika su izgradila proizvodne objekte ukupne površine 543 m² namijenjene za obavljanje

proizvodne djelatnosti, a 20 obrtnika je steklo pravo na poticaj po osnovu investicija u nabavku opreme. U skladu sa Uredbom o zaštiti tradicionalnih i starih zanata dostavljeno je 34 urednih zahtjeva.

*"Želimo pomoći očuvanje starih zanata, a svakome ko ima kvalitetnu ideju da pokrene biznis. To se posebno odnosi na mlade kojima želimo pomoći da ostanu i grade svoju budućnost u BiH", kazao je premijer **Mirza Ganić**. /kraj/*

173. VLADA ZDK SA 550 HILJADA KM VODNIH NAKNADA SUFINANSIRALA IZGRADNJU VODOVODA RADUŠA

TEŠANJ, 02.10.2019. - U Općini Tešanj jučer je potpisan ugovor za završnu fazu radova na distributivnoj mreži vodovoda Raduša u vrijednosti 744.57,46 KM, a sredstva su osigurali UNDP kroz projekt MEG kojeg, Vlada Zeničko-dobojskog kantona, Općina Tešanj i građani. Izgradnja vodovoda započeta je 2016. godine, a ukupna vrijednost projekta je 2,1 miliona KM.



*"Ukupno učešće Vlade ZDK u izgradnji vodovoda Raduša je 549.825 KM. U 2016. i 2017. godini smo izdvojili 270.000 KM, a ovu finalnu fazu kojom se završava kompletna mreža sufinansiramo sa 280.000 KM", kazao je ministar za poljoprivredu, šumarstvo i vodoprivredu ZDK **Mirnes Bašić**.*

Nakon potpisivanja ugovora organiziran je obilazak bunara kod džamije u Raduši i na najvišoj koti u Gornjoj Raduši. Vodovod u MZ

Raduša će postati dio vodovodnog sistema kojim upravlja JKP Rad, dok će se snabdijevanje vršiti sa izvorišta u Jelah Polju.

Vodovod Raduša je jedan od četiri projekta na području općine Tešanj koje Vlada Zeničko-dobojskog kantona u 2019. finansira iz programa vodnih naknada, a njihova ukupna vrijednost je 530.000 KM.

*"Vlada je opredijeljena za ravnomjeran razvoj svih općina u Zeničko-dobojskog kantona. Pogotovo nas raduje agilnost općina, kao što je Tešanj, kada osiguraju podršku i drugih donatora. Vlada je uvijek spremna podržati i sufinansirati takve projekte", kazao je premijer **Mirza Ganić**.*

Ukupna vrijednost programa vodnih naknada Ministarstva za poljoprivredu, šumarstvo i vodoprivredu ZDK u 2019. godini je 8,5 miliona KM, od čega su 5,2 miliona sredstva vodnih naknada iz ove godine, a ostatak je prenesen iz 2018. godine. /kraj/

174. POLJOPRIVREDNIM PROIZVOĐAČIMA ISPLAĆENI PODSTICAJI U IZNOSU OD 442 HILJADE KM



ZENICA, 02.10.2019. - Ministarstvo za poljoprivredu, šumarstvo i vodoprivredu Zeničko-dobojskog kantona izvršilo je isplatu novčanih podsticaja poljoprivrednim proizvođačima u ukupnom iznosu od 442.124,35 KM, čime je uspješno završilo planirane aktivnosti iz Programa za podsticaje u poljoprivredi za 2019.

godinu koje se odnose na Podršku poljoprivrednoj proizvodnji u plastenicima i staklenicima, Podršku za proizvodnju presadnica povrća i Podršku za certificiranje organske poljoprivredne proizvodnje.

Tokom trajanja javnog poziva dostavljen je 101 zahtjev za ostvarivanje prava na novčanu podršku za poljoprivrednu proizvodnju u plastenicima i staklenicima iz općina Usora, Tešanj, Maglaj, Zavidovići, Žepče, Zenica, Kakanj, Visoko, Breza i Olovo. Nakon provedenih provjera, utvrđeno je da svi proizvođači koji su aplicirali ispunjavaju propisane uslove, te im je u skladu sa kriterijima odobren poticaj za ovu vrstu poljoprivredne proizvodnje u ukupnom iznosu od 417.118,50 KM.

Uprkos odustajanju određenog broja proizvođača utvrđeno je da je u ovoj godini ipak došlo do povećanja broja registriranih proizvođača u odnosu na prošlu godinu kada je poticaje ostvario 91 proizvođač, a samim tim je došlo i do povećanja površina obuhvaćenih plasteničkom proizvodnjom, što jeste jedan od strateških ciljeva.

Za registriranu proizvodnju presadnica, koja je bitan faktor u proizvodnji kvalitetnog i zdravstveno ispravnog sjemena povrća, isplaćen je iznos od 20.000,00 KM, a kao poticaj certifikaciji organske poljoprivredne proizvodnje iznos od 5.000,00 KM.

Ministarstvo za poljoprivredu, šumarstvo i vodoprivredu je opredijeljeno da i u narednom periodu poduzima aktivnosti na stvaranju dobrih uslova za bavljenje poljoprivrednom proizvodnjom, većem zapošljavanju, a time i stvaranju boljih uslova života. /kraj/

175. DELEGACIJA VLADE I SKUPŠTINE ZDK POSJETILA OPĆINU VAREŠ: RAZGOVARALI SA OPĆINSKIM VLASTIMA I POSJETILI RUDNA NALAZIŠTA

VAREŠ, 03.10.2019. - Delegacija Vlade Zeničko-dobojskog kantona na čelu s premijerom **Mirzom Ganićem** i predsjedavajućim Skupštine **Čazimom Huskićem** posjetila je danas općinu Vareš. Upriličen je sastanak sa općinskim načelnikom i predsjedavajućim Općinskog vijeća, a potom i posjeta području gdje se trenutno vrše rudarsko-geološka istraživanja.



"Vareš je zaista jedna pozitivna priča, pogotovo u turizmu koji nije primarna grana ali svake godine ostvaruje rast zahvaljujući kulturno historijskom naslijeđu, pogotovo starom gradu Bobovcu, kao i prirodnim ljepotama. S druge strane, Vareš je bogat rudama a danas imamo investitora koji vrši geološka istraživanja zbog kojih vlada 'zlatna groznica'. U tom duhu smo posjetili Vareš da sa načelnikom i njegovim saradnicima vidimo koje su to ključne stvari koje moramo rješavati u narednom periodu", kazao je premijer Ganić.



Vlada trenutno sagledava mogućnost osiguravanja sredstava za bržu izgradnju regionalnih puteva, kako bi Vareš, ali i druge općine u ZDK, otvorili turistima, a u isto vrijeme unaprijedili privredni ambijent.

"U Varešu smo ove godine uložili 120.000 KM u razvoj poslovne zone i to je potvrda da želimo da u svakoj lokalnoj zajednici gdje je to moguće gradimo poslovne zone, kao najbolja mjesta za obrt kapitala. Prošle godine smo odobrili 80.000 KM za unapređenje turističke infrastrukture na Bobovcu – otvaranje infobiroa, postavljanje turističke signalizacije i rekonstrukciju krova. Ulaganjem u infrastrukturu i skraćanjem birokratskih procedura otvaramo lokalne zajednice prema investitorima, a istovremeno olakšavamo građanima", kazao je Ganić.



Načelnik **Zdravko Marošević** je izrazio zadovoljstvo što je Vlada odabrala Vareš za prvu posjetu gotovo u punom sastavu, pozdravljajući opredjeljenje za ravnomjeran razvoj svih lokalnih zajednica u ZDK.

"Vareš tu malo kaska ali polako sustižemo razvijenije općine. Prioriteti su infrastruktura, prije svega putna, a ostalo ide samo po sebi. Raduje me da imamo zainteresiranost investitora, kao i našeg iseljništva da obnavlja, stvara i ulaže kapital u našu općinu", kazao je Marošević.

Delegacija je potom posjetila Informativni centar kompanije "Easter Mining", a potom i rudarsko područje u blizini Vareša na kojem vrši geološka istraživanja cinka, olova i barita, kao i plemenitih metala. Miloš Bošnjaković, član uprave i suvlasnik ove australske kompanije, upoznao je članove Vlade da su dosadašnja geološka istraživanja potvrdila isplativost eksploatacije, da su već dobili okolinsku i čekaju urbanističku dozvolu, nakon čega će podnijeti zahtjev za eksploataciju. Na istražnim i drugim radovima angažirano je oko 100 ljudi, među kojima značajan broj lokalnog stanovništva, a kompanija će uskoro premjestiti sjedište iz Sarajeva u Vareš.

Premijer Ganić je najavio uklanjanje birokratskih barijera i prilagođavanje određenih procesa u kantonalnim institucijama investitorima koji žele istraživati mineralna bogatstva, a najavio je i smanjenje koncesionih naknada za istraživanje, kako bi privukli nove ulagače. /kraj/

176. ODOBRENO 10.000 ZA ORGANIZACIJU DOČEKA I NOVČANU NAGRADU AMELU TUKI

ZENICA, 04.10.2019. - Vlada Zeničko-dobojskog kantona odobrila je po 5.000 KM, ukupno 10.000 KM, za podršku organizaciji večerašnjeg dočeka na Atletskom stadionu u Zenici i novčanu nagradu **Amelu Tuki**, osvajaču srebrene medalje na Svjetskom atletskom prvenstvu u Dohi.



Vlada još jednom upućuje iskrene čestitke ponajboljem bh. atletičaru na osvojenoj medalji, čime je na najbolji način predstavio svoju domovinu Bosnu i Hercegovinu, svoj grad i Atletski klub "Zenica". Ponosni smo što smo dio ove lijepe sportske priče i što smo svih godina pružali nesebičnu podršku

Atletskom klubu "Zenica" i njegovoj perjanici **Amelu Tuki**.

Izgradnja Atletskog stadiona Zenica pomognuta je iz budžeta Zeničko-dobojskog kantona sa 50.000 KM, Atletski klub Zenica svake godine dobija 3.000 KM za kotizacije i aktivnosti, a od 2016. do 2019. godine organizacija Atletskog mitinga Zenica, najvećeg atletskog događaja u BiH, podržana je sa ukupno 55.000 KM.

Amel Tuka dobija stipendiju Ministarstva za obrazovanje, nauku, kulturu i sport ZDK u godišnjem iznosu od 5.400 KM, mjesečno 450 KM, i to je najveći pojedinačni iznos stipendije među desetak vrhunskih sportista kojima Vlada pruža podršku za pripreme i sudjelovanje na međunarodnim natjecanjima. Pored toga, stipendije kvartalno ili jednokratno dobija još 24 perspektivnih sportista iz ZDK.

Vlada ZDK u kontinuitetu podržava uspješne klubove i sportiste koji postižu zapažene rezultate, posebno na međunarodnim takmičenjima, a takvo opredjeljenje zadržat ćemo i u budućem periodu. /kraj/

177. U VLADI ZDK UPRILIČEN PRIJEM ZA UPRAVU I IGRAČE KSO ZENICA 92

ZENICA, 04.10.2019. - Prijem za upravu i igrače Kluba sjedeće odbojke "Zenica 92", osvajače prvog mjesta u sjedećoj odbojci na nedavno održanim Međunarodnim igrama osoba sa invaliditetom "Beograd open 2019", upriličen je danas u Vladi Zeničko-dobojskog kantona. Osvajače zlata i pehara drugu godinu zaredom primili su premijer **Mirza Ganić**, ministar za boračka pitanja **Fahrudin Čolaković** i ministar za obrazovanje, nauku, kulturu i sport **Spahija Kozlić**.



"Čestitam vam sve naslove koje ste dosad osvojili i hvala vam što u najboljem svjetlu predstavljate ZDK i BiH. Kada rehabilitacija i druženje, koji su glavni ciljevi, donesu vrhunske rezultate, onda smo sigurni da smo na pravom putu. Zbog toga ćemo nastaviti pružati podršku vama i vašem klubu, kao i drugim uspješnim klubovima i sportistima koji postižu zapažene rezultate, posebno na međunarodnim takmičenjima", kazao je premijer Ganić, najavivši da će Vlada ovom klubu odobriti i adekvatnu novčanu nagradu.

Klub "Zenica 92" postoji 25 godina i jedan je od najtrofejnijih sportskih kolektiva u Zenici i BiH, a dobitnik je i Plakete Zenice.

Gosti su se zahvalili na prijemu kao i za kontinuiranu podršku Vlade i Ministarstva za boračka pitanja ZDK.
/kraj/

178. PREMIJER I MINISTAR OBRAZOVANJA DOČEKALI BRUCOŠE: POČELA AKADEMSKA GODINA NA FAKULTETIMA UNIVERZITETA U ZENICI

ZENICA, 07.10.2019. -

Prigodnom svečanošću na Univerzitetu u Zenici počela je nastava za oko 5.000 studenata na osam fakulteta u akademskoj 2019/2020. godini. Dobrodošlicu brucošima poželjeli su rektor Damir Kukić, premijer Zeničko-dobojskog kantona **Mirza Ganić** i ministar za obrazovanje, nauku, kulturu i sport profesor **Spahija Kozlić**.



"Želim da budete uspješni studenti, a Vlada ZDK će biti uz vas i pružati vam podršku. Ove godine smo po prvi put uspjeli dodijeliti stipendije svim studentima koji su podnijeli formalno ispravne prijave, ukupno 3.820, čime praktično pokazujemo našu podršku mladima. Put do uspjeha je potkovan obrazovanjem, a bez obrazovanja, nauke i upornosti ne možemo postići rezultat", kazao je premijer Ganić.

Univerzitet u Zenici ovu akademsku godinu počinje kao reakreditirani univerzitet sa reakreditiranih pet studijskih programa.



"Vlada je dala podršku da se proces reakreditacije provede i na ostalim studijskim programima, što je jedan od uslova napretka UNZE-a", kazao je ministar Kozlić.

Univerzitet u Zenici je upisao nešto više od 900 studenata na prvi ciklus studija. Dok na nekim studijskim programima nije upisan

dovoljan broj studenata, u isto vrijeme se na nekim fakultetima bilježe pozitivni trendovi. Na Pravnom fakultetu povećan je broj studenata, a odobren je i upis dodatnog broja studenata na Politehničkom i Medicinskom fakultetu.

Rektor **Damir Kukić** je istakao kako je u zadnje dvije godine zaustavljen trend opadanja upisa novih studenata, te da su zadovoljni ovogodišnjim odzivom studenata za studiranje na UNZE-u. /kraj/

179. DELEGACIJA VLADE POSJETILA OLOVO: OPREDIJELJENI ZA RAVNOMJERAN RAZVOJ SVIH OPĆINA U ZDK

OLOVO, 08.10.2019. - Delegacija Vlade Zeničko-dobojskog kantona na čelu s premijerom **Mirzom Ganićem** boravila je danas u radnoj posjeti općini Olovo, gdje je upriličen sastanak sa općinskim načelnikom **Đemalom Memagićem** i saradnicima.



U širokom spektru aktuelnih pitanja o kojima je razgovarano dominirale su teme vezane za privredu, turizam i generalno stvaranje boljeg ambijenta za rad i život u ovoj općini. Prema riječima načelnika Memagića, Općina Olovo očekuje podršku Vlade ZDK u projektima formiranja prve poslovne zone, proširenja kapaciteta banjskog lječilišta „Aquaterm“ i odmarališta „Zeleni Vir“, a želi iskoristiti i raspoložive hidropotencijale. Također, traže da se uspostavi efikasnija kontrola sječe šume, insistirajući na promjeni modela plaćanja drvene mase, kako bi

Općina Olovo, koja je uz Vareš najbogatija šumskim resursom u ovom kantonu, imala više koristi.

“Otvoreni smo da zajednički rješavamo sporna pitanja i da sa lokalnom zajednicom realizujemo projekte koji će u konačnici donijeti boljitak za privredu i građane Olova. Siguran sam da podrška ove Vlade neće izostati“, kazao je Ganić.

Premijer Ganić je izrazio nadu da će u budžetu Zeničko-dobojskog kantona biti dovoljno sredstava za razvojne projekte, te da planirane promjene u sistemu oporezivanja poreza na dohodak u FBiH neće stvoriti jaz između prihoda i rashoda, nego da će kroz rasterećenje privrede podstaći otvaranje novih radnih mjesta i povećati potrošnju.

Istakao je opredjeljenje Vlade da se kroz obezbjeđivanje značajnijeg iznosa finansijskih sredstava stvore pretpostavke za značajnija ulaganja u rekonstrukciju regionalnih puteva na području Olova, ali i drugih lokalnih zajednica u ZDK.

Također, najavio je i nove projekte podrške održivom povratku, podsjetivši da je potpisan ugovor za rekonstrukciju puta, a uskoro će Vlada odobriti sredstva za rekonstrukciju rasvjete u naselju Gurdići, tako da će samo u ovom naselju biti uloženo oko 80.000 KM.

Općinski načelnik Đemal Memagić zahvalio se Vladi ZDK na posjeti, pozdravivši opredjeljenje da se aktivno uključi u rješavanje pitanja kao i zalaganje za ravnomjeran razvoj svih općina u ovom kantonu.

Članovi Vlade su posjetili Banjsko lječilište “Aquaterm” gdje je ove godine realizirana vrijedna investicija u proširenje smještajnih kapaciteta i izgradnju zatvorenog bazena. /kraj/

180. UPRILIČEN PRIJEM ZA KOALICIJU ORGANIZACIJA OSOBA SA INVALIDITETOM ZDK

ZENICA, 09.10.2019. - Premijer Zeničko-dobojskog kantona **Mirza Ganić** primio je delegaciju Koalicije organizacija osoba sa invaliditetom ZDK u kojoj su bili **Harun Aliefendić**, predsjednik Skupštine te predsjednik i članica Upravnog odbora **Selvedin Dedić** i **Amela Šekić**. Sastanku je prisustvovala i ministrica za rad, socijalnu politiku i izbjeglice **Azra Šabanović**.



Koalicija organizacija osoba s invaliditetom formirana je 2017. godine, a okuplja 16 udruženja osoba sa invaliditetom sa područja ZDK. Nastala je kao potreba da se na adekvatan način odgovori na potrebe osoba s invaliditetom u našem kantonu, kao i potrebe davanja smjernica za implementaciju Strategije u oblasti invalidnosti u FBiH.

Predstavnici Koalicije upoznali su premijera Ganića i ministricu

Šabanović s radom i realiziranim aktivnostima na provedbi Akcionog plana iz oblasti invalidnosti za period 2016. - 2018. godina, založivši se za izradu novog akcionog plana kojim bi se trebale definirati aktivnost na unapređenju položaja osoba sa invaliditetom. Također, ukazali su i na neriješeno pitanje reprezentativnosti na nivou FBiH, kao i problem nedostatka prostora za rad u Zenici.

Izrazili su zahvalnost Vladi Zeničko-dobojskog kantona na kontinuiranoj podršci, kao i zbog činjenice da je Koalicija jedna od sedam nevladinih organizacija kantonalnog karaktera kojima je u 2019. odobrena finansijska pomoć iz budžeta ZDK za realizaciju programa rada.

Premijer Ganić je najavio nastavak podrške, kao i pomoć Vlade u rješavanju aktuelnih problema, kako bi se osobama sa invaliditetom olakšala svakodnevica i omogućili bolji uslovi za život. /kraj/

181. MINISTARSTVO ZDRAVSTVA ZDK POTPISALO SPORAZUM O SARADNJI SA TURSKOM GRUPACIJOM MLP CARE



ZENICA, 11.10.2019. - Delegacija Ministarstva zdravstva i Zavoda zdravstvenog osiguranja Zeničko-dobojskog kantona boravila je u zvaničnoj posjeti najvećoj turskoj zdravstvenoj grupaciji MLP Care, koja ima 31 bolnicu u tri koncepta - **Medical Park, Liv Hospital i VM Medical**

Park, kao i Univerzitet **Istinye**, uz afilijacije sa još dva univerziteta - **BAU Tip Bahcesehir i Altinbas**.

Tom prilikom je potpisan sporazum o saradnji, s ciljem stručnog usavršavanja zdravstvenih radnika te razmjene znanja i iskustava. Pored toga planirana je saradnja između fakulteta, kao i razmjena profesora i studenata.

*"Smatramo da je ovaj sporazum značajan iskorak u razvoju zdravstvenog sistema, te nastojanju poboljšanja usluga korisnicima zdravstvene zaštite u ZDK", kazao je ministar zdravstva **Adnan Jupić**. /kraj/*

182. ODOBRENO 149.800 KM PODSTICAJA U OBLASTI POLJOPRIVREDE

ZENICA, 11.10.2019. - Na prijedlog Ministarstva za poljoprivredu, vodoprivredu i šumarstvo, Vlada Zeničko-dobojskog kantona donijela je više odluka o odobravanju sredstava podsticaja u oblasti poljoprivrede, u ukupnom iznosu od 149.800 KM.



Za podršku projektima u oblasti pčelarstva sredstva odobreno je ukupno 35.000 KM, a sredstva su dobila udruženja pčelara "Pčela"

Nemila-Zenica (3.000), "Pčelar" Zavidovići (3.000), "Maglaj" Maglaj (3.000), "Polen" Vareš (3.000), "API ZE" Zenica (3.000), "Bagrem" Kakanj (3.000), "Žepče" Žepče (3.000), Savez pčelara ZDK (3.000), "Matica" Kakanj (3.000), "Eko pčela" Zenica (2.500), "Bor" Olovo (2.500), "Matica - ANA ARI" Žepče (2.000) i „Lipa“ Doboj Jug (1.000).

Sredstva za podršku razvoju u poljoprivrednoj proizvodnji i unapređenje uzgoja divljači, u ukupnom iznosu od 13.000 KM, dobili su Udruženje poljoprivrednika ZDK (3.500), Lovačko društvo "Srndać" Kakanj (2.000), Lovačka organizacija "Orlovik" (2.000), Udruženje proizvođača jagodičastog voća "Vi-Plod" Visoko (1.500), Udruženje građana poljoprivrednih proizvođača "Agro-Liješnica" Maglaj (1.000), Udruženje građana pčelara "Bagrem" Kakanj (1.000), Udruženje poljoprivrednih proizvođača "Oranica" Kakanj (1.000) te Udruženje žena "Kovači" Zavidovići i Udruženje poljoprivrednih proizvođača "Doglodi Šerići" kojima je odobreno po 500 KM.

Za podršku organizaciji sajмова i izložbi u oblasti poljoprivrede u ovoj godini odobreno je 25.000 KM, od čega 10.000 KM Udruženju poljoprivrednih proizvođača u ZDK za organizaciju Sajma poljoprivrednih proizvoda u Zenici, 5.000 KM Gradu Visoko za organizaciju Izložbeno-prodajnog sajma domaćih i poljoprivrednih proizvođača i prerađivača "Jesen u Visokom", po 2.000 KM za organizaciju Izložbe sitnih životinja Zenica 2019, Sajma maline i meda u Žepču, Sajma pčelarstva u Tešnju i 4. Kongresa pčelarstva i pčelinjih proizvoda Sarajevo, dok je po 1.000 KM odobreno organizatorima Sajma domaćih poljoprivrednih proizvoda Zavidovići 2019 i 20. Međugradske izložbe sitnih životinja Tešanj.

Za nabavku sadnog materijala za pošumljavanje šumskog zemljišta u privatnom vlasništvu odobreno je 30.000 KM, dok je 19 poljoprivrednih proizvođača dobilo 24.045 KM podsticaja za nabavku poljoprivredne mehanizacije.

Općini Kakanj odobreno je 15.000 KM za izvođenje dodatnih radova na uređenju korita rijeke Zgošće, s ciljem zaštite vodozahvata "Pitka voda", a Kantonalnoj upravi za šumarstvo odobreno je 7.755 KM za ugradnju plina u terenska motorna vozila kojima raspolaže ova uprava. /kraj/

183. POSAO I EGZISTENCIJA ZA DJECU ŠEHIDA I POGINULIH BORACA

ZENICA, 14.10.2019. - Vlada Zeničko-dobojskog kantona nastavlja s projektima dobre prakse čiji je cilj zapošljavanje djece šehida i poginulih boraca. I ove godine, kao i prethodne dvije, Ministarstvo za boračka pitanja ZDK će izdvojiti iznos od 100.000 KM koji će udružiti sa Federalnim zavodom za zapošljavanje, tako da će za ovu svrhu u ZDK-u u 2019. godini na raspolaganju biti 200.00 KM.



Vlada ZDK je na posljednjoj sjednici donijela zaključak o odobravanju učešća i izdvajanju sredstava te ovlastila ministra za boračka pitanja **Fahrudina Čolakovića** da potpiše sporazum o učešću Zeničko-dobojskog kantona sa Federalnim zavodom za zapošljavanje te Službom za zapošljavanje ZDK, kao nosioca aktivnosti u ovom kantonu.

*"Pored zapošljavanja kod poslodavaca, novina je da će djeca šehida i poginulih boraca od ove godine imati podršku da kroz program samozapošljavanja otvore vlastiti biznis. Na taj način se podstiče privredni rast u kantonu, tako da je riječ o obostranoj koristi. Želim da se zahvalim predstavnicima Federalnog zavoda za zapošljavanje za učešće u jednom ovakvom programu te naglasim da će Ministarstvo za boračka pitanja i Vlada, na čelu s premijerom **Mirzom Ganićem**, ostati posvećeni rješavanju egzistencijalnih pitanja boračke populacije", rekao je ministar Čolaković.*

Federalni zavod za zapošljavanje ovaj projekt u saradnji sa kantonima realizira od 2016. godine, a projekt se pokazao vrlo uspješnim, jer se kroz direktno zapošljavanje i putem javnog zagovaranja promovišući pozitivnu praksu, u protekle četiri godine značajno smanjio broj nezaposlene djece šehida i poginulih boraca u FBiH. /kraj/

184. VLADA ZDK POKROVITELJ SAJMA POLJOPRIVREDNIH PROIZVODA U ZENICI

ZENICA, 15.10.2019. - Udruženje poljoprivrednika Zeničko-dobojskog kantona organizator je 9. Sajma poljoprivredne i organske proizvodnje i etno-narodnog stvaralaštva OPEN's koji će se od 17. do 19. oktobra održati na Trgu Alije Izetbegovića u Zenici. Pokrovitelji sajma su Vlada Zeničko-dobojskog kantona i Grad Zenica, a očekuje se učešće oko 100 izlagača iz cijele Bosne i Hercegovine.



Ministar za poljoprivredu, vodoprivredu i šumarstvo ZDK **Mirnes Bašić** kazao je na press konferenciji kako je podrška organizaciji sajмова jedna od 28 politika podsticaja Vlade ZDK u oblasti poljoprivrede. Od ukupno 35.000 KM za podršku sajmovima u 2019. godini, za sajam OPEN's je opredijeljeno 10.000 KM.

"Sajam poljoprivrednih

proizvoda u Zenici je kruna svih sajmovi koji se organiziraju po lokalnim zajednicama u Zeničko-dobojskom kantonu. Podržavamo ovu priču jer je naš cilj da promoviramo te pomognemo našim poljoprivrednim proizvođačima da uspostave saradnju i razmijene iskustva te da, na kraju krajeva, prodaju svoje proizvode", kazao je ministar Bašić.

Vlada ZDK je za podsticaje u poljoprivredi ove godine opredijelila 3 miliona KM, a mjere podsticaja u značajnoj mjeri su usaglašene sa Udruženjem poljoprivrednika ZDK, sa kojim resorno ministarstvo ima odličnu saradnju.

Ministar Bašić ističe kako je podrška domaćoj proizvodnji i jačanje ekonomskog patriotizma zajednički cilj države i proizvođača, a što potvrđuje i slogan manifestacije „Hoću samo domaće“.

„Sajmovi su u prednosti u odnosu na moderne tehnologije i internet, jer ne možemo osjetiti kvalitet proizvoda dok ih ne probamo. Pozivam građane da dođu na sajam i kupovinom kvalitetnih proizvoda podrže domaće poljoprivredne proizvođače", kazao je Bašić. /kraj/

185. VLADA ZDK FINANSIRA OSAM VODNIH PROJEKATA NA PODRUČJU GRADA ZENICE

ZENICA, 16.10.2019. - Ministarstvo za poljoprivredu, šumarstvo i vodoprivredu Zeničko-dobojskog kantona pokrenulo je postupak javne nabavke za izbor izvođača radova za izgradnju/rekonstrukciju vodnih objekata na području grada Zenice, koji će se financirati iz sredstava vodnih naknada za 2019. godinu.



Radi se o osam projekata ukupne vrijednosti 683.700 KM, bez uračunatog PDV-a, a procijenjena vrijednost po pojedinačnim lotovima iznosi: LOT-1 "Regulacija potoka Baretnjak" 85.470,00 KM, LOT-2 "Izgradnja razvodne mreže vodovoda Briznik" 145.299,00 KM, LOT-3 "Rekonstrukcija vodovoda Gladovići" 68.376,00 KM, LOT-4 "Kanalizacija Gornja Zenica MZ Gornja Zenica" 128.205,00 KM, LOT-5 "Kanalizacija Perin Han - MZ Perin Han" 68.376,00 KM, LOT-6 "Kanalizacija Putovići" 51.282,00 KM, LOT-7 "Rekonstrukcija vodovoda Vukotići"

59.829,00 KM i LOT- "Regulacija Ciganskog potoka – Stranjani" 76.923,00 KM.

*"Izvođač će biti izabran putem otvorenog postupka. Ubrzo očekujemo početak radova na ovim projektima koji su vrlo značajni za navedene mjesne zajednice na području grada Zenice", kazao je ministar za poljoprivredu, šumarstvo i vodoprivredu **Mirnes Bašić**. /kraj/*

186. SVEČANO OBILJEŽEN ZAVRŠETAK REKONSTRUKCIJE PŠ SKENDER KULENOVIĆ KLOPČE U ZENICI

ZENICA, 16.10.2019. - U Područnoj školi "**Skender Kulenović**" Klopče u Zenici priređena je svečanost povodom završetka rekonstrukcije prostorija škole, koju su zajednički finansirali Turska vojna misija u BiH, Ministarstvo za obrazovanje, nauku, kulturu i sport ZDK i donator iz Holandije. Svečanu vrpcu su presjekli ministar **Spahija Kozlić** i komandant Turske vojne misije u BiH **Ali Tanış**.



Ukupna vrijednost radova je 220.000 KM, od čega je Vlada ZDK osigurala 60.000 KM. Školska zgrada je dobila novi krov i krovnu izolaciju, prozore, termoizolacionu fasadu, pristupne staze i centralno grijanje, a u završnoj fazi je rekonstrukcija školskog igrališta.

"Ministarstvo za obrazovanje, nauku, kulturu i sport će nastaviti podržavati ovakve i slične projekte, jer je unapređenje uslova za boravak i odvijanje nastavnog procesa prioritet ove vlade", kazao je ministar Kozlić.
/kraj/

187. PREMIJER GANIĆ UPRIILIČIO PRIJEM ZA AMELA TUKU



ZENICA, 17.10.2019. - Premijer Zeničko-dobojskog kantona **Mirza Ganić** i ministar za obrazovanje, nauku, kulturu i sport Spahija Kozlić upriličili su prijem za atletičara **Amela Tuku**, osvajača srebrene medalje u utrci na 800 metara na Svjetskom atletskom prvenstvu u Dohi.

Tuka se ovom prilikom zahvalio Zeničko-dobojskom kantonu na podršci, posebno na samom početku karijere, kao i podršci koju pružaju njegovim kolegama te drugim sportistima.

"Nadam se da ćemo i dalje imati podršku, u skladu sa ostvarenim rezultatima, jer za ostvarivanje vrhunskih rezultata moramo imati i vrhunske uslove, što iziskuje i veće troškove. Pogotovo se želim zahvaliti za podršku Međunarodnom atletskom mitingu Zenica koji će iduće godine doživjeti svoje deseto izdanje, a na kojem atletičari imaju priliku trčati pred svojom publikom", kazao je Tuka.

Suad Kaknjo, predsjednik Atletskog kluba Zenica i potpredsjednik Atletskog saveza BiH istakao je kako je srebro sa Svjetskog atletskog prvenstva u Dohi najveći sportski uspjeh u poslijeratnoj Bosni i Hercegovini.

Premijer Ganić je izrazio zadovoljstvo uspjehom najboljeg bh. atletičara koji je opravdao podršku pružanu od početka karijere. Vlada je pomogla izgradnju zeničkog Atletskog stadiona sa 50.000 KM, za Međunarodni atletski miting u Zenici je izdvojila 55.000 KM, a stipendira i 10 - 15 vrhunskih sportista iz ZDK.



"Konstatirali smo da je ovo bila jedna vrijedna "investicija" koja je učinila ponosnim sve građane BiH", kazao je Ganić.

Za osvojeno srebro u Dohi Vlada je Tuki odobrila novčanu nagradu u iznosu od 5.000 KM, te dodatnih 5.000 KM za organizaciju dočeka na Atletskom stadionu u Zenici. /kraj/

188. KONTINUIRANA PODRŠKA VLADE ZDK: SAJAM OPEN'S OKUPIO 100 IZLAGAČA IZ CIJELE BIH



ZENICA, 17.10.2019. - U Zenici je danas svečano otvoren 9. Sajam poljoprivrede i organske proizvodnje i etno-narodnog stvaralaštva OPEN's Zenica 2019, koji je okupio 100 izlagača iz cijele Bosne i Hercegovine. Organizator trodnevnog sajma je Udruženje poljoprivrednika u Zeničko-dobojskom kantonu, a pokrovitelji Ministarstvo za poljoprivredu, šumarstvo i vodoprivredu ZDK i Grad Zenica.

Obraćajući se okupljenima, premijer **Mirza Ganić** je istakao

kako Vlada podržava sajam OPEN's od početka kao generalni pokrovitelj, te da sajam predstavlja svojevrsnu smotru poljoprivredne i organske proizvodnje u ovom dijelu BiH.

"Poljoprivredna i organska proizvodnja je izuzetno značajna privredna grana u kojoj egzistenciju ostvaruje veliki broj porodica u našem kantonu. U peradarstvu i malinarstvu držimo leadersku poziciju, bilježimo sve snažniji rast plasteničke proizvodnje, a to je dobrim dijelom i rezultat Vladine politike podsticaja u poljoprivredi", kazao je Ganić.

Vlada ZDK je kroz 28 podsticajnih politika za podsticaje poljoprivredi ove godine iz budžeta izdvojila 3 miliona KM.

"Na tom kursu ćemo ostati i ubuduće, kako bismo našim poljoprivrednim proizvođačima dali snagu da povećaju proizvodnju, ojačaju tržišnu poziciju te zauzmu dominantno mjesto na trgovačkim policama i našim trpezama. Nadam se da smo svi postali svjesni da zaista moramo kupovati i koristiti domaće zdravu hranu, a za bolje sutra domaće privrede i ekonomije BiH", istakao je premijer ZDK.



U okviru sajma sutra će se u sjedištu Zeničko-dobojskog kantona održati okrugli sto o perspektivama poljoprivrede i organske proizvodnje u BiH. /kraj/

189. VLADA GRADU VISOKO PRENOSI SREDSTVA ZA IZGRADNJU REZERVOARA DUBRAVE



ZENICA, 21.10.2019. - Vlada Zeničko-dobojskog kantona dala je saglasnost Ministarstvu za poljoprivredu, šumarstvu i vodoprivredu da na grad Visoko prenese sredstva u iznosu od 480.000 KM planirana u Programu utroška sredstava vodnih naknada za 2019. godinu za realizaciju projekta "Izgradnja rezervoara Dubrave".

Na taj način će se JKP "Visoko" d.o.o. Visoko, kao implementatoru projekta, omogućiti provođenje tenderske procedure u skladu s pravilima EBRD-a, kod kojeg će se putem kredita osigurati drugi dio sredstava.

Za projekte na području grada Visoko ove godine je iz budžeta Zeničko-dobojskog kantona izdvojeno ukupno 930.789,19 KM. Pored projekta "Izgradnja vodovoda Dubrave", finansiraju se i nezavršeni projekti "Regulacija Muhašinovičkog potoka" (271.158,13 KM), "Rekonstrukcija vodovodne i kanalizacione mreže s kolektorom u ulici Mladih Muslimana" (83.483,06 KM), "Izgradnja kanalizacionog sistema u Gornjim Porječanima" (91.000,00 KM) te projekt "Utvrdjivanje vodnog dobra na rijeci Fojnici" (5.148,00KM). /kraj/

190. ODOBRENO 282.000 KM ZA PROJEKTE IZGRADNJE I OBNOVE JAVNE TURISTIČKE INFRASTRUKTURE U ZDK

ZENICA, 28.10.2019. - Na prijedlog Ministarstva za privredu, Vlada Zeničko-dobojskog kantona donijela je odluku o odobravanju finansijskih sredstava namijenjenih subvencioniranju projekata izgradnje i obnove javne turističke infrastrukture u ukupnom iznosu od 282.434,57 KM.



Sredstva je putem javnog poziva dobilo 12 subjekata sa područja ovog kantona: **MZ Izbod bb, Breza** (Izgradnja izletišta i poboljšanje turističke infrastrukture ponude na lokalitetu Vinca), **Ekološko udruženje Eko-Tvrtkovac Puhovac, Zenica** (Novi sadržaj u eko parku Postojan Zenica"), **Udruženje agro-etno-eko Bungalovi Menzil Kamenica, Zavidovići** (Uređenje i unaprjeđenje turističke infrastrukture u Kamenici s ciljem unaprjeđenja turizma u općini Zavidovići"), **Općina Zavidovići**

(Unaprjeđenje turističke ponude izletišta Kamenice i Spomenika prirode Tajan - Uređenje parking prostora), **Općina Olovo** (Izgradnja bungalova na izletištu Zeleni vir), **Fondacija Arheološki park Bosanska piramida Sunca Visoko** (Arheološki park Bosanska piramida Sunca), **Općina Kakanj** (Izgradnja objekta caffe bara i restorana na Ponijerima), **MZ Mrkotić Jelah, Tešanj** (Sportsko-turistički centar Mrkotić Tešanj), **Odred izviđača Visoko** (Domar domaćin), **Forum građana Zenice** (Informativno turistički punkt Kulin ban), **UG Planinarsko društvo Bobovac Kakanj** (Projekat zimske bašte na objektu planinarskog doma Bočica) te **Planinarsko društvo VIS Žepče** (Edukativno-rekreativni kompleks Matinski vis).

*"Od subvencija očekujemo značajne efekte. Odobrena sredstva će inicirati realizaciju investicija i projekata u vrijednosti od 2,6 miliona KM", kazao je ministar za privredu **Zlatko Jelić**. /kraj/*

191. Kladionice i objekti za igre na sreću moraju biti udaljeni od škola najmanje 100 metara



ZENICA, 29.10.2019. - Ministarstvo za obrazovanje, nauku, kulturu i sport Zeničko-dobojskog kantona uputilo je osnovnim i srednjim školama na području ovog kantona dopis u kojem podsjeća da kladionice i objekti u kojima se priređuju igre na sreću moraju biti udaljeni od škola najmanje 100 metara, u skladu sa odredbama Zakona o igrama na sreću i Pravilnika o prostornim, tehničkim i drugim uslovima za priređivanje igara na sreću kladenja.

"U skladu sa Zakonom o osnovnoj školi odnosno Zakonom o srednjoj školi, dužni ste, u slučaju manje udaljenosti kladionice i objekta od škole gore propisane, navedeno prijaviti nadležnim organima koji vrše nadzor nad provođenjem propisa koji reguliraju ovu oblast, tj. Federalnom ministarstvu finansija i Poreznoj upravi Federacije BiH. S obzirom na navedeno, obavezujete se na dosljedno postupanje u skladu sa propisima koji reguliraju

*ovu oblast te da o postupanju pismeno obavijestite ovaj organ kantonalne uprave", stoji u dopisu kojeg je potpisao ministar za obrazovanje, nauku, kulturu i sport ZDK, profesor **Spahija Kozlić**. /kraj/*

192. ODOBRENE JEDNOKRATNE NOVČANE NAGRADE ZA NASTAVNIKE OSNOVNIH I SREDNJIH ŠKOLA U ZDK



ZENICA, 29.10.2019. - Na prijedlog Ministarstva za obrazovanje, nauku, kulturu i sport, zaključcima Vlade Zeničko-dobojskog kantona odobrena su finansijska sredstva u iznosu od 56.254,80 KM za isplatu novčanih nagrada za po 83 nastavnika osnovnih i srednjih škola za postignute uspjehe učenika na takmičenjima u školskoj 2018/2019. godini.

Od toga, nastavnicima osnovnih škola je odobreno 26.301,45 KM, a nastavnicima srednjih škola 29.953,35 KM.

Isplata jednokratne novčane naknade nastavnicima za osvojeno 1., 2. ili 3. mjesto na kantonalnom, federalnom, državnom i međunarodnom nivou predviđena je kolektivnim ugovorima za djelatnosti osnovnog i srednjeg obrazovanja za teritorij Zeničko-dobojskog kantona.

Iznosi nagrada usklađeni su sa ostvarenim procentima i prosjekom plate za ZDK, koji je prema posljednjem objavljenom podatku Federalnog zavoda za statistiku u mjesecu junu 2019. iznosio 777,00 KM. /kraj/

193. PREMIJER GANIĆ PRIMIO KONZULA REPUBLIKE AZERBEJDŽAN ELNURA A. GULIYEVA

ZENICA, 29.10.2019. - Premijer Zeničko-dobojskog kantona **Mirza Ganić** razgovarao je danas u svom uredu sa šefom diplomatske misije Republike Azerbejdžan u Bosni i Hercegovini **Elnurom A. Guliyevim**.



Bosna i Hercegovina i Republika Azerbejdžan imaju dobru saradnju, posebice u oblasti kulture, ali je, kako je istaknuto, potrebno proširiti i jačati saradnju u oblasti ekonomije.

Konzul Guliyev je ovom prilikom uputio poziv premijeru Ganiću da političko-privredna delegacija Zeničko-dobojskog kantona posjeti Baku, kada bi se razmotrile mogućnosti saradnje u oblasti metaloprerade, drvoprerade i tekstilne industrije, podsjećajući da su u azerbejdžanskoj prijestolnici

već boravile delegacije općina Travnik i Olovo.

"U fokusu naše diplomatske misije su ekonomski odnosi, sport, kultura i humanitarne aktivnosti i na ovim poljima želimo jačati saradnju i odnose sa Bosnom i Hercegovinom", kazao je konzul Guliyev, podsjećajući da je kapital iz Azerbejdžana već prisutan u BiH kroz ulaganja u Doboju i Srebrenici, a kompanije iz te zemlje bit će angažirane na izgradnji autoputeva u BiH.

Premijer Ganić podržao je ideju o povezivanju privrednika i jačanju ekonomske saradnje, a prvi korak u tom pravcu bi bila upravo posjeta glavnom gradu Azerbejdžana.

"Želimo poduzeti konkretne korake i nadam se da će Azerbejdžan i BiH, a samim tim i Zeničko-dobojski kanton, u narednom periodu proširiti saradnju i unaprijediti međusobne odnose, na zadovoljstvo građana dvije zemlje", kazao je Ganić.

Prijemu je prisustvovao i ministar za obrazovanje, nauku, kulturu i sport Spahija Kozlić, koji je ukazao na mogućnost uspostave saradnje između pravnih fakulteta u Zenici i Bakuu, s obzirom da BiH i Azerbejdžan od 2012. godine imaju potpisan sporazum o saradnji u oblasti visokog obrazovanja. /kraj/



194. PREMIJER GANIĆ NA SVEČANOJ AKADEMIJI U BNP-U: UNZE DAJE NADU I OPTIMIZAM ZA BUDUĆNOST

ZENICA, 29.10.2019. - U Bosanskom narodnom pozorištu u Zenici održana je svečana akademija Univerziteta u Zenici povodom obilježavanja 60 godina visokog obrazovanja u Zenici. Akademiji su prisustvovali rektori svih javnih univerziteta u BiH, predstavnici univerziteta iz Srbije, Crne Gore i Hrvatske, predstavnici diplomatskog kora, izvršne i zakonodavne vlasti, privrede i vjerskih zajednica.



Prisutne je u ime osnivača Univerziteta u Zenici pozdravio premijer Zeničko-dobojskog kantona **Mirza Ganić** koji je rekao kako *"postojanje visokog obrazovanja i Univerziteta u Zenici daje nadu i optimizam da naš kanton i naša zemlja imaju budućnost"*.

"Ja to istinski osjećam kada pogledam sve vas ovdje, jer vaši studenti će sutra naslijediti nas na našim radnim mjestima, društvenim aktivnostima i na svim poljima života i rada", kazao je Ganić.

Razvoj visokog obrazovanja u Zenici pratio je razvoj privrede kroz otvaranje tehničkih fakulteta, Metalurškog i Mašinskog, koji su dugo bili u sastavu Univerziteta u Sarajevu, i zajedno sa Metalurškim institutom bili okosnica privrede i industrije Zenice i BiH, u periodu nakon Drugog svjetskog rata i u SR BiH. Novim ustavnim uređenjem BiH rodila se ideja o zeničkom univerzitetu koja je realizirana odlukom Skupštine ZDK 2000. godine, a četiri godine kasnije Univerzitet u Zenici je počeo s radom.

"U vremenu nakon agresije osnivanje Univerziteta u Zenici je omogućilo mladim ljudima iz Zenice, drugih općina ZDK i šireg okruženja, da dobiju priliku da studiraju po znatno povoljnijim uslovima. Izgrađena je nova zgrada Ekonomskog i pravnog fakulteta, a izgradnju je finansirala Vlada Zeničko-dobojskog kantona zajedno sa donatorima, kojima se ovom prilikom posebno zahvaljujemo. Vlada neće stati na ovome, nego ćemo i dalje stvarati bolje infrastrukturne uslove za studiranje", kazao je Ganić.

Premijer ZDK je istakao kako je ponosan što je Univerzitet u Zenici iznjedrio veliki broj diplomanata, magistranata i doktora nauka, kao i zbog činjenice da se u Zenici dosljedno implementira Bolonjska deklaracija, za što posebne zasluge pripadaju predavačima i profesorima.

U sastavu Univerziteta u Zenici djeluje osam fakulteta, Metalurški institut "Kemal Kapetanović" i Studentski centar u Zenici, a na 30 studijskih programa prvog i drugog ciklusa studira 5.000 studenata iz cijele BiH.

Na svečanoj akademiji promovirani su i počasni doktori Univerziteta u Zenici - bh. oskarovac **Danis Tanović** i norveški filozof **Arne Johan Vetlesen**, a istaknutim studenticama i studentima dodijeljene su nagrade rektora. /kraj/

195. UPRIILIČEN PRIJEM ZA ZLATNU STUDENTICU AMNU MUHAMEDOVIĆ IZ MAGLAJA

ZENICA, 30.10.2019. - Premijer Zeničko-dobojskog kantona **Mirza Ganić** primio je u svom uredu **Amnu Muhamedović** iz Maglaja, koja je Pravni fakultet u Sarajevu završila sa prosjekom deset. Amna je prva studentica sarajevskog Pravnog fakulteta koja je na kraju dodiplomskog studija u indeksu imala upisanih 49 "desetki".

Mlada Maglajka je rekla kako će njen uspjeh biti opravdan ako ostvari dva cilja - prvi je da radi ono što voli, a drugi da joj to donosi dobit. Želja joj je baviti se advokaturom, ali će o tome razmišljati tek nakon završetka master studija.



Čestitajući postignuti uspjeh, premijer Ganić je podsjetio da su ovakvi prijemi redovna praksa

Vlade, istakavši zadovoljstvo što je sugrađanka iz Zeničko-dobojskog kantona postigla uspjeh zbog kojeg će njeno ime biti upisano velikim slovima na Pravnom fakultetu u Sarajevu.

"Naš primarni cilj je da drugima pošaljemo poruku da se rad i trud uvijek isplate. Za društvo je najbolja opcija da najuspješniji studenti ostanu vezani za fakultete, kao budući asistenti i profesori, ali ćemo biti sretni i ako nastavite karijere u javnom ili privatnom sektoru, jer će vaše znanje i upornost sigurno donijeti kvalitet gdje god dođete", kazao je Ganić.

Čestitke mladoj pravnici uputio je i ministar za obrazovanje, nauku, kulturu i sport Spahija Kozlić, rekavši da "sve desetke nipošto ne mogu biti slučaj" te da je to uspjeh koji najavljuje jednu blistavu karijeru.

Vlada Zeničko-dobojskog kantona će Amni Muhamedović na idućoj sjednici odobriti i prigodnu novčanu nagradu. /kraj/

196. ODOBRENA POMOĆ ZA SANACIJU POSLJEDICA PRIRODNIH NESREĆA U ZAVIDOVIĆIMA, OLOVU I DOBOJ JUGU

ZENICA, 31.10.2019. - Na prijedlog Kantonalne uprave civilne zaštite, Vlada Zeničko-dobojskog kantona odobrila je sredstva u ukupnom iznosu od 162.641,99 KM za pomoć u sanaciji šteta nastalih prirodnim nesrećama na području općina Zavidovići, Olovo i Doboj Jug.



Općini Zavidovići odobreno je 100.000 KM za sanaciju infrastrukture oštećene usljed pokretanja klizišta i velikih oborinskih voda, Općina Olovo će odobrenih 55.000 KM utrošiti za sanaciju saobraćajnice na području MZ Solun koja je oštećena usljed aktiviranja klizišta, dok će Općina Doboj Jug odobrena sredstva u iznosu od 7.641,99 KM iskoristiti za izgradnju

šahta i zasuna u Novom naselju Matuzići.

Na prijedlog Kantonalne uprave civilne zaštite odobreno je 40.000 KM za nabavku vatrogasnih ljestava za potrebe Dobrovoljnog vatrogasnog društva "Vareš" iz Vareša. /kraj/

197. ZENICATRANSU NEĆE BITI ODUZETA LICENCA: SADA SU NA POTEZU GRAD ZENICA I VIJEĆNICI

ZENICA, 01.11.2019. - Na inicijativu ministra za prostorno uređenje, promet i komunikacije i zaštitu okoline ZDK **Arnela Isaka** danas je u kabinetu ministra upriličen sastanak kojem su prisustvovali ministar Isak sa saradnicima, te predstavnici Grada Zenica, Kantonalnog poreznog ureda Zenica i JKP Zenicatrans d.d. Zenica.



Tema sastanka je bilo iznalaženje rješenja za problematiku komunalnog preduzeća „Zenicatrans“, kojem je zbog neizmirenih obaveza prema Poreskoj upravi dovedeno u pitanje održavanje licence za prevozničku djelatnost.

*"S obzirom da je riječ o javnom preduzeću i javnoj komunalnoj djelatnosti u nadležnosti lokalne samouprave, Grad Zenica treba rebalansom Budžeta u što skorije vrijeme riješiti ovo pitanje i okončati problematiku opstojnosti licence za Zenicatrans. Sada je, dakle, na potezu grad Zenica i gradski vijećnici, koji će svojim odnosom prema ovoj problematici pokazati jesu li za pomoć Zenicatransu ili ne. Mi smo organiziranjem ovog sastanka na kojem smo okupili sve zainteresirane strane pokazali dobru volju za rješavanje ove problematike, a sada su na potezu Gradska uprava Zenica i vijećnici u Gradskom vijeću", kazao je nakon sastanka ministar **Arnel Isak**, dodajući da su njegov interes građani, kojima treba javni prijevoz, ali i očuvanje radnih mjesta zaposlenika preduzeća Zenicatrans. /kraj/*

198. U PROTEKLE DVIJE GODINE U OŠ U NEMILI VLADA ULOŽILA 250.000 KM

ZENICA, 01.11.2019. - Premijer Zeničko-dobojskog kantona **Mirza Ganić** i ministar za obrazovanje, nauku, kulturu i sport **Spahija Kozlić** posjetili su danas OŠ "Čamil Sijarić" Nemila. U centralnu i područne škole u protekle dvije godine uloženo je oko pola miliona maraka, od čega je oko 250.000 osigurala Vlada Zeničko-dobojskog kantona.

Izvršena je rekonstrukcija PŠ Vukotići i izgradnja novog školskog igrališta, PŠ Bistrica je dobila novi sistem centralnog grijanja, a u PŠ Gladovići je izvršena zamjena stolarije. Centralna škola u Nemili odnedavno ima novi razglas, a uz pomoć stranih donatora planirana je izgradnja novog sistema grijanja.



"Naša namjera je da sve škole u ZDK pređu sa uglja na ekološki prihvatljiva goriva. Time ćemo smanjiti trošak energije, a sredstva od ušteda možemo usmjeriti u nabavku udžbenika", kazao je ministar Kozlić.

Članovi Vlade posjetili su i STEM (Science, Technology, Engineering, Mathematics) učionicu u OŠ „Čamil Sijarić“, čije su opremanje zajedno finansirali Vlada ZDK i UNDP. Učenici stiču znanja i vještine iz oblasti robotike, programiranja i rada na micro:bit uređajima.

"To potvrđuje opredjeljenje Vlade da unapređujemo uslove za boravak i odvijanje nastavnog procesa u školama, te da omogućimo učenicima da steknu znanja koja će im biti neophodna u nastavku školovanja i karijeri", kazao je Ganić. /kraj/

199. TURSKA PREPOZNALA RAD VLADE ZDK U OBLASTI JAVNO-PRIVATNOG PARTNERSTVA

ISTANBUL, 04.11.2019. - U organizaciji Istanbuskog JPP centra izvrsnosti (Istanbul PPP CoE) i turskog Odbora za vanjske ekonomske odnose (DEIK) u Istanbulu je od 30. oktobra do 02. novembra održana 4. **Istanbulska sedmica JPP 2019 (4th Istanbul PPP Week, 2019)**. Na poziv Turske ambasade i organizatora, na prestižnom događaju su učestvovali i predstavnici Vlade Zeničko-dobojskog kantona, ministar za privredu **Zlatko Jelić** i šef Odsjeka za JPP u Ministarstvu za privredu **Dženita Hrgić**.

Događaj je organiziran u saradnji s Ministarstvom trgovine Republike Turske, DEIK-om (Odborom za vanjske ekonomske odnose) i istanbulskim PPPCoE (Istanbulskim javno-privatnim partnerskim centrom izvrsnosti), a doprinos su dali i Istanbulska privredna komora, GI Hub, IFC, Grupacija Svjetske banke, Islamska razvojna banka (IsDB), Borsa Istanbul i sveučilišta.



Glavna tema ovogodišnje Istanbulske sedmice JPP-a definirana je kao "Poticanje razvoja infrastrukture s JPP-ovima".

Glavni cilj Istanbulske sedmice JPP-a je bio okupljanje širokog spektra učesnika iz industrije javno-privatnog partnerstva. Ovaj prestižni događaj služio je kao platforma za ugledne znanstvenike, visoke vladine dužnosnike i vodeće predstavnike privatnog sektora na polju JPP-a kako bi razgovarali o izazovima, stečenim lekcijama i definirali najbolje prakse za JPP projekte širom svijeta.

Istanbul PPP Week 201. obuhvaćao je trodnevni ekskluzivni program obuke, jednodnevnu radionicu i panele na temu „Poboljšajmo PPP zajedno za bolju infrastrukturu – kako doći do globalne investicije u projektima JPP, faze pripreme projekata za JPP“, jednodnevnu prezentaciju PPP projekata zemalja učesnica i jednodnevni posjetu završenim projektima JPP-a u Turskoj.

Na 4. Istanbulskoj sedmici JPP 2019 pored predstavnika Zeničko-dobojskog kantona, kao jedinog predstavnika iz Bosne i Hercegovine, učestvovali su predstavnici iz još 34 zemlje - Turske, Afganistana, Albanije, Argentine, Australije, Azerbejdžana, Bjelorusije, Brazila, Bugarske, Kameruna, Češke, Estonije,



Francuske, Njemačke, Iraka, Kazahstana, Kosova, Kirgistana, Mauritanije, Maroka, Sjeverne Makedonije, Nigerije, Pakistana, Rumunije, Srbije, Južnoafričke Republike, Tunisa, Ujedinjenih Arapskih Emirata, Ukrajine i Sjedinjenih Američkih Država.

Predstavnici Vlade Zeničko-dobojskog kantona i Ministarstva za privredu su učesnicima prezentirali JPP model u Zeničko-dobojskom kantonu, zakonski okvir JPP-a, Katalog potencijalnih JPP projekata Zeničko-

dobojskog kantona, te dostupne sektore i projekte za investiranje privatnog sektora po modelu JPP-a.

Na ovaj način i ostvarenim kontaktima sa predstavnicima drugih država, privatnih kompanija, konsalting agencija i drugih sudionika, promovirane su aktivnosti javnih tijela sa područja Zeničko-dobojskog kantona u primjeni modela JPP-a, potencijalni projekti za investiranje i kreirane daljnje mogućnosti za saradnju i unapređenje provedbe JPP-a i primjenu dobre prakse. /kraj/

200. PREMIJER GANIĆ NA OTVARANJU SAJMA U VISOKOM: POLJOPRIVREDA JE JEDAN OD PRIORITETA VLADE ZDK

VISOKO, 04.11.2019. - Visoko je iduća tri dana domaćin 15. Izložbeno-prodajnog sajma poljoprivredno-prehrambenih proizvoda "Jesen u Visokom" koji je okupio 85 izlagača iz 35 gradova i općina u Bosni i Hercegovini. Organizator sajma je Grad Visoko, a generalni pokrovitelj Ministarstvo za poljoprivredu, šumarstvo i vodoprivredu Zeničko-dobojskog kantona.



U ime Vlade Zeničko-dobojskog kantona, otvaranju sajma su prisustvovali premijer **Mirza Ganić**, ministar za poljoprivredu, šumarstvo i vodoprivredu ZDK **Mirnes Bašić** i ministar unutrašnjih poslova **Dario Pekić**.

Obraćajući se zvanicama i građanima, premijer Ganić je istakao kako je razvoj poljoprivrede jedan od prioriteta ove vlade, te da je zahvaljujući snažnom programu podsticaja Zeničko-dobojski kanton lider u malinarskoj i peradarskoj proizvodnji, a značajan

rast bilježi i sektor plasteničke proizvodnje, posebno u Visokom.

Kroz 28 podsticajnih politika, Vlada ZDK je u 2019. godini za poljoprivredu izdvojila 3 miliona KM. U korištenju podsticaja u značajnoj mjeri učestvuju i poljoprivredni proizvođači iz Visokog, koji su samo u toku 2018. godine iz budžeta Zeničko-dobojskog kantona dobili podsticaje u iznosu od 840.000 KM.

"Nama u Vladi ZDK je razvoj poljoprivrede od posebnog interesa, jer su zelena polja osnova našeg zdravog života, a poljoprivreda jedna od bazičnih grana naše privrede. Kupujmo i koristimo domaće poljoprivredne proizvode jer samo tako možemo osigurati razvoj naše poljoprivrede", kazao je Ganić.

Prvi sajam organiziran je 2004. godine, okupljajući proizvođače suhomesnatih proizvoda, po čemu je grad Visoko nadaleko poznat, a vremenom se širio i okupljao sve veći broj proizvođača iz poljoprivredno - prehrambenog sektora, da bi izrastao u jedan od najprepoznatljivijih poljoprivrednih sajmova u ovom dijelu BiH. /kraj/



201. ATLETSKA SELEKCIJA ZDK POTVRDILA DOMINACIJU U INVALIDSKOM SPORTU

ZENICA, 06.11.2019. - Premijer Zeničko-dobojskog kantona **Mirza Ganić** sa saradnicima upriličio je prijem za članice Udruženja paraplegičara i oboljelih od dječije paralize Zenica koje su ove godine postigle zapažene uspjehe na sportskim takmičenjima u BiH i inozemstvu.



Naročito uspješni su bili na 16. Atletskim igrama i prvenstvu u šahu paraplegičara i oboljelih od dječije paralize BiH sa međunarodnim učešćem te 9. Međunarodnim igrama paraplegičara i oboljelih od dječije paralize, održanim u Zenici, gdje su atletske ekipe iz ZDK ponovo pokazale dominaciju u ovom sportu.

Nakon što je u avgustu u Srbiji osvojila titulu evropske prvakinja u ronjenju na dah, **Ljilja Slišković** je u Zenici osvojila tri prva mjesta u kategorijama kugla, disk i koplje. **Samira Đidić** osvojila je prvo i drugo mjesto u kategorijama čunj i disk, dok je mlada **Sajra Poljo** osvojila po jedno treće i drugo mjesto. U muškoj konkurenciji posebno su se istakli **Marinko Jukić**, koji je osvojio dva zlata i jedno srebro, te **Mujo Adilović** sa osvojenom jednom zlatnom i dvije srebrene medalje.

"Naša atletska selekcija je najbolja u Federaciji BiH već 15 godina. Najbolji smo zato što smo najmasovniji i što nam je omogućeno da se puno ljudi, osoba sa invaliditetom, kroz određenu vrstu inkluzije bavi atletikom. To ne bi bilo moguće bez privrženosti i senzibilitetu Vlade ZDK u kontinuiranoj podršci



invalidskom sportu ali i uopće promoviranju prava osoba sa invaliditetom", kazao je **Harun Aliefendić**, predsjednik UO Udruženja paraplegičara i oboljelih od dječije paralize Zenica.

Premijer Ganić je potvrdio opredjeljenje Vlade da kroz razne vidove podrške omogući osobama sa invaliditetom potpuno integriranje u društvo.

"Raduje me da smo zajedno uspjeli unaprijediti kvalitet života ne samo osoba sa invaliditetom koje se bave

sportom, nego cjelokupne populacije osoba sa invaliditetom", kazao je Ganić, najavivši da će Vlada odobriti konkretnu novčanu nagradu za postignute uspjehe.

Prijemu su prisustvovali ministrica za rad, socijalnu politiku i izbjeglice **Azra Šabanović** i ministar za obrazovanje, nauku, kulturu i sport **Spahija Kozlić**, koji su, uz čestitke gostima, najavili dalju podršku radu ovog udruženja. /kraj/

202. PRIJEM ZA TAKMIČARE KK GARD ZENICA: NA SP U NJEMAČKOJ OSVOJILI DEVET MEDALJA

ZENICA, 08.11.2019. - U Vladi Zeničko-dobojskog kantona upriličen je prijem za trenera i članove **Karate kluba "Gard" Zenica**, koji je ostvario sjajan rezultat na Svjetskom prvenstvu u okviru Svjetske Fudokan federacije održanom od 1. do 3. novembra u Stuttgartu u Njemačkoj. Takmičari "Garda" okitili su se sa čak devet od ukupno 18 medalja koliko je osvojila reprezentacija Bosne i Hercegovine u konkurenciji oko 2.500 takmičara iz 40 zemalja.

Nirhad Mašić odbranio je prošlogodišnje svjetsko zlato iz Rumunije i u ukupnom poretku u reprezentaciji osvojio dvije zlatne medalje, dok se **Naim Mandžuka** iz Begovog Hana okitio zlatom ekipno u kategoriji U-21 mlađi seniors i bronzom u istoj kategoriji pojedinačno. Medalje su još osvojili takmičari ovog kluba **Zeid Muratović, Meris Mahmić, Harun Orlić, Davud Bašić i Hamza Grahić.**



Uputivši čestitke karatistima i treneru **Adisu Orliću**, premijer

Mirza Ganić je rekao kako su ovakvi prijemi način da se mladima pošalje poruka da se trude, rade i stvaraju, a vlada će naći načina da podrži sport i uspješne pojedince.

"Vaš rezultat je tim veći ako se zna u kakvoj konkurenciji ste osvojili medalje. Veliki je uspjeh biti najbolji u svojoj zemlji, a posebice na međunarodnom nivou. Hvala vam što ste u najboljem svjetlu predstavili vaš kanton i domovinu BiH", kazao je premijer Ganić.

Trener i članovi KK "Gard" zahvalili su se institucijama Zeničko-dobojskog kantona na podršci radu ovog kluba, a posebno za odobrena finansijska sredstva za pokriće troškova odlaska na SP u Njemačkoj.

Od klubova iz Zeničko-dobojskog kantona uspješan nastup imali su i članovi KK "Visoko", a medalje su osvojili **Ejman Dišalari, Mirza Kaplan i Naidin Mlivić.**

Prijemu su prisustvovali predsjedavajući Skupštine **Čazim Huskić** i ministar za obrazovanje, nauku, kulturu i sport **Spahija Kozlić**, koji su potvrdili opredjeljenje institucija Zeničko-dobojskog kantona da nastave podržavati sport i uspješne sportiste, posebice osvajače medalja i odličja na međunarodnim takmičenjima.

Tokom prijema je najavljeno da će Vlada odobriti novčane nagrade svim takmičarima iz Zeničko-dobojskog kantona koji su osvojili medalje. /kraj/

203. ZAVRŠENO ANDRAGOŠKO OSPOSOBLJAVANJE PRVE GRUPE POLAZNIKA PO JAVNO VAŽEĆEM PROGRAMU U BIH

ZENICA, 08.11.2019. - Svečanim uručjenjem certifikata završeno je andragoško osposobljavanje prve grupe polaznika koji su prošli obuku po važećem programu u Zeničko-dobojskom kantonu, što je ujedno i prvo andragoško osposobljavanje po javno-važećem programu u Bosni i Hercegovini.



Obuku je prošlo 19 predstavnika Univerziteta u Zenici, srednjih škola, Ministarstva za obrazovanje, nauku, kulturu i sport te Pedagoškog zavoda Zeničko-dobojskog kantona, a u narednih desetak dana planiran je završetak obuke za drugu grupu od 24 polaznika.

Ministarstvo za obrazovanje, nauku, kulturu i sport ZDK donijelo je program "Osnovna andragoška obuka" kao program neformalnog obrazovanja od posebnog interesa za Zeničko-dobojski kanton, koji implementira u saradnji sa Pedagoškim zavodom ZDK, a uz stručnu i finansijsku podršku njemačke organizacije DVV International - Ured za Bosnu i Hercegovinu, na osnovu ranije potpisanog memoranduma o saradnji.

Program je obuhvatio interaktivnu obradu četiri tematske cjeline, kao obavezna modula: Učenje odraslih - psihološke osnove, karakteristike, stilovi učenja, Komunikacija, grupna dinamika i upravljanje

obrazovnom grupom, Vizualizacija i prezentacija u obrazovnom radu sa odraslima te Interaktivne metode obrazovanja odraslih.



*"Radili smo dosta uspješno nekoliko mjeseci. Očekujem da će znanja i vještine koje su polaznici stekli koristiti u budućem radu, posebice u domeni obrazovanja, kako u srednjim školama tako i univerzitetima", kazao je ministar za obrazovanje, nauku, kulturu i sport **Spahija Kozlić**.*

Obuka je počela u junu ove godine, a realizirana je u pet višednevnih termina u ukupnom trajanju od 120 sati. Polaznici su stečene kompetencije pokazali pred supervizorima prof.dr.

Šefikom Alibabić sa Filozofskog fakulteta u Beogradu i dr.sc. **Emirom Avdagićem**, direktorom DVV International u BiH i prvim doktorom andragoških nauka u Bosni i Hercegovini.

"Raduje me što će ovaj kanton biti bogatiji za 44 nastavka kadra koji su dodatno andragoško i didaktički osposobljeni za rad sa mladim i odraslim ljudima", kazao je Avdagić. /kraj/

204. IZVOĐENJE PRAKTIČNE NASTAVE U PRIVREDNIM SUBJEKTIMA OMOGUĆILO 12 ŠKOLA U ZDK

ZENICA, 11.11.2019. - Od početka nove školske godine, 12 od ukupno 16 srednjih mješovitih i tehničkih škola u Zeničko-dobojskom kantonu zaključilo je ugovore sa privrednim subjektima o izvođenju praktične nastave izvan škola, a u skladu sa novim pravilnikom čija je primjena počela u školskoj 2019/2020. godini.



Prema podacima Ministarstva za obrazovanje, nauku, kulturu i sport, praktičnu nastavu u 297 privrednih subjekata izvodi 1.292 učenika, među kojima su medicinske sestre/tehničari (347), fizioterapeuti (119), automehaničari (98), hotelsko-turistički tehničari (86), frizeri (85), kuhari (44), CNC operateri (37), trgovci (33), zavarivači (32) i druga zanimanja.

Pravilnik o utvrđivanju uslova za izvođenje praktične nastave izvan škole pripremljen je u saradnji sa Privrednom komorom Zeničko-dobojskog kantona, poslodavcima i sindikatima, a njime se značajno unapređuje oblast izvođenja praktične nastave. Predviđeno je da se efekti primjene ovog dokumenta analiziraju nakon godinu dana te eventualno korigiraju u skladu sa zahtjevima partnera.

*"Edukacija je jedan kontinuiran postupak, a obrazovne ustanove trebaju da ispune očekivanja i zahtjeve zajednice, u ovom slučaju i privrednih subjekata. Koordinacijom ministarstva, odnosno obrazovnih vlasti i zajednice možemo postići bolje efekte", kazao je ministar prof.dr. **Spahija Kozlić** na pres konferenciji na kojoj su rezimirani dosadašnji efekti primjene ovog dokumenta.*

Predsjednica Privredne komore ZDK **Dijana Babić** izrazila je zadovoljstvo što su privredni subjekti bili aktivno uključeni u izradu pravilnika, naglasivši opredjeljenje ove komore da sa resornim kantonalnim ministarstvom nastavi raditi na projektima koji će osnažiti vezu između škola i privrede.

"Kompanije postaju svjesne svoje uloge i obaveze da unaprijede sistem kako bi sutra imali radnu snagu koja je potreba u savremenim procesima rada, kako bi unaprijedili konkurentnost kompanija i konkurentnost privrede cijelog kantona, a i doprinijeli rastu i razvoju ovog kantona", kazala je Babić.



Novinarima su se obratili predstavnici škola - Mješovite srednje industrijske škole Zenica, Mješovite srednje škole "Musa Ćazim Ćatić" Olovo i Mješovite srednje škole Tešanj, kao i privrednih subjekata "ArcelorMittal" Zenica, MANN+HUMMEL BA Tešanj i JZU BRC "Aquaterm" Olovo u kojima učenici obavljaju praktičnu nastavu.

Upućen je poziv drugim privrednim subjektima da se uključe i omoguće izvođenje praktične nastave izvan škola kako bi učenici stekli znanja i kompetencije koji su neophodni na tržišta rada. /kraj/

205. ISAK: SIGURNOST GRAĐANA I UČESNIKA U SAOBRAĆAJU NAM JE PRIMARNA OBAVEZA

ZENICA, 12.11.2019. - Ministar za prostorno uređenje, promet i komunikacije i zaštitu okoline Zeničko-dobojskog kantona **Arnel Isak** i direktor Kantonalne direkcije za ceste koja djeluje u sastavu ovog ministarstva **Rasim Kovač** potpisali su danas u sjedištu ZDK-a sa izvođačima radova dva ugovora ukupne vrijednosti 529.359,48 KM.



Sa **Kadrijom Muratovićem**, direktorom preduzeća Sacom d.o.o. Sarajevo, potpisan je ugovor o realizaciji projekta nabavke i postavljanja vertikalne saobraćajne signalizacije i cestovne opreme na regionalnim cestama R 445 dionica Karaulsko Polje-Kakanj-Visoko-Podlugovi i R 474 M-17-Perkovići-Novi Šeher-Tešanj-Jelah-granica Federacije. U pitanju je 304.785,00 KM vrijedan projekt koji će doprinijeti poboljšanju sigurnosti na pomenuta dva regionalna pravca.

Također, sa **Edinom Porobićem**, direktorom preduzeća „Porobić“ d.o.o. Zavidovići, potpisan je ugovor o izvođenju radova na sanaciji klizišta i izgradnji pješačke staze u naselju Ulišnjak, općina Maglaj, na regionalnoj cesti R-465 dionica Zavidovići-Maglaj, lokalitet Ulišnjak. Vrijednost ovog projekta iznosi 224.574,48 KM, a u pitanju je sanacija klizišta koje datira od prije dvadesetak godina, te se ovime prevenira štetno djelovanje na putnu infrastrukturu koja se nalazi u blizini klizišta.

„Sigurnost građana je naš prvenstveni cilj i primarna orijentacija te su ovo projekti koje realiziramo u cilju postizanja povećanja sigurnosti svih učesnika u saobraćaju na regionalnim cestama širom Zeničko-dobojskog kantona“, kaže ministar Isak.

Sa preduzećem Porobić d.o.o. Zavidovići je potpisan i ugovor o izvođenju dodatnih radova

na trajnoj sanaciji klizišta na regionalnoj cesti R 444 dionica Podlugovi-Breza-Vareš, lokalitet Vrankamen, a kojima će trajno biti sanirano klizište koje se nalazi pored regionalne ceste R444 na lokalitetu Vrankamen kod Breze. /kraj/



206. PREMIJER GANIĆ RAZGOVARAO SA DELEGACIJOM CRVENOG KRIŽA ZDK

ZENICA, 12.11.2019. - Premijer Zeničko-dobojskog kantona **Mirza Ganić**, sa saradnicima, razgovarao je danas u svom uredu sa delegacijom organizacije Crvenog križa ZDK na čelu s predsjednikom **Markom Sinanovićem**. Na sastanku su učestvovali i ministri za zdravstvo dr. **Adnan Jupić**, rad, socijalnu politiku i izbjeglice **Azra Šabanović**, obrazovanje, nauku, kulturu i sport **Spahija Kozlić** te ministar za finansije **Josip Lovrić**.

U fokusu razgovora bila je saradnja između nadležnih kantonalnih ministarstava i Crvenog križa u oblasti dobrovoljnog darivanja krvi, edukacije učenika i građana kroz programe CK-a te drugih aktivnosti koje ova organizacija provodi na području Zeničko-dobojskog kantona.



Istaknuto je kako CK ima izuzetno važnu ulogu na polju dobrovoljnog davalatstva krvi, ali zbog odliva davalaca te neefikasne poticajne politike zadnjih godina svojim akcijama ne uspijeva osigurati ni polovinu potreba zdravstvenih ustanova u ZDK. Zbog toga je potrebno dodatno animirati javnost, posebno srednje škole i fakultete, da se uključe u dobrovoljne akcije koje su temelj za osiguravanje dovoljnih zaliha sigurne krvi.

Također, važan segment rada CK-a je i edukacija iz pružanja prve pomoći za učenike, odgojno-obrazovne radnike i vozače, djelovanje u kriznim situacijama, kao i skrb o osobama u stanju socijalne potrebe.

Vlada ZDK putem Ministarstva za zdravstvo i Ministarstva za rad, socijalnu politiku i izbjeglice godišnje na ime podrške radu Crvenog križa iz budžeta izdvaja 20.000 KM.

Premijer Ganić je zadužio nadležne ministre da sagledaju mogućnosti i način da se poveća izdvajanje za podršku CK-u, a posebno u oblasti dobrovoljnog darivanja krvi. /kraj/

207. PREMIJER GANIĆ RAZGOVARAO SA BUDIMIROM LONČAROM I ASIMOM KURJAKOM

ZENICA, 13.11.2019. - Premijer Zeničko-dobojskog kantona **Mirza Ganić** razgovarao je danas u svom uredu sa **Budimirom Lončarom**, hrvatskim diplomatom i posljednjim šefom diplomatije SFR Jugoslavije i akademikom **Asimom Kurjakom**, poznatim hrvatskim ginekologom bosanskih korijena i stručnjakom svjetskog glasa iz oblasti ultrazvučne dijagnostike.



Premijer Ganić upoznao je goste sa stanjem i potencijalima Zeničko-dobojskog kantona, istakavši opredjeljenje vlasti ZDK-a za jačanje regionalne saradnje posebice u oblasti ekonomije, turizma, nauke i visokog obrazovanja.

Inicijatori i domaćini posjete su rektor Univerziteta u Zenici prof. dr. **Damir Kukić** te delegat u Domu naroda Parlamenta FBiH i zastupnik u Skupštini Zeničko-dobojskog kantona **Jasmin Duvnjak**, koji je goste upoznao sa turističkim znamenitostima Zenice i ZDK-a.

Gosti će danas na Pravnom fakultetu Univerziteta u Zenici održati predavanje studentima prava i ekonomije - Lončar o temi "Svijet, Europa, region i BiH - 30 godina nakon rušenja Berlinskog zida", dok će Kurjak održati predavanje na temu "Značaj izgradnje znanstvenih lidera za budućnost Bosne i Hercegovine". /kraj/

208. KOMPANIJAMA MADI I BROVIS ODOBRENI PODSTICAJI ZA PRERADU I OTKUP PILETINE

ZENICA, 14.11.2019. - Vlada Zeničko-dobojskog kantona odobrila je isplatu sredstava podsticaja prerađivačima i otkupljivačima pilećeg mesa za ovu godinu u ukupnom iznosu od 60.000 KM. Po 30.000 KM odobreno je kompanijama "Madi" d.o.o. Tešanj i "Brovis" d.o.o. Visoko.



Sredstva su odobrena putem javnog poziva, a dva velika proizvođača piletine u ovom kantonu jedini su dostavili aplikacije i ispunili propisane kriterije, čime su ostvarili pravo na podršku u visini od 0,10 KM po kilogramu žive vage otkupljenih brojlera. Iznos podrške bio je limitiran na 30.000 KM, odnosno do 300 tona otkupljenih brojlera.

Zeničko-dobojski kanton drži leadersku poziciju u Federaciji Bosne i Hercegovine u grani peradarstva, što je jednim dijelom i rezultat politike podsticaja Ministarstva za poljoprivredu, šumarstvo i vodoprivredu kojima se podstiče uzgoj koka nosilica, uzgoj brojlera te otkup i prerada pilećeg mesa. /kraj/

209. VLADA ZDK BORAVILA U POSJETI OPĆINI ŽEPČE



ŽEPČE, 15.11.2019. - Visoka delegacija Zeničko-dobojskog kantona koju su predvodili premijer **Mirza Ganić** i predsjedavajući Skupštine **Ćazim Huskić** boravila je danas u službenoj posjeti Općini Žepče, gdje je sa načelnikom **Matom Zovkom**, predsjedavajućim Općinskog vijeća **Muhamedom Jusufovićem** i saradnicima, razgovarala o saradnji dva nivoa vlasti i projektima koji se realizuju na području ove općine.

"Članove Vlade i Skupštine smo upoznali sa hronologijom svih događaja na području općine

Žepče, a potom i rješavanju nagomilanih problema. Meni je drago da su svi ti problemi iza nas te da imamo vrlo dobru saradnju sa institucijama Zeničko-dobojskog kantona", kazao je načelnik Zovko.

Teme razgovora bile su izgradnja nove osnovne škole, koju finansira Općina Žepče uz pomoć Vlade ZDK i Republike Hrvatske, sanacija klizišta u MZ Željezno Polje, pitanje oslobađanja troškova pretvorbe zemljišta za 60 kuća koje su izgrađene za stradalnike poplava, izgradnja poslovnih zona i jačanje konkurentnosti privrede te brojna druga pitanja u interesu za lokalnu zajednicu i kanton.



"Nakon Olova i Vareša, Žepče je treća općina koju smo posjetili u punom sastavu. Vlada je u proteklih sedam mjeseci, otkako je imenovana, vodila računa o svim općinama u ZDK, među kojima je i Žepče, jer težimo ravnomjernom razvoju ZDK-a. U novom budžetu ćemo planirati sredstva za započete projekte, jer u općinama postoji veliki broj projekata koje treba finalizirati", kazao je premijer Ganić, izrazivši zahvalnost općini Žepče što je pokrenula projekt izgradnje nove škole te što na taj način pomaže da se osiguraju

bolji uslovi i kvalitetnije obrazovanje u ZDK. Članovi Vlade posjetili su i Katolički školski centar "Don Bosco" u Žepču, koji je izgrađen uz pomoć Vlade Republike Hrvatske.



Potom su premijer Ganić, načelnik Zovko i ministrica za rad, socijalnu politiku, raseljene osobe i izbjeglice **Azra Šabanović** svečano pustili u promet novoizgrađenu dionicu lokalnog puta Gornji Vitlaci - Brijeg, koju su sa 60.000 KM zajedno finansirali Vlada ZDK i Federalno ministarstvo za raseljene osobe i izbjeglice. /kraj/

210. VLADA ZDK PONUDILA GRADONAČELNIKU ZENICE SPORAZUM U SKLADU SA ZAKLJUČKOM GRADSKOG VIJEĆA

ZENICA, 18.11.2019. - Vlada Zeničko-dobojskog kantona uputila je Gradu Zenica odgovor na ranije dostavljeni prijedlog Sporazuma o međusobnim odnosima u svrhu dogovornog rješavanja imovinsko-pravnih odnosa na zemljištu i pripadajućim objektima u krugu Kantonalne bolnice Zenica.



U pismu koje potpisuje premijer **Mirza Ganić** konstatira se da prijedlog Grada Zenice nije u skladu sa jednoglasno usvojenim zaključkom Gradskog vijeća Zenica od 24. oktobra 2019. godine, kojim je data "saglasnost Gradonačelniku da zaključi sporazum sa JU Kantonalna bolnica Zenica u formi notarski ovjerene isprave, kojom Grad Zenica priznaje da je JU Kantonalna bolnica Zenica titular prava vlasništva nad nekretninama, zemljištem i zgradama" u krugu KBZ-a. Pored toga,

podsjeca se da je Kantonalni sud u Zenici ukinuo prvostepeno rješenje Zemljišnoknjižnog ureda Općinskog suda u Zenici, po kojem je kao vlasnik na nekretninama u krugu KBZ-a upisan Grad Zenica, te vratio predmet na ponovno postupanje prvostepenom sudu.

"To znači da u ovom trenutku nekretnine, zemljište i zgrade u krugu Kantonalne bolnice Zenica nemaju titulara vlasništva, tako da ne postoji pravni osnov za zaključenje sporazuma na način i sadržaju kojeg ste predložili sa JU Kantonalna bolnica Zenica i Vlade ZDK! Na osnovu iznesenih činjenica proizilazi da je Grad Zenica samo strana u sporu, a svojim narednim koracima ćete se opredijeliti da li ćete nastaviti blokirati navedene projekte i raditi protivno interesima građana Zenice ili ćete se povući iz spora izjavom kako Vam je naložilo Gradsko vijeće i tako dati svoj doprinos u realizaciji ovog izuzetno važnog i značajnog projekta", navodi premijer Ganić.

On poziva Gradonačelnika grada Zenica da dosljedno ispoštuje zaključak Gradskog vijeća i zaključi sa JU Kantonalna bolnica Zenica sporazum kojim će priznati da je JU Kantonalna bolnica Zenica titular prava vlasništva nad nekretninama, zemljištem i zgradama, čime će omogućiti realizaciju projekta energetske efikasnosti, kao i ostalih planiranih projekata (utopljanje zgrada, novi energetski blok, operacioni blok, izgradnja 2.800 m² novog prostora, interventna kardiologija, hemodijaliza, gama nož..), od čega će korist imati svi građani Zeničko-dobojskog kantona, a posebno građani Zenice.

Planirane investicije donijet će direktnu finansijsku korist za Grad Zenica, na što je ukazano i na sastanku u EBRD-u, a korist se ogleda u sljedećem:

-Ulaganje od 10 miliona eura u energetske efikasnost Kantonalne bolnice, koje je preuzeo Zeničko-dobojski kanton, a kojom se, pored modernizacije i unapređenja nivoa usluge ove zdravstvene ustanove, smanjuje zagađenje zraka u gradu,

-Transfer plinovoda vrijednog 0,7 miliona eura sa Zeničko-dobojskog kantona na Grad Zenica /kompaniju Zenicagas, koja nudi mogućnost grijanja na prirodni gas u pojedinim prigradskim naseljima koja nisu uključena u sistem gradskog grijanja,-Grant u iznosu od 0,3 miliona eura od strane Austrijske vlade koji je već osiguran za Akcioni plan zelenih gradova u Zenici - s identificiranim potencijalnim ulaganima pogodnim za daljnje finansiranje. Uspješna provedba projekta kantonalne bolnice je kamen temeljac za ovaj akcioni plan i demonstracija izvodljivosti daljnjih ulaganja, te

-Moguća dodatna ulaganja od 11 miliona eura od strane Zeničko-dobojskog kantona u dodatne bolničke usluge kroz javno-privatno partnerstvo, uključujući planirana ulaganja u Interventnu kardiologiju, tehnologiju Gamma noža i Hemodijalizu.

Ukupna vrijednost planiranih investicija je 41,5 miliona KM. U gradu Zenica investicije će pokrenuti ekonomsku aktivnost te donijeti dodatni prihod u gradskom budžetu, kao i bolju perspektivu i uslove za rad 1.502 radnika Kantonalne bolnice sa prebivalištem u Zenici, što

je 92 posto od ukupnog broja zaposlenih. Ipak, najveću korist će imati građani, jer će se u KBZ-u pružati zdravstvene usluge na visokom nivou, kao što je primjena procedure "zlatnog sata" u interventnoj kardiologiji, koju, u borbi sa vremenom, pacijenti iz ZDK trenutno dobijaju u centrima u Tuzli i Sarajevu.


Premijer Ganić napominje da je Vlada Zeničko-dobojskog kantona posvećena razvoju grada Zenice, što potvrđuje i kontinuiranim ulaganjima u obrazovanje, zdravstvo, putnu infrastrukturu, privredu, poljoprivredu i druge oblasti značajne za život građana, te da je opredijeljena da nastavi s ulaganjima na području grada Zenice i u narednom razdoblju uvažavajući potrebe njenih građana.

Uz odgovor premijera ZDK, priložen je i prijedlog teksta sporazuma koji trebaju potpisati Grad Zenica i JU Kantonalna bolnica Zenica, usklađen sa zaključkom Gradskog vijeća Zenica, a koji će trenutno, bez daljeg odlaganja, omogućiti realizaciju investicija u Kantonalnoj bolnici Zenica.

"U nadi da ćete razumjeti aktuelni trenutak te potpisati sporazum bez populizma i ucjena unaprijed Vam se zahvaljujem", navodi se u pismu.

Premijer Ganić je uputio pismo i gospođi **Manueli Naessel**, direktorici Ureda Evropske banke za obnovu i razvoj (EBRD) u Bosni i Hercegovini, u kojem još jednom potvrđuje opredjeljenje Vlade Zeničko-dobojskog kantona za realizaciju projekta energetske efikasnosti u KBZ-u, za koji je kredit osiguran kod EBRD-a.

Međutim, upozorava da će Zeničko-dobojski kanton odustati od kredita, ukoliko gradonačelnik Zenice i dalje bude insistirao na dodatnom izdvajanju sredstava iz budžeta ZDK, kao kompenzaciju za priznavanje titulara vlasništva nad nekretninama, zgradama i zemljištu u korist JU Kantonalna bolnica Zenica, jer Vlada nema zakonskog uporišta za takvu kompenzaciju niti se smije dovesti u situaciju da zbog neriješenih imovinsko-pravnih odnosa plaća penale za nepovučena sredstva po odobrenom kreditu. /kraj/




211. MINISTAR ISAK I NAČELNIK ŠLJIVO POTPISALI PROTOKOL O IZRADI IZMJENA PROSTORNOG PLANA OPĆINE KAKANJ

KAKANJ, 18.11.2019. - Ministar za prostorno uređenje, promet i komunikacije i zaštitu okoline **ZDK Arnel Isak** i načelnik Općine Kakanj **Aldin Šljivo** danas su u Zenici potpisali Protokol o izradi izmjena Prostornog plana općine Kakanj za period 2010.-2030. godine. U pitanju je realizacija Zaključka Vlade ZDK iz 2013. godine a nakon Odluke Općinskog vijeća od 30. septembra 2019., a prema kojem će pripreme za izmjene Prostornog plana općine Kakanj izvršiti općinska Služba za privredu, urbanizam i zaštitu okoline, dok će nosilac aktivnosti na izradi Izmjena Plana biti Kantonalni zavod za urbanizam i prostorno uređenje koji djeluje u sastavu ministarstva na čijem je čelu ministar Isak.

Ovim izmjenama Plana bit će izvršeno usklađivanje sa zahtjevima iz Prostornog plana Kantona 2009-2029. godine.

„Regulisanje planske izgradnje na području ZE-DO kantona je jedan od strateških ciljeva Ministarstva za prostorno uređenje, promet i komunikacije i zaštitu okoline. Današnjim



potpisom Protokola o saradnji stvorili smo pretpostavke i definisali prava i obaveze u daljim aktivnostima na izradi Izmjena Prostornog plana za koje očekujem da će osigurati dalji dinamičan razvoj Kaknja, koji će biti usaglašen sa trendovima privrednog razvoja BiH i civilizacijskim zahtjevima XXI stoljeća”, kaže Arnel Isak, ministar za prostorno uređenje, promet i komunikacije i zaštitu okoline, ističući da je reguliranje prostorno-planske dokumentacije jedan od preduvjeta za razvoj privrede i kompletnog društva.

„Planiranje kao svjesno usmjeravanje razvoja je odlika savremenog društva. Infrastruktura, za koju smo kao javni službenici direktno zaduženi, jedan je od najvažnijih faktora u prostornom planiranju. Od izgrađenosti i iskorištenosti infrastrukture zavisi razvoj mnogih naselja i regija, zatim otvaranje novih proizvodnih kapaciteta, unapređenje i razvoj brojnih društvenih službi”, dodaje ministar Isak, naglašavajući da će u narednom periodu u okviru svojih nadležnosti raditi na ažuriranju prostorno-planske razvojne dokumentacije i za druge općine u kantonu. /kraj/

212. POTICAJ ZA SAMOZAPOŠLJAVANJE DOBILO 100 PRIPADNIKA BRANILAČKE POPULACIJE U ZDK

ZENICA, 18.11.2019. - Ministarstvo za boračka pitanja Zeničko-dobojskog kantona potpisalo je ugovore za poticaj samozapošljavanju sa 100 pripadnika branilačke populacije u okviru programa "Biznis plus", koji predstavlja nastavak programa zapošljavanja branilačke populacije iz prethodne godine.



"Svi koji su bili uspješni, koji su otvorili svoj biznis i nastavili ga ove godine ili zaposlili člana porodice, dobili su poticaj u iznosu od 1.000 do 5.000 KM. Prema Zakonu o dopunskim pravima boraca FBiH, živi članovi branilačke populacije nemaju prednost pri zapošljavanju tako da se na ovaj način željelo pomoći njihovom zapošljavanju", rekao je ministar za boračka pitanja **Fahrudin Čolaković**.

Na javni poziv za ostvarivanje poticaja stiglo je 150 prijava, a odabrano je 100 boraca-poduzetnika koji su bili uspješniji od ostalih za koje je Vlada ZDK izdvojila oko 135.000 KM.

"Nismo potrošili sva planirana sredstva za samozapošljavanje pa smo prije nekoliko dana raspisali novi javni poziv za zapošljavanje i samozapošljavanje boračke populacije. Koristim priliku da pozovem sve pripadnike boračke populacije koji žele da pokrenu biznis ili traže posao da se prijave na konkurs", kazao je Čolaković.

U toku je i javni poziv za dodjelu sredstava za zapošljavanje djece šehida i poginulih boraca, za što su Vlada ZDK i Federalni zavod za zapošljavanje namijenili ukupno 200.000 KM.

Premijer **Mirza Ganić** je istakao kako je program "Biznis plus" dio ukupnih nastojanja Vlade Zeničko-dobojskog kantona da pomogne branilačkoj populaciji te da podstakne ekonomski rast i zapošljavanje.

"Nedavno smo potpisali 100 ugovora za osnivanje obrta sa pripadnicima branilačke populacije, a program "Biznis plus" pokazuje da pratimo i podržavamo uspješne. Također, potpisali smo ugovore za jačanje konkurentnosti u vrijednosti 1,3 miliona KM, koji će podstaći investicije od oko 5 miliona KM, izdvojili smo značajna sredstva za poslovne zone i kada tome dodamo infrastrukturne radove, kroz puteve, škole, vodne projekte, to postaje motor koji vodi stvaranju povoljnijeg ambijenta u našem kantonu", istakao je Ganić, navodeći i da će se realizacijom programa zapošljavanja djece šehida i poginulih boraca smanjiti nezaposlenost kod te populacije.



Podsjetio je da su ove godine stipendije po prvi put dobili svi studenti koji su podnijeli formalno-ispravne prijave te da je i to potvrda nastojanja Vlade da pomogne mladima da se školuju i budu spremniji i konkurentniji na tržištu rada.

"S ponosom mogu istaći da godinu privodimo kraju sa realiziranim postavljenim ciljevima, tako da kao Vlada možemo biti zadovoljni jer stvaramo povoljan privredni ambijent i ulažemo u mlade, razvoj biznisa, obrte i jačamo konkurentnost u ZDK", kazao je Ganić. /kraj/

213. VLADA ZDK PRIPREMILA AKCIONI PLAN ZA IZVRŠENJE PRESUDA, A DOGODINE ĆE PLANIRATI SREDSTVA ZA PRIJATELJSKE NAGODBE



ZENICA, 19.12.2019. - Ukupne obaveze Zeničko-dobojskog kantona po osnovu pravosnažnih izvršnih presuda po tužbama zaposlenih u ovom kantonu iznose 155 miliona KM, a taj dug sa zateznim kamatama narastao je na 300 miliona - izjavio je ministar finansija Zeničko-dobojskog kantona Josip Lovrić.

Komentirajući mirni protest grupe apelantata održan

pred sjedištem Vlade u Zenici, Lovrić je kazao da je to problem koji je zatekao Vladu ZDK te da se vode aktivnosti na iznalaženju rješenja prihvatljivog za obje strane.

"Nakon niza sastanaka, Vlada je na sjednici 31. oktobra donijela generalne mjere koje je naložio Evropski sud za ljudska prava u Strazburu, a u skladu s mjerama donijeli smo Akcioni plan sa rokom izvršenja od 22 godine. Po ovom planu, ZDK će u naredne 22 godine isplaćivati godišnje 13 miliona KM na ime izvršnih sudskih presuda. Također, u budžetu za 2020. godinu ćemo planirati sredstva za prijateljske nagodbe i u toku je priprema javnog poziva", kazao je Lovrić.

On je podsjetio da je ZDK ove godine za izvršne presude isplatio 1,6 miliona KM. Pored toga, u budžetu za 2019. planirano je 3,5 miliona KM za isplatu po presudama Evropskog suda za ljudska prava u Strazburu, od čega je po osnovu nematerijalne štete i sudskih troškova već isplaćeno 500.000 KM, a preostali iznos nije isplaćen zbog "tehničkog problema". Naime, sud u Strazburu je naložio da se isplati nematerijalna šteta te izvrše presude domaćih sudova, s tim da se novac mora isplatiti na račune advokata koji su zastupali apelante pred bh. sudovima.



"Međutim, mi smo od apelanata dobili otkazivanje punomoći tim advokatima koji su ih zastupali pred domaćim sudovima, tako da smo u ovom trenutku došli u problem da ne znamo kome da isplatimo taj novac i na čiji račun. Bilo koje jednostrano otkazivanje punomoći bez odluke suda nije pravovaljano i to je stav Kantonalnog pravobranilaštva", kazao je Lovrić.

Ministarstvo finansija o svemu ovome priprema informaciju koju će u petak razmatrati i zauzeti stav Vlada ZDK, vodeći računa da izvršavanjem presuda ne smije ugroziti ustavne funkcije i život u ovom kantonu.

Lovrić podsjeća da je Ministarstvo finansija održalo niz sastanaka sa apellantima - prvi 25. oktobra, a potom 8. novembra kada je primio 17 apelanata, dok su na sastanak održan u prošlu srijedu, 13. novembra, došli samo advokati koji su zastupali apelante pred domaćim sudovima, ali ne i apelanti i advokati iz Strazbura, koji su danas održali mirno okupljanje.

"Dugo godina se taj problem odugovlačio i nije se riješio. Ova vlada se uhvatila s tim u koštac i pokušava da nađe rješenje, međutim i ovog puta apeliram i na apelante i advokate, koji su zastupali pred domaćim sudovima i Strazburu, da pokušamo naći rješenje", poručio je Lovrić. /kraj/

214. INTERVENTNA POMOĆ ZA NABAVKU LOPTI ZA OSAM KLUBOVA SJEDUĆE ODBOJKE

ZENICA, 20.11.2019. - Ministarstvo za boračka pitanja Zeničko-dobojskog kantona interventno je klubovima sjedeće odbojke u ovom kantonu dodijelilo po 1.500 KM za nabavku setova od po devet profesionalnih lopti u skladu sa propozicijama Paraolimpijskog komiteta BiH.



Lopte marke "Molten" dobili su Klub sjedeće odbojke "Zenica 92" Zenica, Invalidski odbojkaški klub "Bosna" Zenica, Sportsko društvo RVI "Kakanj 92" Kakanj, Invalidski odbojkaški klub "Zavidovići" Zavidovići, Invalidski odbojkaški klub "Auto servis Huso" Maglaj, Odbojkaški klub invalida "Breza" Breza, Odbojkaški klub invalida "Breza 304" i Klub sjedeće odbojke "Čelik 07" Zenica.

Iste lopte koristit će se na narednim Paraolimpijskim igrama u Tokiju, tako da će se klubovima i članovima nacionalne reprezentacije na ovaj način omogućiti da steknu rutinu i obave kvalitetne pripreme za nastup na ovom takmičenju.

*"Ponosni smo što imamo priliku da doprinesemo razvoju invalidskog sporta. Ovoj populaciji nije potrebna pomoć, nego podrška na koju s naše strane uvijek mogu računati", kazao je premijer **Mirza Ganić**, uručujući ugovore predstavnicima klubova koji se natječu u tri grupe takmičenja u BiH.*

Ministar za boračka pitanja **Fahrudin Čolaković** je naglasio da se radi o vanrednim sredstvima te da se svake godine za podršku invalidskom sportu izdvoji oko 100.000 KM. Potvrdio je opredjeljenje Vlade i resornog ministarstva da nastave podržavati invalidski sport kao jedan od najboljih načina rehabilitacije ove populacije, navodeći da se od 10,6 miliona KM, koliko je iznosio budžet ovog ministarstva za 2019. godinu, između 20 i 30 posto utrošilo za potrebe ratnih vojnih invalida.

Hajrudin Zekić, predsjednik Saveza sjedeće odbojke ZDK, izrazio je zahvalnost aktuelnoj Vladi ZDK što je nastavila politiku prethodne Vlade, koja je za četiri godine mandata za invalidski sport izdvojila oko 800.000 KM, što je na nivou godišnjeg budžeta za sport u ovom kantonu. /kraj/

215. NIKOLIĆ I ZOVKO POTPISALI UGOVOR O PRODAJI ZEMLJIŠTA ZA IZGRADNJU ZGRADE OPĆINSKOG SUDA ŽEPČE

ŽEPČE, 20.11.2019. - Ministar za pravosuđe i u pravu Zeničko-dobojskog kantona **Nebojša Nikolić** i načelnik Općine Žepče **Mato Zovko** potpisali su danas ugovor o kupoprodaji zemljišta za potrebe izgradnje zgrade Općinskog suda u Žepču. Prije toga, Nikolić i Zovko su potpisali protokol o načinu uređenja međusobnih odnosa u vezi kupoprodaje zemljišta, prema kojem će Općina Žepče ukupna sredstva od prodaje od 23.280 KM uložiti u vanjsko uređenje zgrade Suda.

"Raduje me što smo sve bliže početku izgradnje objekta koji će omogućiti normalne uslove za smještaj i rad Općinskog suda u Žepču. Ovaj kapitalni projekt je primjer dobre saradnje između općine i kantona", kazao je Nikolić, zahvalivši se svima koji učestvuju u projektu, a posebno donatorima – Vladi Švedske koja



finansira izradu projektne dokumentacije i Evropskoj uniji koja najvećim dijelom finansira izgradnju zgrade.

Potpisivanju ugovora je prethodila parcijalna izmjena Regulacionog plana i formiranje urbanističko-građevinske parcele za gradnju, a dodjela općinskog zemljišta i potpisivanje današnjeg ugovora je drugi korak na projektu. Prema planu, do kraja ove godine bit će osiguran projekt i potrebna odobrenja za gradnju, a sama izgradnja će krenuti u julu 2020. godine.

Nova zgrada Općinskog suda Žepče će se graditi između objekata Srednje mješovite škole "Žepče" i Centra za socijalni rad, u okviru druge faze projekta "Unapređenje efikasnosti sudova i odgovornosti sudaca i tužitelja u BiH" koji implementira Visoko sudsko i tužilačko vijeće BiH s ciljem unapređenja efikasnosti pravosuđa, uključujući modernizaciju i rekonstrukciju zgrada pravosudnih institucija.

Načelnik Zovko je istakao da Općina Žepče podržava razvoj infrastrukture i izgradnju novih objekata te da će nakon izgradnje zgrade i vanjskog uređenja općinska uprava nastaviti pružati administrativnu i drugu potrebnu podršku. /kraj/

216. ODGOVOR PREMIJERA GANIĆA NA SAOPĆENJE ZA JAVNOST GRADONAČELNIKA ZENICE

ZENICA, 20.11.2019. - Premijer Zeničko-dobojskog kantona **Mirza Ganić** uputio je odgovor na saopćenje za javnost gradonačelnika Zenice **Fuada Kasumovića**, a vezano za rješavanje imovinsko-pravnih odnosa u Kantonalnoj bolnici Zenica, u kojem se kaže:



„Populistički pamflet koji ste u formi saopćenja za javnost uputili kao odgovor na pismo Vlade Zeničko-dobojskog kantona, potvrđuje da niste strana koja želi pomoći da se riješe imovinsko-pravni odnosi u JU Kantonalna bolnica Zenica i omogući realizacija kapitalnih projekata koji su najveće ulaganje od osnivanja ove zdravstvene ustanove, ali i najveće ulaganje u zdravstvenu infrastrukturu Zenice.

Očito niste svjesni da blokirate projekte koji će udahnuti novi život upravo u objekte koje su kupovali i gradili građani Zenice, naravno, kao i građani drugih općina na području od Kupresa do Doboja koje je pokrivala tadašnja bolnica, jer samo to može objasniti vaše neracionalno ponašanje prema svim projektima koje finansira Vlada Zeničko-dobojskog kantona. Ulaganjima vrijednim oko 41 milion KM želimo dati novi izgled KBZ-u, unaprijediti uslove za boravak i rad i ovim generacijskim projektom napraviti iskorak ka kliničkoj bolnici čemu težimo decenijama.

Uistinu, kako smo naveli u našem dopisu, Vlada Zeničko-dobojskog kantona je posvećena razvoju grada Zenice, što potvrđuje kontinuiranim ulaganjima u obrazovanje, zdravstvo, putnu infrastrukturu, privredu, poljoprivredu i druge oblasti, a to je naša i ustavna i moralna obaveza, jer u Zenici, kao najvećem gradu i kantonalnom središtu, živi svaki treći stanovnik Zeničko-dobojskog kantona. Ulaganja su mogla biti i znatno veća da nije bilo opstrukcija koje činite od dolaska na poziciju gradonačelnika, a sve s ciljem da obezvrijedite i omalovažite rad Vlade Zeničko-dobojskog kantona. Primjeri su blokada izgradnje puteva prema Babinu, Ovnaku, Bistričaku i drugi projekti koji su mogli biti davno realizirani, da nije bilo opstrukcija sa vaše strane.

U tom svjetlu doživljavamo i tvrdnju da je "Vlada Zeničko-dobojskog kantona Zeničanima na vrat natovarila preko 50 miliona KM kredita za GGM", što je apsolutna neistina, jer je GGM bio lokalni projekt, koji je ZDK podržao u skladu sa svojim mogućnostima, a to je i projekt koji je velikim slovima upisan u historiji Zenice jer je administracija na čelu sa velikim vizionarom, rahmetli Husejinom Smajlovićem, ispunila višedecenijsku želju Zeničana.

Velikim slovima će biti upisano i ime aktuelne Vlade Zeničko-dobojskog kantona kada realizira razvojne projekte u Kantonalnoj bolnici Zenica, a Vas će pamtiti po opstrukcijama i pokušajima da se okoristite od velike investicije u Zenicu i zdravlje Zeničana.

Stoga, još jednom Vas pozivam da ispoštujete jednoglasni zaključak Gradskog vijeća Zenice te zaključite sporazum sa JU Kantonalna bolnica Zenica u formi notarski ovjerene isprave, kojom Grad Zenica priznaje da je JU Kantonalna bolnica Zenica titular prava vlasništva nad nekretninama, zemljištem i zgradama i time pokažete da podržavate razvoj ovog grada i Kantona." /kraj/

217. SVEČANO OTVORENA NOVOIZGRAĐENA OŠ HASAN KIKIĆ TETOVO



ZENICA, 22.11.2019. - U prisustvu brojnih zvanica svečano je otvorena novoizgrađena zgrada OŠ "Hasan Kikić" u zeničkom naselju Tetovo. Izgradnja škole koštala je 2,3 miliona KM, od čega je 2 miliona KM osigurala Vlada Zeničko-dobojskog kantona, a preostalih 300.000 KM su osigurali Vlada Federacije BiH i UNDP.

"Radostan sam iz dva razloga. Prvi je što smo završili kapitalni projekt u obrazovanju koji je veoma važan za grad Zenicu,

čime potvrđujemo da smo opredijeljeni za ravnomjerno ulaganje i razvoj cijelog ZDK, a drugi razlog je što smo školu poklonili učenicima i nastavnicima na Dan državnosti Bosne i Hercegovine", kazao je premijer Mirza Ganić.

Na mjestu starog objekta koji je korišten osam decenija, iz temelja je izgrađena nova škola sa osam učionica, dvije višenamjenske prostorije, upravnim prostorijama, energetske blokove i fiskulturnom salom, a naknadno će se izgraditi i sportski poligon. OŠ „Hasan Kikić“ Tetovo u dvije smjene pohađa 529 učenika.

Ministar za obrazovanje, nauku, kulturu i sport Spahija Kozlić zahvalio se svima koji su na bilo koji način doprinijeli realizaciji projekta, najavivši nastavak ulaganja u obrazovnu infrastrukturu u ZDK.



"Ove godine smo puno radili na rekonstrukciji i investicionom održavanju, zajedno sa UNDP-om, Caritasom i drugim organizacijama koje su zainteresirane za obrazovanje, a to ćemo raditi i u narednoj godini", kazao je Kozlić, navodeći da će samo u općini Tešanj na proljeće biti završene četiri fiskulturne sale u čijoj je izgradnji Zeničko-dobojski kanton učestvovao sa 700.000 KM. /kraj/

218. GANIĆ: VRIJEME NIJE NA STRANI KOČNIČARA I RUŠITELJA BIH

ZENICA, 25.11.2019. - Povodom 25. novembra - Dana državnosti Bosne i Hercegovine, u Bosanskom narodnom pozorištu Zenica večeras je održana svečana akademija u organizaciji Vlade Zeničko-dobojskog kantona.



U programu su učestvovali Kamerni simfonijski orkestar i hor, Ženski hor II gimnazije, učenici i nastavnici Osnovne i Srednje muzičke škole, Ansambl harmonika "Anantango", Muzički vrtić "Notica" i glumica Bosanskog narodnog pozorišta Sabina Kulenović. Prigodan govor, uz čestike svim građanima povodom Dana državnosti, održao je premijer **Mirza Ganić**.

Ganić je odao počast generaciji bosansko-hercegovačkih patriota koja je u sudbonosnim vremenima bila na pravoj strani historije, generacije koja je u temelje BiH, njene neupitne trajnosti i opstojnosti, ugradila svoj kamen na Prvom zasjedanju ZAVNOBiH-a u Mrkonjić-Gradu, 25. novembra 1943. godine.



Podsjetio je da je temeljnom odlukom ZAVNOBiH-a Bosna i Hercegovina definisana kao država njenih građana i ravnopravnih naroda Bošnjaka Srba, Hrvata, kao i pripadnika drugih naroda i narodnosti, napominjući da je izuzetno važan dokument u definiranju pune državnosti BiH bila i Deklaracija o pravima građana u BiH, koja je usvojena na Drugom zasjedanju ZAVNOBiH-a godinu kasnije u Sanskom Mostu, a njene odredbe su u punoj saglasnosti sa savremenim evropskim standardima o zaštiti sloboda čovjeka i građanina.

"Potvrda kontinuiteta trajanja zemlje i države i potvrda jednakosti ljudi koji u njoj žive – to dvoje je duh i slovo ZAVNOBiH-a. I to su temeljne ideje koje bi morale uvijek i nanovo okupiti sve one koji žele dobro narodima i građanima BiH", kazao je Ganić, dodajući da, nažalost, ni 25 godina nakon završetka agresije na BiH, neki od onih koji mogu bitno uticati na stanje u zemlji, nisu spremni zajedno s nama potvrditi ove temeljne vrijednosti.

"Naprotiv, neki od njih sve otvorenije i drskije dovode u pitanje dostignuti nivo pozitivnih reformi, funkcioniranje institucija, pa i sam integritet i budućnost BiH. Političari koji će trajati desetak godina misle da mogu dovesti u pitanje državu koja traje već hiljadu godina. Njihova nervoza i drskost jasan su znak slabosti i svijesti o vlastitoj prolaznosti. Oni znaju da će Bosne biti - s njima ili bez njih", istakao je premijer ZDK.



Naglasio je da mir, teritorijalni integritet i opstanak BiH garantiraju velesile potpisnice Daytonskog mirovnog sporazuma, garantiraju ga institucije države BiH, a prije svega garantira ga sve veća masa običnih ljudi, dobronamjernih građana u svakom dijelu ove zemlje.

"Garantira ga narod koji se umorio od onih koji siju zlo, mržnju, strah, ksenofobiju od onih koji prizivaju nove podjele, a time, neizostavno, i nove sukobe. Vrijeme nije na strani kočničara i rušitelja. Oni će se umoriti. Mi koji Bosnu i Hercegovinu gradimo i unapređujemo nećemo se umoriti", rekao je Ganić.

Istakao je da je budućnost na strani mira i integracija, na strani svih onih koji vole rodnu grudu, koji žele da njihova djeca žive i školuju se u stabilnoj, prosperitetnoj i slobodnoj državi, ravnopravnoj članici EU.

"Predano ćemo nastaviti da radimo za takvu budućnost. Nećemo pristati na zaborav. Obilježavat ćemo Dan državnosti. Njegovat ćemo ideju antifašizma i univerzalnih ljudskih prava i sloboda. Čuvat ćemo sjećanje na hrabre i plemenite pretke, na njihova djela koja su unijela svjetlo u najmračnije momente historije. Izborit ćemo se da BiH bude zemlja slobodnih i ravnopravnih ljudi. Zemlja u kojoj niko neće patiti i biti ugrožen zbog svoje vjere, nacije, političkog stava ili uvjerenja", rekao je premijer ZDK. /kraj/

219. VLADA ZDK PRIHVATILA INICIJATIVU ZA REVIZIJU DIPLOMA U JAVNOM SEKTORU

ZENICA, 26.11.2019. - Vlada Zeničko-dobojskog kantona donijela je odluku kojom je prihvaćena inicijativa Tima Vlade za borbu protiv korupcije za reviziju diploma uposlenih u javnom sektoru u ovom kantonu.



Prema odluci Vlade, u idućih 12 mjeseci bit će provedena revizija diploma nosilaca izvršne vlasti, savjetnika nosilaca izvršne vlasti, uposlenih u kantonalnim ministarstvima i drugim tijelima kantonalne uprave, uposlenih u javnim ustanovama, zavodima, direkcijama i drugim organima čiji je osnivač Zeničko-dobojski kanton ili se finansiraju iz budžeta ovog kantona te javnim

preduzećima i privrednim društvima sa većinskim kapitalom u vlasništvu ZDK-a, a u skladu sa ranije dostavljenom Inicijativom Agencije za prevenciju korupcije i koordinaciju borbe protiv korupcije da svi nivoi vlasti u BiH izvrše reviziju diploma.

Institucije će samostalno provesti postupak detaljne revizije u skladu sa uputstvom Tima Vlade za borbu protiv korupcije i usvojenom Inicijativom, a provjeravat će se vjerodostojnost diploma stečenih u visokoškolskim ustanovama, diploma/svjedodžbi srednjih škola i svjedodžbi stečenih u ustanovama osnovnog obrazovanja.

*"BiH treba efikasne institucije u kojima rade kompetentni ljudi, treba veću sigurnost i nisku stopu kriminaliteta, moramo imati konkurentniju privredu, kvalitetnije zdravstvo i bolje obrazovanje. Zbog toga smo prihvatili inicijativu za provođenje revizije diploma u Zeničko-dobojskom kantonu i to je potvrda našeg opredjeljenja da se suočimo sa svim oblicima korupcije i zloupotreba u javnom sektoru", kazao je premijer **Mirza Ganić**, podsjećajući da je Vlada učinila važan korak u prevenciji i borbi protiv korupcije donijevši Uredbu o zapošljavanju u javnom sektoru čiji je najvažniji element da se bira prvorangirani kandidat na konkursu.*

Istovremeno, Vlada je uputila inicijativu za provođenje revizije diploma Gradu Zenica, Gradu Visoko i svim općinama u Zeničko-dobojskom kantonu.

"Pozivam gradonačelnike i načelnike gradova i općina u Zeničko-dobojskom kantonu da provedu reviziju diploma u institucijama, javnim ustanovama i preduzećima, jer je društvo bez korupcije naš zajednički prioritet", kazao je Ganić.

Odluka, Inicijativa o reviziji diploma i Uputstvo za reviziju diploma u institucijama ZDK će biti objavljeni na internet stranici Zeničko-dobojskog kantona - zdk.ba. /kraj/

220. ODOBRENA ISPLATA ODSICAJA POLJOPRIVREDNIM PROIZVOĐAČIMA U ZDK

ZENICA, 27.11.2019. - Na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona usvojila je set odluka o odobravanju sredstava podsticaja poljoprivrednim proizvođačima u ukupnom iznosu od 117.348,40 KM.

Na ime podrške proizvodnji krastavca kornišona odobreno je 43.544,20 KM, a uslove iz javnog poziva za novčani podsticaj od 10 feninga po kilogramu kornišona dobila su 83 poljoprivredna proizvođača u ZDK.

Podsticaj za držanje koka nosilja u ukupnom iznosu od 43.657,00 KM dobilo je svih deset farmi koje su se prijavile na javni poziv, a odobren im je podsticaj od jedne marke po koki nosilji.



Za podršku proizvodnji paprike feferone podsticaj je dobio 31 proizvođač, kojima je odobreno ukupno 12.820,20 KM. Podsticaj resornog ministarstva za proizvodnju feferone iznosi 10 feninga po kilogramu.

Vlada je odobrila i sredstva u iznosu od 8.737,00 KM za provođenje mjera kliničkog pregleda pčelinjaka na zaraznu bolest Američka gnjiloća pčelinjeg legla, a sredstva će biti plasirana preko devet udruženja pčelara u ZDK-u.

Odobrena su i sredstva za sufinansiranje troškova uspostavljanja i implementacije Programa samokontrola kod subjekata u poslovanju sa hranom, a devet registriranih subjekata koji su se prijavili na javni poziv dobit će ukupno 8.590,00 KM. /kraj/

221. PREMIJER GANIĆ I ČLANOVI VLADE ZDK POSJETILI OPĆINU ZAVIDOVIĆI

ZAVIDOVIĆI, 28.11.2019. - Obilazak općina u Zeničko-dobojskom kantonu, premijer **Mirza Ganić** i ministri u Vladi ZDK nastavili su današnjom službenom posjetom Općini Zavidovići. Sa općinskim načelnikom **Hašimom Mujanovićem** i predsjedavajućim Općinskog vijeća **Redžom Seferovićem**, sa saradnicima, razgovarali su o dosadašnjoj saradnji dva nivoa vlasti te projektima koji se realiziraju na području ove općine. U delegaciji je bio i predsjedavajući Skupštine ZDK **Ćazim Huskić**.



"Razgovarali smo o svim otvorenim pitanjima vezanim za administraciju te realizaciji određenih projekata. Konstatirali smo da je Vlada ZDK usmjerila značajan dio finansijskih sredstava za projekte na području općine Zavidovići, što potvrđuje i realizacija na terenu", kazao je premijer Ganić.

Najavio je nastavak ulaganja, prije svega u projekte razvoja infrastrukture, naglasivši da Vlada pored toga izdvaja značajna sredstva za boračku populaciju te mlade kroz projekt stipendiranja i podršku zapošljavanju i samozapošljavanju.

Na sastanku je istaknuto kako općina Zavidovići ima specifične probleme u privredi, s obzirom da je nekadašnji privredni gigant "Krivaja" bio nosilac privrednog razvoja ove općine, te da treba tražiti prostora za zapošljavanje i razvoj u drugim oblastima, prvenstveno u turizmu.



"Potencirali smo razvoj turizma i korištenje prirodnih ljepota kojima općina obiluje i koje treba staviti u funkciju razvoja općine i privlačenja domaćih i stranih turista. Park prirode Tajan je jedan od najvećih potencijala i tu su već realizirana određena ulaganja, koja ćemo nastaviti i u narednom periodu. Istovremeno ćemo zajedno tražiti rješenja za oživljavanje Krivaje i pokretanje drugih industrijskih kapaciteta", kazao je Ganić, pozvavši lokalnu administraciju da bude agilnija i da se prijavljuje na javne pozive za

korištenje podsticaja kroz programe koje implementira Vlade Zeničko-dobojskog kantona.

Posjeta općini Zavidovići upriličena je na poziv općinskog načelnika, kao i prilikom ranijih posjeta općinama Olovo, Vareš, Žepče i Tešanj.

Zahvalivši se na posjeti, načelnik Mujanović je naglasio kako općina Zavidovići dijeli probleme većine drugih lokalnih zajednica u Zeničko-dobojskom kantonu, a to je, prije svega, odliv radne snage, koji trebaju zajedno rješavati svi nivoi vlasti, kao i komunalne probleme od kojih je posebno naglašen problem odvoza smeća na Regionalnu deponiju Mošćanica u Zenici. /kraj/

222. PREMIJER GANIĆ I MINISTAR ČOLAKOVIĆ ODALI POČAST I PRIZNANJE PRIPADNICIMA TREĆEG KORPUSA ARMIJE R BiH



ZENICA, 29.11.2019. - U Brezi je obilježena 27. godišnjica formiranja Trećeg korpusa Armije Republike Bosne i Hercegovine u organizaciji Saveza ratnih vojnih invalida Zeničko-dobojskog kantona.

Nakon polaganja cvijeća i odavanja počasti na šehidskom mezarju, u gradskoj kino sali održana je akademija kojoj su prisustvovali članovi porodica šehida i poginulih boraca, ratni vojni invalidi, veterani, članovi Udruženja generala i nosilaca priznanja "Zlatni ljiljan", predstavnici vlasti te brojni građani među kojima je bio veliki broj mladih.

U ime Vlade Zeničko-dobojskog kantona skupu su se obratili premijer **Mirza Ganić** i ministar za boračka pitanja **Fahrudin Čolaković**, čestitajući godišnjicu formiranja korpusa koji je odigrao presudnu ulogu u odbrani BiH, a posebno Srednje Bosne.

Treći korpus dao je 6.343 šehida i poginulih boraca, 8.144 ranjenih, 277 pripadnika je odlikovano najvećim ratnim priznanjem "Zlatni ljiljan", 41 "Zlatnom policijskom značkom", a dvije brigade - 303. i 317. dobile su kolektivno priznanje "Zlatni ljiljan".

"Pripadnici Trećeg korpusa, zajedno sa ostalim pripadnicima Armije RBiH, bili su velika prepreka ciljevima agresora. Osnovni cilj agresora je bio da nestane Bosna kao država i Bošnjaka kao naroda na ovim prostorima. Vaša borba je bila veličanstvena i to su nepobitne činjenice", kazao je premijer Ganić.



Istakao je da Vlada ZDK od formiranja kantona kontinuirano vodi brigu od svim boračkim populacijama, počevši od ratnih vojnih invalida, porodica šehida i poginulih boraca do demobilisanih boraca. Kontinuitet brige je evidentan po činjenici da su svake godine sredstva iz budžeta Zeničko-dobojskog kantona za boračku populaciju veća.



Vlada godinama izdvaja sredstva za trajno zbrinjavanje boraca i njihovih porodica, posebno brine o liječenju i nabavci ortopedskih pomagala i lijekova te stipendira djecu i članove porodica boračke populacije. Vodi brigu i o spomen-obilježjima, a svi značajni datumi se obilježavaju na dostojan način, uz pomoć boračkim udruženjima i savezima aktivnim na području ZDK.

"U isto vrijeme smo svjesni da sve ono što izdvaja država nije ni izdaleka dovoljno za siguran i normalan život i obezbjeđenje

egzistencije borcima i njihovim porodicama. Zbog toga Vlada ZDK nastoji svake godine što više uvećati sredstva koja se po raznim osnovama izdvajaju za boračku populaciju u cjelini. Vi to zaslužujete više nego iko drugi", kazao je, obraćajući se prisutnima, premijer Ganić.

Predstavnici Organizacije ratnih vojnih invalida Breza '92 uručili su ovom prilikom premijeru Ganiću i ministru Čolakoviću zahvalnice za izuzetnu saradnju i pomoć u radu ove organizacije. /kraj/

223. POTPISANI UGOVORI SA DESET KORISNICIKA SUBVENCIIJA ZA POKRETANJE POSLOVNIH IDEJA I REGISTRACIJU PRIVREDNIH SUBJEKATA



ZENICA, 02.12.2019. - Ministar za privredu Zlatko Jelić potpisao je danas ugovore sa deset korisnika podsticaja iz Programa subvencioniranja troškova kod pokretanja poslovnih ideja i registracije privrednih subjekata u 2019. godini, za što je ovo ministarstvo izdvojilo 100.000 KM. Po 10.000 KM dobilo je osam fizičkih lica,

te dva obrta iz ZDK.

"Odobrena sredstva se mogu utrošiti za troškove registracije biznisa, nabavku proizvodnih mašina i opreme neophodne pri otpočinjanju poslovanja te opremanje i rekonstrukciju prostora koji će biti korišten u proizvodne svrhe", rekao je ministar Jelić, navodeći kako su sredstva dodijeljena putem javnog poziva, a Komisija start-up programa je nakon provedene specijalističke obuke prihvatila deset od ukupno 19 dostavljenih prijava.

Odobrena sredstva obrtima će biti doznačena nakon zaključivanja pojedinačnih ugovora, a korisnicima - fizičkim licima nakon što dostave dokaze o registraciji privrednog subjekta. Korisnici su dužni da u roku od šest mjeseci dostave izvještaj o namjenskom utrošku sredstava i implementaciji projektne ideje.

Ministarstvo za privredu ovaj program provodi u saradnji s Regionalnom razvojnom agencijom za centralnu BiH - REZ. Obaveza resornog ministarstva je da osigura finansijsku, tehničku i savjetodavnu podršku potrebnu tokom implementacije projekta, da za svakog korisnika osigura grant u iznosu do 10.000 KM te da nadgleda procese implementacije mjera i registracije preduzeća od strane nagrađenih aplikanata.

Obaveza REZ agencije je da obezbijedi stručnu mentorsku podršku u prvih šest mjeseci u ukupnom trajanju od pet dana po aplikantu, kako bi se odgovorilo na povećan rizik poslovanja i uticalo na održivost registriranih biznisa. /kraj/

224. VLADA ZDK OSIGURALA VANREDNI PRIJEVOZ ZA UČENIKE IZ FATIĆA I BRANOŠICE U BEGOVOM HANU

ZENICA, 03.12.2019. - Vlada Zeničko-dobojskog kantona dala je saglasnost menadžmentu OŠ "Begov Han" Begov Han Žepče za organiziranje i osiguranje dodatnog besplatnog prijevoza za 23 učenika na relaciji "Begov Han - Fatići - Branošica - Begov Han". Ministarstvo za obrazovanje, nauku, kulturu i sport ZDK će za vanredni prijevoz učenika iz zaselaka Fatići i Branošica do kraja ove školske godine izdvojiti dodatnih 15.200 KM.



Prijevoz je osiguran na zahtjev školskog odbora, jer je put do zaselaka Fatići i Branošica u izuzetno lošem stanju, sa dosta krivina, bez trotoara i bankina te oko kilometar makadama koji prolazi kroz područje bez ulične rasvjete. Učenici na putu do škole svakodnevno pješače tri i više kilometara.

U to su se jučer lično uvjerili ministar za obrazovanje, nauku, kulturu i sport **Spahija Kozlić** i predsjedavajući Skupštine ZDK **Čazim Huskić** koji su posjetili Fatiće u pratnji direktora škole **Nevresa Memčića** i predsjednika školskog odbora **Selvera Jusufovića**.

"Uvažili smo zahtjev školskog odbora, a sada očekujemo od Općine Žepče da obezbijedi zimsko održavanje lokalnog puta. Ovo je šesnaesta vanredna linija koju smo uveli u tekućoj školskoj godini, što iziskuje značajna finansijska sredstva, a u odnosu na prošlu godinu to je pet novih linija", kazao je ministar Kozlić.

Najavio je rigorozne kontrole vanrednog prijevoza, što je dopisom zatražio i od uprava osnovnih škola u Zeničko-dobojskom kantonu, s obzirom na saznanja o zloupotrebama najčešće kroz spajanje autobusnih linija, organiziranje prijevoza automobilima i drugim neprikladnim prijevoznim sredstvima, a insistirat će se i na strožijim kontrolama ispravnosti vozila. /kraj/

225. MINISTAR ČOLAKOVIĆ PRIMIO SEDMEROSTRUKE POBJEDNIKE KANTONALNOG TURNIRA U SJEDEĆOJ ODBOJCI

ZENICA, 03.12.2019. - Ministar za boračka pitanja ZDK **Fahrudin Čolaković** primio je igrače i trenere Kluba sjedeće odbojke "Čelik 07" Zenica, pobjednika 9. turnira u sjedećoj odbojci koji je ovog vikenda odigran u Maglaju.



Tradicionalni turnir organizira Savez sjedeće odbojke Zeničko-dobojskog kantona povodom Dana državnosti Bosne i Hercegovine, Svjetskog dana invalidnih osoba i Dana Trećeg korpusa ARBiH, a Zeničani su po sedmi put osvojili pobjednički pehar.

"Ponosan sam na rezultate ovog izrazito uspješnog sportskog kolektiva, koji na najbolji mogući način pokazuju koliko je sport važan za rehabilitaciju boračke populacije. Na Svjetski dan osoba sa invaliditetom, 3. decembar, želim da kažem da će podrška invalidskom sportu ostati jedan od prioriteta ovog ministarstva", kazao je ministar Čolaković. /kraj/

226. POLJOPRIVREDNIM PROIZVOĐAČIMA U ZDK-U ODOBRENI PODSTICAJI U IZNOSU OD 260.117,00 KM

ZENICA, 05.12.2019. - Na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona je na današnjoj sjednici odobrila isplatu podsticaja poljoprivrednim proizvođačima u ukupnom iznosu od 260.117,00 KM.



Deset pravnih lica i obrtnika koji se bave otkupom mlijeka ostvarilo je pravo na podsticaj u iznosu od 215.667,00 KM.

Tri otkupljivača iz Zavidovića, Tešnja i Visokog dobili su podsticaj za otkup svježeg povrća i voća u iznosu od 22.275,00 KM.

Osam poljoprivrednih proizvođača koji se bave uzgojem koštičavog, jabučastog i

jezgrastog voća u ZDK-u dobili su podsticaj za zasnivanje novih zasada u iznosu od 20.375,00 KM.

Jednoj firmi iz Visokog odobreno je 1.800,00 KM za zasnivanje novih zasada jagodičastog voća. /kraj/

227. TIM VLADE ZDK ZA BORBU PROTIV KORUPCIJE ODRŽAO SASTANAK SA PREDSTAVNICIMA MEDIJA

ZENICA, 06.12.2019. - U Zenici je danas održan sastanak članova Tima Vlade Zeničko-dobojskog kantona za borbu protiv korupcije sa urednicima i novinarima koji prate rad ovog nezavisnog tijela. Sastanak je organiziran u saradnji sa misijom OSCE-a u BiH. Nakon analize dosadašnje saradnje, razmjene informacije i iskustava, ocijenjeno je kako je podizanje svijesti javnosti o važnosti prevencije i borbe protiv korupcije zajednički cilj Tima i medija.



U tom smislu, dogovoreno je da se pojača komunikacija između Tima i medija putem Pres službe ZDK-a, kao institucionalnog organa, te da se, uz pomoć Misije OSCE-a u BiH, pripremi i realizira jedna kvalitetna obuka za novinare kako bi se dodatno senzibilizirali i osposobili za izvještavanje o pojedinačnim slučajevima i općenito borbi protiv korupcije.

Konstatirano je da je Tim Vlade ZDK za borbu protiv

korupcije u protekle tri godine uspostavio dobru saradnju sa pravosudnim institucijama, akademskom zajednicom i organizacijama civilnog društva, aktivno je učestvovao u koordinaciji za borbu protiv korupcije na nivou BiH, kao i na nivou Federacije BiH gdje je uspostavljena odlična saradnja sa drugim kantonalnim timovima.

Na nivou ZDK uspostavljen je kvalitetan zakonski okvir i sistem prevencije korupcije u 35 institucija - ministarstvima, institucijama, direkcijama i zavodima, školama, Univerzitetu u Zenici, javnim ustanovama i preduzećima, gdje su imenovane kontakt tačke i doneseni odgovarajući planovi koji se provode.

Najvažniji rezultati i postignuća na provedbi Strategije i akcionog plana za borbu protiv korupcije u periodu 2017-2019. godina su institucionalizacija Tima, donošenje Uredbe o zapošljavanju u javnom sektoru, pokretanje revizije diploma u javnom sektoru, analiza provedenih disciplinskih postupaka te analiza ugovora o djelu.

Iduće godine planirano je donošenje nove Strategije i akcionog plana za borbu protiv korupcije za naredni četverogodišnji period, koja bi trebala napraviti iskorak u pravcu korištenja informacionih tehnologija u borbi protiv korupcije, a na osnovu dobre prakse drugih kantona u FBiH. /kraj/

228. VLADA ZDK ZA PRIJEVOZ UČENIKA U 2019. IZDVOJILA 4,4 MILIONA KM

ZENICA, 10.12.2019. - Vlada Zeničko-dobojskog kantona godišnje za prijevoz učenika osnovnih škola koji stanuju na udaljenosti većoj od pet kilometara u jednom pravcu od škole izdvaja oko 4 miliona KM. Pored toga, značajna sredstva izdvaja i za prijevoz đaka koji stanuju na udaljenosti manjoj od pet kilometara, ukoliko posebna komisija Vlade utvrdi da je ugrožena saobraćajna sigurnost učenika.



Vlada je na posljednje tri sjednice donijela šest novih odluka o uvođenju vanrednog prijevoza, tako da je broj osnovnih škola povećan sa prošlogodišnjih 11 na 16 škola u 2019. godini. Novim odlukama data je saglasnost školskim menadžmentima za osiguravanje besplatnog prijevoza za učenike tri

zeničke osnovne škole - 130 učenika OŠ "Hasan Kikić" Tetovo, 98 učenika OŠ "Ćamil Sijarić" Nemila i 125 učenika OŠ "Alija Nametak". Također, data je saglasnost za organiziranje besplatnog prijevoza za 23 učenika OŠ "Begov Han" Begov Han, 81 učenika JU Prva osnovna škola Zavidovići te 80 đaka JU OŠ "Novi Šeher" Novi Šeher Maglaj. Za ovih šest linija izdvojeno je 118.740 KM.

*"U 2018. godini vanredni prijevoz ispod pet kilometara osiguran je za 917 učenika iz 11 osnovnih škola i u te svrhe je utrošeno 269.762 KM. Taj broj se konstantno povećava i u ovoj godini smo za 16 osnovnih škola izdvojili 400.000 KM, tako da ukupno izdvajanje za prijevoz učenika u ovoj školskoj godini iznosi 4,4 miliona KM", kaže **Spahija Kozlić**, ministar za obrazovanje, nauku, kulturu i sport ZDK.*

Apelirao je na gradove i općine da prilikom pripreme i realizacije programa utroška sredstava za rekonstrukciju i održavanje puteva prioritet budu upravo lokalne saobraćajnice na kojima se vrši školski prijevoz i kojima se kreću djeca.

Ministar Kozlić je od menadžmenata škola zatražio da vrše stroge kontrole školskog prijevoza kako bi se spriječile zloupotrebe u vidu spajanja linija, vršenja prijevoza automobilima i neprikladnim prijevoznim sredstvima, kao i da se vrše kontrole tehničke ispravnosti vozila. /kraj/

229. ŠKOLE ZA 21. VIJEK: U ZENICI ODRŽANO TREĆE TAKMIČENJE IZ PROGRAMIRANJA MICRO:BIT UREĐAJIMA

ZENICA, 10.12.2019. - Na trećem po redu takmičenju iz programiranja uz pomoć micro:bit uređaja, koje je održano danas u Zenici, pobjedu je odnio tim Osnovne škole "Velešićki heroji" iz Sarajeva. Drugo mjesto je osvojila ekipa OŠ "Biogradi" iz Širokog Brijega, a treći su bili učenici OŠ "Čamil Sijarić" Nemila.



Takmičenje je organizirano u sklopu programa "Škole za 21. vijek" koji u Bosni i Hercegovini implementira British Council, a podržava Vlada Velike Britanije. Škole iz prvog, od pet, ciklusa obuka bile su pozvane da predaju svoje radove u digitalnom formatu, nakon čega je stručni žiri pozvao na takmičenje autore 20 najboljih radova.

Zadaća učenika je bila da osmisle projekte kao odgovor na Ciljeve održivog razvoja koje je definirao UN. Učenici **Amar Garčević** i **Edin Begović** su osmislili pobjednički projekat "Doniraj hranu, ne bacaj", koji su ga kreirali na način da se ostaci hrane iz tržnih centara uz pomoć robota prikupljaju i distribuiraju onima kojima je to potrebno.

Učenike su danas pozdravili i s njima se družili **Matthew Field**, britanski ambasador u BiH, **Larisa Halilović**, direktorica British Councila u Bosni i Hercegovini i **Spahija Kozlić**, ministar obrazovanja, nauke, kulture i sporta Zeničko-dobojskog kantona.

Ambasador Field je podsjetio da je projekt "Škole za 21. vijek" najveća investicija vlade njegove zemlje u oblasti obrazovanja na području zapadnog Balkana.

"Na ovaj način želimo pokazati svoju posvećenost poboljšavanju kvalitete obrazovanja u pozitivnim promjenama, kada je u pitanju ekonomija, sigurnost i stabilnost", kazao je Field.

Direktorica British Councila u BiH je rekla kako je impresionirana kreativnošću, timskim radom i entuzijazmom učenika iz Zenice, Sarajeva, Olova, Širokog Brijega, Tešnja, Vareša, Breze, Nemile i Gruda, čiji su projekti uspješno prošli prvu fazu ocjenjivanja.



"Divno je vidjeti pozitivan uticaj koji je program imao u učionicama širom Bosne i Hercegovine", kazala je Halilović.

Ministar Spahija Kozlić je izrazio zadovoljstvo što je među 20 ekipa učesnika čak 10 bilo iz Zeničko-dobojskog kantona, što potvrđuje posvećenost škola realizaciji projekta "Škole za 21. vijek" koji će se u ZDK-u realizirati iduće tri godine. Projekt je u ZDK-u obuhvatio 54 škole koje su dobile micro:bit uređaje, te edukaciju nastavnika i direktora.

"Osnovni cilj je razvijati ključne vještine za 21. vijek, a to je razvijanje kritičkog mišljenja. Bio sam razočaran rezultatima PISA istraživanja, a evo danas sam ponosan i radostan jer vidim šta naša djeca zapravo mogu", kazao je ministar Kozlić.

Pobjednici takmičenja u programiranju na nivou zemlje, imat će priliku da učestvuju na regionalnom takmičenju koje će se održati u sklopu Digitalnog Samita za Zapadni Balkan, aprila 2020. godine u Tirani.
/kraj/

230. VLADA PODRŽALA INICIJATIVU DA SE NACIONALNE USTANOVE KULTURE PROGLASE DRUŠTVIMA OD POSEBNOG ZNAČAJA

ZENICA, 12.12.2019. - Premijer Zeničko-dobojskog kantona **Mirza Ganić** primio je u svom uredu delegaciju Hrvatskog kulturnog društva "Napredak" i Bošnjačke zajednice kulture "Preporod", koju su predvodili predsjednici **dr. Nikola Čiča** i **prof. dr. Sanjin Kodrić**. Sastanku su prisustvovali ministar za obrazovanje, nauku, kulturu i sport **prof. dr. Spahija Kozlić** i ministar finansija **Josip Lovrić**.



"Napredak" i "Preporod" osnovani su početkom 20. stoljeća i uz druga dva nacionalna kulturna društva, srpsku "Prosvjetu" i jevrejsku "La Benevolenciju", najstarije su i temeljne ustanove kulture Hrvata i Bošnjaka, koje su u 120 godina postojanja, s malim prekidima u radu u bivšoj državi, ostavile dubok trag, posebno u periodu nakon agresije na Bosnu i Hercegovinu.

Predsjednici "Napretka" i "Preporoda" su istakli kako ova društva sve teže funkcioniraju, jer nemaju stabilan izvor finansiranja, te da su s tim ciljem pokrenuli inicijativu da se posebnim zakonom na nivou Federacije BiH regulira status i finansiranje četiri nacionalna kulturna društva, kao institucija kulture od posebnog značaja. Do tada, traže od institucija FBiH i kantona, uključujući i Zeničko-dobojski, da povećaju izdvajanja već u narednoj godini, kako bi se osigurala sredstva za redovan rad kao i projekte od značaja za očuvanje programskih aktivnosti društava.

Ministar Kozlić je podržao inicijativu da se ove ustanove proglase društvima od posebnog značaja i uvrste kao posebna budžetska stavka, po modelu izdvajanja za vjerske zajednice. Naveo je kako su izdvajanja za kulturu i izdavaštvo u ZDK-u nedostatna, ali da je Ministarstvo za obrazovanje, nauku, kulturu i sport ZDK preraspodjelama i uštedama na drugim stavkama uspjelo uvrstiti u budžet dva projekta BZK "Preporod" i božićne aktivnosti HKD "Napredak" u Zenici i Žepču.

Premijer Ganić se složio da se nacionalna udruženja zbog njihovog značaja ne mogu tretirati jednako kao i druga udruženja, obećavši da će Vlada sagledati mogućnosti da se za ove ustanove dogodio povećaju finansijska izdvajanja, ali kroz projekte i unutrašnje preraspodjele, jer je izrada Budžeta za 2020. godinu u završnoj fazi. /kraj/

231. VLADA DALA SAGLASNOST ZA PROVOĐENJE PROCEDURE DODJELE KONCESIJE ZA ISTRAŽIVANJE I EKSPLOATACIJU UGLJA U OPĆINI KAKANJ

ZENICA, 12.12.2019. - Vlada Zeničko-dobojskog kantona donijela je odluku o pristupanju provođenju procedure dodjele koncesije za istraživanje i eksploataciju mineralne sirovine - mrkog uglja na području općine Kakanj. Time je učinjen još jedan korak ka dodjeli prve koncesija za istraživanje i eksploataciju mrkog uglja u Zeničko-dobojskom kantonu.

Na osnovu pribavljene dokumentacije, Komisija za koncesije je utvrdila da za dodjelu navedene koncesije postoji javni interes, uz obavezu koncesionara da ispunjavanje uslove iz saglasnosti Vijeća općine Kakanj, predloživši Ministarstvu za privredu ZDK da pokrene proceduru dodjele koncesije za navedeni lokalitet.

Predviđeno vrijeme trajanja koncesije je 30

godina, a koncesionar će plaćati kontinuiranu koncesionu naknadu u iznosu od minimalno 0,80 KM po toni proizvedenog uglja, uz propisanu minimalnu količinu eksploatiranog uglja od 1.000 tona godišnje. Minimalna jednokratna naknada je predviđena u iznosu od 250 KM po hektaru eksploatacijskog polja.

*"Dodjela koncesija za istraživanje i eksploataciju uglja je veoma značajna i za lokalne zajednice i za kanton, jer se istovremeno ova oblast uređuje, a kroz koncesionu naknadu, koja se dijeli u omjeru 70:30 posto, osiguravaju investicije u lokalnu infrastrukturu, poboljšanje uslova građana i razvoj privrede. Ministarstvo za privredu je zaduženo da imenuje komisiju koja će provesti postupak dodjele koncesije, a očekujem da ćemo uskoro potpisati prvi koncesioni ugovor za eksploataciju uglja u ZDK-u", kazao je premijer **Mirza Ganić**.*

Pored općine Kakanj, u toku je procedura dodjele koncesija za općinu Breza i grad Zenicu. /kraj/



232. POČINJE EVIDENCIJA I LJEKARSKI PREGLEDI POLAZNIKA PROGRAMA OBAVEZNOG PREDŠKOLSKOG ODGOJA I OBRAZOVANJA U ZDK



ZENICA, 13.12.2019. - Ministarstvo za obrazovanje, nauku, kulturu i sport Zeničko-dobojskog kantona i ove školske godine planira realizaciju Programa obaveznog predškolskog odgoja i obrazovanja za djecu u godini pred polazak u osnovnu školu, u skladu sa članovima 22., 46., 48., 52., 56. i 58. Zakona o predškolskom odgoju i obrazovanja

(„Službene novine Zeničko-dobojskog kantona“, broj: 7/10 i 8/12), u objektima javnih i privatnih predškolskih ustanova, koje su verificirane, tj. upisane u Registar predškolskih ustanova Zeničko-dobojskog kantona, koji vodi Ministarstvo, ali i u objektima centralnih i područnih osnovnih škola na području Zeničko-dobojskog kantona, s tim da se ne remeti nastavni proces.

Program obaveznog predškolskog odgoja i obrazovanja u školskoj 2019/2020. godini namijenjen je djeci koja će do 1. marta 2020. godine navršiti 5 godina i 6 mjeseci života i koja, u ovoj školskoj godini, nisu pohađala neku od predškolskih ustanova.

Roditelji/staratelji djece trebaju prijaviti dijete za Program obaveznog predškolskog odgoja i obrazovanja u školu koju će dijete pohađati, kod pedagoga škole ili osobe koju je ovlastio direktor škole. Za evidentiranje nije potrebno prisustvo djeteta, niti prilaganje bilo kakve dokumentacije.

Evidencija djece će se obaviti u periodu od 20.12. 2019. godine do 30.12. 2019. godine, u školi koju će djeca pohađati.

Tokom mjeseca januara 2020. godine obaviti će se besplatni ljeкарski pregledi djece, polaznika Programa obaveznog predškolskog odgoja i obrazovanja, a roditelji/staratelji trebaju insistirati na adekvatnom ljeкарskom uvjerenju za upis u predškolsku ustanovu.

O upisu djece u Program obaveznog predškolskog odgoja i obrazovanja, potrebnoj dokumentaciji, kao i vremenu realizacije Programa roditelji/staratelji će biti obaviješteni putem sredstava javnog informiranja i putem obavještenja na školi u kojoj su djeca evidentirana. /kraj/

233. VLASNICIMA UGINULIH ŽIVOTINJA NA IME NAKNADE DIJELA ŠTETE ODOBRENO 19.430,00 KM

ZENICA, 13.12.2019. - Na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona donijela je odluku o odobravanju sredstava u iznosu od 19.430,00 za nadoknadu dijela štete vlasnicima životinja kod naglih uginuća.



U periodu od januara 2018. do novembra 2019. zaprimljeno je 38 zahtjeva za pomoć u naknadi dijela štete za naglo uginula goveda, ovce, koze, pčelinja društva, jarad, janjad i koke nosilice, koje su dostavili farmeri iz Zenice, Žepča, Tešnja, Visokog, Zavidovića, Maglaja i Kaknja. Prihvaćeni su svi zahtjevi, a odobreni su iznosi za uginulu kravu 400,00 KM, junicu 300,00 KM, tele 100,00 KM, ovcu ili kozu 40,00 KM, jedno pčelinje društvo 30,00 KM, jarad ili janjad 20,00 KM i koke nosilice 3,00 KM po kljunu.

Za finansiranje troškova eutanazije i neškodljivog uklanjanja oboljelih životinja odobreno je 6.321,00 KM, dijagnostičko ispitivanje životinja i službenih uzoraka po nalogu veterinarske inspekcije 991,00 KM, dok je za dijagnostičku pretragu uzoraka na Američku gnjiloću pčelinjeg legla u jednom pčelinjaku u općini Kakanj odobreno 320,00 KM. /kraj/

234. ODOBRENO UVOĐENJE BESPLATNE AUTOBUSNE LINIJE ZA UČENIKE IZ HRUSTIĆA I KLOPČA

ZENICA, 17.12.2019. - Vlada Zeničko-dobojskog kantona dala je saglasnost menadžmentu OŠ "Skender Kulenović" Zenica za organiziranje i osiguranje dodatnog prijevoza za 133 učenika na relaciji Hrustići (Kelave) - Klopče - Radakovo. Ministarstvo za obrazovanje, nauku, kulturu i sport će za ovu namjenu u tekućoj školskoj godini izdvojiti dodatnih 15.160 KM.



"Ovo je sedamnaesta osnovna škola u ZDK-u kojoj smo dali saglasnost za organiziranje i osiguranje besplatnog prijevoza za učenike čije je mjesto stanovanja udaljeno od škole manje od pet kilometara u jednom pravcu, a čija je saobraćajna sigurnost ugrožena. Djeca u konkretnom slučaju pješake nekategoriziranom cestom koja prolazi kroz radilište na trasi autoputa, zbog čega

*smo se opredijelili da damo saglasnost", kazao je ministar **Spahija Kozlić**.*

Za redovan prijevoz đaka, na relacijama dužim od pet kilometara do škole, iz budžeta Zeničko-dobojskog kantona je u školskoj 2019/2020. godini izdvojeno 4 miliona KM, tako da sa 17 vanrednih prijevoznih linija, koje koštaju više od 400.000 KM, ukupno izdvajanje za prijevoz đaka u ZDK iznosi oko 4,4 miliona KM. /kraj/

235. SARADNJOM PRIVREDE I OBRAZOVANJA DO KVALITETNIJE RADNE SNAGE

ZENICA, 18.12.2019. - Ministarstvo za obrazovanje, nauku, kulturu i sport Zeničko-dobojskog kantona, u saradnji i uz finansijsku podršku njemačke organizacije DVV International - Ured za Bosnu i Hercegovinu, organiziralo je u Zenici okrugli sto o temi "Unapređenje saradnje obrazovanja odraslih i privrede". Na skupu su sudjelovali predstavnici te institucija obrazovanja, privrede i poslodavaca, sektora rada i zapošljavanja te lokalnih zajednica u ZDK-u.



Naglašeno je da je neophodno jačati saradnju obrazovanja i privrede kako bi se unaprijedila znanja, vještine i kompetencije radne snage, jer u sadašnjim uslovima, privreda ne može zadovoljiti potrebe za radnom snagom, iako je, prema podacima za mjesec septembar, na evidenciji biroa rada u ZDK bilo 55.178 nezaposlenih.

*"Samo sinergijskim djelovanjem institucija vlasti, službi za zapošljavanje, obrazovnih institucija i kompanija može se riješiti disbalans između potreba tržišta rada i obrazovnog sistema", kazala je **Dijana Babić**, predsjednica Privredne komore ZDK.*

Anes Čerkez, projekt koordinator u DVV Internacional - Ured za BiH, istakao je da je u fokusu ove organizacije u Bosni i Hercegovini, a time i u Zeničko-dobojskom kantonu, jačanje međusektorske



saradnje nadležnih obrazovnih institucija i poslodavaca te drugih relevantnih aktera u oblasti obrazovanja odraslih.

"Saradnja trenutno nije na potpuno zadovoljavajućem nivou i zaključak ovog kao i ranijih okruglih stolova je da ona mora biti unaprijeđena u što skorije vrijeme kako bi se osigurala funkcionalnost sistema obrazovanja u ZDK", kazao je Čerkez.

Ministar obrazovanja, nauke, kulture i sporta Spahija Kozlić izrazio je zadovoljstvo što je obrazovanje tokom ove godine bilo u vrhu

prioriteta i interesovanja vlasti u ZDK, navodeći primjere dobre saradnje resornog ministarstva sa privredom i komorama, čiji je rezultat donošenje i primjena Pravilnika o izvođenju praktične nastave izvan škola, zatim poboljšanje funkcionalne pismenosti učenika kroz projekt "Škole za 21. vijek", koji se realizira u saradnji sa British Councilom, kao i odličnu saradnju na polju obrazovanja odraslih sa DVV International.

"Obrazovanje je kontinuum i traje cijelu godinu. Reforme obrazovanja trebaju ići u korak sa reformom zajednice, a zahtjevi zajednice moraju ići u pravcu da obrazovne vlasti pruže ono što oni traže", kazao je Kozlić. /kraj/

236. POTPISANI UGOVORI O REALIZACIJI PROJEKATA PODIZANJA SVIJESTI O OKOLIŠU

ZENICA, 17.12.2019. - U sjedištu Vlade Zeničko-dobojskog kantona danas su potpisani ugovori o realizaciji projekata iz oblasti zaštite okoliša za 2019. godinu - LOT 3 između Ministarstva za prostorno uređenje, promet i komunikacije i zaštitu okoliša i korisnika koji su odabrani putem javnog poziva.

Odobren je ukupno 71 projekt podizanja svijesti o okolišu u iznosu od 81.500 KM, a korisnici su nevladine organizacije, udruženja građana, javne i obrazovne institucije te mediji.

Arnel Isak, ministar za prostorno uređenje, promet i komunikacije i zaštitu okoliša, rekao je da je ovo drugi javni poziv za finansiranje projekata podizanja svijesti o zaštiti prirode i

ekološki prihvatljivog ponašanja koji je realiziran u toku ove godine, a na koji su se mogle prijaviti i korisnici sredstava iz prethodnog javnog poziva.

Od projekata u oblasti zaštite okoliša koji su realizirani u 2019. godini, ministar Isak je izdvojio pomoć gradovima i općinama za zbrinjavanje i odvožnje komunalnog otpada u iznosu od 900.000 KM, projekt čišćenja obala i korita rijeke Bosne vrijedan 500.000 KM, te izgradnju Eko kuće Smetovi iznad Zenice za što je ove godine odobreno 100.000 KM, a dogodine je planirano još 200.000 KM.

Iduće godine planirana je kupovina opreme za sterilizaciju medicinskog i infektivnog otpada za četiri bolnice u ZDK-u. /kraj/



237. POLJOPRIVREDNIM PROIZVOĐAČIMA ODOBRENI PODSTICAJI U IZNOSU OD 1,3 MILIONA KM



ZENICA, 19.12.2019. - Na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona donijela je više odluka o isplati podsticaja poljoprivrednim proizvođačima u ukupnom iznosu od 1.304.474,70 KM.

Na ime podrške za registrirane farme goveda u ZDK-u odobrena je isplata 718.900,00 KM. Pravo na podsticaj ostvarile su 143 farme sa 2.050 grla, i to u iznosu od 400,00 ili 100,00

KM po grlu, ovisno o tome da su farme u sistemu otkupa mlijeka.

Uzgoj brojlera podržan je sa 442.660,00 KM, a sredstva je dobila 51 farma koja je ostvarila pravo na podsticaj od 0,10 KM po jednom utovljenom brojleru.

Odobreno je 76.665,00 KM na ime sufinansiranja laboratorijskih pretraga na mikroorganizme mlijeka koje se stavlja u javnu potrošnju ili se prerađuje u vlastitom domaćinstvu. Farmeri su ostvarili pravo na sredstva od 15,00 KM po uzorku.

Za osam otkupljivača jagodičastog voća odobren je podsticaj u iznosu od 65.602,00 KM, dok su tri proizvođača plantažne borovnice i aronije dobila subvenciju od 647,70 KM. /kraj/

238. DELEGACIJA VLADE ZDK ODALA POČAST BRANITELJIMA IZ OPĆINE ZAVIDOVIĆI



ZAVIDOVIĆI, 19.12.2019. - U okviru obilježavanja 19. decembra - Dana ratnih jedinica općine Zavidovići, brojne delegacije položile su cvijeće i odale počast na Centralnom spomen obilježju šehidima, poginulim braniocima i civilnim žrtvama odbrambeno-oslobodilačkog rata na prostoru općine Zavidovići. Cvijeće su u ime Vlade Zeničko-dobojskog kantona položili izaslanik i savjetnik premijera **Mirnes Burkić** te ministrica za rad, socijalnu politiku i izbjeglice **Azra Šabanović**.

Obraćajući se prisutnima, Burkić je istakao da su pripadnici ratnih jedinica općine Zavidovići, zajedno sa ostalim pripadnicima Armije RBiH, odigrali veliku ulogu u borbi protiv agresora, koji su željeli da nestane Bosne kao države i Bošnjaka kao naroda. Naveo je da je boračka populacija u fokusu Vlade Zeničko-dobojskog kantona, koja vodi brigu o svim kategorijama, povećavajući svake godine izdvajanja iz kantonalnog budžeta.

"Izdvajamo sredstva za trajno stambeno zbrinjavanje boraca i njihovih porodica, brinemo o liječenju i nabavci ortopedskih pomagala i lijekova, finansiramo banjsko liječenje, stipendiramo djecu i članove boračkih porodica, vodimo brigu o spomen-obilježjima, a pomažemo i da se kroz obilježavanje značajnih datuma i aktivnosti boračkih udruženja sačuvaju tekovine naše oslobodilačke borbe", kazao je Burkić.

U sklopu kompleksa spomen obilježja otvorena je Spomen soba odbrambeno-oslobodilačkog rata 1992-1995, čije je opremanje dijelom finansiralo Ministarstvo za boračka pitanja ZDK. U Centru za kulturu premijerno je prikazan dokumentarni film "Ratni put zavidovićkih ratnih jedinica 92-95". /kraj/



239. VLADA PODRŽALA ZAPOSŁJAVANJE I SAMOZAPOSŁJAVANJE 43 PRIPADNIKA BRANILAČKE POPULACIJE



ZENICA, 19.12.2019. - U sjedištu Vlade Zeničko-dobojskog kantona potpisani su ugovori o dodjeli podsticaja za zapošljavanje i samozapošljavanje 43 pripadnika branilačke populacije za što je iz budžeta Ministarstva za boračka pitanja izdvojeno 248.000 KM. Otvorene su 24 nove firme, pet osoba je zaposleno u postojećim firmama, a 14 pripadnika branilačke populacije, koji su ranije pokrenuli biznis, dobilo je novčani podsticaj u okviru programa "Biznis plus".

"Od 2015. godine kroz ovaj projekt smo pomogli zapošljavanje 1.000 pripadnika branilačke populacije. Samo u ovoj godini smo izdvojili 1,55 miliona KM i omogućili da posao dobije 270 osoba, od kojih je 130 pokrenulo biznis, 30 je zaposleno u postojećim firmama, a podršku je dobilo i 110 obrtnika koji





*su ranije pokrenuli posao, a koji su uspješno poslovali u protekloj godini", kazao je ministar za boračka pitanja **Fahrudin Čolaković**.*

Podrška za zapošljavanje u postojećim firmama iznosi 7.200 KM za SSS i 8.400 KM za VSS, za pokretanje novog biznisa 8.000 KM, dok vlasnici firmi koji su ranije pokrenuli posao dobijaju podsticaj u rasponu od 1.000 do 5.000 KM zavisno od ostvarenih poslovnih rezultata.

Premijer **Mirza Ganić** uputio je čestitke korisnicima podsticaja istakavši da je podrška

u okviru Ministarstva za boračka pitanja ZDK samo jedan od vidova podrške Vlade zapošljavanju u ovom kantonu te da se značajna sredstva izdvajaju i putem Ministarstva za privredu.

"Strateški cilj ove vlade je razvoj i otvaranje novih radnih mjesta, tako da ovo nije pomoć nego naša podrška da kroz realizaciju poslovnih ideja riješite egzistencijalno pitanje, od čega korist ima cjelokupno društvo. Nadam se da ćete uspjeti i da ćete se dogodine prijaviti na naš program Biznis plus", kazao je premijer Ganić. /kraj/

240. PODRŠKA RADU SRPSKOG GRAĐANSKOG VIJEĆA - POKRETA ZA RAVNOPRAVNOST U BIH

ZENICA, 23.12.2019. - Premijer Zeničko-dobojskog kantona **Mirza Ganić** razgovarao je sa predsjednikom Srpskog građanskog vijeća - Pokreta za ravnopravnost u Bosni i Hercegovini (SGV) ZDK **Sretkom Radišićem** o dosadašnjim aktivnostima ove organizacije u Zeničko-dobojskom kantonu kao i planovima za narednu godinu.



SGV - Pokret za ravnopravnost u BiH od formiranja 1994. godine zalaže se za izgradnju Bosne i Hercegovine kao države na njenim temeljnim vrijednostima, a to su zajednički život, multietnički karakter života i ravnopravnost svih njenih naroda i građana. Posebno značajnu ulogu odigralo je u angažiranju i afirmaciji povratka izbjeglih i raseljenih osoba na cijelom prostoru BiH te uvođenju odredbe o konstitutivnosti u svim Ustavima, posebno u entitetima i kantonima.

Premijer Ganić je potvrdio opredjeljenje da podrži rad svih organizacija čija je misija unapređenje kvalitete i uslova života građana Zeničko-dobojskog kantona, a posebno povratničke populacije, navodeći da već podržava rad parohija u Kaknju i Visokom. Vlada će u skladu s mogućnostima budžeta u narednoj godini nastojati da pruži podršku radu Srpskog građanskog vijeća - Pokreta za ravnopravnost u BiH, kao i konkretnim projektima na terenu. /kraj/

241. PREMIJER GANIĆ RAZGOVARAO SA PREDSTAVNICIMA UDRUŽENJA DLAN I UDRUŽENJA OSOBA SA INVALIDITETOM ZDK



ZENICA, 23.12.2019. - Premijer Zeničko-dobojskog kantona **Mirza Ganić** sa saradnicima odvojeno je primio delegacije Kantonalnog udruženja roditelja osoba oboljelih od cerebralne paralize i drugih onesposobljenja **"Dlan" Zenica** i **Udruženja osoba sa invaliditetom ZDK**, a razgovarano je o problemima i potrebama ovih organizacija.

Udruženje "Dlan" je prije osam mjeseci, uz pomoć USAID-a, pokrenulo Servis centar za osobe sa invaliditetom, koji je do sada svojim korisnicima pružio

2.600 usluga. Servis centar brine o 76 korisnika svih uzrasta i stepena invaliditeta sa područja Zeničko-dobojskog kantona. Predstavnici udruženja "Dlan" očekuju da se osigura finansijska podrška za Servis centar u 2020. godini, kao i da se na esencijalnu listu lijekova u ZDK-u uvrste određeni lijekovi za teško invalidne osobe.

Premijer je podržao aktivnosti "Dlan-a", sugerirajući da se sa prijedlogom za dopunu esencijalne liste lijekova obrate Zavodu zdravstvenog osiguranja ZDK, te da se organizira novi sastanak u Ministarstvu zdravstva ZDK na kojem bi se sagledale mogućnosti unapređenja položaja invalidnih osoba. Najavio je da će ZDK do kraja godine dobiti budžet za 2020. godinu, tako da se već u februaru očekuje raspisivanje javnih poziva za finansiranje projekata, na koje će se moći prijaviti i udruženje "Dlan".



Na sastanku sa predstavnicima Udruženja osoba sa invaliditetom ZDK ukazano je na svakodnevne probleme u radu, a posebice na poteškoće prilikom zapošljavanja invalidnih osoba, što je primarna misija ovog udruženja. Udruženje je nedavno bilo prinuđeno da zbog finansijskih problema zatvori objekt u kojem je vršilo prodaju rukotvorina osoba sa invaliditetom. Premijer Ganić je obećao interventnu pomoć vlade kako bi udruženje prevladalo trenutne poteškoće u radu. /kraj/

242. PREMIJER GANIĆ RAZGOVARAO SA AMBASADOROM NEDIMOM MAKAREVIĆEM



ZENICA, 24.12.2019. - Premijer Zeničko-dobojskog kantona **Mirza Ganić** razgovarao je u svom uredu sa ambasadorom Bosne i Hercegovine u Norveškoj **Nedimom Makarevićem**. U fokusu razgovora bio je privredni ambijent u Zeničko-dobojskom kantonu te značaj privrede kao generatora razvoja.

Cijeneći da u Norveškoj postoji brojna bh. dijaspora, ambasador Makarević se ponudio da se angažira na uvezivanju privrednika iz Zeničko-dobojskog kantona sa privrednicima u Norveškoj, a posebice Bosancima i Hercegovcima koji imaju biznise u toj zemlji. /kraj/

243. GANIĆ: ZDK ĆE IDUĆE GODINE BITI VELIKO GRADILIŠTE



ZENICA, 24.12.2019. - Zadržali smo kurs i politiku fiskalne stabilnosti i razvoja, ali smo se okrenuli i rješavanju određenih problema i pitanja koja su opterećivala rad prethodne vlade - istakao je premijer ZDK **Mirza Ganić** na novogodišnjoj press konferenciji Vlade Zeničko-dobojskog kantona.

"Ispunili smo obaveze ZDK-a prema projektu Plava voda, usvojili Prostorni plan Zenice, omogućili i ubrzali kapitalne investicije u vodne projekte, inovirali programe podsticaja u privredi koji su fokusirani na jačanje konkurentnosti kompanija i edukaciju radne snage i izgradnju poslovnih zona. Uveli smo novine i u programe podsticaja u poljoprivredi, kako bismo nastavili rast i zadržali leaderske pozicije u granama kao što su peradarstvo, malinarstvo, plastenička proizvodnja i dali snažnu podršku razvoju stočarstva", kazao je Ganić.

Najavio je da će Vlada krajem sedmice donijeti odluke o podršci malinarskoj proizvodnji, gdje će po prvi put kantonalni podsticaj povećati sa prošlogodišnjih 23 na 32 KF po kilogramu za fizička i 40 KF za pravna lica.

Značajnim je ocijenio i projekt čišćenja rijeke Bosne na gotovo cijelom području ZDK, kao i programe podrške iz Fonda za zaštitu okoliša gdje su lokalne zajednice dobile značajna finansijska sredstva za zbrinjavanje otpada i podizanje ekološke svijesti kod građana.



Vlada je realizirala nabavku auta i opreme za MUP Zeničko-dobojskog kantona te stvorila pretpostavke da se u budžetu za 2020. godinu finansijska planiraju sredstva za povećanje plata policijskim službenicima.

Također, posvetila se i rješavanju obaveza kantona po osnovu pravosnažnih presuda po tužbama budžetskih korisnika, za period 2004-2015. godina, koje su teške 325 miliona KM, od čega je glavnica 155 miliona. Vlada je nedavno donijela akcioni plan kojim je utvrđen rok za

izmirenje obaveza od 22 godine, a u budžetu je planiran dio sredstava za ovu namjenu.

"Ubrzo ćemo objaviti javni poziv kako bismo omogućili onima koji žele da se odreknu kamate i dijela glavnice da prije naplate svoja potraživanja, jer želimo da ubrzamo isplatu obaveza koje prijete stabilnosti i likvidnosti Zeničko-dobojskog kantona. Vjerujem da će ova vlada ostati zapamćena po rješavanju jednog od najvećih problema ZDK-a od njegovog formiranja", kazao je premijer ZDK.

Intenzivirane su i aktivnosti na dodjeli koncesije za eksploataciju uglja u Kaknju, a nedavno je donesena odluka o pokretanju procedure javnog poziva tako da se očekuje da ubrzo bude potpisan prvi koncesioni ugovor za eksploataciju uglja u ZDK.

Napravljen je važan iskorak u politici stipendiranja studenata tako što su osigurana sredstva i omogućeno da stipendije dobiju svi studenti koji su podnijeli formalno ispravne aplikacije.

"Želimo pomoći roditeljima da školuju djecu i da grade budućnost u Bosni i Hercegovini. Značajna sredstva se izdvajaju i za finansiranje smještaja i ishrane studenata u studentskim centrima, kao i za rad brojnih nevladinih organizacija", kazao je Ganić, naglasivši da je u oblasti obrazovanja završen još jedan veliki projekt, a to je izgradnja OŠ "Hasan Kikić" Tetovo Zenica koja je koštala 2,3 miliona KM.

Među projektima koji su uspješno završeni u 2019. godini su i izgradnja spomen obilježja poginulim borcima i šehidima, izgradnja mosta u Tešnju te izgradnja saobraćajnice u poslovnoj Zoni Visoko, a provedene su i tenderske procedure i izabrani izvođači radova za veliki broj infrastrukturnih projekata koji će se implementirati s početkom građevinske sezone u 2020. godini.



"Javni radovi su nam jako važni, jer su oni motor razvoja našeg kantona. Pripremili smo Prijedlog budžeta za 2020. godinu i očekujemo da će budžet dobiti zeleno svjetlo kantonalne Skupštine na sjednici 30. decembra. To je vrlo važno, jer ćemo onda u idućih mjesec dana pripremiti programe utroška sredstava, a potom provesti postupak izbora izvođača radova za velike infrastrukturne projekte za koje smo već pripremili dokumentaciju u 2019., tako da očekujem da će ZDK iduće godine zaista biti veliko gradilište", rekao je Ganić.

Vlada je posvećena i borbi protiv korupcije, a u tom svjetlu se može posmatrati Uredba o zapošljavanju u javnom sektoru, čija je najvažnija odredba da se bira prvorangirani kandidat, kao i pokrenuta revizija diploma u javnom sektoru.

Ipak, ističe premijer Ganić, najvažnije je da je održana finansijska stabilnost i likvidnost budžeta, tako da se ustavne i zakonske obaveze izvršavaju na vrijeme. Isplata porodičnih naknada, stipendija, socijalnih i drugih transfera se vrši redovno, kao isplata plaća i naknada zaposlenih u policiji, prosvjeti i javnoj upravi.

"Pokazali smo da poslu pristupamo odgovorno i profesionalno te da smo se uhvatili u koštac sa problemima na čije se rješavanje čekalo godinama. Kurs koji smo zauzeli ne samo da je kontinuitet, nego smo napravili dodatni iskorak kako bismo imali što više zadovoljnih građana ZDK-a. Nadamo se da će i projicirani prohoditi sa većih nivoa biti ostvareni u planiranom iznosu te da ćemo iduće godine napraviti iskorak u odnosu na sve prethodne godine", kazao je Ganić.

Kao kvalitet ove vlade naveo je i otvorenost prema građanima, akademskoj zajednici, nevladinom sektoru i sportu, a sve aktivnosti, propisi, akti i javni oglasi institucija ZDK objavljuju se na internet stranici Vlade ZDK i putem press službe.

Premijer Ganić i ministri u Vladi uputili su katolicima čestitku povodom Božića, a svim građanima ZDK-a sretnu i uspješnu novu 2020. godinu. /kraj/

244. VLADA PODRŽAVA POVEZIVANJE PRIVREDNIKA I IZVOZ NA TRŽIŠTE INDONEZIJE

ZENICA, 24.12.2019. - Premijer Zeničko-dobojskog kantona **Mirza Ganić** razgovarao je sa ambasadorom Bosne i Hercegovine u Indoneziji **Mehmedom Halilovićem** o mogućnostima unapređenja ekonomske saradnje BiH i Indonezije.



U indonezijskoj prijestolnici Džakarti sredinom ovog mjeseca održan je najveći privredni sajam u tom dijelu jugoistočne Azije, u organizaciji tamošnjeg Ženskog internacionalnog kluba, na kojem se po prvi put predstavila i Bosna i Hercegovina.

Ambasador Halilović se zahvalio premijeru Ganiću i Vladi ZDK koja je finansirala predstavljanje proizvoda iz Zeničko-dobojskog kantona. Na sajmu su predstavljeni turistički i privredni potencijali BiH.

Privredna saradnja BiH i Indonezije intenzivirana je u minulih godinu dana zahvaljujući angažmanu diplomatske misije BiH na čelu sa ambasadorom Halilovićem.

Premijer Ganić je iskazao spremnost Vlade da u narednom periodu podrži povezivanje privrednika iz Indonezije i ZDK-a, kao i izvoz proizvoda i izlazak kompanija iz našeg kantona Zeničko-dobojskog kantona na veliko tržište Indonezije. /kraj/

245. ISAK: SPORAZUM NE SMIJE OSTATI MRTVO SLOVO NA PAPIRU



ZENICA, 25.12.2019. - Na inicijativu ministra za prostorno uređenje, promet i komunikacije i zaštitu okoline Zeničko-dobojskog kantona **Arnela Isaka**, u sjedištu Ministarstva je upriličen sastanak o stepenu realizacije Sporazuma o provođenju aktivnosti vezanih za projekat rekonstrukcije tunela Vranduk i mostova na magistralnoj cesti M-17.

Sastanku su, pored ministra Isaka sa saradnicima, prisustvovali i predstavnici JP Ceste Federacije BiH, predstavnici Gradske uprave Zenica, kao i predstavnik Koordinacije mjesnih zajednica tetovskog područja.

„Izvršili smo analizu dostignutog stepena realizacije potpisanog Sporazuma, te konstatovali da su sve strane u zadovoljavajućem obimu izvršile svoje preuzete obaveze. U cilju zadovoljavanja interesa javnosti i građana koji zaslužuju tačnu i pravovremenu informaciju odlučili smo da eksperti svih strana potpisnika Sporazuma utvrde tačan stepen realizacije preuzetih obaveza na osnovu kojeg ćemo utvrditi osnovu za realizaciju preostalih aktivnosti na finalizaciji projekta rekonstrukcije tunela Vranduk i mostova na magistralnoj cesti M-17“, kaže ministar Isak.

Bila je ovo prilika da se još jednom iskaže stav Ministarstva i opredijeljenost za rad u isključivom interesu građana Zeničko-dobojskog kantona.

„Sastanak sam inicirao zbog zabrinutosti građana sa područja koja gravitiraju Vranduku i zaobilaznici, a s obzirom da su sve moje aktivnosti na čelu Ministarstva u interesu građana i usmjerene ka poboljšanju kvaliteta života građana nisam se puno dvoumio oko stava po ovom pitanju. Ministarstvo na čijem sam čelu neće dozvoliti da Sporazum ostane samo mrtvo slovo na papiru, već će kao i do sada blagovremeno preduzeti sve potrebne mjere da sve strane ispoštuju preuzete obaveze“, dodao je ministar Isak. /kraj/

246. POTPISANI UGOVORI ZA MODERNIZACIJU PUT MOŠTRE-VISOKO I IZGRADNJU MOSTA U KRALJEVOJ SUTJESCI



ZENICA, 25.12.2019. - Ministar za prostorno uređenje, promet i komunikacije i zaštitu okoline Zeničko-dobojskog kantona **Arnel Isak** i direktor Kantonalne direkcije za ceste **Rasim Kovač** potpisali su danas sa direktorom firme "Trgošped" d.o.o. Kakanj **Ahmedom Zaimovićem** dva ugovora ukupne vrijednosti 1.579.475,39 KM. Ugovori su potpisani u uredu premijera ZDK **Mirze Ganića**.

Prvi ugovor vrijedan je 1.129.479,13 KM, sa PDV-om, a odnosi se na sanaciju i modernizaciju dijela ceste na dionici Moštre-Visoko na regionalnoj cesti R445 Kakanj-Visoko, koji je u skladu sa Godišnjim planom zaštite, održavanja, rekonstrukcije i izgradnje regionalnih cesta za 2019. godinu potpisan nakon tenderske procedure provedene u skladu sa Zakonom o javnim nabavkama. Ovim projektom je predviđena sanacija pomenute dionice ceste u dužini oko 1.300 metara, a podrazumijeva modernizaciju u skladu sa najvišim standardima u ovoj oblasti gradnje.

"Ovo je jedna od najfrekventnijih saobraćajnica na području Grada Visoko. Zbog toga smo se opredijelili da izgradimo novu saobraćajnicu sa potpuno novim slojem asfalta, a ne da krpimo rupe. Radimo u interesu građana i stvaramo uslove za razvoj ovog područja, jer je dobra putna infrastruktura osnov za privredni razvoj", kazao je premijer Ganić.

Također, potpisan je Okvirni sporazum o uslovima i načinu izvođenja radova izgradnje mosta preko rijeke Trstionice na regionalnoj cesti R466 dionica Čatići-Kraljeva Sutjeska, u općini Kakanj. Vrijednost okvirnog sporazuma je 449.996,26 KM, sa PDV-om.

"Izgradnja ovog mosta dužine 20 metara je specifična i građevinski veoma zahtjevna, jer je potrebno da se most arhitektonski uklopi u kompleks historijskih građevina koje se nalaze u neposrednoj blizini, a to su Franjevački samostan i džamija Sultana Mehmeda Fatiha iz XV vijeka. Zbog toga će se najvećim dijelom u izgradnji mosta koristiti prirodni materijali, kao što je oblaganje ograde mosta kamenom, uz korištenje drugih autohtonih konstruktivnih elemenata i materijala", rekao je ministar Isak. /kraj/



247. PU VISOKO DOBILA PET NOVIH VOZILA: PREMIJER GANIĆ NAJAVIO NOVA ULAGANJA U OPREMANJE I KADROVSKO JAČANJE POLICIJE



VISOKO, 26.12.2019. - Premijer Zeničko-dobojskog kantona **Mirza Ganić** i ministar unutrašnjih poslova Dario Pekić uručili su danas Policijskoj upravi Visoko ključeve pet novih policijskih vozila, čija je nabavka koštala 240.000 KM. Nabavljena su četiri vozila marke "mazda", od čega je jedno za potrebe krim-policije, te jedno kombi vozilo za prijevoz privedenih osoba marke "ford".

"Želim da imate što manje posla, jer je naš interes što bolja sigurnosna situacija. Međutim, znamo da je u Visokom povećana stopa kriminaliteta, a



posebno korištenje opojnih droga, tako da se nadam da će opremanje policije pratiti i bolji rezultati policije u borbi protiv ovih pošasti", kazao je premijer Ganić.



Nabavka novih vozila za potrebe PU Visoko realizirana je u okviru kupovine 15 novih vozila za potrebe policije u ZDK-u, a u narednim danima vozila će biti uručena i drugim organizacionim jedinicama MUP-a.

*"Drago mi je da smo uspjeli završiti postupak nabavke vozila u ovoj godini. Želimo omogućiti našoj policiji najbolje uslove za rad i borbu protiv kriminaliteta", kazao je ministar **Dario Pekić**.*

Policijski komesar **Semir Šut**

zahvalio se Vladi i Ministarstvu unutrašnjih poslova što kontinuirano ulažu u opremanje i kadrovsko jačanje policije u Zeničko-dobojskom kantonu te dodao kako će oprema i nova vozila koja su nabavljena ove godine pomoći da policija odgovori očekivanjima građana i vlasti od policije, koja su svake godine sve veća.

Premijer Ganić je rekao da su u budžetu ZDK za narednu godinu osigurana sredstva za blago povećanje plaća službenicima policije, a iduće godine planirano je i kadrovsko jačanje MUP-a. U prvom kvartalu planirano je raspisivanje konkursa za prijem 100 policajaca i 15 policijskih inspektora, od kojih će jedan broj biti angažiran i u Visokom.

Nakon uručenja vozila, premijer Ganić je posjetio crkvu Svetog Prokopija u Visokom. Obnovu pravoslavnog hrama Vlada ZDK je podržala sa 10.000 KM, a prema riječima premijer, planirano je da se određeni iznos osigura i naredne godine. /kraj/

248. VLADA POVEĆALA IZNOS PODSTICAJA ZA PROIZVODNJU MALINE, KUPINE I ORGANSKE JAGODE

ZENICA, 27.12.2019. -

Vlada Zeničko-dobojskog kantona odobrila je 589.413,00 KM na ime podsticaja za proizvodnju maline i kupine te proizvodnju organske jagode proizvođačima sa područja ovog kantona. U 2019. godini otkupljeno je 1.900.000 kg maline, a proizvođači će dobiti podsticaj u visini od 0,32 KM po kilogramu za fizička lica i 0,40 KM za pravne subjekte.



Programom utroška sredstava za podršku malinarskoj proizvodnji bio je predviđen podsticaj za proizvodnju maline do 25 feninga po kilogramu, ali je nakon prijema aplikacija i dobijenih podataka o otkupljenim količinama donesena odluka o povećanju podsticaja. Po prvi put, razdvojeni su podsticaji za fizička i pravna lica.

*"Smatramo da ćemo tom mjerom zadržati dostignuti nivo proizvodnje u malinarstvu i da će ovo biti vjetar u leđa malinarima da nastave s proizvodnjom maline. Strategijom razvoja ZDK smo definirali cilj da razdvojimo obrte i pravne subjekte od fizičkih lica, kako bismo podstakli fizička lica da se udružuju i jačaju na tržištu", kazao je ministar poljoprivrede, šumarstva i vodoprivrede **Mirnes Bašić**.*

Premijer **Mirza Ganić** je ponovio da je malinarska proizvodnja, uz peradarstvo, strateška proizvodna grana u Zeničko-dobojskom kantonu, u kojoj egzistenciju ostvaruje veliki broj proizvođača, te da je cilj ove vlade sa sačuva lidersku poziciju u proizvodnji maline u Federaciji BiH.

Zbog problema i niske otkupne cijene jedan broj proizvođača je uništio svoje zasade maline, tako da je u 2019. godini došlo do smanjenja proizvodnje.

„Nadam se da će uz ove podsticaje malinarska proizvodnja opstati i dodatno ojačati. Također, nadam se da će se i lokalne zajednice povesti primjerom Vlade ZDK-a i pružiti podsticaj kako bi proizvođači mogli da rade i žive od onoga što proizvode", kazao je Ganić. /kraj/

249. VLADA POMOGLA ZAPOSŁJAVANJE 33 DJECE ŠEHIDA I POGINULIH BORACA



ZENICA, 27.12.2019. - U sjedištu Vlade Zeničko-dobojskog kantona potpisani su ugovori o zapošljavanju i samozapošljavanju 33 djece šehida i poginulih boraca iz ovog kantona. Radi se o zajedničkom projektu Federalnog zavoda za zapošljavanje i Ministarstva za boračka pitanja Zeničko-dobojskog kantona, koji su za ovu namjenu osigurali po 100.000 KM.

"Podsticaj za zapošljavanje iznosi 600 KM, s tim da NK, PK, VK i SSS kadrovi dobijaju podršku šest mjeseci, a VŠ i VSS kadrovi idućih 12 mjeseci. I

*podsticaj za samozapošljavanje iznosi 600 KM u trajanju od 12 mjeseci, s tim da korisnici dobijaju dodatak od 300 KM na ime troškova registracije obrta i djelatnosti", kazao je **Anto Pešić**, direktor Službe za zapošljavanje ZDK, koja je implementirala projekt u ZDK.*

Premijer **Mirza Ganić** je istakao kako je projekt zapošljavanja djece šehida i poginulih boraca kruna ovogodišnjih aktivnosti na zapošljavanju branilačke populacije.

"Nadam se da će ovi mladi ljudi nastaviti raditi i nakon godinu dana, a mi kao vlada na sebe preuzimamo obavezu da nastavimo s programima podrške i pravimo ovakve i slične projekte, dok broj nezaposlenih ne svedemo na nulu", kazao je Ganić.



Ministar za boračka pitanja **Fahrudin Čolaković** podsjetio je da su tokom godine realizirani projekti zapošljavanja i samozapošljavanja gdje su na različite načine zaposlene 273 osobe.

"Ovo su razvojni projekti, ali oni imaju i svoju humanu dimenziju, pogotovo kada se radi o djeci šehida i poginulih boraca prema kojima imamo posebnu obavezu", kazao je Čolaković. /kraj/

250. NOVOGODIŠNJA ČESTITKA PREMIJERA GANIĆA I PREDSJEDAVAJUĆEG HUSKIĆA

ZENICA, 31.12.2019. – Premijer **Mirza Ganić** i predsjedavajući Skupštine Zeničko-dobojskog kantona **Čazim Huskić** uputili su građanima čestitku povodom Nove godine, u kojoj se kaže:



"Dragi građani,

u ime institucija Zeničko-dobojskog kantona i u lično ime, svima vama od srca želimo sretnu i uspješnu 2020. godinu, uz želju da Novu godinu dočekate u zdravlju, miru i radosti, sa optimizmom i nadom u vedriju i ljepšu budućnost.

Iza nas je godina u kojoj smo na svim poljima pokrenuli procese s ciljem stvaranja boljeg ambijenta za život i rad u Zeničko-dobojskom kantonu. Uvjereni smo da ćemo u 2020. godini ubirati plodove našeg rada, pokrenuti javne radove i realizirati velike projekte te da će iduća godina donijeti opći prosperitet za Zeničko-dobojski kanton i njegove građane. Iskreno vjerujemo da će naša domovina Bosna i Hercegovina, napraviti iskorak na putu ka Evropskoj uniji i NATO-u.

Napredak je moguć jedino ako se svi posvetimo postavljenim ciljevima, a rad, posvećenost, uvažavanje i poštovanje budu vrijednosti koje nas ujedinjuju i spajaju. Na kraju, još jednom vam čestitamo Novu 2020. godinu, a posebne čestitke upućujemo radnicima dežurnih službi koji će, umjesto s porodicama i prijateljima, novogodišnju noć provesti na radnim mjestima."

PRESS SLUŽBA ZDK